



67

BIBLIOTECA NAZ.  
Vittorio Emanuele III

**XVII**

**B**

**44**

**NAPOLI**



1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810

1810



# MEMOIRES D'ESTAT.

*P A R :*

MONSIEVR DE VILLEROY,  
Conseiller d'Estat, & Secretaire des  
commandemens des Rois Charles  
IX. Henry III. Henry IV. & de  
Louis XIII. à present regnant.



A PARIS,  
Par la Compagnie des Libraires  
du Palais.

---

M. DC. LXV.

251152-11-11

7192233

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11

11/11/11


11/11/11

11/11/11


11/11/11



## AVANT-PROPOS.

 *Es Memoires ont esté faits & dressez par feu Monsieur de Villeroy, lors que durant les guerres de la Ligue, la necessité des affaires le portoit aux negociations pour remettre l'Estat en paix, & les peuples reuoltez en obeïssance, témoins irreprochables de sa fidelité & de ses seruices, qui ont eu si bon succez, que la France en a reçu tout contentement. Au lieu de cét eschantillon, s'il eust laissé toute la piece, le public luy en eust esté grandement obligé. Car il faut aduoüer franchement qu'il n'appartient qu'aux Secretaires d'Estat à faire l'Histoire, lesquels ont veu, sçeu & connu les secrets de l'Estat, les Conseils du Prince, & les af-*

faïres du Royaume. La connoissance de leurs escrits & discours, assaisonnez par diuers âges & experiences, apprennent les nouuelles du monde, les moyens de s'y conduire, & la voye pour en sortir. Ce qui veritablement se reconnoist par ces Memoires, lesquels il auoit adressé à Monsieur de Belieure Chancelier de France, & à Monsieur le President Ianin, pour estre seuls témoins de ses actions & deportemens, sans les vouloir donner au public. Pour moy i'ay crû, avec le iugement de mes amis, que ce seroit vne trop grande perte de les taire & supprimer, tant pour l'utilité que le general & particulier en pourra receuoir, que pour rendre l'honneur à ce grand Personnage, lequel par sa fidelité, merites & seruices, a obligé toute la France à sa memoire. Cette consideration m'a porté à ce dessein.



*TABLE DES PIÈCES*  
*contenues en ce premier Volume*  
*des Memoires d'Estat.*

<b>L</b> E T T R E de Monsieur de Dunes à M. de Villeroy.	page 71
<b>P</b> romesse écrite de la propre main de sa Majesté.	107
<b>A</b> p o l o g i e & Discours de Monsieur de Ville- roy, pour monstrier la peine qu'il a pris de faire la paix entre le Roy & Monsieur de Mayenne.	114
<b>A</b> d u i s de Monsieur de Villeroy à M. le Duc de Mayenne, publié à Paris apres la mort du Roy, sur la fin de l'an 1599.	408
<b>H</b> a r a n g u e faites par Monsieur de Villeroy pour estre prononcée en l'assemblée des pretendus Estats de Paris, l'année mil cinq cens quatre-vingt treize.	445
<b>L</b> e t t r e de M. de Villeroy à M. de Mayenne du 20. iour de l'an 1594.	516
<b>L</b> e t t r e de M. de Villeroy à M. de Bellicure, du 17. Mars 1596.	519
<b>M</b> a n i f e s t e de M. de Villeroy, sur l'evasion de l'Hoste son Commis. 1604.	525

1877 - 1878

1879 - 1880

1881 - 1882

1883 - 1884

1885 - 1886

1887 - 1888

1889 - 1890

1891 - 1892

1893 - 1894

1895 - 1896

1897 - 1898

1899 - 1900

1901 - 1902

1903 - 1904

1905 - 1906

1907 - 1908

1909 - 1910

1911 - 1912



# MEMOIRES

## D'ESTAT.



LE plus grand contentement que puisse auoir vn homme de bien, apres celuy que luy rend sa conscience, lequel ne luy peut estre osté, & d'estre tenu pour tel qu'il est, & principalement de ceux ausquels il a vouié amitié & seruice. Nous voyons peu de personnes en ce Royaume auoir iouï de ce bien-là depuis ce regne, tant a esté grande la corruption des bonnes mœurs, & la porte ouuerte à la calomnie : & plus que les autres, les Courtisans en ont esté priuez, & spécialement ceux qui ont esté employez aux affaires publiques, & ont voulu suiure & executer fidelement & rondement les commandemens du Roy; soit qu'ils ne s'en soient rendus dignes, ou qu'ils ayent porté le blasme & l'enuie des choses qui ont esté faites, lesquelles ont esté plus souuent condamnées qu'approuuées, à cause de nos diuisions & partialitez, & des vexations & surcharges publiques, qui ont esté

mesurées aux causes & fins motiues d'icelles, mais plustost au poids de nos passions, ou du mal que nous en auons receu; car comme le Roy a esté contraint, ou bien a voulu quelquefois changer de chemin & de resolution en la conduite de ses affaires, ceux auxquels tels changemens ont dépleu & porté dommage, ont accusé les Ministres & seruiteurs de la Majesté, de legereté, d'imprudence, mesmes d'infidelité: les Huguenots les ont appelez Guisards & pensionnaires d'Espagne, & les autres, fauteurs d'Heretiques & Politiques, & pouuons dire qu'il n'y a celuy pour droit qu'il aye cheminé, qui aye pû éuiter qu'il n'ait esté dépeint de l'vne desdites couleurs, & de plusieurs autres encore: ce qui a plus appresté à parler aux detracteurs, qu'il n'a troublé la conscience des gens de bien.

CAR la verité console & assure assez d'elle-mesme celuy qui s'y confie: mais à present que la violence de nos troubles a forcé plusieurs personnes de changer de route, ceux qui courent telle fortune, qui sont soigneux de leur honneur, & de conseruer leurs amis, doiuent les esclaircir des raisons qui les ont poussez à ce faire, afin de ne leur donner occasion de changer la bonne opinion qu'ils auoient conceuë d'eux, laquelle a deu estre le principal fondement de leur amitié, d'autant qu'il est impossible que nous aymions bien celuy que nous n'estimons.

C'EST pourquoy me trouuant, par la volonté de Dieu, du nombre de ceux qui ont changé de place, plus desirux de viure en la



# D' E S T A T.

bonne opinion des hommes, & par ce moyen  
conferuer mon honneur & mes amis plus que  
ma propre vie, i'ay estimé leur deuoir repre-  
senter les choses qui me sont aduenues, & en  
ce faisant les rendre iuges de ma procedure,  
ce que ie feray le plus succinctement qu'il  
ne sera possible: mais ie les exhorte & prie  
de croire que ie ne leur diray rien qui ne soit  
tres-veritable, & que ie ne verifie & preuue  
par écrit, ou autrement quand besoin sera:  
mes actions ont esté aussi si publiques, que  
quand ie voudrois les déguiser, c'est chose qui  
ne seroit tres-difficile.

I' E V cét honneur, quoy qu'indignement,  
mais fauorisé de la protection de la feüe Rey-  
e Mere du Roy, que Dieu absolue, & des ser-  
uices tres recommandables que feu Monsieur  
de l'Aubespine, mon beau-pere auoit rendus à  
sa Majesté, d'estre pourueu à l'âge de vingt-  
cinq ans, par le feu Roy Charles mon pre-  
mier Maistre, de l'Office de Secretaire d'E-  
stat, qu'exerçoit ledit feu sieur de l'Aubespine,  
par la resignation qu'il m'en fit à sa suruiuan-  
ce, le vingt-cinquième iour du mois d'Octo-  
bre 1567. Mes Lettres furent seellées par feu  
Monsieur de l'Hospital Chancelier de Fran-  
ce, auquel feu M. de Moruillier prit la peine  
de les presenter, & le iour mesme feu mondit  
sieur de l'Aubespine tomba malade dans le  
chasteau du Louure où il estoit logé, de la-  
quelle maladie il trépassa l'onzième Nouem-  
bre, qui fut le lendemain que la bataille fut  
donnée entre Paris & S. Denis, en laquelle  
Monsieur le Connestable Anne de Mont-

morency fut blessé à mort.

I E commençay dès le lendemain à exercer ledit Office, & y ay depuis vacqué continuellement & sans intermission durant le Regne dudit feu Roy Charles : si ç'a esté avec sa bonne grace & son contentement, i'en appelle à tés-moin ceux qui ont vescu & suiuy la Cour de ce temps-là, lesquels ont pû sçauoir la fiance qu'il auoit en moy, & la bonne volenté qu'il me portoit; laquelle veritablement procedoit plus de sa bonté, qui estoit infinie, que de mon merite; estant certain que tout le bien que ie faisois lors au seruice de sa Majesté, ne procedoit de mon industrie: mais de l'instruction & des bons records que ie tirois iournellement de feuz Messieurs de Moruillier & de Limoges, lesquels auoient tres-grande experience & connoissance des affaires du monde, & ne pensoient iour & nuict qu'à procurer le bien du Roy & du Royaume, comme ils ont fait tant qu'ils ont vescu; & neantmoins telle communication & la couuersation que nous auions ensemble, en laquelle Messieurs des Fises, Brussart & Pinard estoient aussi ordinaires, ne peut estre exempté d'enuie, & de jalousie, spécialement apres l'aduenement du Roy à la Couronne, que ceux qui auoient deuant les yeux la gloire de Dieu, l'honneur du Roy, & le bien public du Royaume, eurent bien-tost pour contraire, les autres qui vouloient s'auancer à quelque prix que ce fust: dequoy led. Euesque de Limoges commença à sentir & receuoir les effects aux premiers Estats de Blois, qui fut

renuoyé en sa maison sans exprimer les causes de son bannissement, ny luy donner lieu de s'en justifier.

IE n'ay delibéré de rendre compte par le present Memoire de toutes mes actions, ce seroit chose tedieuse, ie me contenteray seulement de représenter celles qui ont seruy d'argument à quelques-vns de me calomnier, pour esclaircir ceux qui le liront de la verité d'icelle, à la charge de respondre tousiours aux autres quand il en sera besoin, à quoy ie me souûmers & oblige de tres-bon cœur.

PARTANT ie commenceray par le voyage que ie fis en Languedoc deuant le dedens du Roy Charles, pour respondre à ceux qui ont voulu croire & publier que i'auois eu charge dudit Roy partant d'auprès de luy, de faire attenter à la personne de Monsieur Duc de Montmorency, qui portoit lors le nom de Damville, sous couleur de luy parler de paix: car c'est vne imposture tres-vraye, plus ny moins que l'accusation, que l'on a eue depuis auoir esté faite par vn nommé ..... contre Monsieur de Villequier & moy, lequel fut executé par le commandement dudit Duc, lors que le Roy fut en Auignon l'an mil cinq cens soixante & quinze.

IE fus depeesché audit pays de Languedoc par feu Monsieur de S. Sulpice, Super-Intendant de la maison de feu Monseigneur le Duc d'Alençon frere du Roy, exprés pour essayer de composer les troubles qui estoient entreteus audit pays, ou en quelques autres Provinces de ce Royaume par les Huguenots,

sur les aduis que ledit Duc de Montmorency Gouverneur dudit Pays, auoit donnez au Roy & à la Reine sa Mere, qu'il auoit moyen d'y pouruoir par cette voye-là: mais il ne fut iamais à nostre puissance de passer plus auant qu'Auignon, ny de voir ledit Duc, quelque deuoir & sollicitation que nous en fissions, & nous ne pouuions traiter avec les autres, & avec luy; parce que nostre commission s'adressoit à luy, il s'excusoit sur les affaires qu'il auoit ailleurs; mesmes nous découurismes bien-tost qu'il attendoit quelque nouveau mouuement à la Cour, qu'il estimoit reüssir tout autrement qu'il n'aduint.

CAR vn mois apres nostre arriuée en ladite ville d'Auignon, nous receûmes la nouvelle de la prison de feu Monsieur le Duc de Montmorency son frere, & de feu Monsieur le Marechal de Cossé, laquelle nous fut apportée par le feu Comte de Martinengue, avec Commission seellée du grand seau, & commandement de sa Majesté, par lettre es-crite de sa propre main, de nous saisir de la personne dudit Duc de Montmorency, que sa Majesté nous mandoit tremper bien auant aux entreprises de feu son frere, aupres duquel sa Majesté pensoit que nous fussions, & d'aduertir les Gouverneurs & Capitaines, Consuls, manans & habitans des villes de son Gouvernement: & particulierement les bandes Corfes qui estoient en garnison en icelles, de ne le reconnoistre plus pour Gouverneur, ny luy rendre obeïssance.

LE DIT sieur saint Sulpice & moy fusmes

res-estimez de ce commandement, non tant pour le regard du mécontentement que le Roy nous mandoit auoir dudit Duc, d'autant que nous auions decouuert plusieurs choses qui nous auoient donné occasion de nous dé-her d'iceluy. Mais dequoy sa Majesté, laquelle nous auoit choisis & enuoyez deuers ledit sieur Marechal, exprez pour parler de paix, nous commandoit-il de nous saisir de sa personne, au milieu de son Gouvernement & de ses forces, n'y ayant aucune apparence de raison, d'espérer que ce fust chose que nous eussions effectuer, quand mesmes nous nous eussions trouuez aupres de luy, n'ayant forces ny moyens quelconques pour ce faire; de sorte que nous fusmes tres-aïses de ce que ledit Martinerique nous auoit encore trouuez en ladite ville d'Avignon, & est certain que si nous eussions esté aupres dudit sieur Marechal, qu'il luy esté tres-facile de nous faire le traitement, duquel l'on nous vouloit faire ministres en son endroit.

PAR QUOY nous nous resolûmes bien-est de nous contenter de pouruoir au second chef de ladite charge que l'on nous donnoit par ladite depêche, dont à la verité nous fîmes peine de nous acquitter avec toute vigilance & fidelité, & nous succeda assez heureusement par la bonne assistance & correspondance que nous tirâmes de feuz Messieurs le Cardinal d'Armagnac, du Duc d'Vendôme, & du sieur de Joyeuse à present Marechal de France: & des feuz sieurs de Suze, de Quercy, de Maugiron, de Quelus, & du sieur

de Rieux, ensemble desd. Corfes, & des Officiers & habitans des villes principales dudit Gouvernement; dequoy les effets eussent encore esté plus grands, n'eust esté que ledit Duc de Montmorency fut aduerty aussi-tost que nous de l'emprisonnement de sondit Frere, & du commandement que sadite Majesté nous auoit adressée, par les bons amis qu'il auoit en Cour & en la ville d'Auignon.

C E L A fait, & voyant que nostre plus longue presence & demeure en ladite ville d'Auignon estoit inutile au seruice du Roy, ledit sieur S. Sulpice & moy prîmes resolution de renenir trouuer leurs Majestez par l'aduis desdits sieurs. Mais nous trouuâmes à nostre retour que le feu Roy Charles estoit decédé, à nostre grand mal-heur & regret, & de toute la France, voire de toute la Chrestienté qui ne deuoit pour la gloire de Dieu & le bien vniuersel d'icelle, estre si-tost priuée de la vertu, presence & assistance d'un Prince si magnanime, equitable & bon qu'estoit ledit Roy, qui estoit aussi tant obey, honoré & aimé de tous ses seruiteurs, qu'il n'y a que la seule mort qui puisse effacer de leurs cœurs sa tres-heureuse & chere memoire.

S I Sa Majesté eust commandé audit sieur de S. Sulpice, & à moy, partant d'aupres d'elle, de prendre le Duc, ou le faire tuer comme l'on a dit, nous ne nous fussions arrestez si longuement que nous fîmes par les chemins, ny en ladite ville d'Auignon, sur les difficultez & remises que ledit Duc faisoit de nous voir: n'y n'eussions attendu que les

nouvelles de la prise de son frere luy eust  
 decouvert l'intention de sa Majesté : pareille-  
 ment nous ne fussions partis de la Cour sans  
 voir clair, & estre bien asseurez des moyens  
 avec lesquels nous eussions pû executer tel  
 commandement : d'autre-part il n'eust esté  
 besoin que le Roy nous eust enuoyé vne nou-  
 velle Commission pour prendre ledit Duc,  
 comme il nous enuoya par ledit Martinen-  
 gue; car nous ne fussions partis de la Cour  
 sans estre garnis d'un bon pouuoir pour ce  
 faire : plus ie diray que nous estions instru-  
 ments tres-mal propres pour executer vne telle  
 entreprise; led. Martinengue auquel on disoit  
 que le Roy en auoit depuis donné la char-  
 ge, estoit bien plus propre pour ce faire que  
 nous n'estions. Or i'ay en main plusieurs let-  
 tres, memoires & papiers que ie represente-  
 ray tousiours, où il sera besoin, qui font foy  
 certaine de la verité dudit fait.

**Q**UANT à la premiere pretendiie accusa-  
 tion & charge dudit ..... qui portoit que  
 Monsieur de Villequier & moy, l'auions de-  
 taché exprez pour empoisonner ledit Duc,  
 ainsi qu'il manda à sa Majesté par du Belloy,  
 lors qu'elle estoit en Auignon, c'est chose qui  
 fut reconniie tres-mensongere par la seule le-  
 ctüre de la deposition, qui contient plusieurs  
 iustices tres-claires & faciles à prouuer :  
 toutefois i'offris pour la décharge & iustifi-  
 cation dudit sieur de Villequier, qui estoit  
 lors en sa maison, & de la mienne, d'aller  
 trouuer ledit Duc, répondre à ladite accusa-  
 tion, & estre confronté audit .....

Mais il se trouua si animé d'icelle contre luy, qu'il le fit executer aux flambeaux, sans attendre la réponse de sadite Majesté, qui luy pouuoit estre apportée en vn ou deux iours au plus.

A P R E S le deceds du feu Roy, ie fus enuoyé par ladite Dame Reine sa Mere, en la compagnie de Monsieur de Cheuerny, à present Chancelier de France, de feu Monsieur de Sauue, au deuant du Roy, lequel nous trouuafmes à Thurin, il nous receut tres-humainement, & me fit en particulier, certainement plus d'honneur & de bonne chere, qu'aucuns n'esperoient ny desiroient, se ressouenant de la bonne volonté que le feu Roy son frere m'auoit portée, & de la recommandation qu'autrefois il luy auoit faite de moy, qui auois receu de luy auparauant qu'il fust Roy en cette consideration, & de sa bonté toute assistance, faueur & protection.

L E Roy estant arriué à Lyon, fut conseillé par quelques-vns de faire deux choses, entre les autres, qui ont depuis engendré beaucoup de maux : l'vne fut l'ouuerture des acquits des deniers contans, mis és mains ou coffres du Roy : l'autre, le changement de la forme ancienne des expéditions des dons & bien-faits, sur ce qu'on luy fit entendre, qu'il n'estoit pas raisonnable que ses Officiers controllassent ses volonteiz & commandemens, comme ils faisoient du temps du feu Roy son frere, lequel à la verité se reposoit grandement sur leur deuoir & fidelité, pour l'administration de ses finances, & execution de ses



commandemens, dont aussi ils estoient responsables du tout : ce qui estoit cause qu'ils y verseroient plus religieusement & loyalement, comme l'on a mieux connu & experimenté depuis : car la facilité & couverture desdits comptables a engendré tant de sortes de concussions, larcins, dons immenses, & dépenses mal employées, que ie ne pense point qu'il y ait rien qui ait tant fait de tort au Roy, ny destruit le Royaume que cela, comme a fait aussi la nouvelle forme de presenter & expedier lesdits dons ; parce que n'estans par icelle permis aux Princes & Seigneurs de qualité, de parler au Roy pour autres que pour eux, comme ils souloient faire de tout temps auparavant, cela les auoit grandement indignez & mal contentez, & auoient tellement chargé, voire accablé d'enuie, ceux qui estoient auprès de sa personne, qu'une grande partie de nos troubles en sont adueus. Dauantage, au lieu de retrancher par ladite forme les abus que l'on disoit que les secretaires ou leurs Commis y faisoient, elle leur rendit les moyens de ce faire plus faciles : car deuant ils estoient responsables des expéditions qu'ils faisoient, & n'eussent osé signer vne contraire ausdites Ordonnances & Reglemens du Roy, sans courir le hazard d'un chastiment & reproche : dequoy ils furent deschargez par ce nouuel ordre, d'autant qu'il leur estoit enjoint par iceluy, de signer & expedier sans difficulté, tout ce que le Roy auroit vne fois accordé par placet né de sa main ; ce qui ouurit la porte à

plusieurs surprises: Et me souuient qu'un iour le Comte d'Escars m'apporta vn placet qu'il auoit fait signer au Roy; par lequel sa Majesté luy auoit accordé, qu'il seroit imposé & leué sur les habitans de ses terres la solde de certain nombre de soldats qu'il disoit vouloir employer à la garde de ses Chasteaux, que ie fis difficulté d'expedier, parce que l'on n'auoit encore commencé à faire garder les maisons des particuliers aux despens du peuple: dequoy il s'alla plaindre; de façon que i'en receus vne grande reprimande, & me fut dit, que ie voulois controller les commandemens du Roy, que c'estoit chose que l'on ne vouloit plus que mes compagnons & moy fissions, ains que nous eussions à dépêcher promptement tout ce qui nous apparoiroit par placet, signé de la main de sa Majesté, & auoir par elle esté accordé, nous contentant de retenir & garder le placet pour nostre discharge, sans entrer à l'aduenir plus auant en connoissance de cause: ce qui a esté par moy, comme par mesdits compagnons, suiuy depuis; de façon que ie ne voudrois répondre des expéditions que i'ay faites depuis ledit commandement: chose certainement que ie ne faisois difficulté de faire en toutes celles que i'ay signées du temps du feu Roy Charles, lequel à l'exemple de ses predecesseurs, ne disoit iamais non, à ceux qui luy demandoient quelque chose, aussi il ne leur accordoit d'abord leur demande, ains il commandoit de bailler leur placet à l'un de ses Secretaires, qui estoit tenu d'en refuser à la partie

l'expedition, ou à celuy qui auoit parlé pour elle, si la demande estoit trouuée contraire aux Ordonnances & Reglemens de sadite Majesté; sinon il employoit & couchoit ladite demande sur vn rolle qui estoit apres rapporté, & leu à sadite Majesté en la presence de la Reine sa mere, & d'autres qu'elle y vouloit appeller, ou elle en ordonnoit à sa volonté, en signant ledit rolle, qui seruoit apres de descharge audit Secretaire, & de témoignage Monsieur le Chancelier, du commandement de sadite Majesté.

CERTAINEMENT ceux-là ont esté tres-ages, qui ont dit, qu'il ne falloit legerement changer les loix & formes qui sont en vsage en vn Royaume, parce que tels changemens effacent souuent autant qu'ils edifient: joint que l'on ne reconnoist ordinairement les inueniens d'une loy, que par l'experience icelle, & que toutes choses, pour bien ordonnées qu'elles soient, sont sujettes à deprauation & corruption: de maniere que i'estois en de l'aduis de ceux qui disent, qu'il faut iustost corriger les abus d'une loy depraüée, & mal obseruée, que de l'innouer ou changer; specialement quand il est question de chose qui touche à plusieurs, & mesmes aux grands, lesquels vn Prince bien aduisé doit entretenir de tout son pouuoir, comme il se fait facilement, quand il ne communiquera au moindre qu'eux, sans grande raison, ce que la Nature & les anciennes Loix & Constitutions leur ont affectée: Et s'il aduenoit qu'aucuns d'eux en abusassent au dommage du Roy,

ie dis qu'il seroit plus expedient pour le bien du Prince & du Royaume, faire chastier par Iustice ceux-là, que de les priver de leurs droits & préeminences; l'entends bien que l'on a dit, que lesdits Princes & Grands acqueroient des subjets & Officiers du Roy pour seruiteurs, & les obligeoient aux despens de sa Majesté, quand il leur estoit loisible d'interceder pour eux. Mais considerons si par cette nouvelle forme, sa Majesté a esté depuis plus fidellement seruie qu'elle n'estoit, & si lesdits Princes ont eu moins de cliens & seruiteurs, ie ne dis pas à la suite de la Cour, où chacun idolatre la faueur; mais dedans le Royaume, quand il a esté question de remuer mesnage: l'on trouuera que les changemens ont plustost enflé leur suite qu'ils n'ont seruy à la retrancher.

IE fus employé à traiter la paix qui fut faite avec le Roy de Nauarre l'an mil cinq cens soixante & dix-sept, & fis ce que ie pû pour en estre excusé, tant parce que le Roy auoit protesté & déclaré quelque mois deuant en la ville de Blois, y estant les Estats assemblez, qu'il ne feroit iamais paix avec les Huguenots, s'ils n'accordoient de viure en ce Royaume, sans iouïr de l'exercice de leur Religion: Et si par necessité, mauuais conseil ou autrement il en accordoit vn autre, qu'il vouloit & entendoit qu'eux & leurs compagnons sceussent que c'estoit contre ses commandemens & volonté, & partant qu'il ne l'observeroit point, afin que l'on n'en fist plus d'estat, & que parce que plusieurs esti-

noient que l'on auoit donné congé à l'Euefque de Limoges feulement, parce qu'il auoit affifté la Reine Mere du Roy en la paix qu'elle auoit pourfuiuie, & faite auparauant avec feu Monsieur, en laquelle ie fçauois qu'il auoit feruy en homme de bien.

N O N O B S T A N T mes excuses, le Roy me commanda d'entreprendre ladite negociation, & me dit qu'il ne vouloit rien accorder de contraire à fa declaration, mais qu'il se promettoit que lefdits Huguenots accepteroient la paix, fans auoir ledit exercice, & de fait ie fçay quelques-vns qui abusoient ladite Majesté, ou connoiffoient tres-mal lefdits Huguenots, luy en donnant esperance; & croy certainement que telle estoit lors l'intention de ladite Majesté, laquelle auffi ne me donna autre charge, m'y depéchant, que d'y faire refoudre le Roy de Nauarre & ceux de la Religion.

A Q V O Y ie les trouuay tres-contraires, jaçoit qu'ils fussent alors tres-foibles & mal-menez, mais ils commençoient à se promettre que feu mondit fleur frere du Roy, qui conduisoit l'armée de sa Majesté, & leur faisoit la guerre, se lasseroit bien-toft de ce faire: chatoüillé, & diuerty des esperances & recherches qu'on luy representoit de la part de ceux de Hainault, où il ne tarda gueres apres de s'acheminer.

C E qui fut cause que sa Majesté se resolut d'auancer la conclusion de ladite paix avec ledit Roy de Nauarre, parce qu'elle estimoit que lefdits Huguenots seroient plus dif-

faciles à contenter, quand ils verroient que mondit Seigneur se seroit separé de sadite Majesté, en la poursuite d'icelle, comme certainement il aduint : & toutefois le Roy fut si bien seruy en cette negociation, que ceux auxquels il en confia la principale conduite, n'y employèrent toute la matiere qu'elle y auoit destinée, & en rapporterent de reste, de quoy elle monstra estre tres-contente.

C O M M E elle fit aussi de l'autre traité que Monsieur de Believre & moy fismes aupres de feu mondit sieur, avec le Roy de Nauarre au lieu de Flex, où sa Majesté fut aussi tres-fidellement seruie, comme il me sera tousiours tres-facile de faire paroistre par escrit ou autrement à qui en doutera.

I E croy fermement que les Catholiques de ce Royaume, eussent à la fin receu vn notable aduantage de l'obseruation desdits traittez, si les choses qui se passoient à la Cour n'eussent réueillé & alteré les esprits des Grands, qui supportoient impatiemment l'autorité & puissance que l'on auoit donné à moindre qu'eux, & qui craignoient qu'il ne leur en arriuaist encore pis à l'aduenir.

I E ne diray point ce qui se faisoit à la Cour, car chacun l'a sceu, & en estois aussi absent, il y auoit huit mois quand les troubles commencerent : Ie diray seulement deux choses; la premiere, que i'ay tousiours esté obseruateur si entier des commendemens & volonteiz du Roy, que l'on ne trouuera point que i'aye fait depêche, ny refusé ausdits Huguenots aucune expedition contraire

paix que sa Majesté leur auoit accordée, & qu'elle a duré; bien ay-ie empêché de mon pouuoir qu'ils n'ayent élargy la troye, & obtenu de sa Majesté plus que Edits ou Articles pour mal-faits qu'ils n'en eussent portoit; & ose dire m'y estre rapporté si loyalement, que les Deputez du pays de Nauarre & desdits Huguenots, n'ont eu occasion de s'en plaindre: l'autre, que si ceux qui estoient demeurez aupres de sa Majesté durant mon indisposition qui m'en tenoit absent, eussent tenu la main que les gens de guerre de cheual & de pied, que le Roy auoit au commencement de l'année départis dans ses Prouinces, eussent continué à estre entretenus & payez suiuant les reglemens qu'elle auoit faits, il eust esté tres-difficile de trouuer son Royaume, comme l'on fit: dequoy ie suis contraint d'accuser ceux qui ont renuersé les anciennes maximes de nos peres, au deuiement des affaires de ce Royaume, qui estoient que les dépenses necessaires pour la conservation d'icelle, & principalement celles des garnisons & de la gendarmerie, fussent assignées & payées par preference à toutes autres.

Ie fus accusé par Salcede d'auoir projeté & fait certains desseins avec feu Monsieur de Guise, & quelques autres, pour troubler le Royaume, par le moyen du Roy de Suede & ses Ministres: & combien que sa deposition fust jugée pour ce qui me concernoit superflue & impertinente, & peu vray-semblable par son simple & nue lecture d'icelle: toutefois ie

fis grande instance au Roy & à mes bons amis, à ce que ie fusse représenté, recollé, & confronté audit Salcede, deslors que l'on trauail-  
la à son procez. Mais parce que sa Majesté declaroit estre éclaircie, & bien assurée de mon innocence, & aussi que ledit Salcede à son attriuee & premiere interrogatoire, declara & soustint que tout ce qu'il auoit depose estoit faux, & que l'on luy auoit fait dire iusques au iour qu'il fut gehenné & executé: ie me remis à sa Majesté à en vser ainsi qu'il luy plairoit, & fis si peu de conte de toute cette poursuite, me confians en Dieu, & en mon innocence, que ie ne fis aucune recommandation aux Iuges ny à autres, & me contentay d'en attendre le iugement tel qu'ils ordonneroient. Je iure & proteste aussi, & appelle Dieu & ses Anges à témoin, suppliant sa diuine Iustice, que son ire soit sur moy, & sur mes enfans à jamais, si ie dis chose qui ne soit tres-veritable: c'est que ie ne parlay jamais qu'une fois audit Salcede, qui fut lors que Monsieur de Carrouges Gouverneur de Normandie, donna main forte à l'execution d'un Arrest de la Cour de Parlement de Roien contre ledit Salcede, pour forfaits par luy commis, lors qu'une maison qu'il auoit en Normandie fut saisie, que ledit Salcede s'enfuit à Paris, où estoit Monsieur le Duc de Lorraine, qui me fit commandement par le Roy, d'écrire une lettre en son nom audit sieur de Courrouges, pour faire sortir de ladite maison les gens de guerre qu'il y auoit mis, d'autant que ledit Salcede offroit se rendre



monnier entre les mains du grand Preuost, & se iustifier de ce dont on le poursuivoit, ledit Salcede me vint demander ladite lettre, laquelle ie luy refusay, parce qu'il me des propos dudit sieur de Carrouges, iniques de sa preud'hommie & vertu, conuie chacun, & de sa dignité: de sorte qu'il dit que mondit sieur le Duc de Lorraine quel i'en fis plainte, comme i'auois fait au Roy, me fist faire vn commandement par sa Majesté, laquelle ledit Sarcede se garda de venir querir luy-mesme; Mais mondit sieur le Duc de Lorraine y enuoya vn des seigneurs qui s'en chargea, & ledit Salcede qui ne vouloit que tromper le Roy, & eluder la Justice, s'absenta de la Cour contre ce qu'il avoit promis, soudain qu'il eut tiré ladite lettre, ayant decouvert que ledit sieur de Carrouges & le Parlement auoient enuoyé à sa Majesté les charges sur lesquelles ils l'auoient condamné, qui fut cause que sa Majesté me commanda deux ou trois iours apres de reuoker ladite lettre, par vne nouvelle, adressée audit sieur de Carrouges, qui fut soudain depeschée & enuoyée. Voila en verité toute la connoissance que i'ay iamais eüe dudit Salcede, & que ie n'auois veu deuant, i'ay veu depuis aucunement; & pour plus grande iustification de mon innocence en cét endroit, ie m'en remets au procez dudit Salcede, & à son iugement, & prie Dieu de tout son cœur me rendre le plus miserable homme qui viue sur la terre s'il me connoist coulable, directement ou indirectement, en

tout ou en partie de ladite accusation.

I'ESTOIS aux champs malade, il y auoit huit iours, comme i'ay commencé à dire, quand la guerre & la Ligue commença, l'an mille cinq cens quatre-vingt-cinq, ie me rendis aussi-tost auprès du Roy à Paris, ayant encore la fièvre, où ie seruis sa Majesté en homme de bien, & confesse que ie ne fus jamais si outré de douleur & d'affliction, que ie fus de ce remuement, lequel ie ne m'attendois pas voir arriuer durant la vie du Roy, comme ie croy aussi qu'il ne fust aduenu si sa Majesté eust esté bien assistée & seruie; ie veux dire si ses seruiteurs & officiers plus redeuables eussent eu seulement autant de soin de son seruice que de leurs affaires priuées, que la resolution de la leuée des Suisses, dont sa Majesté fut secourüe tres à propos, & l'auancement de la venuë d'icelle, sans laquelle ses affaires se fussent tres-mal portées, rendront témoignage à la posterité de la fidelité du sieur de Fleury, mon beau-frere, qui estoit lors son Ambassadeur en Suisse, comme fera ledit sieur Fleury, du bon deuoir que ie fis de l'en solliciter avec Monsieur de Believre, & les gens de bien qui estoient prez sa Majesté: si elle eust esté seruie en toutes autres choses aussi diligemment qu'elle fut en cette-cy, elle eust fait la paix plus à son aduantage qu'elle ne fit.

SA Majesté voulut m'enuoyer à Espernay deuant la Reine sa Mere, lors que l'on estoit quasi sur la conclusion du Traitté de ladite paix qui y fut faite: ie n'en diray l'occasion,

ce que ce ne sont choses à diuulguer, moins  
moy que par vn autre; mais ie desire bien  
l'on sçache que ce fut contre mon aduies  
ie fis ce voyage, comme ie puis monstrier  
lettre escrite de la propre main de sa Ma-

N o n pour cela que ie veuille faire croi-  
re i'aye esté contraire à ladite paix, car  
s'en faut que cela ait esté, que i'aduouie  
r esté de ceux qui ont conseillé à sa Ma-  
de reünir à soy tous les Catholiques, par  
les moyens possibles, & plütoſt faire la  
re fort & ferme aufdits Huguenots, qui  
esté les premiers autheurs de nos diui-  
s, que souffrir former en son Royaume  
party composé de Catholiques separé d'el-  
meu premierement de l'affection tres-  
nde que i'ay tousiours connu que le Roy  
oit à nostre Religion, de son inclination  
ir mortellement les heretiques, n'ayant  
ues receu de luy commandement, par le-  
ie me fois apperceu qu'elle les aye voulu  
riser ny espargner, quoy que l'on aye  
lié: ce que ne diray de tous ceux qui  
ient part aupres de sa Majesté: meu aussi  
euoir de ma conscience, & du zele à no-  
ite Religion (que i'ay tousiours eu, &  
i'auray tant que viuray si Dieu plaist) qui  
eu plus de pouuoir sur moy, que toute  
e chose, & finalement de la crainte que  
ois de voir arriuer ce que nous sentons  
tenant, par vn desespoir de reconcilia-  
des Chefs des Catholiques separez de sa  
esté, preuoyant avec Monsieur de Belie

vre, que quand cela arriueroit, ce seroit la ruine du Royaume, & vn grand affoiblissement de nostre Religion, comme nous sommes prests d'éprouuer au grand regret des gens de bien.

C'A esté le sujet & la cause des Conseils retenus & timides que l'on a publié que ledit sieur de Believre & moy, donnions quelquefois à sa Majesté, quand il estoit question de pouruoir au mécontentement qu'elle auoit desdits Chefs.

P L E V S T à Dieu que ceux qui ont meu ou conseillé sa Majesté à faire ce qui s'est exécuté à Blois contre Messieurs les Cardinal & Duc de Guise, eussent esté aussi timides & apprehensifs, que ie confesse auoir esté toutes & quantesfois qu'il a esté parlé d'vser de violence, & appliquer le cautere aux malades de ce Royaume, peut-estre qu'ils eussent fait à sa Majesté vn seruice, duquel avec le temps il eust receu plus de contentement & d'utilité, qu'il ne fera de ce qui s'est passé.

I L y auoit ce me semble, d'autres moyens pour remedier aux mécontentemens du Roy, & aux choses qui se passoient : ie sçay certainement que le Roy auoit assemblé ses Estats avec dessein tout contraire à celuy qui en est succédé, & qu'il ne cherchoit qu'à bien faire pour nostre Religion, pour le public, & pour luy, qui sont trois choses inseparables : & croy fermement qu'il en fust ainsi auenu s'il eust esté assisté de personnes qui eussent eu son seruice en plus grande recommandation que leurs affaires particulieres.

A ce propos, ie diray auoir remarqué avec plusieurs autres, que iamais on n'a parlé de rechercher & punir les larcins de la Cour, que l'on n'ait aussi-tost suscité quelque trouble ouueau, qui a interrompu & fait cesser les recherches : ce ne sont pas aussi ordinairement ceux qui ont la bourse mieux garnie, qui ont le plus dérobé, & fait leurs affaires (pour vsfer des termes qui sont en pratique) qui ont eu le moins de pouuoir auprès des Grands qui ont pû remuer ménage.

Qv i forçoit & obligeoit le Roy à se laisser emporter aux poursuittes des Estats, & à leur accorder les choses qu'ils luy demandoient, qu'il estimoit & reconnoissoit luy estre honteuses & preiudiciables. Je ne puis dire quant à moy que ce fust l'intention du Rerail desdits Estats, d'offencer sa Majesté : car mal & le reproche leur en fust à la fin desiré, quand ils l'eussent entrepris & executé. Et pour le regard des particuliers, & qu'on voit qui mouuoient les autres ; ie dis qu'à la fin tout fust tourné à leur confusion, & à l'adantage du Roy & du Royaume : vray est que l'on eust pû donner quelque regle & bride aux charges que le peuple portoit & aux dépenses qui estoient ordinaires au maniement des finances du Royaume, pour contenter & soulager le peuple : Mais qui a plus desiré ce-  
& qui en deuoit aussi plus profiter que le  
?

Le v M. de Guise estoit-il assez fort dedans avec les deputez desdits Estats? Quand mes ils eussent esté tous à sa deuotion,

pour forcer la volonté du Roy à leur accorder ce qu'il leur eust voulu refuser : il y parut par ce qui s'en est ensuiuy, le Roy n'auoit à faire autre chose qu'à fortifier son autorité & ses volontez de la raison; en épousant le premier par effect de cœur & d'affection le soulagement du peuple, la reformation des choses qui auoient besoin, & la guerre contre les heretiques; il eust en ce faisant & sans coup ferir renuersé la ligue, & attiré à soy les cœurs des Catholiques; qui en sont à present par trop distraits & éloignez.

Les auteurs & fauteurs d'un tel conseil, deuoient mieux reconnoistre l'estat du Royaume, & les complexions & humeurs de la Cour qu'ils n'ont fait, leurs passions les ont aueuglez : ceux qui craignoient estre chassez ont mieux aimé conseiller au Roy de manquer à ses promesses que de les abandonner: ils luy ont dit que feu M. de Guise l'eust mis en tutelle, & amené prisonnier à Paris, si on ne l'eust fait mourir, & qu'il luy vouloit donner un conseil, & des seruiteurs à sa poste.

Ie n'ay que faire en cela de iustifier l'intention dudit Duc, parce que i'en en fus iamais assez informé pour en répondre; mais i'ose dire, que quand il l'eust entrepris il ne l'eust pû faire, & qu'il se fust perdu : l'on dit qu'il s'en fust allé, & eust rompu les Estats, & commencé la guerre. Sur quel fondement l'eust-il fait : le Roy auoit desia accordé, ou estoit resolu, d'accorder tout ce que l'on luy demandoit pour le bien general du Royaume; c'étoit son deuoir aussi d'en vser ainsi, mais il ne  
voulait

vouloit changer de seruiteurs à la poste dudit  
 Duc, ny le faire Connestable de France. Eust-  
 il pour cela, & sur cela commencé la guerre:  
 C'eust esté bien vn foible fondement & pre-  
 texte, il eust esté mal receu d'un chacun, &  
 eust en ce faisant plus perdu de seruiteurs & de  
 craance en ce Royaume, qu'il n'y en auoit ac-  
 quis par ce qu'il auoit fait. Il s'est tousiours  
 aussi tres-bien gardé de toucher de son parti-  
 culier, ny d'auoir aucun autre dessein pour luy  
 en tout ce qu'il a fait; il ne falloit que suiure  
 le mesme chemin, & vser de mesme industrie  
 pour contreminer ses desseins. Les peuples ne  
 aimoient que pource qu'ils esperoient par  
 son moyen estre déliurez des heretiques, &  
 nulagez plustost que par celuy du Roy: il ne  
 alloit pour changer les affections du peuple,  
 ne faire mieux que luy en l'un & l'autre, voi-  
 comment i'eusse voulu faire mourir Mon-  
 sieur de Guise, c'estoit le moyen de releuer  
 l'autorité du Roy.

DES LORS que le Roy permit à Mon-  
 sieur de Guise de le venir trouuer à Meaux.  
 pour aduiser & resoudre des moyens de resi-  
 ster à l'armée Protestante, qui commençoit à  
 marcher pour entrer en ce Royaume; ie m'ap-  
 erceus bien que l'on auoit fait trouuer mau-  
 uais à sa Majesté le conseil que l'on luy auoit  
 donné de voir ledit Duc, & de le rallier à soy.  
 pour mieux s'opposer ausd. Protestans, & que  
 l'on luy auoit imprimé vne telle jalousie dud-  
 it Duc, qu'il oubloit quasi la crainte de ladite  
 armée, en quoy sadite Majesté auoit esté nour-  
 rie, & entretenüe par aucuns, poussez de leur

interest priué, plûtoſt que du ſeruice du Roy, ce que i'oſe dire auoir eſté la principale cauſe de nos maux : car plus le Roy ſe declaroit jaloux & mal content dudit Duc, plus ledit Duc regardoit à ſe fortifier, tant pour ſe faire rechercher & rendre plus neceſſaire, que pour mieux reſiſter à ſes ennemis ; ce qu'il ne pouuoit faire qu'en offenſant & affoibliffant le Roy, ce qui a engendré à la fin le tonnerre qui eſt tombé ſur les Catholiques.

LA derniere choſe qu'un Prince Souuerain doit faire, eſt de ſe monſtrer mal content & offenſé d'un ſien ſujet, au lieu de le chaſtier, luy donner plus de moyen & pouuoir de luy mal faire : car c'eſt tres-grande folie & impertinence que d'eſperer arreſter le cours d'une deſobeiſſance, par gratification, c'eſt par la vertu de la Juſtice que telles playes doiuent eſtre gueries ; ce qui a eſté trop mal practiqué en ce Royaume depuis 30. ans, de ſorte que petits & grands ont creu que pour auoir des charges & des recompensés, il ſe falloit plûtoſt faire craindre qu'aimer.

IL fait pluſieurs autres voyages, affaires, traitez & negotiations de tres-grande importance, que i'eſtime n'eſtre de beſoin de repreſenter, parce qu'il y'auroit trop de choſes à dire, leſquelles il vaut mieux taire à preſent pour diuers reſpects ; & d'autant plus qu'elles ne ſeruent à l'effect pour lequel i'ay entrepris d'écrire le preſent Memoire, comme i'ay déjà dit, pour faire paroître que i'ay ſeruy ſa Majeſté tres-fidelement en toutes choſes, & en la meilleure partie d'icelles aſſez heureuſe-



ment, graces à Dieu, dequoy ie me rapporteray à ceux qui en ont eu la connoissance.

M A I S i'estime estre à propos, voir nécessaire pour ma décharge, d'éclaircir mes amis de tout ce qui s'est passé entre Monsieur d'Espernon & moy, parce que l'on m'a dit que son inimitié auoit plus aduancé m'a disgrâce que toute autre chose : quoy estant, il y auoit eu de ma faute, l'on auroit eu occasion de m'en blâmer.

I E puis prouuer par lettre & témoins, gens de bien qui viuent encore, que feu Monsieur de la Valette son pere, sur ses derniers iours n'auoit personne à la Cour de qui l'amitié nuy fust si assurée & si vraye que la mienne, ayant souuent fait mon propre fait de tout ce qui le concernoit, tant i'honorois sa verité en toutes choses, & sa fidelité au seruice du Roy : & de fait quand il mourut, il me commanda ses enfans, & Madame de la Valette sa femme, me les adressa lors qu'elles enuoya à la Cour : ce que ledit sieur Duc d'Espernon a dit souuent, & que l'amitié qu'il me portoit estoit hereditaire, & produisoit de l'obligation que feu son pere m'auoit fait, dont il faisoit telles demonstrations, & souuent à la Cour on a eue jalousie, comme toutes choses sont sujettes à y estre interpretées, & prises plutôt en mauuaise qu'en bonne part.

C E T T E opinion dura, & fut creüe d'un chacun, & mesmes des plus Grands, iusques au temps que ledit Duc s'opposa au mariage de l'heritiere de la maison de Maure avec mon

filz, auquel le Roy m'auoit seulement permis d'entendre, mais aussi promis avec la Reine sa Mere, de me prester toute faueur & assistance : & de fait leurs Majestez l'embrasserent de leur grace, avec telle affection, que ie croy certainement que ledit mariage eust esté fait sans l'opposition qu'y porta ledit Duc d'Espernon, lequel disoit que le Roy & Madame la Duchesse d'Vfèz, parente de ladite fille, luy auoient promis de la donner en mariage au filz de Monsieur de Termes, que nous appellons à present Monsieur de Bellegarde : ce que ledit Duc prit à cœur contre moy, que reconnoissant le Roy en estre en peine, comme certainement il estoit, ie suppliay sa Majesté trouuer bon que i'en quittasse la poursuite, comme ie fis à l'heure mesme.

LES vns disoient que ledit Duc auoit entrepris la susdite poursuite : meu veritablement du desir qu'il auoit de marier sond. Cousin à ladite fille, qui deuoit vn iour estre heritiere de grands biens; mais les autres eurent aduis incontinent qu'il l'auoit fait plûtoft pour m'en priuer, que pour autre chose, parce que les principaux parens de ladite fille disoient qu'ils ne permettroient iamais qu'elle fust mariée audit sieur de Termes, aussi le Comte de Torigny filz de Monsieur le Marechal de Matigon l'ade puis espousée.

Q V O Y que ce soit, depuis ce temps-là ledit Duc connoissant m'auoir fait perdre cette occasion, & croyant que ie fusse de ceux qui n'oublent & ne pardonnent volontiers vne offense, a tousiours eu deffiance de

moy & de tout ce que ie faisois ; de façon qu'il estimoit que ie fusse contraire à tous ses desseins , interpretant en ce sens tout ce que ie disois & faisois par le commandement & seruice du Roy , qu'il ne luy estoit agreable & conforme à ces desirs , au lieu qu'au parauant il souloit prendre le tout autrement.

A quoy aida grandement la bonne volonté que feu Monsieur de Joyeuse commença à me monstrier & à mon fils aussi , l'honorant de Guidon de sa compagnie de cent hommes d'armes , & le prenant en sa protection : car ces deux Ducs, que le Roy auoit voulu ioindre & allier ensemble de plusieurs sortes de liens , estoit si jaloux l'un de l'autre , que l'un haïssoit mortellement les seruiteurs de l'autre , & toutefois il estoit comme impossible qu'un ieune homme fust fortuné à la Cour , s'il ne prenoit le party de l'un des deux : telle inimitié a duré iusques apres la mort , qui sont iugemens de Dieu , lequel ne permet que telles amitez , basties sur faux fondemens prosperent , quoy que les Roys apportent de leur part tout ce qu'ils peuuent.

Q V A N D ledit Duc d'Espernon partit de la Cour pour aller prendre possession du gouuernement de Prouence, ( que le Roy luy auoit donné , apres le trespas de feu Monsieur le grand Prieur de France , bastard d'Angloulesme ) il voulut m'asseurer de son amitié en presence de Monsieur de Bellièvre, qui luy estoit tres-affectionné, & à moy tres-cher amy , laquelle assurance il me confirma encores à son logis à Paris , où ie le

fus trouver pour prendre congé de luy.

M A I S cela ne dura gueres, car ayant écrit au Roy, qui lors estoit allé aux bains de Pougues, que la surprise que le sieur de la Valette frere dudit Duc auoit faite en ce temps-là, de la Citadelle de Valence, sur le sieur de Gessan, estoit cause de troubler grandement les affaires, & jetter Messieurs les Ducs de Guise & de Mayenne en plus grande défiance que iamais de l'observation de la paix, que l'on auoit de n'agueres faite avec eux, avec grande peine, & au desaduantage pour sa Majesté. Ledit Duc d'Espéron en fut incontinent aduertty; les vns disent que ce fut par le Roy, les autres par autre voye: il m'en fçeut tres-mauuais gré, & le coup que j'auois frappé en bonne intention, renouuella la playe de son mécontentement en son endroit, qui n'estoit pas encore bien consolidée.

L A surprise de ladite Citadelle de Valence fut suivie quelque temps apres de celle des villes de Dourlans & du Crotoy en Picardie faite par Monsieur le Duc d'Aumale, lesquelles engendrerent tant de défiance entre mesdits sieurs Duc de Guise & de Mayenne, & ledit Duc d'Espéron & ledit sieur de la Valette, que ç'a esté la pepiniere de tous nos maux.

A V mesme temps quelques-vns de la ville de Lion, qui estoient bons seruiteurs du Roy, & amis communs de feu Monsieur de Mandelot & de moy, ne desirant pas que ledit sieur de Mandelot mariaist sa fille aisnée à Monsieur le Marquis de Villars, fils de Ma-

lame la Duchesse de Mayenne , dont l'on estoit entré fort auant en propos , pour la rainte qu'ils auoient que telle alliance mist le Roy en defiance dudit sieur de Mandelot, & fit entrer ledit sieur de Mandelot en la ligue , mirent en auant celuy de mon fils avec ladite fille : dequoy estant le Roy aduerty, sa Majesté me commanda de le poursuiure, me disant que ie ne luy ferois pas moindre seruiice que de luy asseurer ladite ville de Lion avec tout le Gouuernement , & la personne dudit sieur de Mandelot , que sa Majesté auoit occasion detenir comme perduë , si l'autre mariage se faisoit ; & sur cela sadite Majesté me promit de faire tomber entre les mains de mondit fils le gouuernement dudit sieur de Mandelot , & de faire tant de bien & d'auantage aux parties , que nous aurions occasion de nous en louer , & qu'elle recommanderoit en ce faisant tout d'un même coup deux familles qui l'auoient tres-bien seruy, & dont il esperoit tirer encores à l'aduenir des seruiices tres-notables.

LE commandement de sadite Majesté, & sesdites promesses , & le desir que i'auois de luy faire seruiice , & luy conseruer ledit sieur de Mandelot , pour l'honneur & la bonne amitié que ie luy portois, me firent bien-tost resoudre de rechercher ledit mariage, & le preferer à d'autres qui s'offroient , encores que ie sceusse qu'ils estoient plus riches en biens que l'autre, mais non veritablement en honneur.

CE qui fut incontinent diuulgué par tout,

& ſçeu auffi dudit Duc d'Efpernon , qui n'aïmoit gueres ledit ſieur de Mandelot, à cauſe qu'il auoit aidé aux habitans de ladite ville à faire ſortir de la Citadelle le ſieur du Paſſage, que Monſieur de la Valette y auoit mis, lequel auoit achepté la Capitainerie d'icelle du ſieur de la Mante, en eſperance de recouurer quelque iour tout le gouuernement duquel il auoit obtenu la reſerue, laquelle Citadelle ledit ſieur de Mandelot auoit depuis fait raſer par la permiſſion de ſadite Majeſté, dont ledit ſieur de la Valette eſtoit tres-indigné, & par conſequent ledit Duc ſon frere; i'açoit qu'ils fiſſent quelquesfois demonſtration du contraire.

C O M M E fit encores ledit Duc en cette occaſion: car à ſon retour de Prouence, ayant ſçeu que le Roy deſiroit pour ſon ſeruiſe que ledit mariage ſe fiſt, & pour ſe faire, aſſeurer ledit ſieur de Mandelot de la ſuruiuance dudit Gouverneur pour ſon gendre, il remit entre les mains de ſa Majeſté, tant pour luy que pour ſon frere la reſerue dudit gouuernement, dont ſa Majeſté luy auoit donné promeſſe.

I' EN fis vn grand remerciement audit ſieur Duc d'Efpernon à ſon arriuée à Paris, qui m'aſſeura qu'il n'eüſt quirté ladite reſerue, ſi ce n'eüſt eſté en ma faueur & conſideration; de forte que ie croyois veritablement auoir tres-grande part en ſa bonne grace, laquelle ie ménageois & conſeruois de tout mon pouuoir.

T O U T I F O I S, parce que le Roy à ſon

retour de Prouence, ne luy monstroït ainsi qu'il diſoit tant d'amitié & de confiance qu'il vouloit; & auſſi que ſa Majeſté parloit plus ſouuent à moy que de couſtume, il ſe perſuada bien-toſt apres que ie luy faiſois de mauuais offices, & que i'eſtois en partie cauſe du refroidiſſemēt de ſa Majeſté en ſon endroit; de forte que ſ'eſtant rencontré vne fois que ie parlois à ſa Majeſté de Monſieur l'Archueſque de Lion, & que ie ſuppliois de luy faire faire vne lettre, & aduiſer de compoſer le différend qui eſtoit entre ledit Duc, & luy, pour retenir & conſeruer ledit Archeueſque en ſon ſeruiſe, que ie ſçauois eſtre tres-fort ébranlé, à cauſe de la haine qui eſtoit entr'eux. Ledit Duc prit occaſion de fonder ſur ce ſujet vne nouuelle querelle & plainte de moy; dont il me tint quelque propos, & pareillement d'une certaine ouuerture faite au Conſeil par le feu Preſident Nicolai, touchant le party du ſel, qu'il diſoit que i'embralſois & pouſſuiois à ſon prejudice à cauſe des aſſignations qu'il auoit ſur ledit ſel, dont ie trauiſois parlé aucunement, & eſtois du tout innocent: ie m'apperceus aſſez-toſt que ſon mal procedoit d'ailleurs que de moy, & qu'il ne s'attachoit à moy que pour battre & gourmander le chien deuant le lion, dont i'aduertis ſa Majeſté, afin qu'il luy plût y pouruoir.

S V R cela s'offrit le voyage de Meaux, duquel i'ay cy-deuant parlé, qui ſeruit grandement à bien remettre ledit Duc avec ſa Majeſté, au deſaduantage de ceux qui deſiroient rabattre & faire ceſſer les deſſiances &

mécontentemens qu'elle auoit dudit Duc de Guise , pour les raisons susdites ; dequoy la Reine Mere du Roy ne fut mesme exempte non plus que les autres : toutefois ces choses ne refroidissoient les gens de bien de leur deuoir , ny de procurer ce qu'ils estimoient estre vtile au Roy & au Royaume : & comme la nouvelle arriua que les troupes du Duc de Guise auoient ja commencé à combattre avec celles de ladite armée Protestante , où ils auoient gaigné vne cornette du Colonel Bouc , Monsieur le Duc de Neuers témoignera l'office que ie fis en cét endroit avec luy , pour auancer le partement de Paris de sa Majesté , & son acheminement en son armée ; meu principalement du zele que ie portois au Roy , & soin que i'auois de sa reputation & de son contentement , qui m'a tousiours esté plus cher quand i'ay esté aupres de luy, que la conseruation de ma propre vie.

Le Roy s'achemina bien-tost apres en son armée , où ie fus commandé de le suivre , estant à saint Aignan , ledit Duc d'Espernon s'attaque à moy , en la presence & dans le Cabinet de sa Majesté , sur vn rapport que ie faisois d'vn aduis de Messieurs du Conseil que l'on auoit laissé à Paris , touchant certains deniers qui y restoient à recevoir de la vente du domaine du douiaire de la feu Reine d'Escoffe au païs de Poictou , que lo'n conseilloit à sadite Majesté de bailler au grand Preuost , pour luy donner moyen de partir de Paris , & d'acheminer en l'armée ses Archers , dont l'on auoit grand besoin ,



disant ledit Duc que les deniers auoient esté donnez à son frere pour les frais de l'armée qui estoit en Dauphiné sous sa conduite, & partant que l'on ne pouuoit plus les destiner ailleurs sans luy faire tort: comme il sembloit que l'on prenoit plaisir de faire, & de luy retrancher & oster tous moyens de seruir: à quoy ie ne fis aucune responce, parce que ce propos, ce me sembloit, ne s'adressoit à moy, d'autant que c'estoit chose qui n'auoit passé par mes mains; mais sa Majesté & luy en entrèrent en grande contestation, dont la colere tomba apres sur moy; car ledit Duc me dit, que i'auois esté seul cause de ce que l'on auoit ainsi traitté son frere, pour fauoriser Monsieur le Marechal de Joyeuse; de quoy m'estant voulu excuser, il me dit que ie taillois & rongnois des affaires de sa Majesté à ma discretion, & sans charge ny commandement de sadite Majesté; & luy ayant respondu que c'estoit chose que ie n'auois iamais faite, mesme la pressant d'en coterter quelque vne, & que i'estois prest d'en respondre, il s'echauffa tellement qu'il m'iniuria & menaça en la presence de sa Majesté, lequel se leuant de sa chaire où il estoit assis, & moy appuyé derriere luy, me commanda de me taire: ce qui fut cause que ie me departis de cette façon de la presence de sadite Majesté, & l'on m'a dit depuis que ie courus deslors fortune d'estre renuoyé en ma maison, avec lesdites iniures & menaces: toutefois sadite Majesté fit toute autre contenance: car l'ayant suppliée le lendemain de me faire iustice de

ladite iniure , ou me permettre de me retirer en ma maison , parce que ie ne deuoïs ny ne pouuoïs la seruir estant iniurié ; elle me refusa mondit congé , & se contenta de m'exhorter à la patience , & à l'exemple de ceux que ledit Duc auoit auoit baffoüez , qui faisoient profession des armes , & estoient encores plus qualifiez que moy : & faut que i'aduoüe que ie n'eusse iamais crû que le Roy eust permis , que ledit Duc ny autre plus grand que luy , eust en sa presence , & pour occasion si friuolle , traitté de cette façon vn sien seruir & Officier auquel elle monstroït tant de bonne volonté & fiance, comme étoit celle que i'en receuois.

I e portay ce déplaisir iusques à ce que la nouuelle arriua de la mort de Monsieur le Duc de Joyeuse , que sa Majesté voulut deux iours apres que ledit Duc en sa presence me tint , comme il fit , vn tres-honnestel langage , sur ce qui s'estoit passé audit saint Aignan : de façon que i'eus certainement toute occasion d'en demeurer tres-satisfait, depuis se representant celle de la poursuite de l'armée Protestante , qui se retiroit apres la deffaite d'Auneau , ie priay sa Majesté de trouuer bon que la compagnie de mon fils, qui n'estoit des moindres de l'armée , suiuiſt ledit Duc d'Espernon , comme elle fit , sans l'abandonner iusques à la composition qu'il fit avec les Chefs d'icelle , dont il enuoya la nouuelle à sadite Majesté par mon fils , qui la porta apres par le commandement de sadite Majesté , à la Reine sa mere.

M A I S ie ne veux oublier à dire , que quand l'on sçeut la dispute que ledit Duc auoit eüe avec moy , tant de gens s'offrirent à m'assister , que ie reconnus que l'inimixié qu'on portoit audit Duc , estoit encores plus grandes que ie n'auois crû , & qu'elle seroit enfin cause d'un tres-grand malheur : ce qui me m'eut depuis de le solliciter , & admonester assez souuent de composer tous les differens qu'il auoit avec Messieurs de Guise , & d'en pourfuiure & parler à sa Majesté , sur laquelle ie preuoyois que le contre-coup & principal dommage en tomberoit à la fin : & certainement ledit sieur de Bellièvre y faisoit de son costé vn tres-grand deuoir , comme il est tres-sage personnage , clair-voyant , & aimans grandement le seruice du Roy , comme il faisoit aussi particulièrement le bien dudit Duc ; mais plus nous remuyons ce propos & affectionnions ce Conseil , plus ledit Duc se deffioit de nous , & mettoit le Roy en soupçon de nous , dont ie m'apperceuois tous les iours dauantage ; & faut que ie die , que la connoissance que i'en auois , fit grand tort aux affaires du Roy , lors qu'il se resolut de faire entrer les Suisses dedans Paris , car ie n'en osay parler qu'à demy : & à dire vray , le regret m'en demeura eternellement en l'ame , n'ayant rien fait ny veu faire durant que ie seruis le Roy , dont graces à Dieu , ma conscience demeure chargée , que de ce seul fait.

SUR cela ledit Duc d'Espernon s'achemina en Normandie pour prendre possession du

gouuernement dudit païs, & de l'Admirauté de France, dont le Roy l'auoit pourueu apres la mort dudit Duc de Joyeuse; ce qui augmenta l'enuie & la haine que l'on luy portoit.

Ces grandes desfiances & inimitiez croissant à toute heure, firent venir à la fin ledit Duc de Guise à Paris, contre l'attente & volonté de sa Majesté: ce qui fut cause qu'elle fit entrer apres lesdits Suisses dans la ville, & les compagnies du Regiment de sa Garde qui estoient logez aux faux-bourgs, dont s'ensuiuit la iournée des Barricades, & le partement du Roy de ladite ville, qui se retira en celle de Chartres.

Ces choses affligerent grandemene les bons seruiteurs de sa Majesté, tant pour le déplaisir & la honte qu'elle y auoit receuë, que pour la connoissance qu'ils auoient des miseres qui en naistroient; dequoy se donnerent peu de peine, ceux qui craignoient plus la guerre en la paix, que la ruine du Royaume.

C'a esté vn coup procedant du iugement de Dieu sur nous, car chacun preuoyoit & predisoit qu'il arriueroit quelque violence desdites desfiances & inimitiez, qui mettroient le Roy en peine tres-grande, & ses affaires en pareille confusion; luy-mesme le disoit, & en receuoit tous les iours des aduis. D'auantage, il faisoit demonstration d'y vouloir pouruoir; neantmoins comme il estoit conseillé des vns pour ce faire par la douceur, & des autres par la rigueur, il s'y trouuoit tres-

empesché; toutesfois il inclinoit plus à suivre le dernier chemin que l'autre, pource qu'il estoit plus agreable à ceux qui auoient plus de credit aupres de luy: aussi qu'ils luy faisoient tres-facile, & qu'il luy sembloit que le malheur de ses affaires estoit d'auoir esté trop indulgent auparauant en semblables occasions: ce fut aussi celuy qu'il choisit, sans decouurir rien à la Reine sa mere, parce qu'elle auoit insques à l'arriuée dudit sieur Duc de Guise, grandement contredit aux aduis que l'on en auoit donnez, & particulièrement des remuemens qui se preparoient en ladite ville, lesquels pour mon regard ie sçauois & reconnoissois estre tres-veritable: Mais certainement i'apprehendois fort le danger qu'il y auoit d'y remedier par la force, estant les choses si preparées & aduancées qu'elles estoient à vne souleuation; mais la facilité de l'executer que l'on en promit au Roy l'y embarqua: toutefois il me fit cet honneur que de me dire le matin, que lesdites forces entrant en la ville, qu'il eust desiré les ordonner, ayant la nuit considéré & apprehendé le mal qu'il en pouuoit arriuer. Dauantage ie suis obligé de dire que ie ne connus point que sa Majesté eust lors volonté d'attenter contre la personne de Monsieur de Guise, ny de faire apprehender ny punir par iustice aucuns de la ville, comme l'on a publié, ains seulement de faire vider plusieurs Gentils-hommes, & autres gens d'effect que l'on y auoit fait couler deuant & depuis l'arriuée dudit Duc de Guise, pour

rompre le coup d'une souleuation du peuple, dont il estoit menacé. A quoy i'adjousteray que la resolution que sa Majesté prist de sortir de la ville vint d'elle-mesme, iugeant qu'en conseruant sa personne, elle pourroit apres recouurer ce qu'elle delaissoit.

CERTAINEMENT i'entrepris des premiers de remonstrer à sa Majesté les maux & accidens que cette guerre engendreroit, & de luy donner conseil de penser à y remedier plustost par la douceur que par la force, luy cottant par le menu les raisons qui fortifioient telle opinion que sa Majesté sçauoit & entendoit encores mieux que nul autre de ses seruiteurs : pour cette cause elle eust bien desiré que ledit Duc d'Espernon ne la fust venu trouuer à Chartres, comme il fit ; car d'ailleurs il estoit si mal voulu à la Cour, que les principaux d'icelle protestoient de s'en aller s'il y demeuroit, ne pouuant cōpatir avec luy : ce qui fut cause que sa Majesté ne cessa qu'elle ne l'eust enuoyé, & pour ce faire luy accorda tout ce qu'il luy demanda : Mais auant que de partir il dissuada sa Majesté tant qu'il peut de la paix, blasmant ceux qui la luy conseilloient, sur tous autres il monstroït m'en sçauoir tres-mauuais gré : toutefois, partant il me voulut asseurer de son amitié, sur vn propos que i'auois tenu à son Secretaire.

BIEN-tost apres ledit partement, sa Majesté me voulut depécher à Paris, pour donner commencement à la negotiation d'une paix, dequoy ie la suppliay de m'excuser, pour la jalousie que led. sieur d'Espernon auoit con-

tie contre moy, qu'il se prendroit à moy de tout ce qui seroit dit & conclud à son desavantage; chose que sa Majesté print en bon port, de maniere qu'elle y depécha M. Miron son premier Medecin: lequel n'ayant rapporté de deux ou trois voyages qu'il y auoit faits que des paroles generales qui tenoient sa Majesté en grand suspens & incertitude entre la guerre & la paix, dont elle estoit en tres-grande peine; elle m'enuoya querir le iour de la Pentecoste estant à Vernon, & m'ayant dit en la presence dudit sieur Miron, que ie trouuay seul avec elle, l'ennuy & fascherie qu'elle auoit de ces longueurs, & mesmes le prejudice que ses affaires en receuroient, & le desir extrême qu'elle auoit d'estre esclaircie de ce qu'elle se deuoit promettre de ladite paix, pour mieux se resoudre de ce qu'elle auoit affaire: Sa Majesté me cōmanda d'entreprendre le voyage de Paris, où l'on disoit que i'estois desiré, pour aider à jetter les premiers fondemens de ladite paix: ie m'offris & resolus volontiers à ce faire; me veyant veritablement d'un tres bon zele au seruice de Dieu, & celuy du Roy, & au bien public du Royaume, & d'un tres-grand desir de tirer sa Majesté des incertitudes esquelles elle demeueroit, que ie reconnoissois luy estre tres-dommageables, & refroidir grandement l'affection de ses bons sujets.

I E fus donc depéché à l'heure mesme, & sur le champ deuant que de sortir du lieu où nous estions, & escriuions sous sa Majesté ma premiere instruction, laquelle fut dressée sur les

aduis que luy donnoit ledit sieur Miron, qui auoit reconnu & appris aux voyages qu'il auoit déjà faits, quel emplastre il falloit appliquer aux playes que l'on vouloit guerir; pour cette cause, ie suppliay sadite Majesté de renuoyer avec moy led. sieur Miron, ce qu'elle fit.

E t d'autant que ce dont i'ay esté le plus blasmé de toute cette negociation, a esté du pouuoir que le Roy auoit accordé audit sieur Duc de Guise, parce que personne n'en eust eu connoissance ny communication qu'apres la conclusion de ladite paix; ie desire qu'un chacun soit bien éclaircy de la verité de ce fait; pour cette cause il est besoin que ie die, que par ladite premiere instruction que le Roy me fit écrire sous luy, en la presence & par l'aduis dudit Miron, sa Majesté me commanda entr'autre chose, de proposer audit sieur Duc de Guise, la Lieutenance generale de son Royaume, comme ie puis monstrier par écrit, certifié & signé de la propre main de sa Majesté; ledit Miron luy ayant dit, que si elle ne luy donnoit ce pouuoir, l'on ne feroit iamais la paix: & fus depesché avec cela, & plusieurs autres commandemens, que ie me resolus de ménager & faire valoir à l'auantage du Roy & de son contentement, avec toute industrie, sollicitude & fidelité.

S i i'eusse eu telle intelligence avec ledit Duc de Guise, & si grand desir de l'autoriser aux despens du Roy, ou eusse esté son pensionnaire, comme l'on a dit du depuis, sous correction tres-faussement, ie pouuois facilement luy donner aduis du commandement.



& du pouuoir que sa Majesté m'auoit donné, afin de luy faire demander & poursuiure ladite Lieutenance generale, que ie sçauois que l'on luy eust en ce cas tres-volontiers accordée.

MAIS tant s'en faut que telle trahison soit entrée en mon esprit, que ie me resolus de dire à Monsieur le Cardinal de Bourbon, & audit sieur de Guise & autres qui l'assistoient, que le Roy m'auoit depesché sans charge & pouuoir quelconque, ains seulement pour sçauoir & luy rapporter s'ils auoient enuie de la paix, ou non, afin qu'on ne s'y attendist plus, s'ils estoient resolus à la guerre, sinon, & qu'ils desirassent ladite paix, comme ils disoient, que sa Majesté sçeust ce qu'ils demandoient pour cét effet, & pour ce en falloit sortir, afin de la conclure au plûtost pour soulager le peuple, & ne consumer inutilement les moyens & le temps que l'on auoit de faire la guerre aux Heretiques, à laquelle sa Majesté estoit plus disposée & resoluë que iamais, laquelle se plaignoit & mécontentoit grandement qu'en deux ou trois voyages qu'auoit fait vers eux ledit sieur Miron, il n'en n'auoit rapporté que des paroles generales & ambiguës, sur lesquelles on ne pouuoit asseoir aucun fondement.

LEDIT sieur Miron qui arriua à Paris deuant moy, sçait & pourra témoigner que ce fut la resolution que ie luy dis, que i'auois prise sur ma depesche, le priant de trouver bon que ie la suiuisse, afin de ne rien precipiter, & faire parler les premiers ceux auxquels nous auons affaire.

C'EST qu'ayant fait entendre à la Reine Mere du Roy, à laquelle estoit ma principale adresse suiuant le commandement de sadite Majesté, apres luy auoir à elle seule leu mon instruction, elle loua grandement ma deliberation, & principalement pour ce qui concernoit ladite Lieutenance generale, me disant qu'elle auoit decouuert & appris ( & pense qu'elle me dit que ç'auoit esté du sieur de Schomberg, ou par son moyen que ledit Duc de Guise se contenteroit ) que le Roy luy donnast vn pouuoir general sur les armées en ce Royaume, conjoint & vny avec son estat de Grand Maistre de France, en sa personne seulement, & qu'elle auoit déjà aduertie sa Majesté par vne lettre qu'elle luy auoit enuoyée par la Roche Gentil-homme seruant de ladite Dame, lequel elle me demanda si ie l'auois rencontré par les chemins, & luy ayant dit que non, pource que ie n'estois pas venu le chemin des postés, elle me fit paroistre qu'elle desiroit grandement receuoir au plûtoſt la responce & volonté de sadite Majesté sur ladite lettre.

DE QUOY nous ne tardâmes gueres à receuoir des nouuelles, car si-toſt que le Roy eut veu l'aduis que ladite Dame luy donnoit, il m'écriuit que ie n'eusse à proposer ladite Lieutenance generale, mais m'informer bien particulièrement de ce que ladite Dame auoit appris, que ledit Duc de Guise desiroit que l'on luy accordast, afin de l'en esclaircir d'auantage, me recommandant au reste l'aduanacement de la negociation qu'il m'auoit commise.

V O I L A comment il me prit bien d'auoir  
teu le commandement qui m'auoit esté fait  
touchant ladite Lieutenance generale. Et  
comme ie ne fus iamais autheur ny inuenteur  
du pouuoir qui fut depuis donné audit Duc,  
lequel fut dressé, comme ie feray entendre  
cy-apres.

La feuë Reine Mere du Roy, & ceux qui  
estoient avec ellè, firent tant que ces Princes  
commencerent à se laisser entendre de ce  
qu'ils desiroient, & en baillerent quelque  
chose par écrit; que i'eus charge de rempor-  
ter à sadite Majesté, ce qui fut assez debattu  
par ladite Dame deuant que de l'accepter,  
afin d'en faire rabattre tousiours & moderer  
quelque chose; mais ce fut tousiours sans leur  
rien promettre de la part de sadite Majesté,  
qu'une tres-bonne volonté à la paix; d'au-  
tant que ladite Dame fut conseillée de faire  
voir au Roy leurs demandes deuant que de  
l'engager aucunement, afin qu'en son conseil  
sa Majesté considerast & resolust bien ce que  
son seruice requeroit qu'il en fust fait.

I' A Y esté particulièrement accusé de n'a-  
uoir conduit la pratique de la ville d'Orleans  
avec les sieurs d'Antragues & de Dunes, si  
chaudement & fidelement que ie deuois, de-  
quoy ie rendray compte aussi par ce present  
Memoire.

E T pour commencer, il faut sçauoir que  
le sieur de Chemérault, qui a tousiours esté  
tres-bon seruiteur du Roy, & homme de bien,  
me dit vn iour estant encore à Paris, quelque  
semaine deuant que Monsieur de Guise y ar-

riuast, qu'il estimoit qu'il y auoit moyen de gagner le sieur d'Antragues & de Dunes, & les rendre aussi affectionnez au Roy & à son seruice, que nul autre de ses subjets; ils étoient bien recherchez, & principalement ledit sieur de Dunes, qui pouuoit beaucoup enuers son frere: & parce qu'il sçauoir que l'un & l'autre auoient grande fiance en moy, qui leur auois aussi fait en toutes occasions, office de vraye amitié, il estoit d'aduis que ie visse ledit sieur de Dunes, & que ie parlasse à luy, se promettant que i'y gagnerois quelque chose pour le seruice du Roy; ie m'offris soudain à ce faire, & resoluſmes que ce seroit à Conflans où il ameneroit ledit sieur de Dunes, comme il fit deux ou trois iours apres. Là ie luy fis ouuerture de se rallier du tout avec sa Majesté, & y attirer son frere avec la ville d'Orleans, surquoy nous eufmes plusieurs propos qui conclurent enfin à faire que l'on rendist son frere content de deux choses, estimant, voire asseurant qu'en ce faisant, le Roy se l'acquerroit tellement qu'il en pourroit du tout disposer, & de tout ce qui dependoit de luy: l'un estoit de faire que l'on fist raison du langage que M. d'Espernon auoit tenu à son fils à Neuers apres la déroute de l'armée Protestante; & l'autre, que sa Majesté luy donnast en chef le Gouvernement d'Orleans, afin qu'il ne fust à l'aduenir subjet à M. le Chancelier, avec lequel il disoit ne pouuoir plus compâtrir.

IE luy promis de faire entendre au Roy sa bonne volonté, en laquelle ie le confortay

qu'il me fut possible, & de luy en faire  
onse bien-tost par la voye dudit sieur de  
emerault. Quand ie parlay à sadite Ma-  
e, elle me dit que ledit sieur de Dunes luy  
it desia fait tenir semblables propos par  
eur de Longnac; & me commanda de luy  
e sçauoir qu'elle auoit pris en tres-bonne  
tout ce que ie luy auois dit, & qu'elle  
feroit aux moyens de pouruoir aux deux  
ts desquels il m'auoit parlé, que sadite  
esté trouuoit assez difficiles à accorder,  
rce que l'on auroit affaire audit Duc d'Es-  
non, & pour l'interest aussi de mondit  
le Chancelier. Toutesfois i'eus charge  
uy en donner bonne esperance, comme  
s par ledit sieur de Chemerault, dequoy  
me dit que ledit sieur de Dunes aduer-  
it son aîné.

VR ces entrefaites suruint la iournée des  
icades, qui nous fit partir de Paris &  
s retirer à Chartres, où bien-tost apres  
nous fusmes arriuez, ie ramenteus au  
cette pratique, & ie sollicitay d'écrire  
lettre de sa main pour cét effet audit  
d'Antragues, considerant que si nous  
uions recouurer ladite ville d'Orleans  
on moyen en la necessité où nous étions,  
nous n'estions encore asseurez de la vil-  
e Roüen) ce seroit vne retraite tres-ad-  
ageuse & propre pour sa Majesté.

Y A N T retiré ladite lettre, ie l'enuoyay  
de mes gens qui estoit à Orleans sous la  
erture d'autres affaires, pour la presen-  
audit sieur d'Antragues, avec vne autre

que ie luy écriuis à mesme fin, & luy fis donner esperance de le contenter sur les deux points susdits, s'il vouloit se resoudre de prendre le party de sa Majesté, & la loger & receuoir dans ladite ville d'Orleans.

A v mesme temps vn autre qui ne sçauoit rien de cette pratique, proposa à sa Majesté d'enuoyer deuers ledit sieur d'Antragues Desbarreaux habitant, & Thresorier de France en ladite Ville pour le pratiquer, par le moyen de sa femme, enuers laquelle il estimoit pouuoir beaucoup pour vn tel effet. Et veritablement ladite Dame s'estoit toujours monstrée tres-affectionnée au party de sa Majesté & à son seruice, & d'auoir grand regret de ce que son mary s'en estoit séparé. Ledit Desbarreaux eut charge de luy offrir vne notable somme d'argent sans luy parler toutefois de la Charge de mondit sieur le Chancelier, auquel cette depesche fut communiquée, comme elle fut à moy, qui dis au sieur Desbarreaux que ie craignois que son voyage ne mist les habitans dudit Orleans en desffiance dudit sieur d'Antragues, parce que sa personne leur estoit tres-suspecte, luy remontrant que cela aduenant, il osteroit le moyen audit sieur d'Antragues de traiter; ce qui ne le pût retenir d'aller, parce qu'il se promettoit de couler dans ladite ville, & conferer avec le sieur d'Antragues par le moyen de sadite femme, sans estre decouvert, & en tout cas quand il le feroit, que personne ne decouueroit, ny ne sçauoit l'occasion de sa venuë.

SOVDAIN que ledit Desbarreaux eut  
 ledit sieur d'Antragues, il m'enuoya  
 l'un des siens vne lettre, laquelle il me  
 fit de rendre au porteur d'icelle, apres  
 l'auoir leuë, comme ie fis; par laquelle il se  
 aignoit estrangement du voyage dudit  
 Desbarreaux, lequel il disoit auoir esté sus-  
 ceu par ses ennemis expressément, pour  
 faire perdre le credit en ladite ville, &  
 le desespoir en quoy le confirmoient les  
 propos qu'il luy auoit tenus, parce qu'il ne  
 luy auoit parlé que d'argent, au lieu du  
 Gouvernement duquel ie luy auois déjà don-  
 né l'esperance, & sans l'assurance duquel il  
 ne pouloit ny pouuoit entendre à aucun ac-  
 tion; au demeurant qu'il auoit aduisé pour  
 de luy toutes sortes d'ombrages aux  
 habitants de ladite ville, de leur permettre  
 d'changer les Magistrats d'icelle à l'exem-  
 ple de ceux de Paris, esperant qu'il y en lo-  
 ueroient qui seroient du tout à sa deuotion, &  
 le moyen desquels il pourroit tousiours  
 se disposer de ladite ville.

YANT receu ladite lettre, i'en aduer-  
 tis le Roy, & le Roy au Roy, qui se repen-  
 dit d'auoir enuoyé ledit Desbarreaux, & me  
 manda d'écrire audit sieur d'Antragues  
 qu'il ne s'arrestast à luy, mais qu'il aduisast  
 quel moyen l'on pourroit bien-tost con-  
 clure ce marché au contentement de sa Ma-  
 jesté & au sien, & de luy renouveler l'espe-  
 ranse du Gouvernement.

ETRE cette réponse que ie luy fis par  
 le porteur que m'auoit enuoyé; ie fis que le

Roy commanda au sieur de Rhodes son cousin, qui s'en retournoit en sa maison pour aller donner ordre à son equipage, pour reuenir trouuer sa Majesté, pour luy seruir comme il a tousiours fait fort fidelement en toute occasion, de passer par ladite ville d'Orleans, sous pretexte de visiter sondit Cousin, luy confirmer lesdites promesses, & nous éclaircir du chemin qu'il falloit tenir pour aduancer la resolution dudit Traitté, qui importoit grandement au seruice de sa Majesté.

DE VOY il fit tres-bon deuoir, nous mandant qu'il auoit trouué ledit sieur d'Antraques en tres-bonne disposition; mais que pour bien faire & ne donner ialousie aux habitans dudit Orleans, ausquels le voyage dudit Desbarreaux auoit apporté déjà vn grand ombrage, falloit aussi adresser cette negociation au sieur de Dunes qui estoit à Paris, lequel auoit tout pouuoir enuers son aîné.

LE mesme aduis & conseil nous fut donné par le sieur de Schomberg, & par le sieur de Chemerault qui estoient bons amis dudit sieur de Dunes, & ausquels il auoit decouvert la volonté qu'il auoit de traiter; ce qui fut cause que ie suppliy sa Majesté d'envoyer à Paris ledit sieur de Schomberg, sous couleur d'aller assister la Reine sa Mere, mais expressement pour parler audit sieur de Dunes: ce que sa Majesté trouua bon, & pareillement pour aduancer l'affaire, & pour conuertir ledit sieur de Dunes à ce faire, & sans perdre temps de luy bailler vne promesse



par écrit qu'il emporta, signée de la main de sa Majesté, & contresignée de la mienne, le pourvoir ledit sieur d'Antragues en chef dudit Gouvernement, & ledit de Dunes de la Lieutenance, & pareillement d'une compagnie de cinquante hommes d'armes; en s'obligeans par promesses signées de leurs mains, & cachetées du seel de leurs armes, de se departir de toutes ligue, associations & pratiques qui seroient desagreables à sadite Majesté, & la servir à l'aduenir de leurs personnes, & pareillement de ladite ville d'Orleans, & de toutes celles dudit Gouvernement, enuers & contre tous, sans nuls excepter ny reseruer.

LEDIT sieur de Schomberg s'en estant allé avec cette promesse, ie fus d'aduis encore de le faire suiure par ledit sieur de Chermereault, qui auoit tres-grande enuie que ce marché reussist selon l'intention de sa Majesté, pour le bien & aduantage qu'il reconnoissoit qu'elle en retireroit, afin d'y eschauffer tousiours dauantage ledit sieur de Dunes.

LEQUEL fit réponse audit sieur de Schomberg, ainsi qu'il nous manda apres auoir veu par écrit l'intention de sadite Majesté, qu'il estoit besoin qu'il en aduertist son aîné deuant que de faire autre chose.

SUR ces entrefaites, sa Majesté s'achemina à Mante & à Vernon, & aduint que le iour mesme que ie partis dudit Vernon, pour m'acheminer à Paris, pour la negociation de ladite paix, estant ja à cheual, Monsieur

Bruslart m'enuoya par vn des siens vn paquet dudit sieur de Schomberg , dedans lequel estoit la réponse que ledit sieur de Dunes luy auoit faite de la part de sondit frere, qui contenoit ce qui s'ensuit.

PREMIEREMENT, vn remerciement de la faueur que sa Majesté leur voulut faire, d'accorder en chef audit sieur d'Antragues le Gouuernement du Duché d'Orleans , avec mesme puissance & autorité que sa Majesté l'auoit accordée à M. le Chancelier , sans aucune moderation ou restriction.

ASSEVRANT sadite Majesté qu'en reconnoissance de ce bien , il estoit prest & resolu de la receuoir toutes & quantes fois qu'il luy plairoit en ladite ville d'Orleans , & luy rendre toute honneur, seruice & obeïssance qu'un tres-humble sujet doit à son Prince.

ITEM, de luy donner assurance par vn solennel serment qu'il feroit entre les mains de sa Majesté, de se departir dès à present comme pour l'aduenir, de toutes ligues, pratiques, associations , obligations & intelligences qui luy seroient desagrecables , auxquelles il renonçoit , tres-resolu de n'auoir iamais autre volonté, passion ou affection que ce qui concernoit le bien de son seruice, & l'accroissement & conseruation de son autorité, offrant de faire ses Pasques, & receuoir le saint Sacrement , pour plus grande assurance de ce que dessus.

M A I S qu'il supplioit sa Majesté de se contenter dudit serment & de sa parole, sans desfermer ladite promesse par écrit, que sadite Ma-

esté luy auoit fait demander, parce que semblable obligation écrite ne pouuoit apporter plus de feureté que la parole & foy d'un homme d'honneur, & aussi qu'elle presupoit quelque deffiance.

IL supplia aussi sa Majesté, à cause de la peur & du soupçon que quelques-vns des habitans de ladite ville auoient de sadite Majesté, d'auoir agreable & trouuer bon que lors qu'elle entreroit en ladite ville, il luy pleust se contenter d'y entrer avec sa Cour & Noblesse, sans autre force ou gens de guerre: protestant qu'il ne luy faisoit telle requeste pour luy prescrire son train; mais pour chasser par le témoignage de sa bonne volonté & confiance des cœurs desdits habitans, la crainte & la peur qu'on leur auroit imprimée de l'indignation de sa Majesté.

Ayant leu ladite réponse estant à cheval, ie me resolus de n'arrester pour le faire entendre à sa Majesté, pource que ie sçauois qu'elle trouueroit mauuaises ces deux restrictions proposées par icelle; l'une touchant cette promesse que sa Majesté auoit demandée, & l'autre de son entrée en ladite ville d'Orleans, seulement avec sa Cour & Noblesse, pour la deffiance que sa Majesté auoit dudit sieur d'Antragues, à cause des choses passées; joint que i'auois pris congé de sa Majesté, laquelle m'auoit commandé de monter à cheval, & partir sans voir personne: ie me resolus de porter à Paris cette réponse pour en conferer moy-mesme avec le sieur de Dunes, & voir si ie pourrois faire

changer lefdites reſtrictions.

S V I V A N T quoy, ie ne faillis à voir ledit ſieur de Dunes ſur ce ſuiet, duquel i'appris encore vne autre difficulté que ie n'auois comprise par ladite réponſe, qui eſtoit, que ſon dit frere entendoit eſtre pourueu non ſeulement dudit Gouuernement en chef du Duché d'Orleans, comme il ſembloit qu'il ne pretendiſt autre choſe par ladite réponſe, mais auſſi du païs Chartrain, de Blois, Amboiſe & Loudunois, tout ainſi & en la forme que mondit ſieur le Chancelier eſtoit pourueu dudit Gouuernement; dequoy ie fus fort eſtonné & marry, parce qu'il n'auoit iamais fait autre inſtance que d'eſtre deſchargée de l'autorité & puissance que mondit ſieur le Chancelier auoit ſur eux, & que leſdits païs Chartrain, Blaiſois & Loudunois eſtoient ſeparez du Duché d'Orleans; ie luy parlay auſſi des deux autres points, mais ie ne peus rien conclure avec luy, me diſant que ſon aiſné auoit touſiours crû que les choſes paſſeroient comme il les expliquoit, & qu'il ne bailleroit pas volontiers ladite promeſſe par écrit, n'y d'introduire le Roy dedans ladite ville pour la premiere fois, avec ſa garde de gens de pied; mais qu'il feroit que ſon dit frere ſe trouueroit à Paris quand ie reuiendrois, avec lequel ie pourrois reſoudre, & que de ſon coſté il faciliteroit les choſes. Voila donc à mon grand regret tout ce que ie pûs faire avec ledit ſieur de Dunes en ce premier voyage, pour le regard de ladite ville d'Orleans.

ESTANT retourné vers le Roy, que ie trouuay en la ville de Rouën; ie suppliay sa Majesté auoir agreable que ie luy rendisse conte de tout ce que i'auois fait, negocié & rapporté en la presence de tous ceux de son Conseil, tout ainsi que ce qui estoit passé à Paris auoit esté traité en la presence de la Reine sa mere, de la Reine, & de tous ceux qui estoient auprès de leurs Majestez, pour l'importance de la matiere & pour ma descharge: ce que sa Majesté m'accorda.

DE sorte que ie fis rapport à sadite Majesté en plein Conseil de tout ce qui s'estoit traité, leur représentant par écrit les demandes desdits Princes & de leurs adherans, ensemble ce que nous leur auions répondu & remonstré sur icelles en les receuant: sa Majesté fit écrire son intention sur chacun article d'icelles audit Conseil par Monsieur Brûlart; ce qui me seruit d'instruction au second voyage qu'elle me commanda de faire pour poursuiure ladite negociation.

SEULEMENT ie rendis compte à part à sadite Majesté, de ce que i'auois appris du pouuoir que la Reine sa mere luy auoit écrit, que l'on demandoit qu'elle donnast à Monsieur de Guise sur les armées de ce Royaume, conioint à son estat de grand Maistre, que l'on presupposoit deuoir estre accordée avec les mesmes fonctions & authoritez d'un Lieutenant general, ou Connestable de France, desquelles charges sadite Majesté me commanda de luy représenter les prouisions & pouuoirs ordinaires pour en mieux iuger

& ordonner, afin de n'en faire legerement: & parce qu'au moyen de nostre délogement de Paris en haste, ie ne m'estois chargé de mes Registres ordinaires, où estoient lefdits pouuoirs; sa Maiesté me commanda de les luy apporter quand ie reuiendrois, & cependant dire à la Reine sa mere, pour aduancer tousiours cette negociation, de laquelle l'on disoit sous main, que l'on ne tireroit iamais le bon mot de Monsieur de Guise, qu'il ne sçeuſt ce que le Roy luy resoudroit de faire pour son particulier, que sa Maiesté estoit fort contente de faire depescher audit Duc de Guise vne declaration, portant pouuoir affecté à sa personne de commander comme grand Maistre sur les Armées, dont on enuoyeroit puis apres la forme, sans s'expliquer dauantage: voila ce qui me fut baillé & ordonné par sa Maiesté pour instruction particuliere & secrette sur ce fait, dont ie rendis conte à ladite Dame Reine mere du Roy à mon arriuée à Paris.

LE Roy ayant aussi entendu à part par moy les difficultez que m'auoit faites ledit sieur de Dunes, au moyen de son frere pour le fait d'Orleans, les trouua mauuaises & mal fondées, & toutefois me permit pour les surmonter de leur offrir & accorder de sa part & en pur don vingt mil escus, outre & par dessus ce qu'il leur auoit desia fait offrir.

EN ce deuxiême voyage ie suiuis le mesme ordre que i'auois tenu au premier, toutes choses furent traitées & debattuës en plein Conseil & par écrit, pour le regard du ge-

neral, dont les particularitez seroient trop longues à représenter : mesme ie suppliy la Reine mere du Roy d'y appeller Messieurs les Presidens de la Cour qui s'y trouuerent vne fois ; mais ceux ausquels nous auions à faire le trouuerent mauuais, de sorte que ladite Reine mere fut conseillée de ne les y appeller plus.

LADITE Dame fut d'aduis de n'engager point le Roy de promesse pour le regard dudit pouuoir de Monsieur de Guise ; mais seulement luy dire, que le Roy l'approcheroit de sa personne, & se seruiroit de luy dignement, la paix estant faite, ce qui fut suiu.

LEDIT sieur d'Artragues se trouua à Paris, où il se comportoit de telle façon avec Monsieur le Duc de Guise, que luy & les siens en auoient tres-grande deffiance : ie parlay à luy pour luy faire entendre l'intention & les raisons du Roy, sur les demandes & difficultez qu'il auoit faites ; dauantage, ie luy fis offre pour luy & son dit frere desdits vingt mille escus ; mais ie le trouuay si resolu & difficile à se contenter, que ie me departis d'avec luy, tres-mal edifié, & m'en plaignis au sieur de Chemerault son Cousin, qui estoit Lieutenant de sa Compagnie de gens-d'armes, & depuis aux sieurs de Schomberg, & de Dunes ; & ce qui m'en faschoit & mettoit encore plus en peine, estoit que ie voyois Monsieur de Guise resolu de demander ladite ville d'Orleans pour ville de seureté, & de ne faire paix si elle ne luy estoit accordée, par où la pratique que i'auois avec ledit sieur

d'Antragues, & tous les moyens de seruir le Roy, s'en alloient en fumée; toutefois ie fus contraint de partir de Paris sans rien conclure avec ledit sieur d'Antragues.

I E retournay vers le Roy luy rendre conte de ce que i'auois negocié en ce second voyage, dequoy ie m'acquittay ainsi que i'auois fait la premiere fois, où toutes choses furent debattuës, représentées, considérées, ordonnées & recueillies par écrit par le sieur Brûlart; entr'autres choses ie fis entendre l'instance qu'on faisoit d'auoir Orleans pour ville de seureté, avec Bourges, & fut resolu & à moy baillé par écrit, qu'elles leur seroient accordées, si on ne les en pouuoit faire departir, les instructions qui me furent données font foy de ce que dessus.

I E receus à mon arriuée à Roüen vne lettre dudit sieur d'Antragues, par laquelle il me manda, qu'ayant depuis mon partement mieux pesé ce que ie luy auois dit & remonstré de la part du Roy, il s'estoit resolu à condescendre à faire tout ce que ie luy auois dit, que sa Maiesté vouloit de luy, & me prioit de mettre fin à ces affaires que i'auois si bien acheminées, s'en fiant & reposant du tout sur moy, qu'il reconnoissoit aimer plus son bien que luy-mesme. Ce qu'il accordoit donc étoit, d'accepter le Gouuernement en chef de Duché d'Orleans, la Lieutenance pour son frere, & vne Compagnie de cinquante hommes d'armes, & les vingt mil escus, & de bailler par écrit la promesse que le Roy auoit demandée: ce que ie fis entendre à sa Maiesté



deuant qu'elle eust resolu ma dépesche, pour sçauoir si par l'occasion du traité dudit sieur d'Antragues, il aduenoit que nous ne peussions faire departir ceux de la Ligue de la demande qu'ils faisoient d'auoir Orleans pour ville de seureté; nous romprions le traité general de la paix, ce qu'elle n'entendoit pas.

Ie fis voir aussi à sa Majesté vn pouuoir du Connestable de France, & vn autre du Lieutenant general, representant la personne du Roy par tout le Royaume: de ces deux pouuoirs, sa Majesté me commanda de tirer ce dont fut composé celui qui fut baillé audit sieur Duc de Guise, que sa Majesté auoit fait lire, ou leu elle-mesme, & corrigé par trois fois, comme il appert par la minutte que i'ay reseruée; puis l'ayant mis au net, il le signa, & avec tout cela me renuoya à Paris pour la troisième fois.

Où ie me trouuay plus empesché que iamais, pour les difficultez nouvelles qui nous estoient faites; sur tout ie le fus pour le fait d'Orleans: car plus i'en voulois éloigner & détourner Monsieur de Guise, plus s'y opiniastroit-il: ie proposay que le Roy donneroit aux sieurs d'Antragues & de la Chastre, la suruiuance de leurs Gouvernemens pour leurs enfans, & que l'on ne rendist point pour villes de seureté celles d'Orleans & Bourges, qui estoient sieges d'Archeuesché & Euesché; & que c'estoit chose qui n'auoit point encore esté faite; & combien que telles ouuertes fussent plus aduantageuses, & pour le parti-

culier desdits sieurs de la Chastre & d'Antragues, & mesme pour ceux de la Ligue, toutesfois ils n'y voulurent entendre. Sur cela ie fis dire audit sieur de Dunes que son frere & luy deuoient faire parler les habitans d'Orleans, & leur faire dire que ladite ville leur fera baillée pour ville de seureté: Mais ie trouuay qu'ils auoient faite de credit enuers eux, pour leur faire faire ledit office: ie dis doncques alors qu'il falloit que ledit sieur d'Antragues fist les mesmes protestations, & obtint que ceux de la Ligue se departissent de leurs demandes, puis que pour mes raisons ils n'en vouloient rien faire, & que nous étions accrochez à ce point: lesdits sieurs d'Antragues & de Dunes ne furent d'aduis non plus de faire ladite protestation, de sorte que tous moyens & inuentions pour gagner ce poinct me manquerent; ledit sieur de Schomberg sçait ce que ie luy en dis, & commençant à dresser l'article, qui faisoit mention de l'octroy desdites villes, ie m'aduifay de le coucher de telle façon, que quelque iour il pourroit seruir de fondement d'y changer quelque chose.

A v troisiéme voyage nous demeurasmes d'accord de toutes choses avec ceux de la Ligue pour ladite paix, & mesmes du fait du Havre de Grace, qui auoit esté demandé de surcroist pour eux; depuis le traité le Gouverneur d'icelle s'estant ietté au party quelques iours deuant, de sorte que les articles de ladite paix furent signez de part & d'autre, lesquels ie fus porter à sa Majesté, qui les

confirma & ratifia aussi-tost, apres les auoir fait lire en son Conseil.

Je dis aussi à sa Majesté comme la Reine sa mere, & moy avec elle, auions leu à Monsieur le Duc de Guise, apres l'accord & signature desdits articles, la minutte du pouuoir que sa Majesté auoit aduisé de luy accorder, lequel m'auoit donné charge d'en remercier sa Majesté; & neantmoins le supplier d'auoir agreable qu'il ne l'acceptast point, ains seulement qu'il le seruist de son estat de grand Maistre, duquel il se sentoit fort honoré, & ne luy demandant pour son particulier que l'assurance de sa bonne grace puis qu'il auoit pourueu au public, ainsi que luy deuoient plus particulièrement faire entendre Messieurs l'Archeuesque de Lion & de la Chastre, qui deuoient le lendemain arriuer vers sadite Majesté, laquelle me répondit resolument, qu'elle vouloit que ledit sieur de Guise prist ledit pouuoir, & qu'elle confirmast encore ausdits sieurs, & écriuist vne lettre de sa main tres-expresse audit sieur de Guise, de laquelle furent porteurs lesdits sieurs Archeuesque de Lion & de la Chastre; & neantmoins lesdites lettres de pouuoir & declaration ne furent mises au net, signées, seellées, ny déliurées audit sieur de Guise, que iusques à leur entreueuë à Chartres, que quelques-vns en auoient dégousté sa Majesté, & luy auoient fait trouuer mauuaise l'autorité qu'elle auoit accordée par icelle audit sieur de Guise, les vns par ialousie qu'ils luy portoient, les autres parce que c'estoit chose qui diminuoit aucunement

L'autorité & puissance de leurs Estats , & la plus grande partie, parce qu'ils connoissoient que sa Majesté ne pouuoit oublier le mal talent qu'il portoit audit Duc pour luy complaire , l'animer & irriter dauantage contre luy.

DE façon que sa Majesté mit vn iour en deliberation de retrancher ledit pouuoir deuant que de le déliurer , dequoy elle fut déconscillée par ceux ausquels elle en parla, qui luy remonstrent, que puis que c'estoit chose qu'elle auoit desia accordée audit Duc pour le bien de la paix , que la coppie luy en auoit desia esté leuë & baillée , elle n'en pouuoit rien oster sans faire tort audit Duc , & à la foy donnée pour ladite paix , qui auoit trop cousté à faire , & dont l'observation importoit grandement à ses affaires ; joint que ledit Duc qui sçauoit les trauerses qu'on luy donneroit en ce fait , se laissoit desia dire n'auoir pû faire qu'à l'appetit de tels enuieux, on ne luy fist recepoir telle escorne ; surquoy sa Majesté se resolut , & commanda ledit pouuoir estre déliuré audit Duc de Guise, comme il fut fait ; mais on a dit depuis qu'elle fit ce commandement avec tel regret, qu'elle resolut delors de chasser d'aupres d'elle , ceux qui luy auoient donné tel conseil, & ne l'auoient secondee en la volonté qu'elle auoit de le retrancher.

IL faut noter encores de ce traicté , que iacoit que les principales & plus aigres plaintes que ceux de la Ligue auoient fait de leurs mécontentemens, & ausquels ils requeroient

plus viuement estre pourueu; eussent esté fondez sur la personne, l'autorité & les charges dudit Duc d'Espernon, comme il appert par leurs écrits: toutefois dautant que sa Majesté me l'auoit ainsi recommandé & enioint tres-expreslement; ie fis tant, qu'en tout ce qui fut mis par écrit, il n'en fut fait aucune mention; mais que l'on se contenta de remettre à sa Majesté d'y pouruoir elle-mesme, comme elle leur auoit fait dire & promettre qu'elle feroit; dequoy certes il faut que ie die, que ie trouuois ledit sieur de Guise plus fauorable & moderé que nul autre, non tant pour en auoir occasion, que pour ce que ie luy auois remonstré qu'il feroit en ce faisant seruice tres-agreable au Roy.

Les Deputés de ladite paix témoigneront assez le deuoir que ie fis, & le soin que i'en eus, pour l'honneur & obeïssance que ie portois à tous les commandemens de sa Majesté, & pour le desir que i'auois aussi d'éteindre toutes les estincelles qui pouuoient seruir avec le temps à rallumer le feu de discorde entre ses sujets & seruiteurs Catholiques, pour la consideration seule de l'honneur de Dieu & du seruice de sa Majesté, dont dependoit le bien du Royaume.

Et toutefois ie fus souuent aduertty durant la negociation de la paix, & depuis la conclusion d'icelle, que ledit Duc estoit tres-mal content; & iusques-là qu'il escriuit à quelqu'un de ses amis en Cour, qu'il m'en feroit repentir & perdre la vie; dequoy ie ne m'émeus gueres, parce que ie sçauois qu'il n'a-

uoit occasion quelconque de se prendre à moy de ce qui s'estoit passé, ny de la deffiance de son Maistre, qui estoit ce qui l'irriteroit le plus, d'autant que ie n'auois esté que Ministre de sa Majesté à tres-bonne fin & intention; & mesme que i'auois eu tel soin de sa reputation, qu'il n'auoit esté rien écrit contre luy, & aussi que ie me confiois que i'auois pour bon témoin & protecteur de mon innocence sa Majesté, qui scauoit comme toutes choses auoient passé

LE Roy estant à Vernon, par où il passa reuenant de Roüen à Mante où se deuoient trouuer les Reines, il m'enuoya querir exprés, pour se plaindre d'un aduis qui luy auoit esté donné, que ledit Duc d'Espernon se vouloit aller ietter dedans la ville d'Angoulesme pour s'en saisir, & me commanda d'écrire des lettres en son nom au sieur de Tayan, aux habitans de la ville, au Lieutenant general d'icelle, & au Capitaine de la Citadelle, de ne receuoir personne en ladite ville qui leur peust donner loy, de quelque qualité qu'il fust, iusques à ce qu'il leur apparust d'un commandement de luy, postérieur ausdites Lettres que sa Majesté au deffaut d'un valet de chambre commanda d'enuoyer par courrier exprés, comme ie fis incontinent & fidellement, ainsi que i'auois accoustumé les commandemens de sa Majesté.

LE Courier arriua à Angoulesme trois iours apres que ledit Duc y eust esté receu, auquel les lettres du Roy furent portées, dont il s'irrita & s'offença grandement, & s'en prit

à moy , disant que i'auois esté autheur desdites lettres , & en fit vne tres-grande plainte à sa Majesté, qui luy manda les auoir commandées, & les raisons qui l'auoient meu à ce faire. Lesdites lettres ayant esté veuës du Maire & des habitans d'icelle ville , furent cause qu'ils depeschèrent bien-tost apres l'un de leurs Citoyens, beau-frere dudit Maire , en Cour , lequel eut charge de s'adresser à moy; parce que ladite ville d'Angoulesme estoit de mon département , que les lettres dernieres que le Roy leur auoit écrites estoient contresignées de moy , aussi qu'ils auoient quelque creance en moy pour m'auoir tousiours reconnu tres-affectionné à leur bien, & au seruice de sa Majesté: Il se presenta comme nous estions à Chartres, & me dit que lesdits Maire & Escheuins ayans veu lesdites lettres de sa Majesté, estoient entrez en doute si c'estoit son intention , ou non , que ledit Duc d'Espernon fist sa residence en leur ville , en laquelle ils protestoient qu'ils ne l'eussent iamais receu, s'ils n'eussent pensé faire seruice à sa Majesté, comme ledit Duc leur auoit fait apparoir par vn pouuoir que sa Majesté luy auoit donné de commander en leur ville & au pais , & qu'il auoit esté depesché exprés par eux pour en estre éclaircis , d'autant que si sa Majesté ne trouuoit bon ce qu'ils en auoient fait , ils pourroient encore reparer leur faute , en fermant la porte de leur ville vn matin qu'il seroit sorty dehors pour aller courre la bague, comme il faisoit souuent , laissant la garde des portes ausdits habitans, qui estoient beau-

coup plus forts dans la ville, que n'estoit ledit Duc avec tous ses gens, & qu'ils pouuoient aussi pour mieux asseurer & executer ladite entreprise, se saisir de la personne du Capitaine de la Citadelle, sinon la circuir, & enuironner par dehors par vn bon nōbre de Gentils-hommes du païs qui estoient à leur deuotion, afin de garder que le secours n'y entraist, pendant qu'ils forceroient ladite Citadelle par le dedans de la ville, comme ils disoient pouuoir faire facilement. Ayant entendu ce propos, ie luy demanday qui il estoit, & s'il auoit quelques lettres; & m'ayant donné connoissance de sa personne par le moyen du courrier qui auoit porté à Angoulesme les susdites lettres de sa Majesté; & sur ce, dit, qu'il ne s'estoit osé charger d'aucunes lettres de peur d'estre pris en chemin: ie luy dis que l'ouuerture qu'il m'auoit faite de l'occasion de son voyage, estoit de telle importance, qu'il estoit necessaire que i'en parlasse au Roy auant que d'y répondre, & partant qu'il eust à me venir trouuer le lendemain de bon matin.

Ie fus le soir mesme trouuer sa Maieité, tant pour la remercier de ce que la Reine sa mere m'auoit dit qu'elle luy auoit accordé & promis de me descharger de l'exercice de mon office de Secretaire des Commandemens, suivant la supplication que ie luy en auois faite, ainsi que ie diray cy-apres, avec tout ce qui s'est passé en ce fait, que pour luy faire entendre les propos que m'auoit tenu ledit habitant d'Angoulesme, lequel sa Maieité fit demonstration d'écouter volontiers, pour le



mécontentement qu'elle auoit de ce que ledit Duc estoit allé en ladite ville , ainsi que sa Majesté disoit , contre son commandement, se promettant d'en auoir sa raison par lesdits habitans: Et en ce faisant , faire paroistre & sçauoir audit Duc & à tous autres , combien vn Roy a les bras longs ; & est foible toute autre puissance en son Royaume sans la sienne, me disant qu'il vouloit parler luy-mesme audit habitant sans que personne en sçeust rien; dont il me chargea expressément , & à cette fin le luy amener le lendemain de bon matin, comme ie fis.

E r l'ayant introduit dans le cabinet de sa Majesté , où il n'y auoit personne que moy, il luy rapporta & confirma les mesmes propos qu'il m'auoit tenus de la part desdits Maire & habitans , desquels sa Majesté luy declara estre fort contente , & leur sçauoit tres-bon gré , luy disant qu'elle les auoit tousiours reconnus tres-gens de bien , aimans Dieu & son seruice , & qu'elle louoit la resolution qu'ils auoient prise d'enuoyer deuers elle pour estre éclaircie de la verité sur l'entrée & demeure dudit Duc en ladite ville, laquelle sa Majesté vouloit qu'ils sçeuissent luy auoir esté desagreable , comme ayant esté entreprise par ledit Duc contre son commandement , & en saison qu'il auoit eu occasion de se deffier de luy & de ses actions ; parce qu'il monstroir estre par trop indigné de ce que sa Majesté auoit fait la paix , par laquelle elle auoit accordé qu'il se dépouilleroit d'une bonne partie de ses Charges , & spécialement des Gou-

uernemens qu'il auoit, & qu'il sembloit que Dieu auoit conduit expressement ledit Duc en ladite ville, & auoit enuoyé à sadite Majesté cette occasion, pour luy donner moyen de pouruoir à ce coup, puis que ledit Maire & habitans auoient le moyen & la volonté d'executer ce qu'elle leur commãderoit: Mais que ce n'estoit assez faire pour son service que de chasser & faire sortir ledit Duc d'Espernon de ladite ville, comme il luy auoit proposé, qu'il falloit que lesdits Maire & habitans ses bons subjets & seruiteurs se faissent de luy, sans toutesfois faire mal à sa personne, afin que le tenant en sa disposition, il peust recouurer ses villes de Mets & de Boulogne qu'il ne vouloit rendre, & le faire contenter du Gouvernement de Prouence, qu'il auoit aduisé de luy laisser. Quoy faisant, lesdits Maire & habitans luy feroient ensemble à la Religion Catholique & à tout son Royaume, vn seruice tres-signalé, que sa Majesté reconnoistroit à iamais, luy demandant si lesdits habitans n'auroient pas le courage & le pouuoir de luy faire ce seruice qu'il auoit fort à cœur, & qui les importoit aussi grandement; parce que si ledit Duc demeueroit long-temps en leur ville, tout ainsi qu'il s'entendoit avec le Roy de Nauarre & les Huguenots, il estoit à craindre qu'il ne les mist avec le temps entre leurs mains, qui estoient leurs ennemis. A quoy il luy fut répondu par ledit habitant, que lesdits Maire & ses concitoyens auoient tousiours eu le courage de mourir pour executer ses commandemens, lesquels il leur

rapporteroit tres-fidèlement , & que sa Majesté en-oïroit bien-tost parler. Et comme il auoit esté enuoyé sans apporter aucune lettre, il fut aussi renuoyé sans en remporter , & prit congé de sa Majesté en cette façon , laquelle luy commanda de déloger à l'heure mesme, afin de n'estre decouuert.

T O V R E F O I S ledit habitant me vint encore trouuer en mon logis , pour me dire que depuis estre party d'auprès du Roy , il auoit mieux examiné & considéré le commandement que sa Majesté luy auoit commis , lequel il craignoit ne pouuoir estre executé sans coup ferir , d'autant qu'il estimoit que ledit Duc se mettroit en deffence quand on le voudroit prendre. Quoy aduenant , il desireroit volontiers sçauoir ce qu'ils auroient à faire contre ledit Duc. A quoy ie luy répondis, que c'estoit chose qu'il deuoit auoir demandé luy-mesme à sa Majesté, quand elle luy auoit fait ledit commandement. Mais ce que ie luy pouuois dire sur ce, estoit que le Roy luy auoit expressement commandé ne faire aucun mal à la personne dudit Duc ; de sorte que i'estimois, quant à moy , que s'ils ne s'en pouuoient saisir sans crainte d'estre offencez , ou de l'offencer, qu'il seroit plus à propos qu'ils se contentassent de luy fermer la porte de la ville, lors qu'il en seroit hors , comme il auoit proposé qu'ils pouuoient facilement & sans danger de personne , ny de leur vie, qui estoit tout ce que ie luy pouuois dire sur la difficulté qu'il m'auoit proposée, & que s'il en vouloit derechef

parler au Roy, pour en estre mieux éclaircy & assuré, que i'en aduertirois sa Majesté. Surquoy m'ayant dit qu'il craignoit que son sejour le fist découurir, il se resolut de s'en aller.

VOILA la verité de tout ce que i'ay sceu & a passé par mes mains touchant ce fait, & fais iuges mes amis & tout le monde si ie m'y pouuois conduire autrement; s'estant ledit habitant adressé à moy, comme il auoit fait.

IE ne veux point parler de ce qui est aduenu de ladite entreprise, des propos qui ont esté tenus sur le suiet d'icelle; mais ie veux bien croire & ose dire avec verité, que ledit Duc d'Espernon a depuis suffisamment reconnu par diuers effets & témoignages, que la mal-veillance que le Roy luy portoit, ne procedoit de moy, ny de mon inuention & persuasion, dont aussi i'appelle Dieu à tefmoin. Veritablement i'ay souuent blasmé plusieurs choses que ledit Duc faisoit quand il estoit aupres du Roy, & ne les ay teues à luy-mesme: Et pleust à Dieu qu'il eust voulu croire Monsieur de Bellièvre & moy; ie suis assuré que le Roy, le Royaume, & luy-mesme s'en fussent beaucoup mieux trouuez qu'ils n'ont fait, & ne feront de ce qui est aduenu; mais les flatteurs qui sont les vrayes pestes & ennemis des Roys & des Grands, l'ont tousiours emporté par dessus les gens de bien, tant est forte & puissante l'industrie coniointe à la nature.

ESTANT à Chartres ie receus encores

une lettre dudit sieur de Dunes par les mains du sieur de Schomberg du 27. de Iuillet, par laquelle il me mandoit m'enuoyer la promesse susdite de son aîné & de luy, que ie leur auois demandée de la part du Roy, & ne l'auoit pû recouurer que depuis deux iours. Et afin que l'on sçache qu'il n'estoit point si mal content de ce que i'auois fait & poursuuy pour son frere & pour luy en cette occasion, cōme l'on m'a depuis voulu faire croire qu'il l'auoit publié; i'ay bien voulu icy transcrire la mesme lettre dudit sieur de Dunes, pour me seruir de descharge où besoin fera, & à luy de réponse s'il s'est plaint de moy.

*S'ensuit donc la teneur de ladite  
Lettre.*

M O N S I E V R,

Mon beau-pere s'en retournant trouuer le Roy, ie l'ay supplié de se charger de la promesse que vous auez désiré de mon frere d'Antragues, laquelle i'ay depuis deux iours recouuerte, & la vous presente avec cette lettre, que vous receurez, s'il vous plaist, pour me ramenteuoir en vostre bonne grace, & vous asseurer de la fidelle volonté que i'ay de vous faire seruice, & non pour vous importuner & presser de l'effet que vous nous auez à tous deux procuré; vous priant tres-humblement de croire, que si tous les bons offices qu'auuez departis à beaucoup de per-

sonnes de toutes qualitez, auoient rencontré des ames aussi peu ingrates, que le seront pour iamais enuers vous celles des deux freres, que ie ne sçache Seigneur en France, qui ait plus acquis d'amis & de seruiteurs, ny qui en eust de plus affectionnez que vous, Monsieur, à qui i'espere pour mon particulier faire connoistre que l'obligation que ie vous ay iointe à l'ancienne inclination que i'ay eüe toute ma vie à vous faire seruice, vous a acquis sur moy toute l'autorité & commandement que vous sçauriez desirer : dequoy ie me promets que Dieu me fera la grace quelque iour de vous en rendre témoignage. Je n'ay mis que le mois en ladite promesse, ayant laissé le iour en blanc, afin que comme vous le trouuerez le plus à propos, vous commandiez qu'elle soit remplie, ayant fait entendre sur ce sujet l'opinion de mondit frere à Monsieur de Schomberg, laquelle il vous descouurira, voulant finir apres vous auoir tres-humblement baisé les mains pour prier Dieu, Monsieur, qu'il vous donne en santé tres-heureuse & longue vie. De Paris, ce 27. Iuillet 1588.

PAR cette lettre écrite apres la conclusion & publication de la paix, apportée par ledit sieur de Schomberg qui auoit assisté ladite negociation, & auoit veu & sçeu tout ce que i'auois traité avec ledit sieur d'Antraques & son frere, chacun peut iuger s'ils estoient mal satisfaits de la peine que i'auois prise pour eux, ou non. A la verité aussi s'il y a eu faute en ce fait, elle a plus procedé  
de

de l'irresolution dudit sieur d'Antragues, & de la deffiance que ses actions passées luy faisoient auoir de la volonté du Roy en son endroit, & particulièrement du peu de pouuoir & peu de credit qu'il auoit dans la ville d'Orleans, que d'autre chose.

LE DIT sieur de Dunes arriua en ladite ville de Chartres, bien-tost apres que ladite lettre m'eut esté baillée par ledit sieur de Schomberg, accompagnant encore feu Monsieur de Guise, & me vint parler; & me le fit aussi commander par le Roy, de parler à Monsieur le Chancelier, pour auoir sa procuration du Gouvernement du Duché d'Orleans en faueur de son frere, & la luy faire remettre entre les mains du Roy, afin que sondit frere en peust estre pourueu. Veritablement ie luy dis, qu'il me sembloit pour le seruice du Roy, & le bien particulier de son frere & le sien, qu'il ne deuoit encores poursuiure ladite prouision, parce que i'estimois que ceux de la ligue s'y opposeroient, d'autant que ladite ville leur auoit esté delaissee pour leur seureté; quoy faisant le Roy seroit contraint passer par dessus leurs oppositions, ou bien y acquiescer, & que de l'un & l'autre party qu'il choisiroit, il pourroit plus aduenir de mal que de bien: parce qu'ils diroient que sa Majesté commenceroit desia de contreuenir à la paix si elle gratifioit ledit sieur d'Antragues dudit Gouvernement malgré eux: estant ainsi que la condition d'une ville de seureté, tiroit apres vne consequence, que ceux qui y commandoient fussent

agreables & confidens à ceux auxquels elle auoit esté delaisée & accordée par cét effect ; dequoy sa Maiesté se pourroit trouuer en peine, n'estant à propos ny vtile, si fraichement apres estre fortý d'un mal, tel qu'étoit celuy où nous auions esté, que nous entreprissions de faire chose qui nous y plongeast, incertains du bien qui en succederoit ; que s'il aduenoit aussi que sa Maiesté pour le bien general de ses affaires, fust contrainte de ne faire expedier ledit Gouuernement audit sieur d'Antragues, & à luy la lieutenance, que les dommages & la honte en tomberoient principalement sur eux, desquels ils seroient découuerts, tres-mal à propos pour eux, & le seruice du Roy ; luy remonstrant pour conclusion qu'il ne deuoit encore, à mon aduis, faire ladite poursuite, en luy offrant & à sondit frere la continuation de mon seruice & assistance lors que ie verrois qu'il seroit à propos de remuer cette pierre pour le seruice du Roy & leur contentement. Je m'apperceus que ledit sieur de Dunes n'auoit si bien pris le propos, comme certainement ie le luy disois de cœur & d'affection que ie luy portois, & à toute sa maison ; & parce que ie partis de la Cour deux iours apres pour venir en ma maison, ie ne puis respondre de ce qui s'est passé depuis pour ce regard, n'ayant eu connoissance ny communication quelconque d'un certain breuet, qui s'est trouué expedie dudit fait, & fais vn chacun iuge, si i'ay deu estre blasme de la façon de laquelle ie me suis conduit en cét affaire : &



si lesdits sieurs d'Antragues & de Dunes ont esté bien fondez de s'en plaindre; i'ay dequoy prouuer & verifier tout ce que i'en ay cy-deuant dit: l'on peut iuger aussi par l'issuë qu'a eu la precipitation desdits sieurs d'Antragues & de Dunes en la poursuite dudit Gouvernement, si i'auois raison ou non, de les en diuertir, tant pour le seruice du Roy, que pour leur propre bien.

Il y auoit quelque temps que ie desirois me faire décharger, sinon du tout, au moins en partie du labeur & du travail ordinaire de la charge que i'exerçois, tant pource que ma santé n'estoit si bonne & assurée depuis auoir eu la fièvre quarte, qu'elle estoit deuant, que pource qu'il me sembloit qu'à cause de la multitude & diuerses sortes d'affaires, dont i'estois surchargé, la Majesté n'estoit si bien diligemment seruie en toutes choses, que ie desirois, son seruice & le bien de ses affaires, m'ayant toujours esté recommandé plus que toute autre chose. Et faut que ie confesse que ce mien desir se fortifia & augmenta grandement, deslors que ie vis qu'il auoit esté permis audit Duc d'Espernon de m'outrager en la presence du Roy, sans raison ny fondement, ayant en toute ma vie esté aimé & protégé de mes maistres en les seruant fidèlement; & ce qui m'auoit encores plus picqué, c'estoit que ledit Duc m'auoit accusé & reproché en la presence de sadite Majesté, que i'auois fait, & faisois en ses affaires tout ce que ie voulois, sans que la Majesté sceust rien du tout de ce qui se passoit, dont elle auoit

fait si peu de conte de me faire raison, que par là ie iugeay, ou que sa Majesté le croyoit ainsi, ou qu'elle estimoit fort peu la reputation & l'honneur d'un homme de bien, qui estoit ce qui m'estoit le plus cher, & me faisoit bien souvent quitter le manger, le boire & le dormir pour la bien servir.

I E m'estois quelquesfois decouvert de ce mien desir à aucuns de mes principaux amis & parens, pour y estre fortifié de leur consentement & assistance, mais ils m'en diuertissoient tousiours plutôt qu'ils ne m'y confortoient tous, pour l'affection qu'ils me portoient, n'estimant pas que ce fust mon bien de me retirer si-tost de la Cour; quelques-vns pour leur interest, & les autres parce qu'ils me faisoient cét honneur de croire que i'estois encores utile en ma charge pour le service du Roy; Toutefois plus j'allois en avant, & considerois les choses qui se passoient en ce Royaume & à la Cour, & celles qui se preparoient, cette enuie m'augmentoit davantage.

C E qui me meut au second voyage que ie fis à Paris pour la paix d'en parler à Monsieur de Villequier, & le prier de me conseiller & secourir en cette occasion vers la Reine Mere du Roy, aupres de laquelle ses longs services luy auoient acquis autorité & creance, en quoy ie le trouuay de sa grace tres-disposé, & en parlay à ladite Dame, laquelle il trouua tres-desireuse de me faire tout plaisir, suivant sa bonté accoutumée enuers ses creatures, telle que i'estimois.

Monsieur de Villequier m'ayant assuré de la bonne volonté de ladite Dame, i'en remerciay sa Majesté, & la suppliay d'en faire naistre le fruit, quand elle reuerroit le Roy son fils : la suppliant de croire que ie ne pretendois demander autre recompense du seruice que ie luy auois fait, & pretendois faire tant que ie viurois, que ladite permission de me décharger de mon Office, & de me retirer en ma maison, avec la bonne grace de leurs Majestez, & en leur protection.

Mais comme à la Cour on interprete plütoſt en mauuaise part qu'en bonne, les actions d'un chacun, & ne peut-on croire qu'un Courtisan qui a esté employé aux affaires publiques, avec honneur & dignité, veuille iamais de son bon gré s'en départir, sinon à dessein d'obtenir mieux : Ladite Dame Reine, & plusieurs autres qui ouïrent parler de cette mienne deliberation & poursuite, creurent incontinent, ou que ie ne parlois à bon escient, ou que i'auois quelque autre pretention, dont ie ne me découurois, qui fut cause que ie dis à ladite Dame, que s'il plaisoit à leurs Majestez m'octoyant ma requeste estre encores quelquefois seruies de moy à la Cour; ie receurois à grand honneur qu'il luy pleust m'accorder, qu'estant à leur suite i'entraisse en leur Conseil d'Estat, & en celuy de leurs affaires; sinon, ainsi que faisoit mon grand pere en celles du Roy François I. au moins comme ie faisois tous les iours : dequoy madite Dame me promit d'en faire requeste à sa Majesté.

ELLE en parla à sa Majesté à Mante, ou leurs Majestez se virent la premiere fois apres que la paix fut accordée ; toutefois elle me dit qu'elle n'auoit peu obtenir du Roy qu'il me permist de me décharger de l'exercice de mondit office sans m'en dire autre raison : & parce qu'elle s'en retourna de là à Paris querir Messieurs le Cardinal de Bourbon & Duc de Guise, elle me promit qu'elle en parleroit derechef, lors que sa Majesté seroit à Chartres.

CE qu'elle fit d'elle-mesme, & sans en estre par moy sollicitée, ainsi qu'elle me fit l'honneur de me dire, & qu'elle auoit tant pressé le Roy qu'il m'auoit accordé ma requeste, dont ie fus tres-joyeux.

ET fus dès le soir trouuer sa Majesté pour l'en remercier, & luy faire entendre les raisons qui me mouuoient à faire ladite poursuite. Ce fut le soir mesme que i'ay dit cy-dessus que ie la fus trouuer pour luy parler de la venue du beau-frere du Maire d'Angoulesme.

Soudain que sa Majesté m'apperçeut dans sa chambre elle m'appella, & sans me donner loisir de parler à elle, commença à me dire la priere que la Reine sa Mere luy auoit faite pour moy, comme elle luy auoit répondu à la fin, qu'elle desiroit tant faire pour moy, & mesme en sa consideration, qu'elle condescendroît & accorderoit tousiours tres-volontiers tout ce que ie desirois, tant en cette occasion qu'en toutes autres : mais aussi qu'il falloit que i'eusse égard à son seruice, qu'elle auoit à present plus grand besoin de

ma presence en ma charge, qu'elle n'eut jamais, & mesmes en ses Estats qu'elle alloit tenir, où l'on traiteroit des affaires tres-importantes à sa personne & à son Estat, me donnant courage par ses paroles, pleines de tres-grande confiance & affection, de continuer à la servir audit Estat; surquoy ie luy representay les raisons qui me contraignoient à faire ladite poursuite, suppliant sa Majesté de ne croire que ce fust en intention de quitter son service, ny de demeurer inutile, & mesmes en l'assemblée des Estats, en laquelle ie luy promettois me trouver, & la servir de mon pouvoir; que i'estois de ceux qui seruoient de cœur & d'affection sa Majesté, comme i'y estois tres-obligé; & partant que ie voulois mourir à ses pieds, si telle estoit sa volonté, pourueu que ie fusse deschargé du faix trop pesant de l'exercice de ma charge qui commençoit à m'estre insupportable. Et voyant que ie ne pouuois obtenir que sa Majesté m'en déchargeast entierement, comme ladite Dame Reine m'auoit dit qu'il luy auoit accordé, ie m'aduisay au moins de la supplier me permettre que ie m'en déchargeasse d'une bonne partie sur le sieur de l'Aubespine Secretaire de ladite Dame, auquel sa Majesté auoit déjà en ma faueur accordé & fait expedier la suruiuance d'iceluy, & que nous pussions ensemble, estans à la Cour, expedier & signer les commandemens, afin que ie fusse soulagé: ce que sa Majesté m'accorda tres-volontiers, me commandant d'en faire expedier telles

lettres que ie connoistrois estre necessaires, comme ie fis incontinent, & luy en presentay la minutte afin qu'il luy plût de la voir, & la considerer à part; pour la faire apres changer ainsi qu'il luy plairoit: sadite Majesté retint & garda trois iours ladite minutte, auant que de me la rendre, puis me dit qu'elle l'auoit trouuée tres-bien de la sorte, & que i'eusse à la faire mettre en forme & expedier. Et parce que la grace que le Roy m'auoit faite fut incontinent diuulguée & sçeuë d'un chacun, le sieur de Beaulieu Ruzé, qui pretendoit tousiours d'estre fait quelque iour Secretaire d'Estat, s'en plaignit à sa Majesté, ainsi qu'il luy pleut me dire elle-mesme, & qu'elle auoit tres-volontiers permis audit Ruzé de se retirer en sa maison, & de se deffaire de tous ses offices, sur l'instance qu'il luy en auoit faite, fondée sur le mécontentement qu'il auoit de ce que sa Majesté m'auoit accordé, encores qu'elle luy eust fait cét honneur de luy remonstrer & faire entendre qu'il n'auoit aucune cause de ce faire: d'autant qu'elle ne creoit vn office nouveau, comme il s'estoit persuadé, mais me donnoit moyen seulement de me soulager, me faisant sa Majesté paroistre se soucier fort peu de la retraite dudit Ruzé, puis qu'il s'étoit si legerement & mal à propos débandé.

A V D I R temps le Roy me fit encores vne autre faueur, par laquelle il luy plût me témoigner sa bonne volonté, & le soin qu'elle auoit de moy & des miens. Ce fut sur l'instance tres-grande que la Reine sa mere luy

faisoit en faueur de Madame de Nemours & de Monsieur son fils, pour le Gouuernement de Lion, duquel on requeroit sa Majesté qu'il luy pleust rafraischir la promesse autrefois faite audit sieur de Nemours . à quoy sadite Majesté ne se voulut engager, se souuenant de ce qu'elle en auoit accordé à feu Monsieur de Mandelot & à moy pour mon fils, en le mariant avec la fille aînée dudit sieur de Mandelot, sans en auoir au prealable mon aduis & consentement. Pour cette cause non seulement elle m'en parla en la presence de ladite Reine sa Mere, où ie leur dis que si leurs Majestez connoissoient que ce fust chose qui leur tournast à seruice, que d'asseurer mondit sieur de Nemours dudit Gouuernement, que pour ce qui me concernoit particulierement & mondit fils aussi, ie me remettois à elles d'en disposer à leur discretion & volonté, les suppliant seulement d'auoir égard aux merites & seruices dudit sieur de Mandelot, & au besoin que leurs affaires auoient, qu'il n'eust occasion de se plaindre: Mais aussi sa Majesté voulut que ie visse à part, & mesme reformasse selon mon aduis le breuet qu'on luy en demandoit, afin qu'il ne fust rien écrit, ny ordonné par iceluy, qui obligeast sa Majesté à autre chose, qu'à ce qu'elle auoit promis par le premier susdit breuet, qui auoit autrefois esté depesché par elle pour cét effet, du consentement mesme dudit feu sieur de Mandelot, ainsi que ie fis, sans que personne en sceust rien que sa Majesté, de laquelle ie pris congé deux iours apres pour me venir ra-

fraischir en ma maison , apres luy auoir promis de me rendre à Blois deuant l'ouuerture desdits Estats , suiuant son commandement. Et faut que ie die que ie ne m'estois iamais departy d'auprès de sa Majesté & de la Cour, avec tant d'assurance de la bonne grace, satisfaction & protection d'icelle , que ie fis lors : ce fut le 23. du mois d'Aoust 1588.

E t neantmoins le huiétième du mois de Septembre ensuiuant , le iour de la Nostre-Dame estant en ma maison de Villeroy , ie receus au matin par Benoïse la lettre & le commandement de sa Majesté , par laquelle elle me deschargeoit de mon office , & de son seruice ; & toutefois me promettoit de me faire plaisir en autre chose ; i'appris dudit Benoïse qu'il auoit porté pareille depesche à Messieurs le Chancelier , de Bellièvre, Brûlart & Pinart , & qu'ils auoient desia quitté la Cour sans voir le Roy , ny prendre congé de luy.

I e laisse à penser à mes amis , si i'eus occasion ou non , de m'émeruëiller d'un tel changement & inopiné commandement , lequel neantmoins ie receus avec la reuerence que ie deuois , fortifié & consolé de la sincerité de mes comportements : Ie m'enquis seulement dudit Benoïse, si le Roy ne pretendoit point de faire difference de ceux qui auoient bien versé & seruy , d'avec les autres , & luy dis , que s'il luy plaisoit de suiure ce chemin là , qu'il feroit beaucoup pour son seruice, & pour les gens de bien.

Et n'ayant demandé réponse , ie l'écriuis,



& la luy baillay sur le champ, telle que la deuoit faire vn seruiteur tres-fidelle & obeissant à son maistre; adioûtant seulement de bouche, que s'il eust plû à sa Majesté me laisser sortir de la Cour, par la porte à laquelle i'auois tant heurté deuant que d'en partir, sans me faire sauter par les fenestres, qu'elle eust mis mon esprit en grand repos, comme i'esperois, moyennant la grace de Dieu & le congé qu'elle me donnoit, d'y mettre le corps.

I'AVOIS fait venir de Lion en ces quartiers mondit fils exprés, parce que Monsieur le Duc de Mayenne ayant à dresser vne armée pour seruir en Dauphiné contre les Huguenots, il sembloit que ceux de son âge ne se pouuoient bonnement excuser estans voisins dudit païs; ce que ie ne voulois qu'il fist, sans que le Roy luy commandast pour ma descharge & pour la sienne, à cause du lieu que ie tenois au seruice de sa Majesté, m'étant tousiours estudié de la seruir fidelement; mais aussi de ne luy donner aucune cause de suspicion de mes actions, & de tout ce qui dependoit de moy: Ce que ie diray en passant m'auoir meu dès le commencement à nourrir mondit fils près de Messieurs de Longueuille, Princes que ie reconnoissois, & par l'exemple de feu M. leur pere, & par l'instruction que leur donnoit Madame leur mere, ne viser qu'au pur seruice du Roy, & auoir leur grandeur attachée à la prospérité des affaires de sa Majesté; à quoy ladite Dame sçait & témoignera tousiours le deuoir que i'ay fait de

la conforter, toutes & quantesfois qu'il s'est présenté occasion de ce faire.

L'AVOIS doncques enuoyé mondit fils deuers sa Majesté pour receuoir ses commandemens sur l'occasion susdite, lequel arriua à Blois le iour mesme, où le lendemain que les commandemens de nos congez furent portez à Messieurs du Conseil, & enuoyez deuers moy, & furent sçeus d'un chacun; toutefois il ne laissa de se presenter à sa Majesté avec la lettre que ie luy escriuois, laquelle il receut tres-benignement; luy disant, ainsi qu'il me rapporta, qu'il estoit fils d'un pere qu'il auoit si bien seruy, qu'il n'auoit qu'à imiter son exemple, & suiure le chemin qu'il luy auoit monstre, pour acquerir honneur en sa profession, & sa bonne grace & protection en toutes choses.

QV'IL desiroit qu'il le seruist en ladite armée en Dauphiné avec sa compagnie de gens-d'armes, & quelques autres forces dont Monsieur de Mandelot auoit projecté de luy donner sa conduite, sous le bon plaisir de sa Majesté, laquelle escriuit par luy vne lettre de sa main audit sieur de Mandelot, pour l'asseurer de la continuation de sa bonne volonté.

CES bons propos qui me furent rapportez par mondit fils, certainement me consolèrent grandement, entendant par iceux que le Roy n'auoit conçu mauuaise opinion de moy, ayant dit que ie l'auois tres-bien & fidellement seruy. C'estoit le fruiet aussi que j'auois toute ma vie désiré moissonner de tous

mes labeurs & seruices, duquel à la verité ie craignois que le chemin que l'on auoit tenu à me donner congé, m'eust aucunement priué, sinon à l'endroit des gens de bien, qui auoient eu connoissance de mes deportemens; au moins en l'opinion commune du vulgaire qui a accoustumé de iuger des actions des hommes, plütoſt par le ſuccez de leurs fortunes, que par la verité & iuſtice d'icelles.

Ce langage doncques m'ayant grandement conforté, me donna encore la hardieſſe d'enuoyer vn de mes gens deuers le Roy, pour luy remonſtrer la perte que ie faiſois par la priuation de mon office, qui m'auoit eſté mis en conſideration, en partageant les biens de feu Monsieur de l'Aubespine mon beau-pere, duquel ie le tenois, & le peu de bien qui me demeueroit apres auoir ſi longuement ſeruy le feu Roy ſon frere & luy audit office avec beaucoup d'honneur, n'ayant acquis pour toutes choſes, que trois ou quatre mil liures de rente de reuenu en fonds de terre que ie pourrois lors dire miens, quand i'aurois payé mes debtes, qui n'eſtoient pas petites, comme il me ſeroit facile de monſtrer en répondant de toutes mes actions, où & quand il plairoit à ſa Maieſté l'ordonner, comme i'eſtois preſt de ce faire; le ſuppliant à cette cauſe d'y auoir égard, & m'ordonner quelque recompence; & en attendant icelle de continuer de me faire payer les gages & penſions dont ie iouiſſois, pour m'aider à viure en ma maiſon, & donner moyen à mondit fils de luy faire ſeruice en la profeſſion

en laquelle ie l'auois nourry & acheminé par son commandement, & sur la promesse qu'il luy a plû me faire quelquesfois de l'y protéger : Ie suppliois aussi sa Majesté, puis qu'elle auoit aduisé & resolu d'employer à l'exercice de mon Office, des personnes nouuelles & de moindre estoffe & qualité, ce sembloit, que n'estoient celles qui auoient seruy, il luy pleust au moins choisir & prendre pour ce faire quelqu'un de ceux que i'auois nourris, qui s'estoient rendus dignes & capables de ce faire, luy faisant seruice auprès de moy, comme ie reconnoissois qu'estoit en fidelité & suffisance Pasquier mon Commis, que i'auois rendu porteur de ma lettre, luy remontrant qu'en ce faisant, il donneroit à entendre à tout le monde, m'auoir éloigné de son seruice pour faute que i'eusse fait, ny pour deffiance que sa Majesté eust de ma loyauté, qui estoit la plus digne & chere recompense, que ie luy demandois de tous mes seruites; i'en écriuis autant à la Reine mere du Roy, la suppliant d'interceder pour moy enuers sa Majesté.

LA réponse que le Roy fit à ma susdite dépesche, m'osta toute esperance d'attendre & receuoir de luy à l'aduenir aucune recompense & gratification, & qui plus est me donna assez le suiet de croire qu'elle n'estoit demeurée si satisfaite de mes seruites ny de ma fidelité, que ma conscience; les traitemens que i'aurois reçu de luy en toutes choses, & mesme à mon partement de la Cour, & les derniers propos qu'il auoit tenus à mondit

ils, m'auoient donné occasion de croire encores que ladite Dame Reine sa mere m'asseuraist du contraire par la réponse qu'elle me faisoit par ledit Pasquier : dequoy certainement i'estois tres-affligé, & allois examinant toutes mes actions passées; & conferant avec vn chacun pour decouurir les causes dudit mécontentement : les vns disoient, que le Roy s'estoit laissé entendre, que i'auois trop d'autorité & de credit en ma charge; les autres, qu'il trouuoit mauuais que ses Secretaires ouurissent ses Pacquets ailleurs qu'en sa presence, & qu'ils escriussent des lcttres particulieres aux Gouverneurs des Prouinces, à ses Ambassadeurs & autres qui le seruoient, & en receussent aussi d'eux concernant ses affaires. Aucuns disent que sa Majesté auoit decouuert que quelques-vns de mes gens, & mesme ledit Pasquier, donnoient aduis à ceux de la Ligue des affaires de sa Majesté qui passaient par mes mains, & mesmes que ie m'entendois avec eux.

PLVSIEURS me taxoient aussi de ce pouuoir accordé à feu Monsieur de Guise, & de la negociation de la paix, en laquelle on disoit mesme, que la Reine Mere du Roy estoit entrée en jalousie de moy : & ceux qui estimoient estre plus clairs-voyans disoient, que le Roy auoit ainsi esloigné de luy ses vieux seruiteurs & ministres, pour le seul respect de ladite Dame Reine Mere du Roy, avec laquelle ils auoient trop grande communication. Comme si sa Majesté n'eust eu volonté de se confier à l'aduenir celle part de

ses affaires, qu'elle luy auoit differée iusques alors ; & fut telle opinion fortifiée par les déportemens de ceux que sa Majesté appella au maniement de ses affaires, lesquels ne recherchoient aucunement ladite Dame, & ne l'honoroient & courtoisoient comme nous auions accoustumé de faire.

E r combien que les choses qui sont aduenues depuis, ayent vuidé cette question, & assez éclaircy vn chacun de la verité, & cause certaine de nos esloignemens, & que toutes les autres raisons susdites n'estoient que couleurs mises en auant pour ébloüir les yeux de ceux qui s'y sont arrestez.

Toutefois ie répondray succinctement à celles que l'on a publié auoir esté cause de ma condamnation & disgrâce, plus pour représenter la verité des choses, à ceux qui pourroient voir quelque iour le present Memoire, que pour besoin que i'estime qu'il en soit.

Doncques pour répondre à la premiere raison, par laquelle l'on disoit que le Roy reconnoissoit que i'auois trop d'autorité & de credit en ma charge; ie diray que ie me suis tousiours mocqué d'icelle quand l'on m'en a parlé, n'ayant pû croire que sa Majesté ait conçu telle opinion de moy, & sur ce fondé la resolution qu'elle a prise de m'éloigner d'elle, veu que l'autorité que i'auois procedoit entierement de celle qu'elle me donnoit du fardeau qu'elle me faisoit porter, & de la confiance qu'elle faisoit paroistre auoir en moy. Chose qui luy estoit tres-facile de

retrancher toutes les fois quelle eust voulu, sans me chasser, ioint que ie luy auois mis en main quelques iours deuant le moyen d'y pouruoir plus doucement, lors que ie l'auois supplié me descharger de l'exercice de ma charge. Dauantage, i'auois deuant cela souvent supplié sa Majesté de ne me charger de tant d'enuie comme ie sçauois que i'en portois, pour executer les commandemens dont elle m'honoroit ordinairement en ses affaires, lesquels elle me deffendoit de communiquer à autres quels qu'ils fussent. Mais tous ceux qui connoistront en quoy consiste, & combien importe la charge des Secretaires d'Etat, ne trouueront estrange, si en faisant bien leur deuoir, ils acquierent de l'autorité, de l'honneur, & de la creance, non seulement auprès du Roy, & à la Cour, mais aussi par toutes les Prouinces du Royaume, & hors iceluy : S'ils sont gens de bien, le Roy ne se peut trop fier en eux, il faut qu'ils écriuent & fassent toutes les dépesches que les autres proposent, & ordonnent, & qu'ils tiennent registres & memoires des precedentes pour en seruir le Roy, & ceux qui l'assistent aux occasions qui se presentent. Ce que tous autres ne peuuent si bien faire qu'eux : c'a toujours esté aussi sur la vigilance, diligence, capacité & fidelité d'iceux, que les plus sages Princes se sont reposez, & reposeront, quoy que l'on fasse, de la principale direction & conduite de leurs affaires. Et est certain que le maistre qui n'en vsera ainsi, s'en trouuera tres-mal, ses affaires seront faites par pièces,

& à bastons rompus ; ioint qu'il luy fera tousjours beaucoup plus facile de corriger & châtier vn Secretaire qui versera mal en sa charge qu'un autre de plus grande qualité , c'est aussi en chastiant par iustice les méchans , & faisant difference d'iceux d'avec les bons, qu'il faut corriger les abus & fautes des charges. Il n'y a rien qui oblige tant un homme de bien à se crucifier pour servir son Maistre, que quand il void qu'il se fie en luy , & qu'il fait distinction de son service d'avec celui de ceux qui versent mal. Sa Majesté ne se peut trop fier en ses Secretaires qui la servent bien & fidèlement , & ne peut aussi châtier trop severement & exemplairement ceux qui en usent autrement. Pleust à Dieu que le Roy eust voulu suivre ce chemin en nostre endroit, il eust fait beaucoup pour l'honneur & contentement de ceux que l'on eust trouvé avoir bien vescu ; mais il eust fait encore davantage pour son service : car tout ainsi que le benefice bien colloqué & employé honore le Prince , encourage & recompense tout d'un coup plusieurs personnes ; aussi la correction des méchans a pareille vertu & efficace. Et n'y a rien qui fasse tant reuerer , craindre , & aimer un Prince que l'usage de cette iustice, par laquelle les Rois regnent , & ne regneront iamais heureusement sans icelle, quoy qu'ils fassent. Mais considerons si avec toute la faueur, autorité & confiance que le Roy me communiquoit , i'eusse pû acquerir quelque reputation & creance entre ses serveurs ; si ie l'eusse servi infidèlement & negligem-



ment. I'en appelle à témoins tous ceux qui auoient correspondance avec moy, & suis content de receuoir telle punition que l'on voudra, s'il s'en trouue vn seul qui puisse prouuer que ie luy aye iamais dit, conseillé ny écrit chose qui fust tant peu que ce soit contraire; ie ne diray pas aux affaires & seruices de sa Majesté, mais seulement à ses volontez & commandemens, qui m'ont toujours seruy de loy & de regle en toutes choses. Dauantage, en quoy ay-ie abusé de la dite autorité; me suis-je agrandy avec les miens au dommage de quelqu'un? T'ay exercé vingt & vn an & plus vne mesme charge, aimé, honoré & fauorisé en icelle de la bonne grace de mes Maistres, autant & plus dès la premiere année qu'en la derniere. I'ay veu asseoir au Conseil du Roy, & passer deuant moy plusieurs personnes qui estoient venues à la Cour, & au seruice de sa Majesté, long-temps apres moy, & ay long-temps refusé tel honneur, commandé par le Roy de l'accepter, & depuis en auoir esté honoré; A t'on veu que i'aye pris ma place, & me fois assis au Conseil de sa Majesté, lors qu'elle s'y est trouuée, encoré que tous ceux qui estoient venus apres moy le fissent. I'estois content de quitter les honneurs, les charges, & mesmes quelquefois les biens-faits aux autres, & estre leur solliciteur & facteur en la poursuite d'iceux, pour faire que mon Maistre fust mieux seruy, aimé & obey d'un chacun. Ce m'estoit assez de bien seruir & de connoître que sa Majesté se confioit en moy, & me

tenoit pour homme de bien.

Certainement les Secretaires ouuroient les pacquets des affaires du Roy, soudain qu'ils les receuoient, leurs peres & eux en auoient ainsi vsé durant les regnes du feu Roy Charles & du Roy qui est à present, & principalement depuis huit ou dix ans, sans que l'on leur ait iamais fait paroistre le trouuer mauuais, ils eussent volontiers pris telle regle que l'on leur eust prescrite pour ce regard, mais qui plus est, il sembloit que l'on voulust, voire qu'il fust necessaire, qu'ils en vsassent ainsi, parce que le Roy ne leur permettoit de les luy porter à toutes heures, & que la plus grande peine qu'ils auoient, soit que le Roy fust present ou absent, estoit de luy lire ou faire voir les dépesches, d'autant que par faute de ce faire à point nommé, ils ne pouuoient, comme il estoit necessaire, faire promptement réponse à ceux qui escriuoient, lesquels se prenoient ordinairement à eux desdites longueurs, & les affaires de sadite Majesté en patissoient; de sorte qu'ils estoient contraincts quelquefois d'extraire desdites dépesches, ce qui estoit le plus important; soit pour l'enuoyer à sadite Majesté par écrit quand elle estoit dehors, ou ne pouuoient parler à elle, comme il aduenoit trop souvent; soit pour luy en faire rapport, & tirer d'elle plus facilement sa volonté, afin d'y satisfaire..

Je diray que les affaires d'Estat requierent que ceux qui les conduisent voyent les dépesches à mesure qu'elles viennent, car elles

peuvent contenir telle chose , que si vous retardez d'y pourvoir, il en arriue des dommages & inconueniens incroyables , & on perd des occasions qui ne se peuvent apres recouurer : de sorte qu'il faut ou que le Roy permette que l'on les luy porte , & represente à toutes heures , ou qu'il donne charge à quelqu'un de prendre ce soin , où bien qu'il s'en fust confié & reposé sur sesdits Secretaires: sinon qu'il fasse estat d'estre tres-mal seruy, & de ne se prendre qu'à luy-mesme du mal qui en succedera. Quel plus grand contentement peuvent receuoir les Secretaires , que quand leur Maistre void tous les iours ses affaires, & leur ordonne ce qu'ils ont affaire, c'est leur décharge & leur honneur. Car il void & considere mieux le deuoir qu'ils font en leurs charges , & peuvent mieux satisfaire à ceux qui s'adressent à eux , & leur correspondre : sans quoy il est du tout impossible que les affaires du Roy cheminent comme il appartient ; & c'est pourquoy i'ay trouué bien estrange , ce que l'on a publié que sadite Majesté auoit trouué mauuais de ce que lesdits Secretaires accompagnoient de leurs lettres celles que sa Majesté escriuoit.

Si sa Majesté s'estoit enquisse & bien informée de tous ceux qui l'ont serui dedans & dehors le Royaume depuis son regne; si c'est chose qui ait preiudicié à ses affaires, ou non, ie suis certain qu'elle ne blasmeroit ceux qui ont pris la peine de ce faire , ie pense estre vn de ceux qui en écrit autant , & est certain que c'estoit ce qui m'empeschoit & travail-

loit le plus en ma charge , & en quoy ie cuide aussi auoir mieux seruy le Roy , voulant que si parmy vne milliaice de lettres que i'ay écrites , il s'en trouue vne qui ait esté contraire au seruice & aux volontez de sa Majesté , en estre repris & puny griefuement. Nous écrivons ce que nous connoissons estre l'intention de sa Majesté , & necessaires que ses Ministres sçachent pour bien seruir & accomplir ses commandemens , à laquelle nous ne cachions rien de tout ce que l'on nous écriuoit , & bien souuent c'estoit chose qu'on ne luy osoit écrire à elle mesme , pour diuers respects, lesquels quoy qu'elle fasse , elle n'ostera iamais entierement l'esprit de ceux qui seruent; car la Cour & les affaires en engendrent tous les iours de nouveaux.

E T tels que si on ne leur ouure le chemin de se satisfaire & contenter en cela , le Roy doit faire estat qu'il ne sera seruy qu'à demy, dont i'appelle à tesmoins tous ceux qui manient ses affaires , & sont employez à son seruice dedans & dehors le Royaume ; sadite Majesté deuroit pour son propre bien chercher plustost à confirmer & estreindre la correspondance & confiance entre ses Ministres & Officiers , que de les blasmer ; ce ne seroit leur faire tort , ce seroit leur faire iustice.

Q V A N T à l'intelligence que l'on a voulu dire que mes gens auoient avec ceux de la ligue , ie iure & proteile deuant Dieu , estre chose dont ie ne me suis iamais apperceu ; & à laquelle toutefois i'ay eu les yeux ouuerts autant que nul autre de ma profession, & croy

veritablement que cela n'estoit point. Mais si l'on en auoit quelque opinion fausse ou vraye, pourquoy ne m'en aduertissoit-on? on eust veu comme i'y eusse pourueu, & si i'y eusse conuiué, i'eusse porté patiemment la peine que l'on m'en eust imposée; il n'y a celuy qui ne soit sujet à estre trahi ou trompé, & mesmes en ce miserable siecle, que le vice & la corruption regnent par tout: & est certain que souuent nous nous apperceuons les derniers des tromperies qui nous concernent. Quoy que ce soit, ie repeteray encores vne fois ne m'estre iamais apperceu que Pasquier, ny aucun de ceux qui seruoient le Roy auprès de moy, m'ayent fait ce tort: protestant que si ie m'en fusse apperceu, i'y eusse pourueu tres-viuent. Dauantage, ie diray qu'il estoit assez difficile de decouurir tout ce que i'y faisois, pource que i'écriuois de ma main les choses plus importantes, & ne les commettois toutes à vn seul, mesme ie ne les faisois écrire en vn registre pour cette occasion, comme d'autres faisoient; ie me contentois de garder & reseruer mes minutes, desquelles ie seray tousiours prest de répondre.

Et quant à la fidelité, pleust à Dieu d'estre condamné d'en rendre compte à peine de ma vie en la presence de mes accusateurs: ie suis certain que ie les ferois rougir de honte, & paroistre tels qu'ils sont; ils diroient que Salcede m'a accusé, & que la plus grande partie de ce qu'il a dit, a esté confirmé par les euenemens suruenus depuis, qui sont témoins irreprochables: ie l'auoue pour ce qui concerne

les autres, mais que ie fois pour cela conuaincu, ie le nie; i'ay répondu par cy-deuant à ce point, de façon que ie n'en diray autre chose. Mais combien ay-ie écrit de lettres; à combien de personnes ay-ie parlé: combien ay-ie d'amis & parens à qui ie me suis communiqué, & découuert ce que i'auois sur le cœur, & iugeois deuoir aduenir les remuëmens de ceux de la ligue? I'ose me promettre qu'il n'y en aura vn seul qui m'accuse de les auoir iamais approuuez, mais au contraire qu'il s'en trouuera plusieurs qui diront que ie les ay trauersez, voire persecutez pour cette seule occasion: car graces à Dieu, pour mon particulier ie n'eus iamais disputé avec personne, qu'avec ledit sieur Duc d'Espernon.

Ils diront aussi que feu Monsieur de Guise me faisoit cét honneur, que d'estimer & rechercher mon amitié, se loüer de moy, & mesme en faire estat: tels argumens sont-ils suffisans pour me condamner, & que sçait-on s'il en vloit ainsi pour me nuire: Veritablement ie ne le croy pas; mais ie dis qu'il y auoit peut-estre plus grande occasion d'en soupçonner quelque chose, que de m'accuser pour sa façon de proceder en mon endroit: atton iamais veu qu'il ait failly à carresser tous ceux qu'il a estimez que le Roy aimoit & fauorisoit? Que l'on se represente ses portemens. Il auoit telle enuie d'acquérir les bonnes graces du Roy, & pousser la grandeur de sa fortune par cette voye-là, qu'il honoroit le plus petit seruiteur que sa Majesté eust, qu'il connoissoit auoir quelque  
part

part auprès d'elle ; mais combien y a-il maintenant auprès de la Majesté de personnes qui ont suivi la ligue ? Pourquoi ne content-ils quelque chose particuliere de l'intelligence que j'auois avec ledit Duc de Guise, lors qu'ils sçauoient tous ses secrets ? ie ne les prie point de s'en taire, ny de m'épargner, mais seulement de ne me seruir à couuert ny en derriere, pour faire les bons courtisans. l'offre de me représenter & rendre où l'on voudra, pour répondre à tout ce qu'ils proposeroient ; ie ne demande point de grace & de faueur pour ce regard, ie ne demande que iustice, & que l'on trouue bon que la verité soit approfondie & conneuë ; ie me departiray volontiers de la poursuite de la récompense de tous mes seruices, & que l'on m'accorde ladite grace. Je voulois, ce dit-on, establir Monsieur de Guise à la Cour pour en tirer support ; & toutefois il est certain que j'auois demandé mon congé, & auois plus grande enuie d'en sortir que d'y demeurer. Estoit-ce pour plumer l'oye du Roy avec luy, que ie cherchois tel support ? quel besoin auois-je de luy pour ce faire ? Ceux qui s'estoient enrichis l'auoient fait sans son assistance, i'en pouuois donc bien faire autant, si i'eusse voulu sans icelle ; dauantage, chacun sçait que ie tirois du Roy des biens-faits & des faueurs assez pour m'enrichir, si ie l'eusse voulu faire, sans auoir besoin d'un entremetteur ou mediateur entre la Majesté & moy pour cet effet : car de sa grace, elle ne me refusoit chose quelconque que ie luy demandasse : i'eusse aussi esté

tres-mal aduisé, ce me semble, d'aider à rendre Monsieur de Guise si puissant à la Cour, que i'eusse esté contraint avec les autres de dépendre de luy, & aller à son leuer, au lieu que ie deuois estre recherché de luy, & qu'il auoit besoin de moy, comme de tous les seruiteurs du Roy pour se maintenir en Cour: dauantage, estois-ie si ignorant ou grossier que ie ne reconnusse quelque chose de la ialousie que sa Majesté auoit dudit Duc de Guise? nem'en auoit-elle iamais parlé; ce sont simplicité ou malices trop grandes que d'en douter: mais ils ont dit que ie voulois autoriser ledit Duc de Guise, pour me vanger de Monsieur d'Espernon, & me fortifier contre luy: voila encore vne plus grande asnerie; Ceux qui craignoient sa puissance, estoient-ils pas assez aiseurez ou vangez de luy par son éloignement, sans faire autre chose? i'estois trop sçauant courtisan pour choisir cette voye-là, quand i'eusse voulu en trouuer quelqu'une pour nuire audit Duc; car tant s'en faut que i'aye iamais crû que l'inimitié de Monsieur de Guise ait nuy audit Duc d'Espernon aupres du Roy, que ie tiens pour certain qu'elle luy a long-temps seruy de protection. Ledit sieur d'Espernon auoit à la Cour des ennemis & enuieux plus dangereux & puissans que ledit Duc & moy ensemble: ie les connoissois bien, ie iure auoir plütoft destourné que procuré le mal, que i'ay connu que l'on luy vouloit faire: aussi ma fortune n'auoit rien de commun avec la sienne, il voloit d'une autre ail.



I'AY tousiours conseillé l'vñion des Catholiques avec le Roy, comme i'ay cy-deuant dit; c'est ce qui a meu les Huguenots & leurs adherans, de dire que i'estois de la Ligue, & que ie la fauorisois au preiudice du seruice du Roy, aux Edicts duquel s'ils eussent voulu obeïr, comme i'ay souuent esté cause qu'ils en ont esté recherchez & admonestez, ils eussent bien-tost éprouué & connu le contraire, i'eusse esté leur cousin: car ils eussent en ce faisant s'appé la Ligue par son fondement, esté cause de la restauration de ce pauvre Royaume, que leur obstination a renuersé les pieds contre-mont.

M A I S ie m'estonne & me plains grandement de ceux qui ont eu opinion, ou fait paroistre l'auoir, que i'eusse esté pensionnaire de Monsieur le Duc de Guise. Pericard son Secretaire m'a dit qu'il en a esté enquis & interrogé apres sa mort, & menacé de la corde, parce qu'il disoit que cela n'estoit point. I'ay receu beaucoup de mal & d'ennuy de toutes mes fortunes; mais i'aduouë que ie n'ay point senty de coup qui eust plus estourdy & émeu ma patience, que certuy-là, ayant par iceluy reconnu la mauuaise volonté que l'on me portoit, la sincerité de ma conscience m'empeschoit de le reconnoistre, & i'eusse esté tres-mal aduisé de m'adresser à Monsieur le Duc de Guise pour auoir du bien, il m'estoit plus facile d'en tirer du Roy, qui ne me refusa oncques choses que ie luy aye demandée, comme i'ay desia dit: Et quand i'eusse voulu estre si méchant que de m'enrichir aux

dépens du Royaume, ie suis asseuré que la meilleure bourse de-la Chrestienté ne m'eust point esté fermée. Et c'est pourquoy les Anglois & les Huguenots, qui sont plus rusez que les autres, ont bien mieux rencontré: car ils ont publié que ie prenois des pensions & des presens du Roy d'Espagne, & l'ont autrefois voulu faire croire à feu Monsieur frere du Roy & à d'autres; ie ne répondray qu'une seule chose à cette calomnie, c'est que si i'eusse voulu estre traistre, & vendre ma conscience, ie l'eusse fait pour peu. Je suis prest à rendre compte de tout le bien que i'ay: i'en'ay esté ne ioüeur de dez, de cartes, ny faiseur de festins, ny trop somptueux & magnifique en toutes mes actions: i'ay seulement vescu honnestement, comme il me sembloit que le requeroit la charge que i'avois, & l'honneur que me faisoit le Roy: i'ay toujours esté, comme ie le suis encores, fils de famille, & partant sans tirer aucune commodité de nostre maison; i'ay vécu de mon travail; s'il y a quelqu'un qui se plaigne de moy, que i'aye exigé de luy argent, ou autre chose, ou luy aye fait tort ou iniure, ie suis prest de luy en faire raison, & d'en répondre où l'on l'ordonnera. Les plus grandes dépenses que i'aye faites ont esté à faire instruire le fils unique que Dieu m'a donné, & à luy donner moyen de paroistre entre les gens d'honneur, & faire service au Roy. Si ceux qui entreprennent en ce Royaume de suivre le chemin que ie luy ay fait prendre par la permission & le commandement du Roy, ne

dépendent du commencement pour recompenser aucunement les autres défauts qui sont en eux ; ils ne peuvent estre aimez ny suiuis, & mesmes en ce temps que le profit & l'argent commandent plus aux hommes que l'honneur. I'ay veritablement basty vne basse-court en la Maison ancienne de mes peres, & y ay employé plus d'argent que ie ne deuois : mais ie suis prest à monstrier qu'il est venu de la liberalité du Roy, & non d'autre, comme tout le reste que i'ay eu, qui n'est pas grand chose, car pour tout, i'ay acquis en vingt & vn an que i'ay exercé mon Office, prés de quatre mille liures de rente en fonds de terre, que ie pourray dire miennes, quand i'auray payé 30000. écus que ie dois, comme ie puis à mon grand regret prouuer trop facilement ; & subjets à tout perdre, si ie ne le fais, où & quand l'on voudra, & outre cela que i'ay engagé ou vendu vne bonne partie du bien de ma femme.

VOILA les trefors que i'ay tirez d'Espagne, & de Monsieur de Guise : est-ce ce que i'ay gagné à estre traistre. Quoy doncques ? i'ay refusé autrefois pension de deux mil écus par an, qui me fut offerte de la part du Roy de Navarre, apres la paix, de l'an mil cinq cens soixante & dix-sept, par vn Cheualier d'honneur, comme ie puis encore monstrier par écrit ; ie n'ay iamais receu aucun present d'Angleterre, & partant i'en dois auoir tiré & receu d'Espagne, ou d'ailleurs : cette consequence n'est pas bonne. Ie veux croire aussi que ceux qui en vsent, & les autres qui me

condamnent sans m'ouïr, iugent de la conscience d'autrui par la leur. Qu'ils se presentent, & que l'on nous commande de répondre de nos actions; i'offre de comparoître où l'on voudra pour cet effet, & ne demande point de grace, ny de pardon de ma déloyauté, si elle est vérifiée; ie ne leur souhaite aussi autre mal, sinon que mon innocence soit connue telle qu'elle est; car ie ne pretens m'armer & deffendre de reprimination, leurs fautes ne me touchent point, mon but est de me deffendre, & non d'assaillir: pourquoy doit-on plus volontiers exposer sa vie, pour sauuer son honneur?

I L n'y a grand ny petit en ce Royaume, qui puisse dire m'auoir iamais donné vn écu; & s'il y en a bien peu qui n'ayent passé par mes mains; i'ay aussi seruy des maîtres qui me faisoient assez de bien, sans en aller chercher ailleurs: Celuy qui prend s'engage, ce que ne doiuent faire ceux qui sont constituez aux charges publiques, pour quelque cause que ce soit.

E T parce que i'ay assez éclaircy vn chacun de la verité, de tout ce qui s'est passé en la negociation de la paix derniere, & de l'octroy & expedition du pouuoir dudit Duc de Guise pour ma iustification en cet endroit, ie me contenteray de dire sur ce premiere-ment.

Q U E s'il se trouue que i'aye écrit chose que ie ne puisse prouuer, ie suis content de porter tout le reproche du mal qui s'en est ensuiuy. Secondement, i'ay tres-grand re-

gret dequoy le Roy n'a vſé autrement du bien & aduantage qu'il pouuoit receuoir pour luy, & pour ſon Royaume de ladite paix, & meſme dudit pouuoir; il a perdu, parce qu'il a fait la creance que l'obſeruation de ſa foy & parole luy auoit encore conſeruée, non ſeulement entre ſes peuples & ſujets, mais auſſi par tout le monde; ie luy ay ſouuent ouy dire, qu'il vſuloit plütoſt perdre la vie, qu'un tel treſor; lequel ie ſuis aſſeuré qu'il euſt gardé tres-cherement, s'il euſt reconnu & crû pouuoir ſans y faire breſche, conſeruer ſon authorité & puiſſance. Voila l'écueil contre lequel il a fait naufrage, voila la cauſe de ces trauaux & de nos maux; ie ne veux accuſer ny excuſer perſonne, ie prie Dieu qu'il donne paix aux trépaſſez, & conſerue les viuans: mais ie diſ qu'il y auoit pluſieurs bons moyens d'arreſter le cours des deſſeins dudit ſieur Duc de Guiſe, & de Monſieur le Cardinal ſon frere, eſtans deſagreables à ſa Maieſté, comme ils eſtoient, ſans vſer de celuy qui a eſté pratiqué; i'en ay dit quelque choſe cy-deuant, & n'en diray dauantage à preſent, ne voulant augmenter le regret & la douleur que nous deuons reſſentir des maux que nous en receuons.

**Q**UE le Roy nous ait éloignez de luy pour le reſpect de la Reine ſa Mere, c'eſt choſe que ie ne croiray iamais: car il luy auoit trop grande obligation, & luy eſtoit ſon conſeil & aſſiſtance trop neceſſaire: les Huguenots ont voulu dire qu'elle auoit des deſſeins à part en faueur de Monſieur de Lor-

raine & Messieurs ses enfans , pour la reuerence qu'ils luy portoient , & pour luy estre si proches qu'ils estoient ; mais qu'elle eust voulu pour cela nuire au Roy & à ses affaires ; ceux qui l'ont bien connu , n'ont iamais eu telle opinion ; ouy bien qu'elle eust bien voulu que le Roy se fust seruy d'eux , & les eust aduancez plütoſt que d'autres. Mais où ſont ceux que leſdits Huguenots n'ont accusé , quand ils ne les ont fauorisez & seruis ; qu'ont-ils dit autrefois du Roy meſme , deuant & depuis qu'il eſt Roy , & qu'ils n'estiment vrais François que ceux qui approuuent leurs actions ? ils blaſment les Catholiques qui ſe deſſient d'eux , & ils ne ſe ſient aucunement aux Catholiques , dont i'appelle à teſmoin Monsieur de Montmorency , & tous les autres qui ſe ſont meſlez avec eux ; ils appellent rebelles ceux qui combattent pour leur Religion ; & il y a 30. ans & plus qu'ils ſont la guerre au Roy & au Royaume ; ſous ce pre-texte , quelles villes n'ont-ils pillées ? quelles Eglises n'ont-ils abbatuës ? combien de fois ont-ils combattu contre le Roy meſme ; mis la diſcorde en la maiſon Royale ; logé les Anglois & autres eſtrangers en ce Royaume ; enfin quels maux n'ont-ils faits depuis ce temps-là ? Il ne faut que lire les Ediſts de paix que l'on a fait avec eux , l'on verra de quelle eau ils ont eu beſoin d'eſtre lauez. Et routeſois aujourd'huy le Roy n'eut & n'aura iamais ( ainſi qu'ils diſent ) de meilleurs ſeruiteurs & ſubjets qu'eux : cela veut dire , pourueu qu'il ſe ſerue d'eux , qu'il faſſe leurs at-

faïres , & qu'il trouue bon , ou souffre que le Roy de Nauarre tienne la place du Royaume, que l'on dit que feu Monsieur de Guise vouloit occuper , & cu'il leur soit loisible, cependant que sa Majesté & les Catholiques qui ont pris les armes s'entrebatteront, de s'emparer des villes & deniers du Roy , s'établir & fortifier , le tout pour le seruice de sa Majesté , & le bien general du Royaume. C'est estre Espagnol ou Guiscard, que de n'approuuer ou endurer toutes leurs actions: de ne pouuoir compâtiſſer avec ceux qui veulent nous troubler en nostre Religion, nous abſtraïndre à leurs volontez, & nous donner la loy , comme ils feront à la fin si nos diuisions continuent encore longuement.

O R si tant est que nous ayons esté éloignez de ladite Cour , pour le respect de ladite Dame Reine mere du Roy , comme l'on a dit, certainement nous auons moindre cause de nous en plaindre pour nostre particulier, que pour le Roy & le public.

Entr'autres Princes & Seigneurs qui me firent cét honneur , que de m'enuoyer visiter & offrir amitié apres mon bannissement de la Cour , feu Monsieur de Guise y enuoya deux ou trois fois , dequoy ie le remerciay bien humblement; le suppliant par ma réponse, que s'il auoit enuie de me faire plaisir , il luy pleust faire tant pour moy , que d'éclaircir sa Majesté, de la façon par laquelle ie m'étois conduit en son endroit , en guerre & en paix ; ne desirant autre recompense de mes seruices , sinon que sa Majesté connust au

vray comme ie l'auois seruie. Voila toute l'intelligence que i'ay eue avec ledit Duc depuis mon departement de la Cour.

Plusieurs de mes amis qui estoient deputez aux Estats, & autres, voulurent sçauoir de moy si i'auois agreable que lesdits Estats fissent instance & supplication au Roy, pour me r'appeller à son seruice; mais ie les supplay de ne le faire pas, parce que ie ne voulois que pour l'amour de moy, ils fissent chose qui déplust à sa Maiesté: joint que ie m'estimois tres-heureux de iouir du repos de ma maison, & aussi que ie ne voulois entrer à la Cour, ny aux affaires, contre le gré & la volonté de sa Majesté: si nonobstant ma response, quelqu'un d'eux eust eu opinion d'en parler, ie n'en dois ce me semble estre blâmé, comme i'ay entendu auoir esté assez leggermente pour ce regard.

Dieu voulut audit temps appeller à soy feu Monsieur de Mandelot, dequoy ie receus tel déplaisir, que chacun peut s'imaginer, perdant vn si fidel amy, & sur la vertu duquel i'auois fondé le reste de toutes mes esperances & ressources de ma miserable fortune.

Ie pris la hardiesse d'écrire vne lettre au Roy, pour supplier sa Majesté d'auoir compassion de la famille dudit feu sieur de Mandelot, & de la mienne, qu'elle auoit iointe & vnice ensemble pour son seruice, afin de faire iouir mon fils de l'effet de sa promesse, touchant le Gouvernement de Lionnois, sur laquelle auoit esté basti principalement ledit mariage.



*S'ensuit la teneur de la promesse écrite de  
la propre main de sa Majesté.*

**A**DVENANT que le mariage du fils du  
sieur de Villeroy s'effectuë avec la fille  
aînée du sieur de Mandelot ; i'accorde en  
consideration des seruices de l'un & de l'autre ,  
que le fils du sieur de Villeroy soit pour-  
ueu du Gouuernement de Lionnois , Forests  
& Beaujolois , à la suruiuance dudit feu sieur  
de Mandelot , pour l'exercer apres sa mort ,  
dont ie veux que les expeditions & proui-  
sions soient faites qui luy seront necessaires  
par l'un de mes Secretaires d'Etat , Brûlart  
ou Pinart , apres l'accomplissement dudit  
mariage , sans qu'il soit besoin d'autre rolle ,  
breuet , commandement , ou descharge , que  
la presente écrite de ma main , nonobstant  
tous autres Breuets de reserve , ou promesse  
dudit Gouuernement expediez au contraire.  
Fait à Paris le 2. iour de Iuillet 1587.

Signé ,

HENRY.

Depuis , ladite resignation , à condition de  
suruiuance , nous fut accordée & confirmée  
sur le rolle de Monsieur Brûlart le 11. Mars  
1588. & la prouision d'icelle expediee en for-  
me , & scellé sur iceluy.

Veritablement ie ne m'attendois pas que le  
sieur de Mandelot deust si-tost faillir au Roy ,  
à la ville de Lion , & à ses amis ; mais que vi-  
uant il dresseroit mondit fils de sa main , & le  
rendroit capable de faire seruice à sadite Ma-  
jesté en ladite charge , de laquelle pour son

âge & inexpérience il estoit indigne.

Je ne receus point de réponse du Roy à mes lettres; mais quand il fut aisé du trépas du sieur de Mandelot, non seulement il donna le Gouvernement dudit pais à Monsieur le Duc de Nemours, mais aussi il prit mondit fils de la Lieutenance generale d'iceluy, pour en pourvoir le sieur de Guadagne; il luy refusa pareillement le Bailliage de Mâcon, qu'il auoit donné audit feu sieur de Mandelot six mois deuant, à ma requeste & consideration.

Dauantage, sa Majesté voulut tant défavoriser la maison dudit sieur de Mandelot, & la mienne, que de donner au sieur du Perrat, demeurant en ladite ville de Lion, l'Abbaye de la Grace, de laquelle ledit sieur de Mandelot, depuis la mort de deffunct son frere, qui estoit Religieux & titulaire d'icelle, aduenüe quelque temps auparavant, n'auoit encore retiré les Bulles & prouisions Apostoliques; jâçoit que ladite Abbaye ne fust vacante par le trépas dudit sieur de Mandelot, à qui sa Majesté en auoit enuoyé par vn sien parent toutes les expéditions nécessaires.

Depuis Madame de Mandelot ayant enuoyé vers sa Majesté le sieur de la Grange, pour le supplier d'auoir compassion d'elle & de sa maison, & luy remonstrer les debtes d'icelle, il n'en rapporta que du mépris & de l'indignation: bien luy fut-il dit, que l'on pourroit avec le temps faire quelque chose pour ladite Dame & ses filles, en consideration des seruices du feu sieur de Mandelot; mais qu'il ne falloit pas qu'il s'attendist que

l'on fist rien pour mon fils ny pour moy.

Sur ces entrefaites la mort de feu Monsieur de Guise & de Monsieur le Cardinal son frere sont aduenuës , avec l'emprisonnement de Monsieur le Cardinal de Bourbon , & de Messieurs les Princes de Joinuille, Ducs de Nemours & d'Elbœuf , de M. l'Archeuesque de Lion, & autres qui ont esté arrestez avec eux.

Soudain que i'en fus aduertý , i'enuoyay querir les Officiers & habitans de la Ville de Corbeil, dont ie suis le Capitaine, lesquels i'admonestay de leur deuoir & fidelité , & de ne s'embroüiller avec ceux qui entreprendroient à l'occasion de ladite mort de remuer ménage, ce qui me pensa couster bien cher; parce que ceux de Paris en furent incontinent aduertis , qui entrerent en tel soupçon de moy , que ma maison de Paris faillit d'en estre pillée , comme furent les villages de celle de Villeroy , par les premieres troupes qui sortirent de Paris; & quand ie vis que les habitans dudit Corbeil prenoient le party de ceux de Paris, ie ne voulus que celuy que i'auois mis dedans le Chasteau qui n'estoit tenable contre ladite ville y demeurast avec eux , ny fist le serment qu'ils faisoient , & aimay mieux quitter la place , en laquelle ie n'ay pû entrer depuis, que de tremper en ce qu'ils faisoient , esperant que moy & les miens serions à la fin honorez de quelque commandement de sa Majesté. Ces mesmes raisons furent cause que mon pere s'abstint de s'engager & obliger en la ville de Paris; mais qu'il resolut de sortir d'icelle avec la

fièvre carte, & se retirer en sa maison d'Alincour, laissant les biens qu'il a en ladite ville, qui sont les principaux de nostre maison, à la mercy & discretion du temps.

I'écriuis aussi à mes amis qui sont à la Cour, de sçauoir du Roy ce qu'il luy plaisoit faire de nous, & l'asseurer de nostre fidelité: à quoy il ne fit autre réponse, sinon que l'on y aduiferoit; ce qui me mit en tres-grande peine, & encore plus quand ie vis que le Roy non seulement ne nous auoit fait cét honneur que de nous écrire, ny nous honorer d'un seul commandement depuis la mort dudit Duc de Guise; ie ne dis pas encore pour nos personnes, mais pour les charges que nous auions, combien qu'alors l'on n'en fust pas chiche; mais que l'on auoit commandé au sieur de Varicaruille de se ietter dans Meulan qui estoit de la charge de mon pere, & que l'on auoit fait sçauoir à ceux de Mante de se deffier de luy, & aussi que l'on auoit cassé la Compagnie des gendarmes de mondit fils, laquelle M. le Cardinal de Gondy m'écriuit quelque temps apres auoir esté remise sur l'Estat pour seruir en Dauphiné à la requeste de M. le Duc de Rets son frere.

Ie receus encore au mesme temps vne lettre de sa Majesté, par laquelle elle me mandoit d'ordonner à mondit fils de se retirer de ladite ville de Lion & me venir trouuer; non parce que sa Majesté, ainsi que le portoit ladite lettre, l'estimast autre que son seruiteur; mais pource que son séjour en icelle ville, en ce temps plein de suspicions, ne pouuoit

empescher d'en faire diuers discours, autrement qu'à l'aduantage de son affection.

Veritablement ladite lettre m'estonna, voyant que non seulement l'on ne se vouloit seruir de moy, mais aussi que l'on ne vouloit que nous demeurassions aux villes qui obeïssioient à sa Majesté, & mesme en celle de Lion, laquelle ie scauois n'estre demeurée en son obeïssance les troubles passées, que par le bon deuoir de feu M. de Mandelot, excité & fortifié du mien, en la consideration du mariage de mondit fils; toutesfois i'écriuis aussi-tost à mondit fils d'obeïr à ladite lettre.

Mais bien-tost apres ie sceus que ceux de ladite ville de Lien auoient pris resolution d'entrer en l'vnion des Catholiques, & que mondit fils en estant par eux requis auoit fait le semblable, ne les ayant voulu éconduire & abandonner, en consideration de l'affection que feu M. de Mandelot leur auoit portée, & de l'honneur qu'ils auoient aussi fait à sa memoire.

Ie scay bien que peu de personnes croiront que mondit fils aye franchy ce fault contre ma volonté; si est-ce que c'est chose tres-veritable, & prie Dieu qu'il me punisse rigoureusement s'il est autrement; & faut que ie die que si deuant & depuis ladite déclaration, i'eusse pû estre assuré de la protection du Roy, i'eusse plütoست choisi & souffert la perte de tous mes biens, voire la prison, & la mort mesme, que d'en chercher vn autre, quand i'eusse deu abandonner pere &

filz , & tous mes parens & amis ensemble : chose pourquoy i'enuoyay demander vn passe-port au Roy pour sortir du Royaume , si tost que ie connus qu'il ne se vouloit point seruir de nous , & m'en fuisse allé si ie l'eusse receu plûtoſt ; mais il me le fit ſeulement rendre à Paris le 2. du mois de Mars , par vn des gens du ſieur de Hauteſort.

O R voyant que non ſeulement le Roy ne vouloit point ouïr parler de moy à la Cour ny ailleurs , mais auſſi que mes ennemis auoient eu tant de pouuoir auprès de luy, que de luy imprimer en l'ame que i'eſtois vn traître ; de ſorte qu'il ne nous eſtoit point loifible de demeurer és villes qui luy rendoient obeïſſance, & que l'on ne m'enuoyoit le passe-port que i'auois demandé pour ſortir hors du Royaume.

V O Y A N S d'ailleurs que Meſſieurs de Paris parloient de faire faiſir les biens de ceux qui n'entreroient en l'Vnion des Catholiques, & que tous les noſtres eſtoient en ladite ville, ou aux enuironſ en leur main ; ie reſolus avec mon pere, pouſſé d'vn tres-ardent deſir que nous auions touſiours eu , de ſeruir de tout noſtre pouuoir à la conſeruation de noſtre Religion, & au bien public du Royaume , de nous transporter en ladite ville de Paris, où nous arriuaſmes le 18. iour de Mars, & pareillement d'entrer en l'Vnion & conſeil deſdits Catholiques , où ils nous auoient choiſis & enrollez en l'eſtabliſſement d'ice-luy , ayant eſté recherchez & viuement pourſuiuis & ſollicitez de ce faire, tant par M. le

Duc de Mayenne, que par lesdits sieurs de la dite ville, & autres dudit party.

Je supplie tous ceux qui liront le present Memoire, de ne croire que ce soit chose que nous ayons faite pour nuire à personne, ny pour en rechercher vengeance ou aduantage aucun au dommage d'autrui ou du public: ie prie Dieu me faire succomber miserablement si nostre volonté a esté telle; ains seulement de couvrir de tout nostre pouuoir, & en gens de bien, l'Eglise Catholique, & tout le Royaume, audanger extrême auquel l'un & l'autre se trouuent, & nous conseruer avec le general des Catholiques, qui sont arriuez à la veille de deuenir la proye des heretiques, si Dieu n'y met la main, & ne les assiste, comme i'espere qu'il fera, & l'en supplie de tout mon cœur, en terminant au plûtoſt cette malheureuse guerre & diuision qui est entr'eux en vne bonne sorte, ou autre à sa gloire & au salut public dudit Royaume, pour lesquels i'exposeray ma vie tres-volontiers, comme i'ay tousiours fait tres-fidelement, où i'ay esté employé, dont i'offre derechef pour la fin & conclusion du present écrit, de resoudre à peine de ma vie, si particulièrement que l'on voudra, ou quand il me sera ordonné.

Fait à Villeroy le 8. iour d'Avril mil cinq cens quatre-vingt neuf.

Signé,

DE NEUVVILLE.

# APOLOGIE ET DISCOVERS DE MONSIEVR DE VILLEROY.

*Pour monstrier la peine qu'il a pris de faire la paix entre le Roy & Monsieur de Mayenne, & de sa continuelle poursuite à la pacification de nos misérables troubles.*

A M. DE BELLIEVRE.

**M**ONSIEVR, Le vous enuoye le Memoire que vous m'avez demandé, il contient les causes qui me contraignirent du temps du feu Roy, que Dieu absolve de me sauuer à Paris, & me ioindre à Monsieur le Duc de Mayenne, lequel ie fis deslors plus pour moy - mesme, que pour le communiquer à personne, ny seruir à ma iustification: car encore que la nature nous excuse, voire que la loy nous permette de defendre nostre vie avec impunité: toutefois comme tout homme de bien doit estre moins soigneux d'icelle que de son honneur, & que ie sçay que le commun, lequel s'arreste plus à ce qui apparoist, qu'à ce qui



est, fait souuent tel iugement de nostre deuoir & merite, qui est le contentement que nos Superieurs monstrent auoir de nous; i'ay depuis cette action toûjours desiré l'amender, plûtoſt en bien faiſant au public, que le iuſtifier ou l'excuser par la publication du preſent Memoire: lequel encore que ie vous le preſente maintenant, plus pour vous obeïr & ſatisfaire à 'noſtre commune amitié, laquelle comme elle a eſté fondée ſur la connoiſſance que nous auons de nos deporttemens au ſeruice de noſtre Roy, le garantira, s'il vous plaïſt, en voſtre endroit de ſoupçon, auquel il pourroit tomber enuers vn autre, qu'il ne m'auroit éprouué comme vous, qu'il fuſt accompagné d'artifice ou déguiſement: car c'eſt vn peril, comme vous ſçauéz, qui ſuit l'aduerſité autant & plus que l'enuie fait la felicité, laquelle auſſi vn malheureux doit fuïr tant qu'il peut; ie diſ auſſi parce qu'il eſt impoſſible qu'il s'en garantiſſe entierement, tant eſt grande la malice des hommes, & ſont nos ſins & opinions diuerſes; de ſorte que ſouuent s'il nous aduient que nous voulans purger d'vne choſe par vn autre, comme nous donnons nouuelle matiere de parler de nous, nous empiurons noſtre marché au lieu de l'amender; ſpecialement quand ce que nous entreprenons & faiſons ne plaïſt à vn chacun, ou ne nous ſuccede heureuſement, meſme au gré de nos Maiſtres, d'autant que leur opinion ou iugement, ſoit par autorité & flatterie, a communement plus de vogue & creance que la verité; choſe que ie puis

dire auoir éprouuée depuis ma disgrâce , en la continuelle poursuite que i'ay faite de nos miserables troubles : car encore que i'y aye procedé avec toute l'affection , sincerité & candeur, qu'un homme qui craint Dieu & aime son païs , peut faire : neantmoins , soit que mon entreprise aye déplû à quelques-uns , ou qu'elle n'aye eu bonne issue , i'en ay souuent esté long-temps haï & blâmé de part & d'autre , iusques à m'auoir taxé d'ingratitude enuers ma patrie , par vn écrit composé & publié par vn personnage qui me connoissoit tres-mal , encore qu'il fust mon voisin , & m'eust quelque obligation. C'est pourquoy , Monsieur , i'ay estimé qu'ayant à vous contenter du premier écrit , i'y deuois encore ioindre ce second , par lequel ie pretens vous rendre compte de toute cette poursuite : car ie confesse m'y estre embarqué apres les considerations publiques , exprés pour effacer l'opinion qu'aucuns auoient conceuë & publiée de ma retraite auprès du dit Duc , & pour contenter mes amis & moy-mesme , au moyen dequoy ie vous supplie prendre la peine de lire apres l'autre : il est veritable, comme ie le puis facilement prouuer par écrit , ou par bons tesmoins ; si ie voulois aussi mentir ce ne seroit en choses qui ont esté si publiques , & dont la memoire est si recente , n'y en parlant à vous , estant clair-voyant , & nous honorant plus que tout autre.

M O N S I E U R , ie commenceray donc pour vous faire entendre chose que vous auez

peut-estre expérimentée comme moy ; c'est qu'en mon aduersité i'ay certainement trouué & receu plus d'assistance de ceux auxquels i'auois moins fait de plaisir & seruice en prosperité , que des autres ; soit que l'enuie de ceux qui nous approchent & connoissent le plus , soit communément plus grande que celle des autres , ou qu'ils estiment auoir plus grande occasion de craindre de se faire preiudice en parlant pour leur amy , que ne doiuent auoir ceux qui nous sont moins tenus, ou bien qu'il y ait veritablement des personnes qui ayent l'ame au prix des autres si bonne & genereuse , qu'ils s'estudient à bien faire , à quiconque en a besoin, comme il a plû au Roy qui est à present , & à feu Monsieur de Chastillon en vser en mon endroit ; lors qu'estant le feu Roy arriué à Estampes , venant deuers Paris, apres la bataille de Senlis ; ils supplierent sa Majesté à la poursuite de Bigot, qui sert maintenant de Secretaire à Monsieur de Guise , de me permettre de demeurer en seureté dans ma maison , comme i'en auois enuoyé charge audit Bigot, que ie serois avec mon pere & mon fils , si elle l'auoit agreable & nous y vouloir proteger, contre ceux qui disoient auoir coniuré nostre ruine & celle de nostre maison, en quoy toutefois ils furent éconduits ; de sorte que nous fusmes contraints apres la prise du Pont de Poissy ( car nous estions à Alincourt ) de nous retirer tous à Paris aupres du Duc de Mayenne , où pen de iours apres suruint la nouuelle de la mort du feu Roy, à la suite duquel ledit

Bigot estoit demeuré, dont se ressouuenant le sieur de Chastillon, il l'enuoya querir & le fit parler à sa Majesté, laquelle luy commanda de me voir, & me venir trouuer avec vne lettre de sa main, pour me dire qu'elle desiroit parler à moy; partant que i'eussè le lendemain à me rendre dedans le Parc de Boulogne, où elle se trouueroit; (car l'armée de sa Majesté estoit encore à saint Clou) disant qu'elle se vouloit seruir de moy pour faire la paix, à laquelle elle estoit tres-disposée, & de faire pour y paruenir tout ce qui y seroit raisonnable & vtile, mesme de contenter Monsieur de Mayenne. Je fus tres-aïse de cette ouerture, de laquelle i'aduertis le iour mesme ledit Duc de Mayenne, le priant me permettre de voir sa Majesté, afin d'entendre plus particulierement son intention; mais il me refusa, disant que chacun entreroit en ombra-ge de cette mienne veüe, & qu'elle ne pourroit estre si secrette qu'elle ne fust sçeuë, & partant à luy encore preiudiciable, toutes choses estans encore si meüës comme elles estoient à cause de la mort du feu Roy, laquelle il esperoit apporter vn grand changement aux affaires en sa faueur, pour estre sa Majesté de contraire Religion. De fait il eut opinion qu'elle desiroit parler à moy, plus pour faire connoistre aux Catholiques de son armée, vouloir traitter, & par ce moyen les garder de se débander, que pour enuie qu'elle eust de faire autre chose. De sorte qu'il me fut permis seulement faire sçauoir à sa Majesté par ledit Bigot, ques'il luy plai-

soit enuoyer quelqu'un des siens vers moy iusques en cette ville de Paris, ie le receurois & mettrois peine d'obeir à ce qu'il me manderoit; adjoustant que ledit Duc n'auoit dit qu'il n'auoit aucune querelle particuliere avec sadite Majesté, laquelle il honoroit grandement, & d'autant plus il auoit sçeu qu'elle n'auoit approuué la mort de Messieurs les freres.

Sur ce estant party, ledit Bigot ramena deux iours apres le sieur de la Marfilliere Secrétaire de la Majesté, que ie receus en ma maison; mais ledit Duc ne voulut iamais parler à luy, comme ie desirois qu'il fist; d'autant qu'il auoit expresse charge de l'asséurer de la bonne volonté de la Majesté à la paix, luy representant combien elle estoit necessaire, que la Majesté estimoit qu'il ne tiendrait à luy qu'il n'eust tres-bonne part auprès d'elle, luy remontrant aussi que tous les Princes & Officiers de la Couronne, Seigneurs, Gentils-hommes & autres, outre ce qui s'estoit trouué en grand nombre en l'armée du feu Roy à la mort, auoient desia promis & iuré à la Majesté toute loyauté & obeïssance, estans demeurez contents d'elle pour le fait de la Religion, moyennant vne promesse qui leur auoit esté faite, de laquelle il me dit la substance, & dont il m'en enuoya depuis le double, que nous n'auions encore veu; adjoustant que si les choses se pouuoient accompagner, l'on pourroit aussi donner moyen d'adoucir les esprits desdits Catholiques, lesquels ils disoient grandement estre irritez

contre la personne dudit Duc, à cause de la mort du feu Roy leur Seigneur Souuerain, laquelle ils luy imputoient, qu'ils auoient tous protesté de pourfuiure la vengeance & punition iusques au bout : en quoy sa Majesté s'estoit aussi engagée si auant avec eux, qu'elle ne s'en pouuoit départir, que pour vne utilité telle que pouuoit estre la pacification du Royaume, laquelle pourtant sa Majesté desiroit que ledit Duc voulust embrasser, afin d'auoir occasion d'oublier le passé, de traiter & viure avec luy cy-apres, comme sa qualité le requeroit; ce qu'au deffaut dudit sieur de Marilliere ie fis entendre audit Duc : mais il me donna charge de luy répondre, que sa Religion & le respect qu'il portoit à Monsieur le Cardinal de Bourbon, lequel il auoit reconnu pour son Roy comme celuy à qui de droit la Couronne appartenoit, ne luy permettoit d'entendre à cette ouuerture : que Messieurs ses freres auoient pris les armes du temps du feu Roy, comme ils disoient auoir fait exprés, pour empescher que le Sceptre François tombast entre les mains d'un Prince de contraire Religion, dont le Royaume auoit esté menacé par la mort de feu Monsieur le Duc d'Alençon : à present que l'occasion de s'y opposer estoit plus vrgente & necessaire qu'e i'amaïs, il ne vouloit faire ce tort à la memoire de Messieurs ses freres, à sa conscience, ny à la fidelité qu'il deuoit audit sieur Cardinal d'y manquer; ioint qu'il auoit engagé sa foy, & donné sa vie à la cause publique, par le serment qu'il auoit fait, receuant

uant la charge dont il auoit esté honoré; de sorte qu'encore qu'il eust vn tres-grand desir d'abreger la guerre, pour obuier aux maux qu'il preuoyoit qu'elle apporteroit: toutefois c'estoit chose qu'il ne pouuoit entreprendre seul, & sur tout que ledit sieur Cardinal ne fust libre, afin de se conduire par son commandement: que si la mort du feu Roy luy auoit acquis tant d'ennemis, comme disoit ledit sieur de la Marfilliere, elle luy auoit d'ailleurs apporté vne telle consolation du sang de ses freres, qu'il en porteroit plus patiemment toutes sortes de perils, partant qu'elle auoit plus à louer Dieu que de se mettre en peine de ce qui estoit aduenü, qu'il ne vouloit entreprendre de donner conseil à sa Majesté, ayant les armes en main contre elle; mais qu'elle deuoit considérer que difficilement il les pouuoit poser, & n'entendre à aucune negociation, tant que ledit sieur Cardinal seroit prisonnier, & qu'elle perseuereroit en sa Religion.

LE DIT sieur de la Marfilliere comme tres-aduisé & affectionné seruiteur de sa Majesté, me repliqua plusieurs raisons, principalement sur la reconnoissance & liberté dudit seigneur Cardinal & la religion de sadite Majesté, lesquelles avec tout ce qui se passa entre luy & moy; ie ne vous représenteray, d'autant que ledit Duc de Mayenne voulut que les choses demeurassent aux termes susdits: toutefois sa Majesté ayant ouy ledit sieur de la Marfilliere, eut opinion qu'on ne luy auoit parlé librement à cause de sa Religion; de

forte que ledit Bigot fut encore renuoyé avec vn trompette de sa Majesté, & vne lettre de Monsieur de Liencour, premier Escuyer, par laquelle il me mandoit qu'il estoit necessaire qu'il parlast à moy pour chose qui importoit grandement, laquelle il ne me pouuoit écrire ny faire sçauoir par vn autre, partant il me conuioit d'aller iusques à Liencour. Le Roy estoit lors du costé de Clermont en Beauuoisis, où il se deuoit trouuer aussi-tost que moy, moyennant ledit trompette & vn passeport pour ma seureté: ledit Bigot me dit que cette recherche procedoit encore du commandement de sa Majesté, laquelle depuis le retour dudit Marfilliere auoit monstre auoir plus grande enuie de parler à moy que deuant, dont i'aduertis ledit Duc, le suppliant tres-instamment me permettre ce voyage; toutefois ie ne le pûs oncques vaincre, ny l'entreprendre sans sa personne, estant où estoit mon fils, quasi desespéré & deploré de l'arquebusade qu'il auoit receu au siege de Pontoise: de façon que ie fus contraint de m'excuser derechef deuers sa Majesté; & parce que ie voyois que ledit Duc faisoit estat de partir de Paris, & de s'approcher de sadite Majesté, i'écriuy audit sieur de Liencour, que i'estimois que nous sentions bien-tost si près les vns des autres, que ie pourrois alors auoir congé & moyen de le voir, dont i'auois tres-grand desir, & de me retirer, en le remerciant du soin qu'il monstrois auoir de moy.

MONSIEUR le President Ianin estoit nouvellement arrivé à Paris, venant de Lor-



raine, lequel auoit vû le Commandeur Moreau qui reuenoit d'Espagne, & auoit rapporté audit Duc qu'il deuoit estre bien-tost secouru de grandes & fortes leuées en Allemagne, Suisse, aux Païs-bas & en Lorraine, & de grandes sommes de deniers du costé d'Espagne, partant querien ne luy manqueroit: ce qui auoit tellement enflé les espérances dudit Duc, qu'il me pria de faire qu'on ne m'enuoyast plus de messagers de la part de sa Majesté, d'autant que plusieurs commençoient à en murmurer, & mesmes Dom Bernardin de Mendoza Ambassadeur du Roy d'Espagne, lequel auoit eu le vent du voyage dudit sieur de la Marfilliere & de l'arriuée dudit trompette; deslors ie connus que ledit Duc n'auoit pas grande enuie de la paix.

**D A V A N T A G E** ledit Dom Bernardin de Mendoza estimant que ie pouuois estre instrument fort propre pour seruir aux desseins de son Roy, me les découurit & communiqua deslors plus clairement qu'il n'auoit encore fait audit Duc, ny à autre, avec dessein de m'y engager: mais comme ils tendoient à vsurper le Royaume, i'en demeuray si scandalisé, que l'ayant fait entendre audit Duc, ie le suppliay en la presence dudit sieur Ianin, de me donner congé de me retirer en ma Maison, s'il ne s'y vouloit opposer, luy declarant que ie ne voulois auoir part en vne entreprise si injuste & si impossible qu'estoit celle dudit Roy, laquelle deshonorerait tous ceux qui s'en méleroient, & seroit cause de destruire la Religion & le

Royaume, adjoustant que puis que le Roy auoit tel dessein, il ne deuoit aussi esperer de faire fortune par son moyen, & qu'il acqueriroit plus de gloire, de grandeur & de contentement en aidant au repos du Royaume, sous l'obeïssance d'un Prince François, qu'il ne feroit en fauorissant vn dessein estranger, lequel luy feroit enfin perdre la reputation & ses amis, & peut-estre perdre les biens & la vie.

Monsieur de Lorraine s'estoit nouvellement saisi de Monsieur de verdun, voyant que chacun aspiroit à l'vsurpation ou separation du Royaume, ce qui augmentoit mon dépit de mécontentement avec plainte : toutefois ledit Duc m'assura par serment, qu'il ne consentiroit iamais ny à l'un ny à l'autre : & au reste qu'il sçauoit mieux que ledit Dom Bernardin, que le Roy d'Espagne n'auoit autre intention que de voir regner en ce Royaume vn Catholique, de l'amitié duquel il peust estre assuré, comme ledit President Ianin luy auoit rapporté que luy auoit confirmé ledit Moreau ; surquoy il obtint de moy que ie ne cesserois que ie n'eusse veu ledit Moreau, & sçeus de luy la verité du dessein de son Roy, auquel ie condescendis plus volontiers, d'autant que i'esperois l'accompagner au voyage qu'il vouloit faire, de voir par ce moyen ledit sieur de Liencour comme ie luy auois écrit.

I'auois neantmoins sçeu que sa Majesté auoit esté mal satisfaite de la réponse que ie luy auois faite, & qu'aucuns m'auoient

pour cela depeint pour vn bon Espagnol ennemy du bien & repos de la France, & en particulier de la personne de sa Majesté, à quoy auoit seruy à la persuader l'opinion qu'on leur auoit dit de leur reconciliation, comme i'ay depuis appris d'elle-mesme, & sçeu tout le conte qu'elle auoit decouuert des lettres par interceptes que ledit Dom Bernardin faisoit de moy à son maistre.

A P R E S la mort du feu Roy, ledit Duc fut conseillé & sollicité d'aucuns de se faire élire & declarer Roy de France par les Catholiques ausquels il commandoit, luy remontrant qu'il ne deuoit perdre cette occasion, de remettre en sa maison la Couronne qui en auoit esté ostée, & estant desia reconnu & obey des principales Villes du Royaume, & d'vn grand nombre de Noblesse, comme il estoit, ayant à faire à vn Prince de contraire Religion, auquel la succession pouoit estre iustement debatue: lequel ne seroit iamais bien obey, ny aimé des Catholiques du Royaume: que si à ce commencement ceux qui auoient seruy le feu Roy, faisoient contenance de le suiure, c'estoit à cause du regret qu'ils auoient encores tout recent de la mort du feu Roy, plutôt que pour affection ou inclination qu'ils eussent: mais comme les Catholiques & Huguenots estoient incompatibles, ils n'auroient guerres vescu ensemble, que la memoire des haines & injures passées durant nos guerres se renouelleroit, laquelle leur feroit bien-tost oublier cette paction: que le prin-

principal estoit que lors ils trouuassent vne Royauté formée & establie , à laquelle ils pussent auoir recours, d'autant que les François estoient tous accoustumez à la Monarchie , que tous autres gouuernemens leur estoient odieux ; & qu'on ne les contentoit pas, leur donnant pour Roy Monsieur le Cardinal de Bourbon , comme aucuns proposoient , à cause qu'il estoit prisonnier , & Ecclesiastique , qu'ils vouloient iouir de leur Roy , qui fust belliqueux , & allast à la guerre comme eux , & non en seruir vn par imagination , qui ne pust voir leurs actions , les reconnoistre , ny leur bien faire ; que ledit Duc seroit accusé lasche de courage , s'il méprisoit cette occasion : qu'il n'y auoit que les simples & pusillanimes qui attribuoient ce refus à bonté & équité , pour estre cette entreprise digne d'un cœur genereux, tant pour le mesure de la chose , que de la commodité qu'il auoit d'y paruenir ; c'estoit faire les affaires du Roy de Nauarre , que de reconnoître ledit sieur Cardinal son oncle : car c'estoit enfin confesser la Couronne appartenir à la maison de Bourbon , lequel toutefois l'on pouuoit debattre. Que de s'amuser à deffendre le droit de l'oncle contre le neveu , c'estoit vn suiet bien fragile , à cause de l'âge & de la personne dudit Cardinal , qui estoit au pouuoir d'un neveu ; qu'auenant sa mort , il ne restoit plus que le pretexte & tiltre de Religion contre le Roy , lequel cesseroit quand il voudroit d'aller à la Messe , comme il ne falloit point douter qu'il ne fust,

enfin si autrement il ne pouuoit faire ses affaires ; qu'aussi diroit-on que ledit Duc auoit mis ledit Cardinal en jeu exprés, pour sous son nom couvrir son ambition, & peut-estre auancer ses iours : car peu de gens croyoient qu'il l'eust fait par affection ny iustice. Ce pauvre Prince tenu prisonnier estant demy mort au monde, & la iustice peu considerable, quand il estoit question de regner: de sorte qu'en suiuant tel chemin, il ne seroit exempt de calomnie & de blâme, & si perdrait sa part d'une tres-belle & glorieuse fortune, laquelle il ne recou-  
ureroit iamais : car quand bien ledit sieur Cardinal mourroit ; & que ledit Roy persisteroit en sa Religion, il resteroit toujours d'autres Princes de sa mesme Maison, faisant profession de la Religion Catholique, auxquels ledit Duc seroit d'autant plus obligé de conseruer leur droit par ces mesmes raisons qu'on luy representoit ; pour ledit sieur Cardinal, qu'il n'auroit le jeu si beau qu'il auoit maintenant à cause de la diuersité de la Religion du Roy, & mesme de la prison de Monsieur de Guise son neveu, qui pourroit avec le temps estre deliuré & apres luy enuier cette grandeur, qu'il ne falloit douter qu'il ne fust assisté du Pape & du Roy d'Espagne, apres ce coup ; car comme il seroit sans remede, il seroit toujours plus aisé de le fauoriser, que d'acquiescer au Roy de Nauarre, estant pour sa Religion & pour la dispute du Royaume de Nauarre ennemy irreconciliable de l'un & de

l'autre , qu'estant autorité de sa Sainteté, & secouru dudit Roy d'Espagne, tout luy deuoit estre possible ; car il acqueroit vn grand honneur d'épouser cette entreprise, traualier & mourir pour icelle, comme auoient fait ses predecesseurs ; qu'il poursuiust donc sa fortune courageusement sans varier, quoy qu'il en pust arriuer : car tels desseins vouloient vne ame forte & constante, tel qu'il s'estoit monstré depuis la mort de Messieurs ses Freres, dont Dieu luy offroit & liuroit maintenant le loyer qu'il ne pouuoit mépriser sans faire tort à la memoire des siens, & pareillement à ses enfans ; Que quand Messieurs les Ducs de Lorraine & de Sauoye n'approuueroient du commencement cette resolution, il luy seroit facile apres la leur faire trouuer bonne, qu'au pis aller il en seroit quitte pour leur faire part de sa fortune. Aussi seroit-il difficile qu'il mangeast seul ce morceau, non plus qu'auoient fait ceux qui auoient autrefois tenu ce chemin, lesquels n'auoient rien épargné ny refusé pour y paruenir ; Que c'estoit le principal aussi d'entrer en jeu, & auoir part au hazard, non comme procureur ou lieutenant d'vn autre, ainsi que l'on le voudroit rendre ; mais comme partie interessée, & pour telle reconnuë : car le temps acheueiroit apres le demeurant, s'il s'en rendoit digne deuant Dieu & les hommes : Que si maintenant il reconnoissoit ne pouuoir ny deuoir aspirer à ce grade, au moins deuoit-il rompre & aduiser à la reconnoissance dudit

Cardinal de Bourbon ; d'autant que par icelle , non seulement il prioit luy & toute sa maison de toute cette fortune ; mais aussi c'estoit le moyen d'en pouuoir à l'aduenir disposer en faueur d'un autre Prince que de la maison de Bourbon , laquelle estoit ennemie de la sienne.

A ce conseil , qui estoit assez chatouilleux , ceux qui y vouloient contredire , n'employeroient pour toute raison que l'impossibilité ; Car , Monsieur , comme vous sçauiez , qu'en telles matieres , celles qui sont fondées sur l'équité , ont ordinairement peu de credit , l'honneur & la justice y suivent l'utilité , sinon deuant Dieu , au moins deuant les hommes. Ledit Duc auoit déjà perdu partie de la bonne opinion , que du commencement l'on auoit eue de luy , autant peut-estre par la faute d'autrui , que par la sienne ; tant y a que son mal-heur estoit tel : car ces peuples qui s'estoient persuadez , en prenant les armes que personne ne leur pourroit resister , ayant depuis éprouué le contraire , & n'agueres veu ledit Duc aux abois avec eux en la ville de Paris , s'en prenoient à luy , de façon qu'on ne luy portoit l'affection & obéissance que l'on deuoit faire. Partant , soit que lesdits peuples fussent déjà pratiquez , ou qu'ils en parlassent par experience ou iugement , ils disoient sur cette occasion assez communément & ouuertement , qu'il n'estoit puissant assez pour conseruer la Religion , & soutenir cette guerre. Sur cela aucuns vouloient que l'on eleuast le Roy d'Espagne , &

que l'on se jettast du tout entre ses bras : les autres, que l'on prist Monsieur le Duc de Lorraine, ou l'un de Messieurs ses enfans comme Chef de la Maison, se persuadans que ledit Roy d'Espagne l'approuveroit, & mesme y engageroit sa fille. Aucuns propoisoient encore Monsieur le Duc de Savoie, comme issu d'une fille de France, déjà allié & supporté de la Couronne d'Espagne. Prince courageux, voisin du Royaume & puissant : Mais la plus grande & saine partie jettoient les yeux sur Monsieur le Cardinal de Bourbon, auquel l'on disoit que la Couronne appartenoit de droit pour en estre plus proche d'un degré que son neveu, qu'il avoit esté ainsi jugé par les Estats & Parlemens du Royaume ; que c'est un grand advantage que de combattre & souffrir pour une bonne & juste querelle. Davantage, que ledit Cardinal estoit Prince & Catholique, avoit esté chef du party, & comme tel avoit beaucoup souffert, dont il estoit encore prisonnier, que l'on estimoit qu'il estoit facile de le recouvrer & pratiquer par force, qu'il seroit cause de rallier tous les Catholiques ensemble, qui estoit le moyen de destruire bien-tost les Huguenots, sans estre contraint de mandier l'assistance des estrangers, laquelle ne nous seroit donnée pour neant. Peu certes inclinoient audit Duc de Mayenne, à cause de sa foiblesse, & du peu de contentement que l'on avoit de luy, & de ceux qui manioient les affaires auprès de luy : seulement aucuns de ses domestiques, ou leurs parens & amis en petit



nombre parloient pour luy , & comme il ne pouuoit se faire élire que par le Parlement, ou par le Conseil general de l'Vnion qui n'étoit lors en sa force , ou le corps des Villes; combien que telles compagnies fussent remplies de personnes de différentes humeurs & opinions , non encore bien pratiquées , instruits ni résolus de ce qu'elles deuoient faire & desirer en cette occasion , s'accordoient toutefois à ne vouloir reconnoistre ledit Roy de Nauarre , à cause de sa Religion , ny élire ledit Duc de Mayenne pour Roy , pour les raisons susdites. Sur cela estoit fondée principalement l'impossibilité du dessein dudit Duc ; à quoy ledit Dom Bernardin de Mendoza au nom du Roy son maistre , & les seruiteurs des autres Princes, qui aspiraient à ce grade ne s'endormoient pas ; ce qui estoit mieux connu dudit Duc, que de ceux qui luy en parloient ; partant ils prirent conseil , & résolurent d'en donner le tiltre à vn autre, & mettre peine d'en maintenir & conseruer l'effect , puis qu'ils ne pouuoient auoir l'autre pour luy ; & comme ledit sieur Cardinal estoit plus propre que tous autres , pour seruir à ce dessein , tant pour la qualité de son âge, qu'à cause de son absence , joint que ses pretentions estoient plus plausibles ; il s'arresta à luy, le reconnut le premier , & le fit proposer, reconnoistre & proclamer au Parlement , au Conseil de l'Vnion , & par ceux de la Ville, par l'aduis dudit Dom Bernardin, lequel en fit grande instance ; aucuns ont dit par affection , comme celuy qui se vantoit estre issu

d'une fille de la maison de Bourbon, mariée à celle de Mendoza en Espagne : mais plus à mon aduis pour donner temps & moyen à son Roy, & dresser ses pratiques en ce Royaume, & assembler & faire venir ses forces & deniers pour mieux executer son dessein ; iugeant bien que ledit Cardinal ne la feroit pas longue, que son nom seroit plus propre pour servir de planche à son maistre que celui d'un autre, principalement dudit Duc de Mayenne, l'ambition & autorité duquel il redoutoit. Et d'autant que cette opinion par laquelle la Couronne estoit adjudgée & conservée à la maison, à laquelle de droit elle appartenoit, iustifioit mieux la cause publique, & rendroit nos diuisions & guerres civiles moins dangereuses, elle fut incontinent embrassée d'un chacun ; & veritablement à propos pour le salut du Royaume, puis qu'il n'y auoit moyen de persuader lors à ce peuple d'enuoyer vers sa Majesté traiter avec elle, ny de la connoistre : car si ledit Duc eust pris deslors resolution de contenter le Roy Catholique, & tout autre Prince, il ne falloit que surseoir la declaration de reconnoître ledit Cardinal, comme il pouuoit faire facilement, sous pretexte de sa captiuité, & d'assembler ceux du party pour en ordonner : car par ce moyen il en eust disposé quasi comme il eust voulu, tant estoit grande la haine dudit Roy, fondée sur la Religion, & bonne opinion que la Commune auoit de la probité, pieté, forces & moyens dudit Roy d'Espagne, & de ses Ministres & seruiteurs ; de

forte que ceux qui furent cause de cette resolution ne firent pas petit service au Royaume. Ledit Duc de Mayenne partit de Paris avec son armée le premier iour de Novembre, passa par Noisy, Mante, Vernon, & Trepagny, alla assieger la ville de Gournay, dans laquelle commandoit le sieur de Rudempré avec son Regiment de gens de pied; là survint le Commandeur Moreau, lequel estoit party d'Espagne deuant la mort du Roy, partant il ne scauoit certainement quel conseil prendroit son maistre apres cette nouuelle: car si sa Majesté eust vécu c'estoit bien son intention de secourir Monsieur de Mayenne d'hommes & d'argent, mais sous-main, & sans engager son nom & ses bandes, comme déjà il auoit commencé, lors qu'il auoit enuoyé en France le Comte de Collate avec son Regiment de Landsquenets qu'il auoit équippez à son service, & promis faire service audit Duc, encore qu'il fust payé de ses deniers. Cela fut cause qu'à l'abord ledit Moreau ne me parla qu'en termes generaux de l'intention de son Maistre, comme il auoit fait audit President Ianin en Lorraine: & neantmoins comme il estoit de son naturel assez prompt & impatient, aussi qu'il estimoit auoir si bon jeu, qu'il ne se deuoit plus contraindre, il ne tarda gueres à me donner trop d'occasion de croire qu'il n'auoit pas moins de fureur pour son maistre, que ledit Dom Bernardin: car il ne parloit pas de faire vn Roy de France de sa main, qui fust grand & puissant assez par soy-mesme & sans secours.

d'autrui , en bannir du tout l'Heretique & ses adherans , & plusieurs autres contes semblables , par lesquels l'on découvroit que la mort du Roy luy auoit aiguisé l'appetit.

LE Roy estoit retiré du costé de Dieppe avec les forces qu'il auoit, où le Duc s'achemina incontinent apres la prise de Gournay qui ne dura que deux jours , reprit en passant Neuf-Chastel ; & apres auoir joint Monsieur le Marquis du Pont & Monsieur le Duc d'Aumale , se vint presenter deuant la ville de Dieppe , du costé du Pollet avec son armée, qui estoit composée de quatre cens cheuaux François, Reistres & Vvallons, six mil Suisses , trois mil Landsquenets , & de cinq à six cens hommes de pied François. Quelques iours apres i'obtins permission dudit Duc de voir Monsieur de Liencour , dont ie l'advertis ; mais il me respondit que la recherche qu'il en auoit faite auparauant n'estoit pas venuë de luy , partant qu'il sçauoit & me manderoit si l'on l'auroit encore agreable ; toutefois ie n'eus depuis aucune nouuelle de luy, dont i'appris que de cela auoit esté causée l'impression susdite que sa Majesté auoit conceuë de moy , & perdis cette occasion à mon tres-grand regret, par laquelle i'esperois ietter les fondemens d'une bonne negociation, pour abreger nos miseres.

M A I S il s'en presenta vne autre bien vite apres , par la prise du sieur de Belin , l'un des Mareschaux de Camp de l'armée dudit Duc , aduenü au combat d'Arques , auquel Dieu fauorisa miraculeusement sa Majesté :

car encore que le logement de son armée fût tenu aduantageux , & le chemin pour y aller tres-difficile & perilleux , toutefois comme les forces dudit Duc estoient sans comparaïson plus grandes que celles de sa Majesté , si elles eussent aussi bien assailly comme les autres se deffendoient, sadite Majesté eust couru grand fortune. Ledit sieur de Belin y demeura doncques prisonnier à la teste de l'armée , lequel estant déliuré sur sa foy , vint trouuer ledit Duc au Pont d'Aunay , où il s'estoit retiré , à cause que son armée s'estoit débandée depuis son partement de deuant la ville de Dieppe, pour recueillir quelques gens & deniers qu'il esperoit tirer du Pais-Bas , par le moyen dudit Moreau.

LE DIT sieur de Belin luy dit, que sa Majesté l'auoit enuoyée exprés pour luy demander la paix , de laquelle elle auoit telle enuie , que sans auoir égard à sa dignité ni consideration quelconque , elle auoit bien voulu le rechercher maintenant , que l'on ne pouuoit dire que ce fust par necessité qu'elle le fist , puis qu'il s'estoit reculé d'elle , mais pour la compassion qu'elle auoit du public & du Royaume ; ledit sieur de Belin luy dit aussi , comme les Catholiques qui estoient avec sa Majesté le prioient de faire semondre sadite Majesté de quitter sa Religion , & embrasser la Catholique ; & ce faisant ne laisser de traiter avec elle , & la reconnoistre , se promettant par ce moyen d'auoir la paix à la gloire de Dieu, ou bien qu'il en reüssiroit vn tres-grand bien & aduantage pour la deffense

de nostre Religion, qui apporteroit audit Duc tres-grand honneur.

CETTE proposition fut mise en delibération, & dès-lors fort debattuë près dudit Duc: car les vns vouloient que le conseil desdits Catholiques fust suiuy, & les autres y resistoient. Ceux-là disoient que telle recherche ne pouuoit estre que tres-vtile à la Religion & au Royaume, tres-honorable à ceux qui la feroient, & mesme agreable à Monsieur le Cardinal de Bourbon, estant en prison, & quasi hors d'esperance d'en sortir, comme il estoit: car il aduicndroit d'icelle, que le Roy changeroit de Religion ou non; s'il faisoit le premier, Dieu en seroit glorifié, la Religion restaurée, & le Royaume mis en paix, au grand honneur & aduantage de Monsieur de Mayenne & de son party, parce qu'il seroit reconnu autheur de tel changement, & qu'il obtiendrait pour la grandeur de sa maison, la seureté de nostre Religion, & de tous ses partisans; que telles conditions qu'il voudroit demander, il les auroit, & assureroit aussi la vie dudit sieur Cardinal, laquelle couroit fortune en ce debat, & peut-estre seroit cause de sa liberté, laquelle il ne falloit esperer, puisque nostre armée ne s'y estoit acheminée & employée au départir de Paris, & qu'il auoit esté déliuré par M. de Chauigny au Roy son neveu, lequel l'auoit enuoyé à Fontenay en Poitou, en la garde de ceux de la Religion, seroit cause de la deliurance de Messieurs de Guise & d'Elbeuf, dont il

seroit loüé & fortifié , & que c'estoit tout ce qu'il luy restoit à faire eterniser d'une gloire immortelle , la poursuite qu'il auoit faite si heureusement de la mort de Messieurs les freres : & que si sa Majesté refusoit d'embrasser la Religion apres son offre , non seulement iustificeroient sa cause deuant Dieu & les hommes , dedans & dehors ce Royaume avec la memoire de sesdits freres , & les armes passées ; mais aussi apporteroit vne telle diuision entre sa Majesté & les Catholiques qui l'assistoient , que son party en seroit tres-fortifié ; que c'estoit le but auquel il deuoit tendre , le preferant à toute autre chose : les autres remonstroient qu'estant nostre guerre fondée sur la Religion plus que sur le droit de la Couronne , ledit Duc ne pouuoit en saine conscience , ny ne deuoit par raison s'engager à tel offre sans la permission du Pape, le consentement des Prelats , Villes & Communautéz du party , mesmes des Princes étrangers qui l'auoient assisté iusques alors, d'autant que c'estoit vn coup de partie que chacun trouueroit mauuais qu'il entreprist de iouïr sans eux , lesquels encores qu'ils l'eussent élu chef du party , n'auroient toutefois entendu ny esperé qu'il disposast du general sans les appeller ; & quand meü de l'vtilité publique il s'en dispenserait , il ne seroit suivy des autres : de façon qu'au lieu de pacifier le Royaume , il le troubleroit & diuiseroit par aduanture plus qu'il n'estoit : quoy aduenant ses moyens ne saueroient le public, ains demeureroit méprisé de tous; ce qui leur

donnoit connoissance de soupçonner que ce conseil des Catholiques apporté par led. sieur Belin estoit artificieux, & mis en auant du consentement de sa Majesté, exprés pour faire perdre audit Duc ses amis dedans & dehors le Royaume, & sur tout le Roy d'Espagne, lequel ils n'estoient d'auis qu'il m'écontentast aucunement, comme celuy seul duquel dependoit son principal appuy; mesmement pour chose si incertaine qu'ils estimoient qu'étoit le fruit de cette ouuerture, pour auoir les Catholiques qui estoient auprès de sa Majesté, fait preuue depuis la mort du feu Roy, auoir peu de soin de leur Religion, pour maintenant espérer qu'ils fissent mieux à l'auenir: que leur deuoir estoit de sommer & presser eux-mesmes le Roy de se faire Catholique, & l'honneur de sa Majesté; qu'elle se resolut à leur requeste plutôt qu'à la postulation de ceux qui luy faisoient la guerre, & se contentast qu'après sa conuersion faite comme il conuient, elle fust reconnuë d'eux: ils remonstroient aussi le peril que couroit la Religion en cas de dissimulation en sa conuersion, concluant qu'ils trouuoient cette ouuerture si dangereuse, tant pour ledit Duc, que pour le party, que non seulement il la falloit rejeter, mais aussi celer à vn chacun, pour obuier aux desiances & diuisions qu'elle engendreroit si elle estoit découuerte & communiquée: les premiers repliquoient que la guerre estoit pour aucuns, bien plus ambitieux que religieux, comme l'on commençoit à decouurir, & mesme de la part



des Espagnols, lesquels au lieu de secourir ledit Duc des forces qu'ils auoient fait approcher de la frontiere, sous la conduite du sieur de la Motte Gouverneur de Grauelines, avec lesquelles il eust pû du tout renfermer sadite Majesté dedans Dieppe, comme il leur auoit remonstré; & ce faisant, gagner vn grand aduantage sur luy, auroient voulu surprendre la ville de Cambray sur Balagny qui auoit enuoyé ses forces, & s'estoit luy-mesme acheminé au secours & seruice dudit Duc, & de la cause que leur but estoit d'vsurper l'Estat, & le dissiper, quoy estant ses armes & ses assistances seruiroient plus à nous dés-vnir & destruire qu'à autre chose; que l'on deuoit bien porter honneur & respect au Pape, & partant ne rien conclurre avec sa Majesté, sans son aduis & permission; d'autant qu'il estoit besoin que sa Sainteté mist la main à la conuersion de sa Majesté, pour la rendre parfaite, qu'il en falloit aussi Communiquer aux Prelats, Seigneurs, Villes & Communantez du party, afin de ne rien faire sans eux, pour les raisons représentées; mais que ledit Duc ayant plus de connoissance des affaires que personne, ne deuoit faire difficulté d'vbaucher ce remede à nos maux s'il iugeoit qu'il fust à propos, pour n'en perdre l'occasion, & apres le poursuiure & paracheuer, par l'aduis & consentement des autres enuers lesquels ils ne pouuoient prendre creance, si veritablement & par effet ils n'en recherchoient le bien & aduantage de la Religion & du Royaume, lesquels couroient plus grand peril, la

guerre durant, si elle n'estoit mieux justifiée & conduite, que d'un bon accord fait avec sa Majesté conuertie, quand mesme il y auroit du déguisement; d'autant que l'ambition & la confusion qui estoit audit party, rendoient les armes d'iceluy mal-heureuses, & que l'on pouuoit par ledit accord brider tellement sa Majesté, qu'il ne seroit apres en son pouuoir de nuire à la Religion, ni à ceux du party, quand mesme elle en auroit volonté. Rejettant ce conseil, c'estoit non seulement affermir au seruice de sa Majesté lesdits Catholiques qui estoient avec elle, mais aussi luy en donner des nostres, lesquels connoissans comme plusieurs commençoient déjà de faire, la malice des Espagnols & leur but, composeroient avec elle & l'iroient trouuer & seruir : que ledit Duc pouuoit facilement se conduire en ce moyen sans se faire tort ny offenser personne; & que tant s'en faut qu'il deust craindre que lesdits Espagnols fissent bande à part, & l'abandonnassent comme l'on disoit; qu'au contraire, quand ils verroient que luy & le party se pourroient passer d'eux, ils en feroient plus de conte, & rechercheroient dauantage son amitié, comme gens méprisans ordinairement ceux qui ont besoin d'eux; à quoy ils se reduiroient tellement avec le party, s'il refusoit cette occasion, qu'il seroit apres contraint de seruir tout à leur dessein, voire deuenir esclau d'iceux; que neantmoins ils n'estoient d'aduis de les mépriser ni offenser, si faire se pouuoit, tant pour l'assistance que l'on en auoit receuë, qu'estoit

encore leur amitié & association vtile & auantageuse au public & au particulier dudit Duc; mais bien de ne laisser de faire pour eux ce que l'on iugeoit estre honnesté, iuste & vtile à la cause, comme ils concludoient qu'estoit ladite ouuerture, laquelle pourtant ils supplioient ledit Duc d'embrasser, & non la reietter comme les autres luy conseilloyent.

NEANTMOINS l'aduis des autres fut suiuy, car ledit sieur de Belin fut renuoyé avec vne réponse conçue en termes generaux, de l'affection dudit Duc à la paix du Royaume, pour laquelle il disoit qu'il estoit prest de l'employer quand il connoistroit par icelle pouuoir conseruer & asseurer la Religion qui estoit son principal but, dequoy ledit sieur de Belin eut charge d'asseurer lesdits Catholiques, sans toutefois engager ledit Duc plus auant-enuers sa Majesté.

LEDIT Duc de Mayenne alla de là à Amiens, où il fut receu tres-magnifiquement, toute la ville sortit en armes au deuant de luy, l'artillerie le salua & luy fut présenté vn poil qu'il refusa; mais estant conduit en la grande Eglise, il s'agenouilla sur le marche-pied qui luy auoit esté préparé. Il estoit en grand soucy de la ville de Paris, où il auoit sçeu que sa Majesté s'estoit acheminée au partir de Dippes; toutefois il fut si pressé des habitans dudit Amiens d'y demeurer iusques à l'élection de leur majeur, qui se deuoit faire le iour de saint Simon saint Iude, le 28. Octobre, qu'il s'y accorda; mais il fit cependant auancer son armée du costé du Pont de sainte

Maixance, afin de s'approcher de ladite ville de Paris, dont il sceut la prise des Faux-bourgs bien-tost apres, ce qui le hastia d'aller; & si l'on eust inieux rompu, ou tant soit peu deffendu ledit Pont de sainte Maixance, ie croy qu'il ne fust iamais arriué à temps dans ladite ville de Paris pour la secourir, tant les habitans estoient effrayez, pressez de sa Majesté, de sorte que ledit Duc y arriua fort à propos. Le lendemain sa Majesté quitta lesdits Faux-bourgs, & ledit sieur de Belin reuint encore trouuer ledit Duc, qui derechef luy parla de la paix, mais il aduança aussi peu que la premiere fois, encore qu'aucuns ayent depuis soupçonné qu'il luy fust deslors donné charge d'asseurer sa Majesté en secret; que si elle vouloit estre Catholique, ledit Duc se disposeroit avec ceux de son party de la contenter; chose, si ainsi est, qui ne me fut communiquée, encores que chacun sceust assez que ie fauorisois ce conseil sur tous autres. Il ne sortit aucun fruit de ce propos, car la Majesté alla apres à Vandosme, au Maine & en Normandie, gaignant & forçant tous les iours quelques places: ledit Duc demeura en ladite ville de Paris.

Le sieur Iean Baptiste de Tassis du conseil du Roy d'Espagne au Païs-Bas, arriua quelque temps apres, accompagné dudit Commandeur Moreau: deslors ils voulurent engager ledit Duc à traiter avec leur Maistre, assistez dudit Dom Bernardin de Mendoza, & demandoient qu'il fust déclaré Protecteur du party Catholique en ce Royaume, avec des

authoritez , puiffances Royales & fouveraines qu'ils bâtiſſoient , marques & tiltres de ladite proteſtion & reconnoiſſance , comme ils diſoient de l'obligation que nous luy auions , & du beſoin que nous auions de ſon aſſiſtance , comme de pourvoir aux principales charges & dignitez du Royaume, Eccleſiaſtiques & Seculieres , tout ainſi que fait le Roy au Royaume de Naples & de Sicile par deſſus ſes Vice-Rois qu'il y enuoye.

Je fus appellé à ce conſeil , où ie fus tres-empesché , encores que ledit Duc m'eust promis , qu'il n'accorderoit rien contre les loix du Royaume ; car il me ſembloit que c'eſtoit faire tort à noſtre honneur ſeulement de prêter l'oreille à telles demandes , leſquelles ils pourſuiuoient avec tant d'ardeur ( comme ils nous euſſent tres-honorez de nous recevoir pour eſclaues ) que c'eſtoit choſe indigne de la nation Françoisé d'y entendre , & meſme de la fidelité , que le party auoit iurée à Monſieur le Cardinal de Bourbon , duquel ils faiſoient bien lors paroître qu'ils faiſoient peu d'eſtat , & à quelle fin ils auoient fauoriſé ſa reconnoiſſance. Leſdits Eſpagnols preſſoient tellement cette reſolution , qu'ils ne vouloient donner loisir audit Duc d'attendre que Monſieur le Cardinal Cajetan enuoyé Legat en France par le Pape Sixte cinquième, fut arriué pour luy en communiquer , encore que ſa Sainteté l'eust depeſché expreſ à ſa pourſuite , & qu'il fuſt deſia bien auant dans le Royaume : & fut cela à mon aduis pour ſ'aſſeurer de ſon affection particuliere

au service de leur Maistre , comme celuy duquel les parens tenoient desia de la volonté du saint Pere , lequel aussi l'on disoit commencer à reconnoistre leur malice & ambition, & auoir compassion de la France. Monsieur l'Archeuesque de Lion reuint lors de prison , & ce à propos : car il fortifia & authorisa grandement ceux qui contredisoient ausdits Espagnols , ausquels veritablement ledit Duc fit paroistre par effet , n'auoir enuie d'accorder leurs demandes : toutefois ils ne laisserent d'en faire instance & poursuites, assistez & fortifiez de leurs partisans qui n'étoient en petit nombre.

Monsieur , ie fus trouuer en ce temps-là Monsieur le Cardinal de Gondy à Noyssi, avec Monsieur de Videuille , & le sieur Zamet , où vous pristés la peine de vous rendre à ma priere, il vous en souuiendra ; ce fut pour vous dire la peine en laquelle ie me trouuois de la poursuite desdits Espagnols, du peu d'affection que ie reconnoissois que ledit Duc auoit à la paix , & la crainte que i'auois qu'à l'arriuée dudit Legat , il prist quelque resolution , & remplist tout le Royaume de feu & sang pour iamais : & sur ce, i'ay suppliay ledit sieur Cardinal de venir iusques à Paris, pour assister les gens de bien enuers ledit sieur Legat , afin de le disposer de rechercher les moyens de pacifier ce Royaume, comme chose que ie reconnoissois ne pouuoir auoir lieu, que par l'entremise & autorité de sa Sainteté , pour estre le party trop fort de ceux qui sous pretexte de pieté, vouloient détruire

ou

ou enuahir le Royaume. Vous nous aidastes aussi à faire entreprendre ce voyage audit sieur Cardinal, encore qu'il fust tres-affectionné au bien de ce Royaume, comme il s'est monsté en toutes occasions: de sorte qu'il se rendit à Paris apres l'arriuée dudit Cajetan qui y fut receu, ledit Duc absent; car il estoit au siege de Pontoise, duquel il vint à bout plûtoſt qu'il n'esperoit.

M A I S ledit Cajetan fit peu de conte des bons conſeils & aduis dudit ſieur Cardinal de Gondy des miſeres de la France, ny des remonſtrances des gens de bien: car au lieu de faire l'office de Pere commun, comme l'on eſperoit & croyoit certainement que c'eſtoit l'intention de ſa Beatitude qu'il fiſt; il embrasſa & fauoriſa ouuertement les turbulents & ſous main le deſſein deſdits Eſpagnols, au grand prejudice de la Religion & de la Frâce.

N O U S voyans doncques deceus & priuez de ce remede contre raiſon & noſtre attente, ie me reſolus de me retirer en ma maiſon; mais auant que partir ie voulois mettre & laiſſer par écrit audit Duc les conſeils que ie luy auois donné pour me deſcharger, de les luy enuoyer au ſiege de Pontoise, parce que ie ſçauois que ledit Taſſis l'auoit ſuiuy, qui le preſſoit encores de luy permettre de faire pour ſon Roy, ſinon tout au moins vne partie de ſes demandes, diſant le vouloir aller trouuer & l'en reſoudre. Ie ſçeus auſſi que ledit Duc auoit delibéré d'enuoyer avec luy en Eſpagne l'un des ſiens, de ſorte que ie craignois qu'il s'engageaſt, encore qu'il nous

eust promis le contraire: il fit faire ce voyage à Rosieux, dont ie fus très-marry, car c'estoit celuy de tous ses seruiteurs qui le sollicitoit le plus de contenter lesdits Espagnols.

L E D I T Duc m'écriuit auoir pris en bonne part mon écrit qui tendoit à la persuader au conseil que les Catholiques qui assistoient sa Majesté, luy auoient donné par ledit sieur de Belin, c'est à sçauoir de sommer sa Majesté d'estre Catholique, & en ce faisant l'asseurer de la reconnoître; i'ajoutois aussi qu'à son refus il deuoit mettre peine de retirer vn Prince du sang Catholique, pour estre nostre chef en l'absence de Monsieur le Cardinal de Bourbon, afin de couper broche à toutes les pratiques que l'on faisoit contre l'Estat; néantmoins ledit Duc print autre conseil, pour autres raisons cy-dessus dites, lesquelles aucuns luy faisoient encore plus preignantes & considerables que deuant, à cause des voyages en Espagne desdits Tassis & Rosieux, & de la ialousie que les Ministres du Roy d'Espagne commençoient à faire paroistre auoir de luy, & de ceux qui l'assistoient, pour auoir contredit leurs demandes qu'aucuns de la ville de Paris fauorisoient si ouuertement, qu'ils luy disoient, que ledit Duc estoit seul qui s'y opposoit, avec quelques-vns qui estoient auprès de luy, & que la ville & tout le party ne demandoient autre chose que de contenter sa Majesté Catholique: ce qui fut cause que les Ministres du Roy commençoient à s'adresser à ces gens-là pour des-authoriser



ledit Duc, & faire leurs besongnes sans luy, comme ils leur disoient qu'il leur estoit facile de faire; en quoy les vns & les autres se conduisoient si impudemment & insolument, que chacun s'en apperceuoit, mesme que la partie estoit fauorisée dudit Legat, auquel neantmoins ie fis voir l'écrit que i'auois enuoyé audit sieur Duc, sur l'instance qu'il m'en fit; car il fut incontinent diuulgué & assez bien receu; toutefois en la ville il se contenta d'en voir copie sans en faire autre conte, aussi ne pouuoit-il seruir au sien.

V O Y A N T doncques que ledit Legat nous estoit si contraire, ie dis audit sieur Cardinal de Gondy, lequel ie visitois souuent, que ie m'en voulois aller, & de fait ie ne voulus accepter vne prouision de Conseiller dudit Duc, qui me fut lors enuoyée, ny faire le serment d'iceluy, que Monsieur de Lion, lequel auoit accepté la garde des Seaux, faisoit prester à tous ceux que ledit Duc auoit choisis & retenus du Conseil general de l'Vnion, lequel il auoit esté conseillé de supprimer; & fust party à l'heure mesme sans la prise de Monsieur le President de Blanmesnil, lequel ie ne voulois abandonner en cette necessité, qui estoit certes tres-perilleuse. Dieu me fit cette grace que si ie n'eus le credit de garantir sa bourse, ie ne fus du tout inutile à sa vie, laquelle estoit fort menacée de plusieurs, qui auoient lors plus de puissance & autorité en ladite ville, que n'auoit la justice, ny mes continuelles sollicitations & supplications, lesquelles durerent deux ou trois mois: que

si ledit President n'eust mis la main à la bourse, & payé sept ou huit mil écus qui tournerent au profit d'un particulier, & comme il se resolut de faire à la fin, il n'en fust pas fortuy autrement.

**Q**U E L Q U E S iours deuant ie receus vne lettre de Monsieur le President Ianin, écrite de Maigny, par laquelle il me prioit si l'occasions'en offroit, & que i'en eusse les moyens, de ietter les fondemens d'une negociation pour la paix publique, d'autant qu'il reconnoissoit ledit Duc plus disposé d'y entendre qu'il n'auoit encore esté : cette lettre me réjouit, estant dudit President, qui estoit à la suite dudit Duc, auquel il se confioit grandement, & qui estoit homme de bien & clairvoyant.

I'EN fis part incontinent audit Cardinal de Gondy, & resolusmes que ie me retirerois en ma maison, que sa Majesté m'enuoyeroit un passe-port, & me donneroit moyen de parler à elle pour attacher cette negociation, comme de moy-mesme, & la poursuuirois apres selon que les occasions s'en presenteroient.

SUR cela ledit Cardinal partit de Paris, tres-mal edifié dudit Cajetan, & se retira à Noyssi; mais voyant que ie n'auois aucunes nouuelles de luy, & que d'ailleurs toutes choses s'alteroient tous les iours dauantage en ladite ville de Paris, que les Flamans estoient arriuez en l'armée dudit Duc de Mayenne, sous la charge du Comte d'Aiguemont, que l'on ne parloit que d'aller secourir la ville de

Dreux assiegée par le Roy, & donner vne bataille, & que le marché de la deliurance dudit President Blannefnil estoit accordé & signé, ce qui m'auoit si long-temps arresté en la ville de Paris. Le pris congé d'un chacun pour me retirer en ma maison, dequoy le Commandeur Moreau fut tres-aïse : car il estimoit que ma personne portoit mal-heur aux affaires de son Maistre, & auoit esté si effronté que de le publier par la ville; & soupçonnoit mesme ledit Cardinal Cajetan, qu'il auoit veu les articles de la paix signées de ma main, & accordées du consentement de Mesdames de Nemours & de Mayenne, desquelles il n'estoit lors gueres mieux edifié que de moy, parce qu'elles n'approuuoient leur dessein. Mais comme ie voulus monter à cheual le quinzième du mois de Mars de grand matin, M. de Lion, duquel i'auois pris congé le soir de deuant, m'enuoya prier de le voir encore deuant que partir, avec lequel ie trouuay le sieur du Tremblay, qui luy auoit apporté le premier aduis de la perte de la bataille d'Yury, comme celuy qui pour estre prisonnier sur sa foy, auoit veu ioüir les jeux sans s'en mêler, & partant eut moyen d'apporter la nouuelle le premier : & neantmoins il parloit incertainement de la personne dudit Duc de Mayenne, pour estre party comme il disoit auant l'entiere deffaite de l'armée.

CETTE nouuelle m'arresta tout court, car ie ne voulois qu'il fust dit que i'eusse abandonné le party à cause de cette perte, com-

me peut-estre on eust fait de part & d'autre, sans auoir égard à ma premiere resolution: ie voulois voir aussi si elle n'apporteroit point quelque changement aux affaires publiques, comme de nous donner enuie de faire la paix, & chercher quelque remede à nos maux, autre que celuy duquel nous auions vsé iusques alors; ie voyois aussi mon fils engagé à Pontoise, dont ledit Duc luy auoit de nouveau rendu la charge après l'auoir reprise, & me sembloit ne pouuoir honnestement laisser ledit Duc, le party, ny les miens en cette necessité, laquelle chacun estimoit veritablement deuoir éclore d'autres effets qu'elle ne fit, comme à mon aduis il fust aduenü, si les choses eussent autrement esté conduites qu'elles ne furent.

LE DIT Duc arriua tost après à saint Denis, peu accompagné; ie le fus trouuer avec les autres, & comme il ne parloit que de chercher les moyens d'auoir sa reuanche, d'y engager & encourager vn chacun; ie m'abstins aussi de luy parler de ma retraite, ny d'entreprendre la paix, pource qu'il ne l'eût eu agreable, & qu'il l'eust peut-estre attribué à lascheté; mais i'en dis mon aduis au sieur de ..... & entre tous audit President Ianin, lequel m'assëura que sans cette disgrâce, ledit Duc se fust disposé à la paix; mais qu'il n'y auoit ordre après ce coup de luy persuader, ny seulement de luy en parler, qu'il le falloit laisser se douloir, & abbatre le vent des esperances qu'on luy donnoit par vn nouveau secours, me promet-

tant qu'il ne perdrait l'occasion d'y seruir, quand il reconnoistroit le pouuoir faire avec l'honneur dudit Duc, & la seureté de la Religion & du party. Ledit Duc se retira à Soissons, & laissa à Paris Monsieur de Nemours pour y commander, assisté dudit sieur de Lion; il y laissa aussi sa mere, sa seur, & sa femme avec ses enfans, & pria ledit Cardinal Cajetan d'y demeurer pour asseurer lesdits habitans, auxquels il promit de les secourir bien-tost, quatre ou cinq iours apres son partement. Monsieur le Cardinal de Gondy m'enuoya vn passe-port du Roy, pour aller à Noisy & à Mante, où estoit sa Majesté, car la Ville luy auoit esté renduë par les habitans: apres cette victoire ie retournay à Paris pour huit iours, durant lesquels ledit Cardinal me coniuira de l'aller trouuer, à quoy ie me resolus, pour sçauoir de luy à quelle fin il m'auoit enuoyé ledit passe-port, & quel moyen il y auoit de seruir au public. Il me dit que ledit passe-port auoit esté accordé sur l'instance qu'il en auoit fait faire par le sieur de la Verriere son Cousin, deuant la bataille, suiuant la resolution que nous en auions prise ensemble sur la lettre dudit President Ianin, dont i'ay fait mention cy-deuant: & encore qu'il n'eust esté expédié que depuis ladite bataille, il auoit estimé estre à propos de le receuoir & me l'enuoyer, parce qu'il estoit apres ce coup plus necessaire que deuant, de bastir vn bon accord pour sauuer la Religion & garantir la ville de Paris, laquelle couroit grande fortune; par-

tant il estoit d'aduis que ie visse sa Majesté, & luy fisse ouuerture de ladite paix, nonobstant ce qui estoit aduenü depuis; disant qu'elle s'y attendoit, & que mon logis déjà estoit marqué en ladite ville de Mante, mais ie m'en excusay sur ledit changement, lequel ie luy dis auoir plustost refroidy que rechauffé ledit Duc de Mayenne d'entendre à la paix, comme i'auois appris dudit sieur President Ianin: partant ie craignois, allant trouuer sa Majesté, non seulement me faire mocquer de moy, mais aussi nuire plus aux affaires publiques que ie n'y seruirois. Toutefois sur l'instance que m'en fit ledit sieur Cardinal, ie luy promis de voir le sieur du Plessis Mor-nay, comme mon voisin & amy, avec lequel ie pourrois conferer des affaires publiques & des miennes particulieres, sans preiudicier à personne, tout ainsi que i'auois fait, par la permission dudit Duc de Mayenne, avec le sieur de Buy son frere, qui lors commandoit à Pontoise pour le seruice du Roy.

D O N C Q U E s ie fus trouuer ledit sieur du Plessis prés de ladite ville de Mante, auquel ie fis le discours de tous les susdits propos de la paix, qui s'estoient passez entre ledit Cardinal de Gondy & moy, à laquelle ie luy dis que i'auois reconnu ledit Duc auoir eu plus grande inclination, depuis auoir decouuert les intentions des Ministres du Roy d'Es-pagne, qu'auparauant: de sorte que i'esti-mois que l'on en eust pû tirer quelque fruit deuant la bataille, comme il m'auoit esté mandé & assuré par vn de ses principaux

seruiteurs, dont i'auois aduerty ledit sieur Cardinal de Gondy, lequel sur cela auoit desiré que ie visse sa Majesté pour l'en aduertir: à quoy ie m'estois disposé, pour le desir que i'auois tousiours eu de seruir à vn si bon œuure, luy disant en ce propos la deliberation en laquelle m'auoit surpris la nouuelle de la bataille; mais depuis que i'auois reconnu ledit Duc refroidy en ladite paix, & résolu de recouurer ce qu'il auoit perdu, dont ie preuoyois que les Espagnols feroient tres-bien leur profit; comme ceux qui auoient bien reconnu que ledit Duc, ny le general du party, n'auoient pas grande enuie de s'embarquer avec eux, qu'ils se seruiroient de cette necessité, en nous faisant achepter cherement leurs discours: à quoy il estoit au pouuoir de sa Majesté de remedier, en bien vsant de la victoire que Dieu luy auoit donnée, comme elle feroit si elle aduisoit à contenter les Catholiques au fait de la Religion; sans quoy ie tenois pour certain que la guerre dureroit encore long-temps, & que sa Majesté auroit quasi aussi-tost la fin du Royaume que dudit Duc de Mayenne & son party, d'autant que les Villes & la Noblesse qui en estoient ne s'accorderoient iamais avec sa Majesté, tant qu'elle feroit de contraire Religion, & à luy difficile de les y forcer, estans assistez du Pape & du Roy d'Espagne, comme ils estoient; & sur tout du dernier, lequel il scauoit auoir deliberé d'abandonner les propres affaires pour soutenir le party contre sa Majesté. Que si le Roy auoit autrefois résisté à la France,

lors qu'elle estoit florissante & viue , à plus forte raison la pourroit-il endommager maintenant qu'elle estoit à demy destruite & diuisée par tout comme elle estoit ; qu'il ne deuoit croire que la bonne fortune de sa Majesté ébranlast les Villes ny la Noblesse du party, qu'elle n'eust pourueu au susdit poinct de Religion , ains plûtoſt que le peril les rendroit plus constans & opiniaſtres ; mais s'il plaisoit à sadite Majesté, satisfaire à ce point, comme ce changement seroit du tout interpreté à la pieté & bonté sans plus craindre qu'il fust à aucune autre neceſſité , ie me laissois asseurer que chacun accourroit à elle, la reconnoistre , & obeïroit à l'enuy l'un de l'autre, soit que ledit Duc se resolust ou non; que pour mon regard ie detestois le deſſein des Espagnols , encores qu'ils me l'eussent découuert & confié des premiers, que ie m'étois retiré vers ledit Duc du temps du feu Roy par neceſſité ; mais que ie m'estois depuis entretenu pour le respect de ma Religion , & pour m'estre promis de seruir quelque iour au repos du Royaume , à l'honneur de Dieu , que si Dieu nous vouloit tant punir , que de nous priuer de cette eſperance là , comme il aduiendroit , si ledit Duc par neceſſité ou autrement se iettoit entre les bras des Espagnols , & se donnoit à eux ; i'auois delibéré me retirer de la presse , & ne participer iamais à ce deſſein , s'il plaisoit à sadite Majesté , me prendre en sa protection: chose que ie ferois encore plus volontiers, si sa Majesté pouruoyant à la ſeureté de la Re-



ligion, vouloit vaincre, comme il me sembloit qu'elle pouuoit facilement & vtilement faire ledit Duc & les partisans par bonté & prudence, comme elle auoit fait par les armes, à quoy i'exhortois ledit sieur du Plessis d'employer le credit qu'il auoit auprès de sa Majesté, laquelle i'eusse volontiers pris la hardiesse de l'en requérir & supplier moy-mesme, i'eusse estimé qu'elle l'eust pris en bonne part, & n'eusse eu crainte de déplaire audit sieur Duc; mais qu'il me suffisoit de luy auoir représenté, sçachant qu'il estoit si affectionné à sa Majesté, & d'ailleurs tellement mon amy, à cause de nostre voisinage, & de l'assistance qu'il auoit tiré du nostre, du temps que i'estois en Cour, qu'il satisferoit à tout ce qui estoit necessaire pour ce regard, l'assurant pour fin que si ledit Duc refusoit d'entendre à la paix, ie l'abandonnerois pour viure priuément en ma maison, suiuant ma premiere deliberation prise deuant la bataille.

LEDIT sieur du Plessis fit contenance de bien prendre mes raisons & mon intention, & me dit que sa Majesté auoit encore plus de bonté que de generosité, ne demandant à ses subjets que l'obeissance qu'ils luy deuoiennent; que la Couronne luy appartenoit, tant par droit que par merites, qu'il s'y falloit arrester comme Prince tres-vertueux & parfait, dont il auoit rendu tant de preuues, que personne n'en pouuoit douter: d'auantage qu'il estoit Prince de foy, tres-grand obseruateur de sa parole, à laquelle il vou-

loit moins manquer qu'à foy-mefme ; que c'eftoit vn fondement tres-folide , fur lequel on pouuoit bafir vne bonne paix & reconciliation , à laquelle l'on le trouueroit toujours tres-difpofé ; qu'il n'eftoit aucunement vindicatif ; qu'au combat il eftoit ardent & courageux , mais hors d'iceluy il eftoit encore plus gracieux , comme il apparoiſſoit qu'il faisoit aux prifonniers de la bataille, lesquels eftoient de luy fort careſſez : que Dieu l'auoit toujours aſſiſté , luy attribuant toutes ſes proſperitez , lesquelles ſont encore plus aduouées de ceux qui l'ont toujours ſeruy , que des autres , principalement depuis la Ligue , la rage de laquelle eftoit tombée ſur luy contre toute iuſtice , parce que lors il ne penſoit qu'à viure en patience, & rendre obeïſſance au feu Roy, ſous la protection de ſes Edicts , au lieu de l'accabler, comme les auteurs d'icelle l'auoient projeté , l'auroient remplie & comblée de gloire : que quand il ſe reſſouuenoit d'auoir veu huit ou dix armées toutes employées contre luy & ſes amis , & delaiſſé & abandonné quaſi de tout le monde , il n'auoit pû toutefois gagner ſur luy aucun aduantage digne de memoire , ny ſeulement d'ébranler ſa foy enuers Dieu , ny ſa vertu & conſtance en aucune choſe ; qu'il auoit deſlors iugé que Dieu auoit entrepris ſa deſſenſe & protection , & l'auoit reſerué expreſ pour faire trophée de ſa juſtice diuine , & reſtablir le Royaume en ſon entiere ſplendeur & puiſſance : que ſi iamais Prince fut auſſi propre de ce faire , il

Yestoit ; car s'il aimoit les armes il fauori-  
soit encore plus la iustice , & estoit ennemy  
du vice , honorant & respectant les gens de  
bien & de vertu : qu'il luy asseuroit que si le-  
dit Duc luy demandoit la paix , & se rangeoit  
à la raison , il la leur accorderoit tres-libe-  
ralement , & demeureroit content de luy &  
de ses actions , comme l'estoient les Catholi-  
ques qui l'assistoient ; & mesmes de la decla-  
ration qu'il leur auoit faite sur la Religion,  
qu'estant comme ils estoient en tres-grand  
nombre, composé des principaux Princes &  
Officiers de la Couronne , Seigneurs & Gen-  
tils-hommes du Royaume , l'on pourroit di-  
re qu'ils faisoient la principale & plus consi-  
derable partie des Catholiques d'icelle ; de  
sorte que ledit Duc ni les siens ne pouuoient  
vser de ce nom , ni apporter de scrupule &  
difficulté , & ce dont les autres estoient de-  
meurez tres-contens & satisfaits, sans luy  
faire tort , & donner occasion à vn chacun  
de se deffier de sa volonté ; qu'il ne doutoit  
point que les Espagnols ne fissent leur pro-  
fit s'ils pouuoient de la mauuaise fortune du-  
dit Duc , comme il luy auoit remonstré ; ce  
qu'il ne trouuoit estrange d'eux , estant com-  
me ils estoient nos anciens ennemis , mais  
que le blasme & le dommage en demeueroit  
audit Duc & autres François , s'assurant à  
eux : qu'il esperoit que Dieu acheueroit de  
renuerser leurs desseins comme il auoit com-  
mencé : quand le Roy d'Espagne n'auroit  
que vingt-cinq ans , & seroit trois fois plus  
puissant & micux assisté en ce Royaume , il

y succomberoit , l'entreprenant contre vn Prince si genereux & bien fondé en justice, nourry au trauail , & bien assisté dedans & dehors le Royaume comme estoit sa Majesté , laquelle faisoit aussi peu de compte des rodomondades & forces Espagnoles , & que ce ne seroit iamais par crainte que ses subjets obtiendroient la paix de luy , mais par submission , émeuë de la compassion qu'il auoit du peuple : qu'il connoissoit mon intention à la paix , m'exhortoit d'y perséuerer , & comme mon amy me separer dudit Duc & de son party , comme d'un tres-mauuais garand & appuy : que sa Majesté me donneroit pour ce faire toutes les prouisions & assurances qui me seroient necessaires ; mais il falloit que mon fils en fist de mesme, remettant au pouuoir de sa Majesté la ville de Pontoise à laquelle il commandoit , disant que ma retraite ne pouuoit estre autrement que tres-suspecte & mal receuë : que puis que ie n'auois aucune charge dudit Duc de Mayenne de parler de la paix , i'auois bien fait de ne me presenter deuant sa M. mais qu'il estoit d'auis que ie visse ledit Duc , plustost pour l'asseurer de la volonté de sa Majesté, & scauoir qu'elle estoit la sienne , pour sur cela me resoudre , ne pouuant croire que Dieu eust fait tant de graces au Roy pour les laisser imparfaites : de sorte qu'il esperoit que ceux qui s'opiniastreroient luy faire la guerre , accroistroient plustost leur honte qu'ils ne recouvreroient leur perte , & qu'il ne falloit plus qu'oster la pierre au laict à ceux de

Paris pour les ranger à leur deuoir par force, s'ils n'y vouloient entendre d'amitié: quoy succédant, qui douteroit que les autres Villes du Royaume ne se vinssent ietter aux pieds de sa Majesté? Qu'il ne pouuoit conseiller audit Duc, d'attendre iusques-là à se resoudre, parce qu'il ne feroit son deuoir ny son profit, cõme il me conseilloit de luy remonstrer, m'assurant au reste que si ie reuenois avec charge dudit Duc de parler de la paix, ie serois tres-bien venu, & que sa Majesté, auprès de laquelle il m'assisteroit, me verroit bien volontiers, mais il me prioit de me haster.

M O N S I E U R, Je remerciay ledit sieur du Plessis de sa bonne volonté, & luy dis que i'estois si affectionné à ma patrie, que ie tenois pour perduë, si la guerre duroit, que ie ne faudrois d'aller trouuer ledit Duc de Mayenne iusques à Soissons, où il s'estoit retiré pour luy faire entendre ce qu'il m'auoit dit de la bonne intention de sa Majesté à la paix, & le supplier de s'y resoudre, en preférant le salut du Royaume à toute autre consideration, l'assurant que ie ferois pour ce regard tout ce qui seroit de ma puissance, & que selon sa réponse i'yrois trouuer sa Majesté pour luy en rendre compte: où s'il appelloit les Espagnols & traitoit avec eux, ie me retirerois en ma maison, sans plus le suivre ny assister; mais que ie ne voulois point permettre que mon fils rendist Pontoise, parce qu'il me sembloit y aller trop de son honneur, la place luy ayant esté franche-

ment baillée en garde par ledit Duc : & ne voyant autre cause & changement en la personne de sa Majesté qui le pust iustement mouuoir & excuser de ce faire , que l'auantage de cette derniere victoire que Dieu luy auoit donné , laquelle obligeoit plûtoſt mondit fils de perseuerer en la foy qu'il auoit donnée audit Duc , qu'elle ne l'en deschargeroit s'il ne vouloit estre accusé & conuaincu de lascheté ; de laquelle , comme mon amy & Gentil-homme faisant profession d'honneur , il me deuoit plûtoſt déconseiller si i'y estois disposée , qu'exciter par la consideration du repos de ma maison , duquel ie luy declarois vouloir plûtoſt estre priué pour iamais , voire de la vie mesme , que de consentir que mondit fils acquist vne telle honte , & auois mesme vne telle confiance en la bonté & vertu de sa Majesté , que ie m'asseurois qu'elle l'estimeroit dauantage , faisant ce qu'un homme de bien doit faire , que s'il en vſoit autrement ; que s'il falloit que i'achetasse à tel prix la seureté de ma maison , i'estois deliberé de quitter plûtoſt le Royaume que d'y condescendre : que ie ne doutois point des vertus de sa Majesté , & de sa bonne fortune , ny de la fidelité de ses seruiteurs & amis , & pareillement qu'en ostant à ceux de Paris le laiét & le froment , & les passages de viures , sa Majesté n'aduançast grandement ses affaires ; mais ie priois de croire qu'elle ne reduiroit iamais les habitans d'icelle , ny d'aucune autre ville de la Ligue à la reconnoistre de bonne volonté , si elle ne donnoit ordre au

poinct de la Religion : le suppliant sur ce de considerer combien il falloit de temps pour forcer lesdites Villes l'une apres l'autre, estans mesmes assistez des susdits Espagnols, encouragez par le Pape, desesperez de la Religion de sa Majesté, laquelle pourtant me sembloit y deuoir bien penser.

LEDIT sieur du Plessis fit peu de conte de ces propos, mais il ne me pressa dauantage d'engager mon fils à ma retraite, seulement d'auancer mon voyage deuers ledit Duc, pour lequel il m'enuoya du depuis vn passe-port par la voye dudit sieur de la Verriere, par lequel i'auois esté conduit en cette Conference. Ce ne fut sans me plaindre à bon escient audit sieur de la Verriere, du propos que m'auoit tenu ledit sieur du Plessis concernant mon fils, luy priant de dire au Roy, que ie ne desirerois pas que mondit fils vint à son seruice indignement ny honteusement, parce que ie sçauois qu'il faisoit plus de conte d'un homme de bien que de mille poltrons, & qu'au reste ie serois son tres-humble seruiteur, bien deliberé de faire mon deuoir pour la paix, & de n'estre iamais Espagnol. Je vous assure, Monsieur, que cecy me pensa débaucher : car ledit sieur du Plessis me donna occasion de croire qu'il auoit plus d'enuie de retirer ladite ville de Pontoise pour ledit sieur de Buy son frere, lequel en estoit Gouverneur auparauant, que d'aider à la paix ny à mon repos particulier : toutefois ie me resolus de m'acquitter encore de ce deuoir, & auprès prendre conseil de mes affaires avec

Dieu & mon honneur, comme i'ay declaré audit Cardinal de Gondy, quand ie fus de retour à Noisi, où vint le iour mesme ledit Cardinal Cajetan, & me semble que vous vous y trouuastes aussi, poursuivant vostre accoustumée affection au bien du Royaume, faire quelque office enuers ledit Cajetan; mais ce Prelat tendoit plûtoſt à diuifer les Catholiques d'auec sa Majesté, les exciter, solliciter & presser de suiure l'Eglise, que de faciliter vn bon accord, tant il desiroit complaire au Roy d'Espagne, & le seruir. Ce fut à Monsieur le Mareſchal de Biron à qui il s'adressa pour cét effect: fut-il pas bien conseillé, mesme si fraiſchement apres cette ſignalée victoire, qui auoit enflé les cœurs & les esperances des seruiteurs de sa Majesté, aussi ſit-il tres-mal ses affaires, dont ie m'asseure qu'il n'estoit pas fort marry, comme celuy qui auoit à mon aduis fait le voyage, plus pour irriter le Pape entre les Catholiques qui seruoient sa Majesté, que pour y profiter, craignant que sa Sainteté qui commençoit desia à changer d'aduis en nos affaires, fist trop de compte d'iceux.

E S T A N T à Paris, ie fis part aux trois Princesses qui y estoient, & à Monsieur de Lion, des bons propos que m'auoit tenus ledit sieur du Plessis, tous firent demonstration d'approuuer & desirer que i'allasse trouuer ledit Duc de Mayenne pour l'en informer. Ie partis huit iours apres; le Sieur Zamet vint avec moy, nous le trouuastes à Soissons tres-mal de sa santé, & encore plus affligé



de l'esprit, à cause de l'estat de ses affaires; neantmoins comme Prince courageux & aduisé, il n'obmit rien à faire pour maintenir ses partisans en deuoir, & dresser vne nouvelle armée. Il auoit desia depesché par tout, & auoit enuoyé gens exprés à Rome, en Espagne, Flandre, Lorraine & Sauoye, où vous pouuez penser qu'il n'auoit rien oublié à remonstrer, & permettre, dequoy pouuoir seruir à son besoin, comme ont accoustumé les Princes qui se trouuent en pareille necessité; voyant mesme que sa Majesté auoit desia gaigné la ville de Mante, laquelle s'estoit renduë d'effroy, & qu'elle auoit attaqué Corbeil & Melun, mal-garnies de ce qui estoit necessaire pour se deffendre le succez de cette derniere bataille; ayant surpris les plus fins & diligens, & estonné les plus asseurez.

LE DIT Duc ayant ouy mon rapport, que ie doray le plus que ie pûs; d'abord il eut grande difficulté de me permettre de commencer cette negociation, tant il craignoit d'un costé offenser les Espagnols, par les partisans, desquels il estoit couronné & forté veillé; & d'autre part que la recherche de ce traité luy fust imputée à faute de courage ou de moyen de se deffendre, & partant tres-prejudiciable & honteuse: toutefois le lendemain il changea d'avis, soit que ce fust pour donner l'alarme & l'épouuante aux Espagnols, & en ce faisant auoir le secours qu'il leur demandoit, ou preparer vn moyen pour au besoin sauuer la ville de Paris, la-

quelle personne n'estimoit pouuoir durer, quand les passages des viures seroient bouchés, ou bien endormir sa Majesté de l'esperance d'un accord : car il me permit de retourner vers elle, & me chargea de luy dire de sa part, que s'il luy plaisoit donner contentement aux Catholiques sur le fait de la Religion; il mettroit peine de disposer de ceux qui l'auoient esleu & reconnu pour chef de luy rendre obeïssance, & traiter d'une bonne paix, laquelle il protestoit desirer & affectionner, plus pour garantir le Royaume des calamitez de la guerre, que pour se preualoir ny aduantage, comme celuy qui n'auoit rien deuant les yeux que le bien de la Religion, & contenter pour ce regard nostre saint Peré le Pape, lequel il honoroit comme le chef de l'Eglise, sa conscience & ceux qui l'auoient honoré de sa charge qu'il auoit, que sa Majesté ne deuoit croire que sa mauuaise fortune ny sa foiblesse luy fissent tenir ce langage, car ie pouuois témoigner quel auoit esté son desir en cela: quelques iours auant la bataille, il esperoit aussi mettre sus bien-tost vne armée encore mieux que iamais: sur tout, il me pria de ne dire à personne qu'il n'eust donné la charge de parler à sa Majesté d'aucune chose, mais de faire courir le bruit que ie me retirois en ma maison avec sa permission, pour n'ébranler ny intimider ses amis, auxquels il donneroit aduis de ma retraite, & ne croire qu'il m'eust enuoyé vers sa Majesté, si d'auanture l'on leur en demandoit quelque chose, tant de l'armée que d'ailleurs,

Je voulus voir ledit sieur du Plessis , & luy communiquer ce que j'auois fait avec ledit Duc ; & mesme l'aduis qu'il auoit donné de mon voyage à ses amis , deuant que de me presenter à sa Majesté , afin qu'il aduisast avec elle , s'il estoit à propos pour son seruice & le public , que ie passasse outre : car ie n'auois enuie de ce faire , s'il iugeoit qu'il en deust aduenir autrement. Je le vis à Lezigny en Brie , ou ie fus conduit par le sieur de la Verrieré ; ledit sieur Zamet y vint avec moy , comme celuy qui desiroit seruir de tout son pouuoir au repos de ce Royaume , ainsi que ie puis rémoigner qu'il a fait depuis fidelement.

LEDIT sieur du Plessis , apres m'auoir ouy , fut d'auis que ie visse sa Majesté , laquelle ie trouuay logée aux faux-bourgs de la ville de Melun , de laquelle le sieur de Fontaines auoit composé deux iours auparauant. Je dis à sa Majesté la charge que m'auoit donné ledit Duc , comment & à quelle condition il m'auoit permis de faire le voyage , & ce qui m'y auoit embarqué : le suppliant prendre en bonne part mon affection, & ne perdre maintenant l'occasion de remettre le Royaume en paix , que Dieu luy auoit mis en la main par son trauail & sa valeur , que tout dépendoit du poinct de la Religion , puis que ledit Duc offroit de la reconnoistre , si elle se vouloit resoudre d'y pouruoir au contentement des Catholiques , & par consequent de sa seule volonté : partant elle pouuoit dire qu'il ne tenoit plus qu'à cela qu'elle ne vous rendist

tous heureux, & qu'il ne fust bien-toft le plus grand & glorieux Prince de la Chrestienté, & le mieux obey en son Royaume: que s'il luy plaifoit maintenant prendre cette resolution, l'honneur & le gré luy en feroient entiere-ment deus deuant Dieu & les hommes, à cause de l'aduantage que cette victoire der- niere luy auoit donné, tellement que per- sonne ne pouuoit dire auoir esté contraint à ce faire par ses ennemis. Que sa Majesté ren- droit en ce faisant la victoire aussi heureuse à ses sujets, à elle mesme, voire à toute la Chrestienté qu'elle auoit esté triomphante & glorieuse; car elle engendreroit vne paix vniuerselle, qui rendroit son nom admirable & immortel: que tout ainsi que sa Majesté auoit donné preuue de son courage, elle pou- uoit aussi maintenant faire connoistre sa grandeur, & manifester sa bonté, avec quoy elle pouuoit acquerir plus de Villes en vn iour, qu'elle ne feroit peut estre en toute sa vie à coups de Canon, & par ce moyen éuiter le peril des meilleures Villes de son Royaume, qui estoit quasi ineuitable; autrement, que ie m'asseurois que celuy de la ville de Melun fait à ses yeux, l'auoit autant affligé, que la conqueste d'icelle l'auoit resioüy, encore qu'elle fust aduenüe tres-heureusement, par- ce qu'enfin sa Majesté perdrait plus à la rui- ne desdites Villes que personne, sans compter le déplaisir qu'une ame vraiment Royale, telle que la sienne, receuroit des desordres qui s'en ensuiuroient: que sadite Majesté considerast qu'encore que sa victoire eust esté

grande pour estonner leſdites Villes ; toutefois aucune ne s'eſt ébranlée du party , ce qu'elle deuoit croire proceder ſeulement de la force & puiſſance que la Religion a ſur les hommes. Car que pourroit-on eſperer dudit Duc de Mayenne, moins encores deſdits Eſpagnols ? quel plaſir & aduantage y auroit-il de continuer vne guerre ſi malheureuſe qu'éroit la noſtre , & attendre vn ſiecle , & peut-eſtre vn peril plus cruel, que n'auoit eſté celuy des habitans de Melun. Que c'eſtoit donc eſfets de la Religion qui les roidiſſoient au peril , comme il auoit autrefois éprouué : au moyen dequoy il eſtoit tres-neceſſaire que ſa Maieſté pourueuſt à ce poinct pour cheuir deſdits Eſpagnols, & autres eſtrangers qui aſpirent ſur ce Royaume , leſquels ſa Maieſté deuoit plus craindre que iamais , à cauſe du beſoin que l'on auoit de leur aſſiſtance, qui aucugloit & ſouuent deſeſperoit ceux qui eſtoient preſſez. Qu'il pleuſt à ſa Maieſté conſiderer combien il luy falloir encores acquerir de Villes deuant que d'eſtre Roy paiſible ; que toute la guerre ſe faiſoit à ſes dépens , & que ſes ennemis n'auoient guere à perdre , & peu à gagner ; que quand il ne demeureroit audit Duc qu'une ville de cent auſquelles il commandoit , encore ſeroit-il mieux partagé, qu'il ne l'auoit eſté de ſa maiſon : que c'eſtoit avec prudence & conſideration que le fruit de la victoire ſe recueilloit & aſſeuroit contre l'inconſtance de la fortune. Partant qu'il pleuſt à ſa Maieſté de ne perdre cette occaſion de pratiquer l'une & l'autre vertu.

laquelle peut-estre elle ne recouvreroit iamais: car quand ses hostes viendroient, ledit Duc de Mayenne ne pourroit plus disposer de luy & de ses amis, comme il pouuoit faire de present, d'autant que la necessité autorisoit tous les iours les forces estrangeres, & facilitoit leur dessein: que i'auois entrepris ce voyage exprés pour luy représenter ces raisons & inconueniens, meu d'un tres-bon zele, & battu d'une apprehension que i'auois du malheur qui menaçoit ce Royaume, lequel i'estimois inéuitable si sa Majesté faillait à ce coup d'y remedier, comme il estoit en son pouuoir; que depuis le trépas du feu Roy i'auois suivi ledit Duc, plus pour trouuer moyen d'aider à pacifier ce Royaume, que pour autres considerations, comme i'auois desia assez témoigné par mes actions, & que ie desirois continuer tant qu'il me demeureroit quelque esperance d'y pouuoir estre utile; mais aussi me retirer en ma maison quand elle me le deffendrait, & y viure sous sa protection, comme son tres-humble sujet, sans plus me mêler d'autre chose que de prier Dieu pour le repos & salut de son Royaume, si sa Majesté l'auoit agreable comme ie l'en suppliois.

Sa réponse fut tres-benigne, elle loua mon intention, de laquelle neantmoins elle me dit que plusieurs auoient fait tout autre jugement, me tenant pour vn bon Espagnol; mais qu'elle estoit bien aise, & me sçauoit bon gré de vouloir maintenant faire paroistre du contraire; ce que ie ne pouuois pas  
mieux

mieux faire qu'en recherchant & procurant le repos du Royaume, qu'elle auoit esté bien aise d'entendre ce que ie luy auois dit de la part dudit Duc de Mayenne, qu'elle tenoit de Dieu premierement, & apres des Princes & Officiers de sa Couronne & de sa Noblesse, la victoire qu'elle auoit gagnée : Que Dieu estoit aussi le protecteur de la Iustice & des Rois, contre la rebellion & des-obeïssance de leurs subiets; comme auoit tousiours esté en ce Royaume, leur vray & plus seur appuy, ladite Noblesse, ainsi qu'elle auoit bien éprouué en cette derniere occasion, en laquelle elle l'auoit reconnuë inuincible, ayant son Roy en teste: que le Royaume luy appartenoit, par la grace de Dieu & par succession legitime, que personne ne le pouuoit querreller justement, & moins encore ses subiets luy desnier l'obeïssance; qu'elle n'auoit offensé personne, seulement elle s'estoit deffenduë pour conseruer le sien, comme elle pretendoit continuer, & esperoit faire aussi heureusement qu'elle auoit commencé, avec la grace de Dieu, & que c'estoit sa plus grande esperance: que quand elle se ressouuenoit des miseres & necessitez qu'elle auoit endurez du temps du feu Roy, lors que chacun auoit conspiré sa ruine; que les armées sortoient & marchotent en foule contr'elle & ses amis, & que l'on la tenoit pour perduë, sans jamais s'en pouuoir releuer, & que Dieu l'auoit tellement fauorisé, que non seulement il auoit renuersé le dessein de ses ennemis, mais aussi luy auoit par ce moyen ouuert le chemin de

la gloire à leur honte & confusion : elle ne se pouuoit lasser d'admirer ses diuins jugemens, benir sa bonté, & sans cesse le remercier & inuoker en son aide, comme elle auoit fait plus ardamment depuis la victoire que deuant, d'autant qu'elle reconnoissoit en auoir plus grand besoin, pour estre la jouissance d'une bonne fortune subiette à diuers accidens, souuent autant par nostre propre faute, que par celle d'autrui & par son accoutumée inconstance. Que son but estoit d'estre Roy de fait comme de droit, & que celuy dudit Duc & de ceux qui l'assistoient, deuoit estre de viure en paix & honneur, sous l'obéissance de celuy que Dieu & la Nature leur auoit donné pour tel; dequoy sa Majesté estoit prestee de les faire jouir sans auoir égard au passé, s'ils vouloient aussi s'en rendre dignes par leurs actions, aimant trop mieux les gagner par douceur que par la force, pour estre ce chemin le plus court qu'aucun autre, & plus approchant de son naturel, du tout allié de la violence & vengeance; mais si jaloux à l'observation de sa foy à laquelle elle n'auoit jamais manqué, qu'elle vouloit aussi la maintenir inuiolable, comme deuoit faire vn Prince qui craignoit Dieu, & aimoit son honneur : qu'elle ne pouuoit approuuer que ledit Duc parlast pour les Catholiques du Royaume, quand elle consideroit & jettoit les yeux sur ceux qui la seruoient & auoient combattu avec elle, depuis le deceds du feu Roy : lesquels en qualité & en nombre surpassoient de trop loing les autres de tous



estats , voire mesme des Prelats & Ecclesiastiques , pouuant dire estre assisté de beaucoup plus de Catholiques que d'autres , enseignez à ce faire , autant par la Loy de Dieu , de la Nature , & de la Iustice de sa cause , comme de l'exemple de leurs Majeurs & de leur propre conscience.

QVE c'estoient les mesmes Princes , Officiers de la Couronne , Seigneurs & Gentilshommes qui auoient suiuy & seruy les autres Rois deuant luy , par le conseil desquels il s'estoit conduit depuis son aduenement à la Couronne , & entendoit encore se conduire à l'aduenir ; combien qu'elle me vouloit bien dire (toutefois sans faire tort à personne) qu'un des meilleurs Conseillers de guerre qu'eust le Roy , c'estoit le Roy de Nauarre : que tout ainsi que lesdits sieurs avec les Officiers de la Cour de Parlement du Royaume , s'estoient contentez de la declaration & promesse qu'elle auoit faite apres la mort dudit feu Roy , pour la seureté & conseruation de la Religion Catholique ; que les autres deuoient faire le semblable , se confier en la Foy , & souffrir que toutes choses se fissent dignement à la gloire de Dieu , & au contentement de tous , sans violence & precipitation. Sur cela sadite Majesté me demanda si i'auois veu ladite declaration , ie luy dis que le sieur de la Marilliere me l'auoit enuoyée , & que ie l'auois fait voir audit Duc de Mayenne , dont il n'estoit satisfait , comme croyant en conscience qu'il ne pouuoit obeïr à un Roy de contraire Religion , soit qu'il tint cel langage par art,

ou autrement : à quoy elle me repliqua sur le champ ; qu'elle n'estoit toutefois infidelle ny idolatre ; qu'elle adoroit le seruice d'un mesme Dieu , & que la Religion en laquelle elle auoit esté nourrie, n'estoit si differente de l'autre qu'elle deust estre incompatible , qu'enfin en tel changement qui importoit à la conscience , Dieu y deuoit operer , & non les hommes ? se faire avec le temps instruire & non à coups d'espée: Quesi du temps des Rois derniers l'on n'auoit pû gagner ce point sur luy par force , ny par les appas de la Cour ébranler sa conscience , les armes d'Espagne, ny de tous ceux qui les fauorisoient y aduanceroient encore moins , maintenant que Dieu luy auoit témoigné tant de grace qu'elle n'estoit toutefois opiniastre , voulant ceder à la verité & au desir de ses subiets, mais qu'il falloit l'instruire & l'auoir autrement qu'à coups de canon. Je luy dis sur cela que la connoissance que l'on auoit qu'il estoit Prince conscientieux , craignant Dieu , & affectionnant sa Religion , estoit ce qui donnoit plus de crainte aux Catholiques de la leur , d'autant qu'ils ne pouuoient persuader que sa Majesté , laquelle estoit responsable de ses subjets , leur voulust maintenir & laisser viure en cette Religion , si elle croyoit qu'elle fust abusive ; que i'estois un mauuais Theologien pour répondre pertinemment au propos de sa Majesté ; mais i'auois bien ouy dire mesmes à Beze au Colloque de Poissi que nos creances estoient aussi éloignées l'une de l'autre que le Ciel estoit de la terre , mais que ie

n'approuuois les argumens en cette dispute du sang, ny des armées, mesmes contre sa personne, les cartes estant meslées, comme elles estoient : ains ie croyois certainement que nous aurions plustost deffait l'Eglise de fond en comble avec tels instrumens, que la purger comme l'on auoit que trop éprouué en la Chrestienté depuis cinquante ans : mais aussi que sa Majesté depuis cette victoire, pour acheminer cette instruction qui deuoit preceder la conuersion, sans plus mettre en auant les armes de ses ennemis pour s'en excuser, à cause de leur foiblesse ; & si pour ce faire, il luy plaisoit appeller près de soy quelques Prelats & Docteurs de bonne vie, ie l'asseurois, que non seulement cela resiouïroit & consoleroit grandement la France, mais aussi luy acquerroit & confirmeroit plus de Villes & de seruiteurs que toutes les prosperitez du monde : la suppliant me permettre de luy dire que la ruine du Royaume ne seroit pas seulement imputée aux factieux, ny aux ennemis, ains à elle, puis qu'il estoit en sa puissance d'y remedier.

CE propos fut cause que sa Majesté remit au lendemain matin à faire réponse, & me dit qu'elle en vouloit deliberer avec ses seruiteurs, & ne rien faire sans leur aduis, me commandant de la suiure à Nangis où elle s'acheminoit.

SA Majesté me commanda de retourner deuers le dit Duc, pour luy dire qu'elle auoit pris en bonne part ce que ie luy auois dit ; que la deliberation estoit d'embrasser & oïr

tous ses subiets, selon leur merite, & mesme honorer & traiter ledit Duc, s'il vouloit luy aider à mettre son Royaume en repos, comme il pouuoit faire; qu'encore qu'il eust déjà commencé à pouruoir au fait de la Religion au contentement des Catholiques; toutefois si l'on iugeoit estre necessaire d'y adiouster quelque chose, elle estoit preste à ce faire. Ayant pris & consideré tout ce que ie luy auois remonstré sur cela, me dit qu'elle ne pouuoit traiter plus auant avec moy, parce que ie n'estois pas assez authorisé dudit Duc, & partant elle desiroit qu'il luy enuoyast des deputez garnis de pouuoirs suffisans pour ce faire, qu'ils seroient les tres-bien venus, & qu'elle mettroit peine de leur donner contentement, pour le desir qu'elle auoit de deliurer son peuple d'oppression. Je luy répondis, que la charge que sa Majesté me donnoit me sembloit tres-bien considerée & digne de sa prudence; car veritablement elle ne pouuoit traiter ces affaires qu'avec gens qui eussent pouuoir de les conclurre, comme il auoit tousiours esté pratiqué: Mais ie la suppliois de considerer que ledit Duc pour estre chef du party, n'en pouuoit toutefois disposer sans l'aduis & consentement commun; principalement en ce qui concerne la Religion & la reconnoissance de sa Majesté, & partant il seroit necessaire qu'il les assemblast pour en aduiser & resoudre avec eux, la dite Majesté n'estant apprentifue de l'autorité qu'auoit vn chef volontaire, ayant souvent passé par là, que ledit Duc pouuoit dis-

facilement faire ladite conuocation & assemblée, la guerre durant & sans passe-port, à cause des dangers des chemins: suppliant sadite Majesté d'y aduiser & y pouruoir d'heure, s'il luy plaisoit aduancer les affaires; la remerciant au reste de la protection qu'elle me promettoit en ma maison, en laquelle ie me retirerois apres que ie l'aurois veuë de-rechef pour receuoir les commandemens selon son intention.

SADITE Majesté partit de la maison tout aussi-tost, & me repliqua qu'elle continueroit & ne cesseroit pour cela de faire la guerre: qu'elle ne vouloit point aussi donner lesdits passe-ports, parce qu'elle ne vouloit laisser perdre le fruit de sa victoire, ny donner moyen audit Duc de relouer les affaires, & mieux dresser sa faction, comme il pourroit faire avec lesdits passe-ports & cessation d'armes, se ressouuenans de la commodité qu'elle auoit autrefois receuë de chose semblable du temps du feu Roy: & combien que ie la suppliasse tres-instamment de croire qu'il estoit vray que ledit Duc ne m'auoit parlé de cette cessation d'armes, ny desdits passe-ports, & que ce que ie luy en disois venoit de moy, pour acheminer & abreger les affaires, comme celuy qui connoissoit bien qu'il ne se pouoit rien faire autrement, neantmoins elle me dépescha avec cette réponse.

Dont ie fus parler à Monsieur le Marechal de Biron, pour l'autorité qu'il auoit auprès de sa Majesté, luy représentant ce que ie luy en auois dit, avec les réponses, & ce que ie

preuoyois qu'il en aduiendroit , le suppliant & coniurant par le serment qu'il auoit à l'Estat , de seruir le public en cette occasion, laquelle se perdant ne se recouureroit peut-estre iamais , pour les raisons que ie luy dis ; & en tout cas me faire tant de bien que de se ressouuenir du deuoir auquel ie m'estois mis en cette occasion , comme ie faisois de m'estre adressé à luy , approchant sa Majesté en cette necessité , que i'auois oüy faire compte à ceux qui manioient les affaires de sa Majesté ; qu'en peu de jours elle prendroit Paris , & apres demurerait facilement maistresse de toutes les autres Villes du Royaume , sans composer avec ledit Duc ; que ie leur auois dit qu'ils s'abusoiert grandement , & qu'on y trouueroit plus à faire qu'à dire ; toutefois il s'estoient mocquez de mes raisons, tant ils prenoient plaisir de se flatter en leurs esperances , & auoient peu d'experience aux affaires du monde , ou estoient ennemis de la paix.

TOUTEFOIS apres plusieurs disputes & contestations, ledit Duc prit resolution d'assembler ceux du party, à cette fin d'écrire par tout , d'enuoyer des deputez , sans neantmoins leur mander que ce fust pour la paix, mais seulement pour donner ordre par leurs aduis aux affaires de la cause : Et d'autant qu'il fut aduertiy que les Espagnols faisoient recherche & pratique à part des Gouverneurs des Villes de Picardie , il se resolut d'y aller , tant pour y remedier que pour en s'approchant de la frontiere y solliciter luy-mes-

me le secours que le Prince de Parme luy promettoit.

DE QUOY j'aduertis ledit sieur de la Verriere, auquel sa Majesté m'auoit commandé d'adresser mes lettres, ensemble les dépesches que ledit Duc auoit faites pour ladite assemblée, sans laquelle il m'auoit dit ne vouloir prendre autre resolution : i'aduertis aussi ledit sieur de la Verriere que ie suiuiuois ledit Duc en ce voyage, pour voir s'il s'y presenteroit quelque occasion de bien faire : toutefois que c'estoit chose dont i'auois plus de doute que d'esperance, veu ce qui se faisoit & passoit, & les propos que l'on tenoit, & les preparatifs de guerre qui se faisoient, priant sur cela ledit sieur de la Verriere, de m'aider à conseruer la parole que sa Majesté m'auoit donnée de sa protection en ma maison; parce que ie preuoyois que i'en aurois bien-tost besoin, mais qu'il prist garde en ce faisant qu'on ne me voulust obliger de faire rendre par mon fils la place qu'il auoit en garde, d'autant que son honneur qui m'estoit plus cher que sa vie, ne me pouoit encor le permettre d'y consentir.

PAR sa réponse, il me manda que l'on approuuoit ladite assemblée & mon voyage, mais que l'on en craignoit la longueur, partant l'on desiroit que ie m'employasse à l'aduancement & acceleration de l'une & de l'autre, à l'occasion des accidens qui en pourroient naistre, ou bien que ledit Duc de Mayenne voulust se contenter d'en conserer seulement avec aucuns des principaux de son

party, & traiter avec eux sans faire vne si grande assemblée, & garder plustost place aux absens: au reste que l'on l'auoit derechef asseuré de me donner ladite sauue-garde; que ie meretirerois sans parler de mon fils, lequel toutefois personne ne croyoit que ie voulusse qu'il prist le party d'Espagne, puis que ie ne voulois y entrer; la lettre estoit du mois d'Avril: Depuis il me confirma le semblable par vne autre du troisiéme May, lesquelles i'ay receuës en la ville de Peronne l'onziéme dudit mois, au retour d'un voyage que ledit Duc auoit fait en la ville de Cambray, en laquelle il auoit esté traité & receu pompeusement de Monsieur de Balagny sept ou huit iours durant. Ce fut là qu'il fit iurer & promettre par écrit aux Gouverneurs & Capitaines desdites Villes de Picardie de demeurer vnis avec luy, de ne traiter à part avec les estrangers, & ne se separer de luy à leur sollicitation ou d'autres. Je dressay la cedula, qui fut signée, dequoy i'aduertis ledit sieur de la Verriere par lettres du douziéme May, en répondant aux siennes precedentes; y adjoustant que ie ne voyois pas que Monsieur le Duc de Mayenne püst tenir ladite assemblée dans la fin d'iceluy, comme il s'estoit proposé à mon retour de Melun, à cause de la difficulté des chemins, de l'adujs que l'on auoit donné audit Duc de l'approchement de sadite Majesté, & de son armée sur la ville de Paris, dont il estoit si transporté, qu'il ne pensoit plus qu'à trouuer les moyens de la secourir; que chacun confessoit comme il m'a-



uoit écrit que la guerre ruinerait à la longue le Royaume & la Religion , mais que personne ne mettroit la main telle qu'il falloit pour la faire cesser ; que ie sçauois que ledit sieur Duc de Mayenne estoit resolu de tout perdre plustost que de traiter à part avec sa Majesté ; partant qu'on n'en fist point d'estat : mais au contraire de voir tout aller de mal en pis, si l'on ne facilitoit ladite assemblée, comme l'on pouuoit faire par vne cessation d'armes quelque temps, laquelle modereroit les cœurs que la guerre nourrissoit en alteration, & pourroit engendrer vne bonne paix : que i'estimois bien que sa Majesté blâmeroit ce remede comme preiudiciable à son seruice ; toutefois ie l'asseurois que s'il estoit reietté, que le Royaume seroit bien-tost rempli de tant d'estrangers, que ledit sieur Duc ne pourroit plus disposer ny de soy ny de ses amis, ce que ie luy demandois franchement afin d'en aduertir sa Majesté, ou d'en vser comme il verroit estre à faire pour le mieux : adioustant que i'estois marry de ne pouuoir donner meilleur conseil ny mieux faire, mais que i'estois bien delibéré quand lesdits estrangers entreroient de me retirer : ie n'eus réponse à ladite lettre ; dequoy ie me plaignis au sieur d'Alferan, lequel fut pris en vne course que fit sa Majesté vers Laon, où ledit Duc commençoit à recueillir & mettre ensemble ses forces, luy disant que i'auois grand regret dequoy l'on faisoit si peu de compte des aduis que ie donnois pour le bien du Royaume ; que ie l'attribuois à la défiance.

que l'on auoit de moy , & du peu de connoissance qu'on auoit de mon affection , au public. Ledit sieur du Plessis avec lequel i'auois negocié par le commandement de sa Majesté, dit qu'il regrettoit vostre absence de la Cour , pour vostre experience & prudence, & pour la creance que nous auions l'un de l'autre ; d'autant que ie voyois que sa Majesté alloit perdant vne occasion de pacifier le Royaume , qu'elle ne recouüreroit peut-estre iamais , à cause de la venuë du Duc de Parme en ce Royaume , dont il ne falloit plus douter , ainsi que i'auois appris de ceux qui auoient accompagné ledit Duc de Mayenne à Condé, où il auoit veu ledit Duc de Parme; car ie n'auois voulu faire ce voyage pour ne me trouuer en lieu où tels marchez se faisoient , le priant d'en aduertir sa Majesté, comme ie sceus depuis qu'il auoit fait ; mais que l'on l'auoit prise en mauuaise part, comme si i'eusse voulu prescrire à sadite Majesté, ceux desquels elle deuoit se seruir , & blâmer & controller les autres , de sorte qu'au lieu de seruir au public & à moy-mesme , ie fis tout le rebours, comme il arriue souuent aux marchands qui nauigent en cette mer des affaires publiques, ayant le vent contraire, comme ont ceux qui ont perdu leurs places de la Cour.

CE qui engendra contre moy plus d'enuie & de mécontentement que ie ne meritois , & que le seruice de sa Majesté ne le requeroit : de maniere que quand sur la certitude de la venuë dudit Duc de Parme , i'enuoyay de-

mander à sa Majesté le passe port & la sauuegarde qu'elle m'auoit promis , i'en fus éconduit , & me fut écrit par Monsieur le Marechal de Biron , du Plessis , & de Reuol , & depuis par Monsieur de la Verriere & par Monsieur de Chemerault , auxquels ie m'estois adressé , que l'on auoit fait vn mauuais rapport de moy au Roy , pour lequel il auoit refusé lesdits passe-port & sauuegarde ; joint que l'on ne pouuoit gouster mon intention & ma retraite, laissant les miens derriere , ce qu'on disoit pour mon fils, ou pour mieux dire pour la place qu'il gardoit. Ce fut au mois de Iuin que cette réponse me fut faite par homme que i'auois enuoyé exprés en l'armée de sa Majesté pour obtenir lesdits passe-port & sauuegarde , adjoûtant ledit sieur de la Verriere que mes amis estoient d'auis , du nombre desquels il me mandoit que vous estiez , d'amener mon fils au seruice de sa Majesté avec moy , ou plustost faire rendre audit Duc la place , ou bien promettre à sa Majesté pour luy de la mettre entre ses mains apres la reduction de Paris , que ledit sieur de la Verriere estimoit infailible , disant qu'on n'auroit iamais autre creance, si i'en vsois autrement, que ie ne fusse participant du conseil & dessein des Espagnols , & que ma retraite fust autre que simulée.

I'AVOIS desia pris congé dudit Duc de Mayenne, lequel i'auois laissé en la ville de Laon , & m'estois aduancé à Soissons , tant i'estois asseuré desdits passe-port & sauuegarde, sur la parole que sa Majesté m'en auoit

donnée, & la sincerité de laquelle i'y procedois. Quand ie receus leſdites lettres, dont ie demeuray tres-eſtonné & confus, me voyant bien loin du compte que i'auois fait, & mon fils remis en jeu contre ce que ledit ſieur de la Verriere m'auoit ſi ſouuent écrit : l'on m'impoſoit auſſi auoir fait ou écrit certaines choſes, que l'on diſoit ne reſſembler ny correſpondre aux bons propos que i'auois tenus, comme m'écriuoit ledit ſieur du Pleſſis, ſans s'expliquer dauantage, dont ie fus plus ſcandalisé que du refus dudit paſſe-port : car c'étoit vne calomnie ou vn artifice inuenté par mes mal-veillans, leſquels pretendoient par ce moyen de me deſeſperer du tout, ou de me contraindre d'engager en ma retraite l'honneur de mon fils; ce qui me fit rechercher de parler audit ſieur de Chemerault, comme ie fis bien-toſt apres, au lieu de Villiers-coſterets, croyant apprendre de luy les fondemens de cette impoſture & rigueur; mais comme celuy qui n'en ſçauoit le ſuiet, il ne m'en peût rien dire; ce que voyant, ie le priay d'aſſeſſer ſa Maieſté, que ie n'auois dit, écrit, ny fait choſe pour laquelle elle me deuſt reſuſer le paſſe-port qu'elle m'auoit accordé à Melun, lequel ie ne recherchois, pour craincte que i'euſſe de la perte de Paris, ny du ſucces des affaires de la Ligue, ou autre neceſſité, pource que ie ſçauois que ledit Duc deuoit eſtre bien-toſt ſecouru ſi puisſamment, que l'on porteroit plus d'enuie à ceux de ſon party que l'on n'auroit occaſion d'en auoir compaſſion; & que ſi ie m'y voulois engager à

bon eſcient, ie trouuerois non ſeulement qui me donneroit à viure plus commodément que non pas en ma maiſon, mais auſſi de faire du mal, & nuire à qui mépriſeroit mon ſeruice; que mon intention n'eſtoit & ne ſeroit iamais de conſeiller à mondit ſils de faire choſe que ie ne voulois pas faire, c'eſt à dire, d'eſtre Eſpagnol, mais bien de ne precipiter ſa reſolution aux deſpens de ſa reputation, comme l'on vouloit que ie luy fiſſe faire que ieuſſe veu ſadite Maieſté, allant en ma maiſon comme elle m'auoit commandé, & luy auois promis, & luy euſſe dit choſe qui euſt peut-eſtre plus ſeruy à ſes affaires que la ville de Pontoife, ou la retraite honteuſe de mondit ſils; parce que ie ſçauois que ledit Duc n'eſtoit encore ſi engagé aux eſtrangers, qu'il n'y euſt moyen de traiter avec luy ſur la crainte qu'il auoit de perdre Paris, & ſon mécontentement des longueurs & dilations, deſquelles le Duc de Parme vſoit à le ſecourir, dont ſa Maieſté perdoit l'occaſion, ie m'aſſeuroid qu'elle en auroit vn tel regret vn iour qu'elle rechercheroit tous ceux qui en ſeroient cauſe.

I'E N écriuis quaſi autant audit ſieur de la Verriere, répondant à ſa derniere lettre, me réjouiſſant & louant Dieu d'auoir connu par cét eſchantillon le pouuoir qu'auoient mes mal-veillans de me nuire, deuant que de m'être plus auant engagé & mis à leur mercy: car ie ne pouuois attribuer à ſadite Maieſté, laquelle abonde en bonté, vne rigueur ſi grande contre vne perſonne qui vouloit s'en-

gager avec ses ennemis , plus pour s'acquitter enuers son Prince & sa patrie , que par nécessité.

Monsieur le Duc de Mayenne estant à Peronne , eut aduis de la mort de feu Monseigneur le Cardinal de Bourbon ; toutefois il creut que ce bruit estoit vn artifice de ses ennemis pour émouuoir les Parisiens à se rendre plûtoſt ; de sorte qu'il n'en fit conte , mais étant à Rheims il en eut certitude. Sur cela quelques-vns luy propoſoient qu'il deuoit rechercher d'embrasser vn Prince de la meſme maison , entre ceux qui faisoient profession de la Religion Catholique, comme vn moyen tres-propre pour reünir les Catholiques contre ſa Maieſté , & ceux de la Religion , rompre les pratiques & deſſeins des Eſpagnols, qui estoient odieux à tout le monde , auancer ſes affaires particulieres , ſans enuie; voire meſme faire durer la guerre aſſez long-temps pour luy donner loisir de dresser ſa partie en ce Royaume ſelon ſon deſir , dont on luy diſoit les raiſons & moyens qui estoient ee ſemble aſſez capables & faciles : toutefois il ne les peüt iamais gouſter , & répondit ſi froide-ment à cette ouuerture , que les auteurs d'icelle ne s'y vouloient embarquer plus auant, ſe perſuadant pouuoir encore mieux faire ſes affaires avec les forces qu'il attendoit , que par ce moyen. Lesdits ſieurs de Chemerault & de la Verriere m'écriuirent lors chacun vne lettre faiſant encore mention de la paix en termes generaux , ſans toutefois m'éclaircir du mécontentement que l'on auoit de moy,

& des raisons pour lesquelles ledit passe-port m'auoit esté refusé, & aussi peu de ladite cessation d'armes.

IE leur fis réponse, & principalement audit sieur de la Verriere, que la paix ne se pouuoit traiter durant la guerre, parce qu'elle empeschoit l'assemblée susdite, sans laquelle il ne falloit point attendre qu'il se fist aucune chose, comme ie luy auois souuent écrit; partant que c'estoit peine perduë de plus parler de rechercher l'une & l'autre; que ie scauois aussi la nécessité de Paris, voire sa perte quand elle aduiendroit, qui rendroit les choses encore plus irreconciliables qu'elles n'étoient; d'autant que ledit Duc n'estoit deliberé de ceder à tel accident, duquel toutefois il n'auoit pas encore eu telle crainte qu'ils en auoient d'esperance en leurs armées; mais que si sur l'incertitude d'un tel euénement l'on perdoit l'occasion d'engager ledit Duc, & le party à ladite paix; ie luy voulois bien dire derechef que l'on y auroit regret, & partant le priois d'aduertir sa Maiesté de ne mépriser les ouuertes que l'on auoit faites aux sieurs de Vitry & de Bournouille, par lesquelles l'on auoit fait tenir quelques propos de la paix, & au demeurant ne me laisser plus longtemps en suspens dudit passe-port pour ma retraite, afin que ie n'en importunasse plus personne, & que ie prisse party.

LEDIT sieur de Mayenne receut lors 15. cens Espagnols du Regiment commandé par Dom Anthoine de Quiroga qui auoient esté mutinez, lesquels estoient en tres-bel équi-

page, comme ceux qui auoient touché de grandes sommes de deniers pour r'entrer en seruice : ils ne demandoient, comme ils disoient, que d'estre logez en lieu où il y cust de l'eau, & qu'ils n'auoient besoin d'autre chose, s'enquerans d'vne chose, si la Majesté les voyans, les attendroit; mais ils ne tarderent gueres à nous faire sentir & paroistre qu'ils n'estoient pas si sobres & vaillans, qu'audacieux & bien vestus.

LORS le sieur de la Verriere me manda que l'on auoit surpris vne lettre que j'écriuois à ma femme, par laquelle ie l'asseurois entr'autres choses de la venuë dudit Duc de Parme & de son armée, lequel disoit auoir tellement irrité sa Majesté contre moy, qu'elle ne m'auoit voulu accorder qu'un passe-port tel qu'estoit celuy qu'il m'enuoyoit, par lequel il m'étoit seulement permis d'aller à Alincour, ou à Pontoise avec mon train ordinaire, & y demeurer tant qu'il plairoit à sa Majesté; ledit passe-port contre signé, Russe, lequel il me conseilloit d'accepter, & ne laisser pour lescdites clauses, d'abandonner ledit Duc de Mayenne, comme il tenoit Paris pour perdu : il adjoustoit que cela n'empescheroit la paix, pourueu qu'elle fust demandée avec submission & humilité : sa lettre estoit du 17. Iuillet.

IE luy renuoyay ledit passe-port dès le lendemain, car ie ne fus conseillé de l'accepter ainsi conditionné, puis que sa Majesté estoit si mal édifiée de moy, & qu'on prenoit en si mauuaise part tout ce qui en venoit, comme



on auoit fait la lettre, par laquelle ie luy mandois auoir certainement aduertie ma femme de la venue dudit Duc de Parme, parce qu'elle estoit vraye, & que plusieurs autres que moy l'auoient écrit, mais non peut-estre avec regret, comme moy, ainsi que l'on auoit pu connoistre par la mesme lettre que l'on auoit prise & trouuée si mauuaise, par laquelle i'auois adiousté audit aduis, qu'une bonne paix seroit meilleure que ledit secours, duquel neantmoins ie n'eusse esté en peine d'aduertir madite femme enfermée dans Paris; si l'on m'eust enuoyé le passeport que i'auois continuellement sollicité depuis quatre mois, lequel m'auoit esté promis par sa Majesté: que ie ne pouuois que deplorer le mal-heur de la France, & le mien premier, voyant le public desesperer de la paix, & moy contraint de suivre cette armée estrangere, pour retourner en ma maison si i'y voulois iamais demeurer en sureté; puis mes ennemis auoient eu le pouuoir de me faire refuser ledit passe-port. En ce temps il en fut refusé ou reuocqué vn à Monsieur l'Archeuesque de Lion encore plus mal à propos que le mien pour le bien du public: car si dés-lors il fust venu trouuer ledit sieur de Mayenne, comme il auoit proposé, il eust trouué les choses plus disposées à traiter pour la necessité de Paris, & du mécontentement que ledit Duc auoit des longueurs du secours du Duc de Parme, qu'il ne fit au voyage qui luy fut permis à la fin d'y faire avec Monsieur le Cardinal de Gondy: car ils trou-

uerent ledit Duc de Parme à vne journée de Meaux, & Monsieur de Mayenne si enragé de ce secours, qu'il n'estoit plus capable de la paix.

L'ON accuse quelques-vns de ce refus, dont ie ne puis parler qu'incertainement; mais en verité il ne seruit qu'à aigrir & animer davantage les Parisiens & ceux qui leur commandoient, lesquels comme par le retour dudit sieur de Lion, en ce temps ils eussent esté asseurez de la bonté de sa Majesté, & ne l'eussent esté de la venuë dudit Duc de Parme, car il estoit encore en Flandres, & Monsieur de Mayenne si foible qu'il n'osoit passer la Seine, peut-estre qu'ils eussent esté cause de sauuer la Ville de peril: & que l'on eust attaché vne negociation qui nous eust donné la paix generale: Car ledit Duc de Mayenne ne la vouloit perdre, & n'eust permis qu'elle eust composé sans luy, & si estoit quasi desesperé de la pouuoir secourir par la force, & de la sauuer autrement que par vn traité: mais c'est grande imprudence de perdre les occasions de seruir & secourir le public, principalement quand elle dépend de plusieurs. Car il aduient rarement qu'elle se recouure, parce qu'il faut peu de chose à faire changer d'aduis à vne multitude, comme l'on éprouua bien-tost apres en cette occasion; car quand lesdits sieurs Cardinal de Gondy & de Lion arriuerent à Meaux, ils ne seruirent de rien que de confirmer les habitans de ladite Ville en leur obstination, à cause de l'esperance qu'on leur auoit donnée de les secourir bien-

toft ; joint qu'il n'estoit plus au pouuoir dudit Duc de Mayenne de disposer de affaires ; & aussi qu'il eust esté mal-seant de rendre ladite ville de Paris à la veuë du secours, apres auoir enduré & laissé passer cinq mois de temps sans y vouloir entendre.

Lors l'on m'enuoya vn passe-port de sa Majesté pour me retirer en ma maison à la requeste & poursuite de mon pere, exprés venu en Cour pour cét effet ; mais ie ne pouois plus m'en aider , parce que i'auois promis audit Duc de Mayenne , apres tant de refus que l'on m'auoit faits , de ne me retirer que ie n'eusse veu ce qui aduiendroit au secours de ladite ville de Paris. Dauantage, ie voulois essayer de garantir les maisons de mes amis qui estoient entre Meaux & Paris, de l'orage de ladite armée estrangere, surquoy neantmoins i'eus tres-mauuaise nouvelle ; car toutes celles que i'auois enuie de sauuer, furent pillées , iusques à l'Abbaye de Malnouë , qui auoit esté tres-bien conseruée durant le siege, laquelle fut saccagée par lesdits estrangers avec grande insolence & impieté : de sorte que ie perdis dés-lors la bonne opinion que i'auois de la conduite dudit Duc de Parme , laquelle soit qu'il le fist par art ou autrement , fut si confuse durant ce voyage , que ie puis dire avec verité n'auoir iamais veu tant de desordre en nos armées Françoises qu'en celle-là : & faut que ie vous die vne particularité ; c'est qu'ayant prié le dit sieur Iean Baptiste de Tassis , nouvellement reuenu d'Espagne de secourir ladite

Abbaye , il y mena des gens de guerre , par le commandement dudit Duc de Parme , qui acheuerent de saccager en ma presence ce que les autres auoient laissé , dont ie ne peus iamais auoir iustice , & pillerent aussi en deux iours toutes les Eglises , depuis Lagny iusques à Paris , que sa Majesté auoit conserué entieres durant ledit siege ; ce qui excita plusieurs clameurs & maledictions du peuple contre ladite armée , de laquelle ils s'attendoient de receuoir tout autre traitement qu'ils nous reprochoient en passant par les villages.

L'ON discouroit diuersement du succez aduenü entre ces deux armées , & disoit-on que si sa Majesté eust gardé & deffendu le passage de Claye , dont l'abord estoit tres-difficile , à cause d'un ruisseau qui y passe , qui est accompagné d'un marais fascheux , & laissé quelque caualerie à l'entour de Paris , pour empescher l'entrée des viures & la sortie des habitans , elle eust accumulé ledit Duc de Parme , l'eust contraint prendre un autre chemin , ou de combattre en ce passage avec desauantage ; quoy faisant , peut-estre que les Parisiens qui n'en pouuoient plus , eussent esté contrains de composer & venir à la raison. Ledit Duc de Parme craignoit fort estant à Meaux ; lors que l'on luy representa le chemin qu'il falloit qu'il tint , que sa Majesté prist ce conseil , de sorte qu'il fut tres-aise quand il trouua ce passage abandonné , encore plus quand il sceut que ladite Majesté auoit leué son siege , & venoit au deuant de luy , &

n'auoit laissé aucunes forces auprès de Paris; & neantmoins qu'elle luy donna loisir, les deux armées se voyans, de retrancher à la teste de la sienne au village de Ponponne, où ils estoient logez, car il vit ledit siege leué, qui estoit ce qu'il cherchoit, sans estre contraint de combattre. Sur cela il prit Lagny par force, à la veüe de sa Majesté, quasi sans que son armée eust autres alarmes que de petites escarmouches qui se faisoient à la teste des deux armées, dont il se mocquoit: cette prise accommoda son armée, qui souffroit déjà assez audit Ponponne; aussi fut-elle cause que celle de sa Majesté se débanda & retira incontinent, laquelle alla presenter vne escalade à Paris, qui faillit à reüssir. Je ne pretends blâmer personne, en disant l'opinion susdite, & ce qui est aduenu; car ie sçay qu'il est plus facile de reprendre que de bien faire en toute chose, & principalement au fait de la guerre, où ce qui s'entrepren d'avec plus de consideration succede souuent le plus mal, autant par la faute de ceux qui obeissent, que des chefs; soit que les vns executent mal leur charge, ou que les autres rencontrans ce qu'ils n'ont pas preu, demeurent confus. Sa Majesté, avec ceux qui la conseilloyent, leuant le siege, s'attendoit de combattre l'ennemy, & d'un coup mettre fin à leurs affaires: & de fait, sa Majesté se presenta d'abord, comme si elle eust voulu combattre; & peut-estre que si lors elle eust enfoncé ledit Duc sans marchander, qu'elle l'eust bien empesché, car il n'auoit encore commencé ses

tranchées. Mais quand il s'apperçeut que ladite Majesté se logeoit, & sceut qu'elle n'auoit rien laissé deuant Paris, il commença à se retrancher, & vser de telle diligence, qu'en 24. heures il eut acheué. Nous vîmes là ce que peuuent l'ordre & l'obeïssance en vne armée: car ledit Duc n'auoit aucuns pionniers, les gens de guerre firent seuls cette besongne, mais les chefs y mettoient les mains comme les'moindres, & trauailloient par ordonnance: de sorte qu'il n'y auoit aucun embarrasement entr'eux, d'autant que les quartiers estoient départis aux compagnies, lesquelles se releuoient & rafraischissoient l'une apres l'autre par heures, à mesure qu'elles auoient aduancé la besongne qui leur estoit baillée par les ingenieux en la presence dudit Duc de Parme, & des principaux de son armée: nos François les vouloient imiter, comme ceux, qui pour estre logez à la teste en auoient plus de besoin, mais ils ne faisoient rien qu'approcher des autres, & ne trauailloient que par acquit & confusément.

TANT y a que Monsieur de Mayenne arriva à Paris le 18. ou 19. du mois de Septembre, l'armée de sa Majesté s'estant retirée au de-là de la riuere d'Oise: & combien que les habitans de ladite ville eussent toutes occasions de nous receuoir ioyeusement, en consideration de ladite deliurance, & de la gloire par eux acquise en la deffense de leur ville: toutefois ils estoient si combattus de la faim, & des maux qu'ils auoient soufferts, qu'ils nous regardoient d'un œil plus pitoyable

pitoyable qu'allegé : ne plus ne moins que ceux qui sortent d'un peril contre leur esperance, sont encore plus estonnez que joyeux, sentans plus le mal qu'ils ont enduré, qu'ils ne reconnoissent le bien qui leur arriue, & sont si troublez d'apprehension & de douleur, qu'ils méprisent leur deliurance. Mais comme tels accidens sont leurs effets selon la nature & disposition des cœurs où ils agissent : nous en voyons aussi sortir plusieurs de cette agonie, transportez de rage & d'un desir effrené de se vanger & mal-faire à vn chacun, & les autres si mattez du passé & succez de l'aduenir, qu'ils auoient honte de ce que les autres faisoient gloire, & ne pouuoient nous regarder, ny nous eux sans soupirer.

IE n'écris point les necessitez & extremitez qui furent endurées, parce que ie n'en puis parler que par ouy dire, qu'elles ont esté publiées par ceux qui les ont veuës & supportées, mais ie confesseray que ie n'eusse iamais crû que ladite Ville eust pû tant pâtir; & si i'ay iamais esté abusé en chose, c'est en celle-cy & au iugement que i'en faisois, me ressouenant du peril, auquel on disoit ordinairement à nos Rois, que ladite Ville estoit quand seulement les marchez se trouuoient deux fois sans bleds : mais les maux qui nous arriuent par force se supportent plus doucement que ceux que nous estimions nous aduenir par nostre faute, chacun se resoluant d'endurer ce qu'il ne peut éuiter ; à quoy l'on adjouste le desir & le besoin que l'on a d'en vser ainsi pour conseruer le bon &

éviter le pis, mesme quand il s'agit de la Religion, laquelle a sur plusieurs vne puissance merueilleuse; toutefois i'attribuë bien autant cette patience ou constance au naturel commun des Parisiens, qu'à toute autre chose; car ils sont ordinairement plus timides que courageux, & esclaves de leurs biens & commoditez, & pour cette raison se discordans en ce qui concerne le public, qu'ils s'accorment plus volontiers au temps, & qu'il ne regimbent contre le mal. Aussi voyons nous que peu de gens ont ordinairement & esté cause des mouuemens & changemens aduenus en ladite Ville, laquelle a esté plus preseruée de Dieu que des habitans, és perils esquels elle s'est trouuée, & veritablement nous pouuons dire que Dieu y'est aussi bien seruy qu'en lieu du monde.

Je n'y demeuray que deux iours, car l'auois pris congé du Duc de Mayenne pour me retirer en ma maison de Villeroy, en laquelle ie me rendis le iour mesme que le Duc de Parme assiegea Corbeil: là me vindrent trouuer le sieur de Fleury mon beau frere, & l'Abbé de Chesny, avec la lettre de Monsieur le Cardinal de Gondy, & de Monsieur le Chancelier, par lesquelles ils me prioient, tant en leurs noms que de plusieurs autres Seigneurs, estant au seruice de sa Majesté, de reprendre les erres de ma premiere poursuite, pour le repos du Royaume, & leur donner aduis de ce qu'ils doiuent faire de leur costé pour y seruir, disant qu'il ne falloit se rebuter pour les choses passées, ny laisser à bien



faire au public pour les considerations priuées, qu'il y auoit plusieurs heures au iour, & que les cœurs & les volonteés des Princes estoient subietes au changement comme les occasions s'en presentoient. Que chacun de part & d'autre auoit éprouué la difficulté de vaincre son ennemy par la voye des armes, tant les partis estoient puissans & bien deffendus, partant qu'il falloit en chercher & trouuer quelques-autres pour sortir de nos miseres; qu'ils m'asseuroient que sa Majesté estoit maintenant plus disposée d'y entendre que iamais, comme estoient ses principaux seruiteurs, partant qu'il n'estoit plus question que d'y faire entendre ledit Duc; en quoy chacun estimoit que ie le pourrois mieux seruir que nul autre, tant pour m'y estre déjà employé, que pour la confiance qu'ils auoient de l'affection que ie portois au bien du Royaume, pour lequel à cette cause ils me coniueroient d'entreprendre cette charge, en laquelle ils me promettoient de me seconder & assister de tout leur pouuoir, comme ils me promettoient que feroient tous les autres bons seruiteurs de sa M. laquelle particulièrement mesçauroit gré du deuoir que ie ferois, sans qu'il fust plus au pouuoir de personne de me trauerfer auprès d'elle, & reietter sur moy les fautes des autres, ny attribuer à la necessité publique ou priuée mes poursuites, comme cy-deuant il auoit esté fait assez imprudemment par gens qui ne me connoissoient pas, comme ceux qui s'estoient prommis toute autre issue du siege de Paris, que

celle qui estoit aduenüe.

A P R E S auoir informé bien particulièrement lesdits sieurs de Fleury & de Chesny du passé, tant de ce qui auoit esté commencé par moy que par d'autres concernant la paix; ie leur dis que la vie me defaudroit plutôt que la volonté de seruir à vn si bon œuvre, reconnoissant plus que iamais comme i'auois fait dès le commencement, que si la guerre duroit elle ruinerait enfin la Religion Catholique & le Royaume; que ie l'auois aussi predict & remonstré à tous ceux qui de part & d'autre auoient pouuoir d'y remedier; mais que i'auois esté plutôt blasmé que crû, comme si i'auois esté poussé à ce deuoir pour faire mes affaires particulieres, & non les publiques; que cela m'auoit assez déplû, mais non rebuté ny changé d'opinion ny de volonté de seruir au bien, rendu vn peu plus circonspect & retenu en cette action que deuant, pour de volée ne me laisser transporter à l'aduenir à mon affection, ny à la necessité publique comme i'auois fait: joint que i'auois reconnu mes épaules estre trop foibles pour porter ce fardeau qui estoit trop pesant, d'autant que les interets priuez auoient maintenant plus de puissance sur les François, que les raisons & considerations publiques: dauantage que ie n'estimois point que la paix se peust traiter durant la guerre, pource que ledit Duc de Mayenne ne pouuoit ny vouloit y entendre sans ceux du party, avec lesquels il ne pouoit communiquer sans les assembler: ce qu'il ne pouoit bonnement faire durant la guerre

à cause des dangers des chemins, comme il auoit éprouué depuis cinq mois, qu'il les auoit mandez en vain, ainsi que i'auois souvent dit & écrit à sa Majesté & à ses seruiteurs, dont aussi l'on auoit fait peu de compte: & toute fois il estoit manifeste que si la guerre ne cessoit, ledit Duc seroit plutôt contraint de traiter avec les Espagnols que de composer avec sa Majesté, pource qu'il ne pouuoit plus se deffendre, ny maintenir seul sans eux, & eux ne l'assisteroient plus qu'ils ne fussent assurez de luy; au moyen dequoy il me sembloit qu'il falloit faire deux choses pour bien acheminer les affaires. La premiere, que sa Majesté & ledit Duc commissent & deputassent cinq ou six personnages d'honneur pour traiter ensemble, sans plus faire manier les affaires par vn seul, & en cachette, comme il auoit esté pratiqué iusques à present; & l'autre, accorder dès à present vne surseance d'armes pour certain temps, pour faciliter ladite assemblée, afin de commencer à nous adoucir & reconcilier ensemble. Que si on trouuoit bon ce chemin, ie m'y engagerois volontiers avec les autres, si l'on m'en iugeoit digne: sinon, ie supplerois ces Messieurs d'en estre excusé, parce que ie ne pouuois esperer que les choses succedassent bien, y procedant autrement: que c'estoit l'aduís que ie pouuois donner à ces Seigneurs qui les auoient enuoyez vers moy, lequel ie desirerois qu'ils prissent en bonne part; & neantmoins ie voulus voir ledit Duc de Mayenne, & luy faire entendre ce que lesdits sieurs de

Fleury & de Chesly m'auoient rapporté deuant leur parlement, afin de decouurir son inclination pour les en instruire.

S V I V A N T cela ie fus trouuer ledit Duc au siege de Corbeil, qui me dit que Monsieur le Chancelier auoit desia mandé à Madame de Nemours sa mere, par Jean Baptiste, que l'on appelloit le Compere, qui souloit estre premier maistre d'Hostel de la Reine; cela mesme qu'il m'auoit fait dire par les sieurs de Fleury & Chesly, & sur ce qu'il demandoit que ie fusse enuoyé à Noisy pour en conferer avec les seruiteurs de sa Majesté, en la presence de Monsieur le Cardinal de Gondy, asseurant que ce voyage reüssiroit au bien du public & de la Religion; à quoy ledit Duc adoustoit, qu'il auoit déjà promis à ladite Dame de m'y enuoyer, me priant de prendre cette peine; mais ie luy répondis que ie n'y voulois aller seul pour n'estre subiet à desadueu, & me faire mocquer de moy comme i'auois fait; partant qu'il en deputast d'autres, ou que ie n'irois point. Je m'apperçeus bien que ledit Duc n'approuuoit cette assemblée, sous couleur qu'elle donneroit ialousie aux Espagnols & à leurs adherans, mais qu'il desiroit que l'on fist vne cessation d'armes: i'appris aussi de Monsieur de Rosne, qui estant allé n'agueres à Pontoise querir de la poudre & des balles à canon, il auoit dit à mon fils sur vne lettre de Madame de la Roche-Guyon, laquelle auoit assez de part auprès du Roy, faisant mention de la paix, qu'il fist mettre en auant par le moyen de son pere,

vne cessation d'armes, comme vn moyen fort à propos & necessaire pour paruenir à ladite paix; dequoy ie fis lors peu de conte, estimant qu'on ne s'y arresteroit, car il me sembloit que ce fait deuoit estre manié plus solennellement, dont à mon retour ie priay lesdits sieurs de Fleury & de Chesly, lesquels i'aduertis de ce que i'auois appris de Monsieur de Mayenne, & dudit sieur de Rosne, & de faire remonstrance à mondit sieur le Chancelier, afin qu'il tint la main que les affaires fussent traitées par conference entre personnes d'autorité, publiquement, & non secrettement, pour mieux engager les parties, autrement l'on ne feroit rien de bon.

DE Vx iours apres le departement de Villeroy, lesdits sieurs de Fleury & de Chesly apres la réponse susdite, arriua vers moy vn homme de mon pere, enuoyé exprés pour me faire sçauoir qu'il auoit veu sa Majesté à Magny, laquelle luy auoit dit en la presence de Monsieur le Marechal de Biron, estre si desireuse de la paix, qu'elle estoit contente de commencer par vne cessation d'armes, pour donner relasche à ses subjets, & moyen audit Duc de conferer avec ses partisans sans lesquels ils disoient ne pouuoir rien faire.

PARTANT qu'il n'estoit plus question que d'y disposer ledit Duc, & mettre la main à l'œuvre, ayant comme il auoit, parole de sa Majesté, & sur ce me commanda d'en parler audit Duc, de l'exhorter d'y entendre, & d'en entreprendre la commission, & à cette fin l'aller trouuer à Pontoise, où il s'achemin-

noit, & si i'en faisois difficulté, luy enuoyer vn passe-port dudit Duc, avec lequel il le viendroit trouuer à Paris, ou en l'armée pour luy en faire l'ouuerture; m'admonestant toutefois de ne perdre cette occasion d'assister le public en la nécessité en laquelle il se trouuoit, vsant des termes & commandemens de pere; dequoy i'aduertis incontinent ledit Duc, qui estoit encores au siege de Corbeil, lequel me permit incontinent ce voyage, me pressant de l'entreprendre, & accorder ladicte cessation d'armes, sans laquelle il disoit ne pouuoir assembler ceux du party, & moins traiter sans eux. Je le suppliai encores à ce coup, de ne m'y enuoyer seul pour les raisons susdites: toutefois ie ne pûs iamais gagner ce poinct sur luy, estant en cela conforté par tous ceux qui le conseilloient, & mesmes par Messieurs de Lion & Ianin; ce qui me déplût grandement, joint qu'il me sembloit que leurs raisons lesquelles estoient seulement fondées sur le mécontentement que l'on auoit à Rome, en Espagne, & en plusieurs Villes de ce Royaume, que ledit Duc fit traiter publiquement avec sa Majesté, estant de contraire Religion, ne meritoient d'estre balancées avec le bien que l'on pouuoit esperer pour la Religion & pour le Royaume, par vne publique negociation.

Toutefois ie ne pûs rien profiter, quoy voyant ie me resolus de voir Monsieur mon pere pour le contenter, & luy en dire mon aduis, prenant charge du Duc de traiter & accorder ladicte cessation d'armes, accom-

pagnée d'un commerce general, & d'un règlement, tant pour le labourage que pour la levée des deniers publics durant icelle. Le Cardinal Cajetan partit en ce temps de Paris pour s'en aller en Italie à cause de la mort du Pape Sixte cinquième qui nous l'auoit enuoyé, & nous laissa l'Euesque de Plaisance creature du Duc de Parme, en qualité de Vice-Legat, dont il exerça la charge, sans pouuoir valable, & contre les formes du Royaume. Car puisque le Pape qui auoit delegué ledit Cardinal, estoit decédé, son pouuoir cessant, comme il faisoit, il ne pouuoit aussi subdeleguer vn autre; joint qu'en ce Royaume nous n'admettons pas volontiers telles delegations; aussi sa Commission ne fut présentée au Parlement, & se contenta d'entreprendre cette faute pour s'autoriser & s'accommoder.

L'EDIT Cardinal laissa à son parlement entre les gens de qualité vne opinion toute contraire à celle qu'ils s'estoient promise à son arriuée: car il se monstra durant son séjour si partial pour le seruice du Roy d'Espagne, qu'il méprisoit les conseils de ceux qui n'y adheroient, & ne faisoient conte des autres. L'on a voulu dire que sa Saincteté n'étoit pas trop satisfaite de luy, commençant à connoistre que nostre guerre panchoit bien autant du costé de l'ambition que de la Religion.

I E partis donc de ma maison pour m'en aller à Pontoise avec la susdite charge, sans estre retenu des brûlemens & rauages que

faisoient tous les iours les estrangers , iusques aux portes d'icelle , & qui estoit remplie de toutes sortes de personnes , iusques à trois ou quatre mil qui s'y estoient retirez avec leurs femmes , enfans , & bestiaux , pour leur seureté. Mon pere m'attendoit à Pontoise , lequel me confirma de bouche ce qu'il m'auoit écrit , & aduertit sa Majesté de mon arriuée , ensemble du rapport que ie luy auois fait de l'intention dudit Duc , & de la charge que m'auoit donné sadite Majesté , qui luy manda auoir commandé à Monsieur le Marechal de Biron , & à Messieurs de Thurenne & du Plessis , de conferer avec moy , & qu'ils se trouueroient pour ce faire dès le lendemain à Buy proche d'Alincour , où arriua ledit sieur de Fleury , qui me dit de la part de Monsieur le Chancelier , qu'il se resiouïssoit de ma venue , & qu'il en esperoit tout bien , & que sa Majesté auoit député lesdits sieurs pour parler à moy , ayant iugé à propos qu'il n'en fust point , d'autant qu'il en pourroit mieux fauoriser ma negociation auprès de sa Majesté laquelle estoit lors à Gisors.

CETTE assemblée & conference commença donc au lieu de Buy , le quinziésme jour d'Octobre , entre les susdits Seigneurs & moy , le maistre de la maison y assistant , & ledit sieur de Fleury , leur fut représenté tout ce qui s'estoit passé en la poursuite de la paix , & de la bonne volonté que les Chefs auoient d'y entendre , & reconnu qu'il falloit commencer par une cessation d'armes pour



quelque temps, laquelle fut pour cette cause arrestée de part & d'autre; & fut ce discours de la forme & des conditions, & particulièrement des qualitez qu'on donneroit aux Chefs, du département & levée des deniers publics, de la liberté & seureté du commerce, & du labourage, au soulagement du pauvre peuple, du renuoy hors du Royaume des forces estrangeres, de la deliurance des prisonniers de guerre, où il fut fait mention de celles de Messieurs de Guise & d'Elboruf, & de Madame de Longueville & sa suite, & de la restitution & iouissance des biens saisis, & de l'ordre qu'on tiendrait pour faire executer & garder ladite cessation d'armes, des lieux où elle s'estendoit, du temps qu'elle durerait; ce qui fut debattu & discouru diuerfement: mais enfin il fut arresté que chacun mettroit son aduis par écrit pour en communiquer plus meurement, & s'en accorder à vn autre iour.

Des le lendemain ie leur enuoyay par le sieur de Fleury ce que i'en auois projecté & écrit, dont depuis ie conferay avec eux au lieu de Preaux près Gisors, où ils amenèrent Monsieur de Reuol: Mais d'autant que sa Majesté estoit partie dudit Gisors, & que ie n'estois marry de sçauoir l'intention dudit Duc, sur l'aduis que ie luy auois donné de nostre premiere conference, deuant que passer outre, nous ne conclusmes ny accordasmes rien, & seulement reconnusmes, discourans sur chacun article de l'écrit que i'auois dressé, par où à peu près nous en deuions

sortir , si nos Chefs continuoient à vouloir faire ladite cessation d'armes.

SOVDAIN que sa Majesté fut reuenüe audit Gisors , lesdits Seigneurs me renuoyèrent querir , & manderent aussi à mon pere de s'y trouuer ; lesquels me dirent par la bouche de Monsieur le Marechal de Biron assez succinctement , qu'encore que sa Majesté fust aduertie que Monsieur le Duc de Parme s'en retournoit avec son armée au Pais-Bas , & qu'il estoit en si mauuais estat , que de long-temps il ne pourroit reuenir en ce Royaume , de sorte qu'elle ne pouuoit faillir qu'elle n'en receust vn grand aduantage : toutefois que sa Majesté auoit tant de pitié de son pauvre peuple , & estoit si remplie de bonté enuers ses subjets , qu'elle ne vouloit point laisser de leur donner la paix , si le dit Duc s'y vouloit resoudre ; mais qu'elle ne pouuoit aucunement goustier ladite cessation d'armes qui auoit esté proposée , parce qu'elle luy estoit trop preiudiciable , d'autant que c'estoit accroistre ses subiets à la desobeïssance , & vn moyen de rafraischir les viures dans les Villes qui en auoient nécessité , comme celle de Paris ; donner temps & loisir audit Duc de Parme de dresser ses forces , en ce faisant reculer plustost que d'auancer la paix generale , laquelle si on vouloit pouuoit estre aussi-tost concludë , & apres plus facilement executée & mieux receüe que non pas ladite cessation d'armes. Mais d'autant que i'auois souuent dit , que le Duc ne pouuoit traiter sans l'aduis & consentement de ceux

de son party, lesquels il ne pouuoit assembler durant la guerre à cause des dangers des chemins; ils offroient des passe-ports de sa Majesté pour les aller querir, & faire venir seurement, lesquels seroient expediez en la forme qu'ils aduiferoient avec moy, si ie m'en voulois contenter; adioustant que ce moyen auoit esté pratiqué en autre temps, mais que durant nos guerres ciuiles, l'on n'auoit iamais fait cessation d'armes generally: partant que sa Majesté ne s'y vouloit point accommoder.

IE luy répondis que l'on m'auoit mandé & fait venir exprés pour traiter ladite cessation d'armes; que ledit Duc m'auoit sur cela enuoyé & donné charge de l'accorder, croyant que sa Majesté fust resoluë comme on luy auoit écrit, mais puis qu'il estoit autrement & que l'on auoit changé d'aduis, & que maintenant ils faisoient vne autre proposition, ie ne pouuois y répondre sans scauoir l'intention dudit Duc, lequel à cette cause retournois trouuer le lendemain avec la permission de sa Majesté & la leur; & neantmoins qu'il ne falloit laisser à faciliter les moyens de faire la paix pour la retraite dudit Duc de Parme & de son armée, parce que de long-temps elle ne recouvroit par armes l'aduantage qu'elle auoit perdu deuant Paris: que c'estoit tousiours à recommencer; que tant plus la guerre dureroit, plus sa Majesté y perdrait, car chacun de part & d'autre la faisoit à ses despens; & plus le mal est inueteré, & plus il est difficile à guarir: que

j'estimois que les Espagnols n'en feroient aucunement marris, parce qu'ils ne s'y estoient formellement opposez quand on leur en avoit parlé.

Je receus le soir mesme vne lettre dudit Duc, par laquelle il me s'offendoit d'accorder ladicte cessation d'armes, d'autant que ledit Duc de Parme ne le trouuoit á propos, que les habitans de Paris en murmuroient, comme disoit le Procureur des Marchands, & aussi que l'Euesque de Plaisance que ledit Legat auoit laissé ne l'approuuoit : partant il me prioit seulement d'obtenir la liberté du commerce & la seureté du labourage. Par là ie reconnus que de part & d'autre l'on ne s'accorderoit que trop à reietter les moyens d'acheminer & faciliter la paix.

E S T A N T auprès dudit Duc, ie luy fis entendre ce que j'auois fait avec la dernière réponse & ouuerture qui m'auoit esté faite de la part de sa Majesté; laquelle il prit resolution d'accepter, apres plusieurs disputes & considerations, se promettant qu'outre lesdits passe-ports, que l'on promettoit de luy bailler, l'on accorderoit aussi le commerce & le labourage qui estoit ce à quoy il tendoit le plus.

Donc ledit Duc ayant pris resolution d'accepter lesdits passe-ports, pour enuoyer aux Prouinces, & assembler le party, il me pria encore de faire cét office, m'assurant derechef qu'il ne desiroit rien tant que de faciliter ladite assemblée, pour composer les affaires; il me donna encore charge de faire

instance du commerce & du labourage, & d'asseurer vn chacun de sa bonne volonté à la paix, mesmes me la donna par écrit.

Avec lequel ie me resolus de faire encores le voyage, iugeant estre necessaire d'auancer ladite assemblée, pour en tout cas leuer audit Duc l'ocuse de traiter ce qu'il faudroit sur icelle.

Ie fus à Mante pour cela, où ie trouuay Monsieur le Marechal de Biron, qui estoit sur son partement pour aller en Angleterre & Allemagne querir le secours qu'il en emmena depuis, & Monsieur le Chancelier qui se trouua en son lieu en la conference, en laquelle nous accordasmes la forme desdits passe-ports, lesquels ne furent déliurez iuiuant nos Memoires; mais seulement furent expediez pour deux mois, pour plus aduancer ladite assemblée, comme chacun iugeoit estre necessaire de faire, afin de preuenir les pratiques, & rechercher des forces estrangeres que l'on faisoit de part & d'autre: toutefois il me fut promis que l'on les prolongeroit, si l'on connoissoit qu'il fust necessaire. Nous fismes vn reglement pour la liberte & seureté du labourage, qui fut depuis approuué & publié de part & d'autre; mais nous ne peusmes conuenir dudit commerce general, pour les difficultez que l'on me fit, & reconnusmes que l'on n'auoit aucune enuie de nous accommoder: toutefois ils ne voulurent pas m'en éconduire du tout, pour ne nous effaroucher, mais s'excusoient de n'auoir pouuoir de passer outre, & me promirent d'en écrire à sa Majesté; laquelle estoit allée apres ledit Duc de Par-

me qui estoit enfin party, nonobstant les remonstrances de ceux de Paris, pour s'en retourner en Flandres avec son armée, me priant d'attendre ladite réponse, & cependant enuoyer audit Duc de Mayenne lesdits passe-ports, afin de s'en seruir, comme ie fis. De sorte que ie me retiray à Alincour auprès de mon pere, où ie receus la nouuelle de la prise de Corbeil, & du sac de ma maison, laquelle durant ledit siege auoit seruy de retraite à plusieurs seruiteurs de sa Majesté; laquelle il auoit aussi prise en sa protection, & honorée d'une sauue-garde, & estoit encore remplie de plusieurs ménages sans iamais auoir fait la guerre, ny refusé la porte & accès aux seruiteurs de sa Majesté, ny mesmes desobey à ses commandemens; toute fois l'on y mit vne garnison qui y demeura six sepmaines.

Mon sejour audit Alincour attendant la susdite réponse fut cause d'une grande faute qui fut faite, ou par malice, ou par ignorance, par ceux ausquels ledit Duc donna charge de dresser ou enuoyer aux Prouinces les lettres pour faire ladite assemblée, suiuant lesdits passe-ports que ie luy auois enuoyez, car elles portoient mandement d'une conuocation des Estats generaux du Royaume, dont ie n'auois eu aucune charge de parler, & n'en auoit aussi esté fait aucune mention; moins aussi d'une autre clause portée par lesdites lettres, par laquelle ledit Duc donnoit occasion de croire qu'il vouloit assembler le party, plus pour élire vn Roy que pour autre chose. DE QUOY ie fus le premier aduertty, & certes par hazard, car ledit Duc ny pas vn

des siens ne m'en manderent rien; mais estant allé faire vn tour à Paris, en attendant lesdites responſes de ſa Maieſté, pour voir Monsieur de la Chastre qui m'y auoit conuié, vn Gentil-homme ſervant dudit Duc, lequel il auoit depeſché en Prouence & en Languedoc avec leſdites lettres, me vint trouuer pour ſçauoir de moy comme il en deuoit vſer, dont il diſoit auoir eſté mal inſtruit par ceux qui les luy auoient baillées: auquel ie dis que leſdites lettres auoient eſté mal-faites, que ie n'auois eu charge de prendre leſdits paſſe-ports pour l'effet auquel l'on les employoit, & qu'il ne les deuoit porter: auſſi que ce n'eſtoit l'intention de ceux qui les auoient accordez & demandez, & particulierement que c'eſtoit me faire tort. Que les porteurs d'icelles couroient fortune d'eſtre arreſtez & pris eſtans découuerts, & que ie ſerois le premier à les condamner quand on les iugeroit. Que ledit Duc receuant leſdits paſſe-ports m'auoit expreſſément écrit & aſſeuré ſur la remonſtrance & ſupplication que ie luy en auois faite, & qu'il n'écriroit ny manderait rien aux Prouinces en vertu d'iceux qui puſt offenſer ſa Maieſté, ny ſes ſeruiteurs; & toutefois ie voyois le contraire, dont ie ne luy conſeillois de ſe charger, & luy dis que ie m'en plaindrois à Madame de Nemours, de Montpenſier & du Maine, qui eſtoient en la ville, & ceux qui les aſſiſtoient, comme ie fis dès le iour meſme: i'en fis auſſi vne bonne depeſche audit Duc, & à Monsieur le Preſident Ianin.

Lesdites Dames ordonnerent la retention desdites lettres : cependant ie reuins à Pontoise, & à Alincour, d'où ie donnay aduis à Monsieur le Chancelier, & à Monsieur le Marechal de Biron de cette faute, & depuis leur enuoyay la réponse mesme que Monsieur le President Ianin me fit à la plainte & depesche que ie luy en auois faite, par laquelle il me mandoit que cela auoit esté fait par inadvertance, & non par malice, que l'on y pouruoiroit, & que l'intention dudit Duc estoit tres-bonne, qu'il estoit seulement necessaire que ie la visse pour faire reformer lesdites lettres en faisant prolonger lesdits passe-ports, d'autant que le terme d'iceux estoit expiré quasi deuant qu'ils fussent reueus où l'on les auoit enuoyez.

M E S D I T S sieurs le Chancelier & Marechal de Biron, me firent réponse qu'ils auoient trouué cette depesche tres-mauuaise, & bien éloignée de l'esperance que ie leur auois donnée de l'intention dudit Duc : mais puisque ledit President m'auoit récrit, qu'il la reformeroit quand il me verroit, qu'ils me conseilloyent d'aller trouuer promptement ledit Duc, afin qu'il y fust remedier.

V E R I T A B L E M E N T, Monsieur, cette depesche auoit esté mal considerée & écrite, car iamais il n'auoit esté parlé desdits Estats generaux, & moins d'élire vn Roy ; c'est chose aussi que sa Majesté se fust bien gardée d'accorder, si elle se fust seulement apperceuë que l'on eust tiré à ce but : par le memoire aussi que ledit Duc me bailla, que il ay



encores , pour accepter lefdits passe-ports , il ne fit aucune mention de tout cela : & pour maintenir & conuoquer lefdits Estats , il eust bien fallu plus grands nombre de passe-ports que ie n'en pris : car vous sçavez qu'il faut écrire à tous les Baillifs & Seneschaux du Royaume , & ie n'auois leué que vingt ou vingt-cinq passe-ports , tant pour le dedans que pour le dehors , où nous auions accordé qu'ils seroient enuoyez .

L'ARRI V' A Y à Soissons la veille de Noël, audit an 1591. où ie trouuay ledit Duc , auquel ie fis ma plainte & remonstrance de l'expedition & enuoy desdites lettres , dont il ietta la faute sur ceux qui les auoient dressées , & sur le peu de loisir qu'il auoit eu de les considerer , à cause qu'elles auoient esté faites en chemin , & lors qu'il estoit accablé d'affaires avec ledit Duc de Parme , & pour faire la depêche du President Ianin qu'il auoit enuoyé en Espagne , & des continuélles allarmes que sa Majesté leur auoit données iusques à Guise. Mais qu'il estoit content de les faire reformer , en m'assurant de n'auoir rien promis audit Duc de Parme qui l'obligeast à ruiner le Royaume, ny ses amis, sans l'aduis desquels il se garderoit bien aussi de promettre aucune chose à qui que ce fust, qui importast au general de la cause dont il ne se departiroit iamais.

PLVSIEURS qui estoient auprès de luy le destournoient de ladite assemblée, laquelle il disoit estre fort suspecte aux Espagnols, desquels ils luy remonstroient qu'il auoit

plus grand besoin que jamais , & luy deuoit estre aussi en particulier plus dommageable qu'utile : d'autant qu'en telle assemblée publique , l'on s'estudie ordinairement de diminuer l'autorité & puissance de ceux qui commandent : toutefois il passa par dessus leurs raisons , & fit dresser vne forme de lettre , laquelle i'adressay au sieur de Fleury , pour faire voir à sa Majesté, luy donnant auis de la disposition en laquelle ledit Duc estoit.

S'A Majesté fit changer quelques mots ausdites lettres , qui n'importoient à leur substance, offrant en ce cas qu'on les voulust enuoyer selon la reformation, de rafraischir & prolonger lesdits passe-ports pour tel temps qu'il seroit aduisé, encore qu'elle n'eût que trop d'occasion de se deffier de ladite assemblée , ayant surpris des lettres qui alloient à Rome qui le confirmoient en ce soupçon : neantmoins elle vouloit passer par dessus tout cela , pour faciliter la paix & ne diuertir ledit Duc à y entendre , puis qu'il continuoit à protester , qu'il ne pouuoit rien faire sans ladite assemblée.

L E D I T sieur de Fleury eut charge de faire cét office enuers sa Majesté , laquelle luy commanda de parler luy-mesme audit Duc sur ce propos , pour mieux entendre & concevoir son intention , dont i'aduertis ledit Duc , qui fut conseillé de plusieurs de le voir & faire infinis voyages , comme s'il eust esté question de conclure la paix ; toutefois il le vid en public & parla à luy , dont ledit sieur de Fleury retourna assez satisfait.

Monsieur de Neuers estoit lors à Soissons, qui m'auoit mandé qu'il desiroit parler à moy, mais ledit Duc ne le voulut permettre, dont ie fus tres-marry pour le respect que i'ay tousiours porté audit Duc de Neuers, & l'esperance que i'auois de profiter avec luy pour le public.

L'on promit audit sieur de Fleury, que l'on luy enuoyeroit apres son partement vn Memoire des passe-ports qu'il falloit faire rafraischir, avec vn double de ladite lettre reformée, signée & approuuée dudit Duc.

Ledit sieur de Fleury trouua la Cour partie de Senlis, & separée, de sorte qu'il ne peût executer sa charge, & fut contraint la suiure iusques auprès de la ville de Chartres, laquelle sa Majesté alla de là assieger: ledit Duc ne laissa de luy enuoyer lesdites lettres & Memoires par vn trompette, exprés pour en auoir réponse plus seurement. Le sieur de Videuille arriua en ce temps-là à Soissons, lequel auoit veu Monsieur le Chancelier & Monsieur Do, & conseré de nouveau du commerce par le commandement dudit Duc, où il n'auoit rien profité, parce qu'ils auoient refusé de prendre le bled, le vin, & le foin, tant ils craignoient accommoder Paris, qui en auoit certainement necessité: toutefois ils luy donnerent apres esperance qu'ils pourroient changer d'aduis, apres en auoir parlé à sa Majesté, laquelle ils allerent trouver audit siege de Chartres.

Ledit Duc ayant ouï ledit sieur de Fleury sur le soupçon que sa Majesté auoit

conçu de ladite assemblée, fondée sur ce qu'elle apprint par lesdites lettres interceptes, que cela seul avoit esté cause du retardement desdits passe-ports; luy répondit que depuis l'avoir veu il n'avoit changé de volonté; & qu'il desiroit aider à la paix de tout son pouvoir, pourveu qu'elle se peust faire avec l'honneur de Dieu, & la conservation de la Religion. Mais que ne le pouvant sans frapper coup, comme il avoit toujours dit, il avoit désiré ladite assemblée, de laquelle toutefois il ne pouvoit nier, que plusieurs du party n'eussent prins ombrage comme ceux qui avoient diverses fins & opinions en la conduite & resolution des affaires publiques; qu'il estoit contraint quelques-fois pour contenir chacun en office & conserver son credit, d'écrire & parler des choses qui se presentoient diuversement; toutefois qu'il n'avoit qu'un but, qui estoit celuy mesme qu'il avoit toujours déclaré, dont il appelloit Dieu à témoin; que sa Majesté n'estoit apprentive des peines & traverses, auxquelles estoient subjets ceux qui commandoient à des volontaires, comme celui qui avoit passé par là, que certainement l'on n'en dispoit pas comme l'on vouloit; qu'il desiroit doncques le repos du Royaume, comme à la fin l'on connoistroit par effet: mais puisque ladite Majesté prenoit tant de jalousie de ladite assemblée, & faisoit difficulté de bailler les passe-ports pour l'advenir, il ne le vouloit presser davantage, & neantmoins mettoit peine de

ne laisser pas de ce faire sans cela ; qu'il ne vouloit répondre aux conseils & opinions de ceux qui s'y trouueroient , non plus qu'aux écrits & lettres d'un chacun ; mais qu'il l'asseureroit qu'il ne manqueroit iamais à son deuoir , & que la lettre qu'il auoit écrite à l'Euesque d'Amiens , dont on se plaignoit , n'estoit du tout semblable à la coppie qu'il auoit apportée , comme il estoit facile de verifier sur la minutte qu'il representeroit , & mesmes sur l'original qu'il disoit estre tombé en leurs mains , d'autant qu'il leur configneroit le chiffre pour la dechiffrer quand on s'en voudroit éclaircir. Et d'autant que ledit sieur de Fleury luy auoit fait instance d'enuoyer à Chartres , où il disoit se deuoir faire par le commandement de sa Majesté vne notable assemblée , en laquelle l'on pourroit encore traiter du commerce , & auroit supplié donner cette commission à Monsieur de Videuille & à moy : Il luy répondit , encore qu'il desirast grandement satisfaire au desir de sa Majesté & des Catholiques qui la desiroient , qu'il ne pouuoit toutefois ouuertement enuoyer en ladite assemblée , sans par trop ombrager ceux qui le secouroient , lesquels il ne vouloit mécontenter à cause du besoin qu'il en auoit : que toutefois si à bon escient l'on vouloit traiter dudit commerce pour ladite ville de Paris , comme souuent il auoit esté proposé , il nous prioit volontiers ledit sieur de Videuille & moy , d'aller iusques-là ; mais il ne pouuoit donner d'autre charge que de répondre en general de sa

droite intention au bien du Royaume , avec la conseruation de la Religion , parce qu'il ne pouuoit passer plus auant sans ses amis, ainsi qu'il auoit tousiours déclaré; & sur cela congedia ledit sieur de Fleury par le moyen duquel nous receûmes le passe-port bien-tost apres.

Ledit sieur de Fleury alla à Chartres pour aduertir sa Majesté & ceux de son Conseil de ce que dessus , cependant ie demeuray en la maison oisif; & afin que ie n'obmette rien en ce discours sur cette occasion , i'employeray le temps pour vous rendre compte de la prise & réduction du Chasteau-Thierry , pource que ie sçay qu'il en a esté parlé diuerfement, & mesme à mon defauantage ; & vous tous en direz la verité , comme ie ferois de la prise dudit sieur de Vidguille , aduenüe comme il s'acheminoit à cette negociation avec le passe-port de sa Majesté , si vous n'en auiez esté mieux informé qu'un autre , comme celui duquel il fut tres-bien seruy & secouru en son besoin.

Vous noterez doncques, Monsieur, s'il vous plaist, que ie n'estois à la suite dudit Duc lors qu'il inuestit ladite ville de Chasteau-Thierry , pour m'auoir laissé en ladite ville de Soissons, dont ie ne fusse party pour le venir trouuer , sans l'arriüée dudit sieur de Fleury , lequel me manda l'y conduire , & le fûmes trouuer audit siege , ayant d'abord gagné les faux-bourgs de la ville des deux costez de la riuere , où son armée estoit logée avec luy tres-commodément, ayant telle-  
ment

ment surpris ceux de dedans, qu'ils n'auoient pû les brûler ny les debattre long-temps; aussi estoient-ils aussi mal pourueus de gens de guerre pour ce faire, & mesmes pour bien deffendre la Ville qui a tousiours esté estimée, comme certainement elle est vne des plus mauuaises places du Royaume: toutefois nous trouuâmes que lesdits assiegez s'estoient assez gaillardement deffendus, ayant pris vne piece dedans la batterie dudit Duc qui l'incommodoit grandement.

CHACUN se retira au Chasteau, contre lequel ledit Duc dressa sa batterie, & deux iours apres le Vicomte de Comblisy m'en uoya vn billet, par lequel il me prioit de parler à luy. Je trouuay la place si remplie de femmes & d'enfans, que ie connus bien qu'ils ne pouuoient gueres durer; avec cela aussi il commença deslors de composer, & d'autant qu'il estoit occupé ailleurs, il me laissa son pere qui me proposa des conditions que ie luy dis qu'on n'accorderoit iamais; car il demandoit que la place luy fust laissée en garde comme à luy appartenante, à la charge de n'en plus faire la guerre: encore vouloit-il qu'on luy donnast loisir d'en aduertir sa M. à quoy il s'opiniastra tellement, que ie fus contraint de me retirer sans rien faire, estant mandé dudit Duc, apres auoir contesté plus de deux heures avec luy. En partant ie luy dis que s'il n'estoit pressé de composer, il faisoit mal d'en parler, parce que cela decourageoit ses gens, & scauoit bien que ledit Duc n'accorderoit iamais ce qu'il demandoit. Je le dis

aussi audit sieur de Comblisy, lequel me pria d'obtenir vn passe - port pour faire sortir sa mere & sa femme, avec les autres femmes qui étoient au Chasteau, dont il disoit estre en plus grand soucy que de la batterie qui estoit prestee à iouir, & n'auoit esté retardée que pour ma consideration : & de fait Madame Pinart se vint ietter à mes pieds toute éplorée, me priant de l'amener avec moy ; ce que ie n'osay entreprendre sans congé dudit Duc, dont ie luy fis requeste ; mais il m'en refusa, & fit commencer la batterie, laquelle s'adressant à vne tour, & au pignon d'une gallerie qui n'auoit esté terrassée, fit bien-tost iour. Les estrangers estoient logez au pied du Chasteau, & fussent entrez dans la ville tost apres, si la batterie eust continué, mais ledit Duc la fit cesser à ma requeste ; & sur ce que ledit sieur Pinart & de Comblisy me prierent de faire pour eux telle composition que ie voudrois, ie l'obtins dudit Duc le plus honorablement & aduantageusement qu'il me fut possible, tant pour eux & leurs gens de guerre qui les assistoient, que pour les habitans, & vous assure qu'elle fut faite au grand regret desdits estrangers, car ils connoissoient tres-bien ledit aduantage. Mais ledit Duc me vouloit faire ce plaisir, & fit accompagner luy-mesme ledit Pinart & sa suite, quand ils sortirent iusques au dehors de l'armée, de laquelle il ne m'eust esté possible de les garantir autrement. Voila la verité de cette composition, que ie puis prouuer par écrit, pour laquelle ledit Pinart & son fils ont souffert ce



que vous sçavez. Ce qu'on leur pouuoit imputer estoit d'auoir refusé les gens de guerre, que l'on disoit leur auoir esté offerts quelques iours deuant ledit siege : Mais ils s'excusoient sur la mauuaise volonté qu'ils disoient sçauoir bien, que ceux qui leur commandoient leur portoient, lesquels auoient fait auparauant ce qu'ils auoient pû pour les dénicher de la place, & auoient iuré de ne leur pardonner en cette occasion : & quoy que ce soit, ie vous iure en homme de bien n'auoir eu durant le siege aucune intelligence avec ledit sieur Pinart & son fils, que celle que ie vous ay représentée ; & dauantage, n'auoir iamais veu personne si aigre & contraire à la Ligue que le pere, dont il ne se peût garder qu'il n'en donnast connoissance audit Duc quand il sortit & l'accompagna : & si ceux qui auoient entrepris de deffendre la brèche de la ville eussent fait leur deuoir, ie croy certainement que Monsieur du Maine se fust retiré sans le prendre. Voila à quoy sont subjets en ce Royaume ceux qui changent de profession, & ont faite d'amis & de support à la Cour; car ie puis dire que i'ay veu assaillir, forcer, & rendre infinies places qui n'auoient esté si bien deffenduës, & dont le peril n'estoit toutefois à beaucoup près si grand que celuy-cy ; mais l'on auoit besoin de la bourse du pere, & croy que ledit sieur de Vi-deuille n'eust esté quitte de sa prise à meilleur compte que les autres, si la foy & bonté de sa Majesté ne les eussent garantis de la haine, tant est grande l'enuie de ce temps, & prend-

on plaisir de courir à vn affligé que l'on a veu en prosperité.

Après la déliurance du sieur de Videuille, & le retour de Chartres du sieur de Fleury, par lequel ie receus des lettres de Monsieur le Chancelier, & de Monsieur le Marechal de Biron, n'y ayant trouué sa Majesté, ie m'acheminay à Estampes suiuant leur mandement, où se trouua ledit sieur de Videuille, & eusse bien desiré que Monsieur le Cardinal de Gondy eust pris la peine d'en faire autant, comme ie l'en auois supplié, afin de nous aider à faciliter les affaires : mais il s'en excusa, ayant à mon aduis mauuaise opinion du succez de nostre negociation. Nous passasmes iusques à Dourdan, que ledit sieur Marechal tenoit assiegé. Ledit Duc m'auoit mandé n'auoir iamais ouïy les propos que le sieur de Rosne auoit tenus audit sieur de Fleury, lesquels aussi ledit sieur de Rosne tournoit en risée suiuant sa coustume ; de sorte que ledit Duc me prioit de parler seulement du commerce dont il nous auoit donné charge, sans s'engager plus auant, ce qui fut cause que mon voyage fut du tout inutile : car les sieurs de Chiuerny & de Biron, n'auoient aucune charge ny enuie d'accorder ledit commerce, & attendoient de nous tout autre chose, partant chacun se tint sur les paroles generales, avec plus de desiances les vns des autres, qu'il n'y en auoit ce me semble de suiet ; car ils estimoient que nous fissions les fins, à cause de ce que ledit de Rosne auoit dit au sieur de Fleury, & nous ne

voyant rien de l'esperance qu'on nous auoit donnée de nostre voyage ; au moyen dequoy apres nous estre assemblez deux iours durant, nous nous separasmes, remettant à consulter de toutes choses avec ceux qui nous auoient enuoyez. I'auois apporté le chiffre, de laquelle auoit esté écrite la lettre de l'Euesque d'Amiens, de laquelle a esté cy-deuant parlé, afin de la verifier; mais lescits sieurs n'auoient l'original, de sorte que cela fut remis à vne autre fois, dont l'on ne s'est depuis souuenu, non plus que des autres discours que nous eusmes ensemble : ce fut au commencement du mois de May, de l'an 1591.

Nous retrouuasmes Monsieur du Maine à Rheims, qui fut plus marry du refus du commerce que de toute autre chose, dont i'aduertis ledit sieur de Fleury, & qu'il ne falloit plus s'attendre que ledit Duc fist parler de la paix, que les Deputez de Prouince qu'ils disoient auoir mandé les attendant tous les iours ne fussent venus, d'autant qu'il s'arrestoit à ne vouloir traiter sans eux, pour les raisons susdites. Et me souuient, Monsieur, que vous pristés la peine, estant à vostre maison, de m'écrire vne tres-aigre lettre sur ce sujet, ne vous pouuant contenter des difficultez que faisoit ledit Duc de traiter, ou du moins ébaucher les affaires, en attendant son assemblée, pour garantir l'Estat du peril qu'il alloit courre à l'arriuée des armées estrangeres que chacun attendoit, laquelle ie fis voir audit Duc, pensant l'ébranler ; car c'estoit mon aduis qu'on en

vsfast ainsi , mais ie n'y gaignay rien , s'excellant tousiours sur ce qu'il ne vouloit donner ialousie ny mécontentement à ses amis dedans ny dehors le Royaume , quoy qu'il en feust aduenir.

LE sieur de Landriano Milanois arriua inopinément en la ville de Rheims , en ce temps-là enuoyé par le Pape Gregoire quatorzième , de la maison des Sfondrate , n'aguere au Pontificat , chargé d'offres & d'asseurances du secours , & d'un nouveau mandement de sa Sainteté , adressant aux Catholiques qui assistoient sa Majesté , & spécialement aux Ecclesiastiques , par lequel ils estoient exhortez & commandez d'abandonner sa Majesté , & sortir des Villes qui la reconnoissoient , à peine d'excommunication: Et combien que ledit mandement fust jugé de plusieurs tres-rigoureux , & arriué tres-mal à propos , à cause de la prosperité des affaires de sa Majesté , toutefois il fut incontinent publié à la sollicitation de ceux qui vouloient nourrir la guerre : dont aucuns Ecclesiastiques furent scandalisez , encore qu'ils fussent tres-affectionnez au party , car ils disoient que le Pape deuoit encourager plustost ceux qui residoient aux Villes de sa Majesté d'y demeurer que d'en sortir ; parce que c'estoit quitter le champ aux heretiques , qui estoit ce qu'ils me mandoient ; & ce faisant , abstraire le peuple d'abandonner leurs biens , maisons , & familles : qu'il estoit à craindre qu'ils eleussent l'un plustost que l'autre , car il s'en verroit peu en ce temps

qui voulassent mourir de faim pour obeïr à sa Sainteté; les Ecclesiastiques mesmes ne le feroient pas : de sorte que ledit mandement confirmoit plustost les Catholiques auprès de sa Majesté, qu'il ne les estrangeoit, au mépris du saint Siege, comme il estoit aduenü des precedens; & d'autant plus que les affaires de sa Majesté estoient en meilleur estat qu'auparavant: Que c'estoit tres-mal fait de desesperer chacun de la paix, les affaires du party estant si découuës qu'elles estoient, & deuant que l'on vist les moyens de les redresser; bien asseurez que nos maux estoient si enracinez, qu'ils ne pouuoient plus estre guaris par charmes ou paroles, ny crainte de l'indignation de sa Sainteté: de sorte que les huguenots & les estrangers qui auoient coniué la ruine de la Religion, profiteroient sous ombre du desespoir qu'apporterait ledit mandement, duquel si on les eust creus l'on eust sursis la publication apres la victoire. Mais ledit Landriano auoit charge expresse de le fulminer, dont il ne voulut rien rabattre, tant il estoit mal informé de nos affaires, & se comporta en l'exécution de sa commission à la mode de Rome, où il leur semble que toutes choses doiuent passer par leur censure & jugement, encore que souuent ils se fondent plus sur le vray-semblable que sur le profitable. Ils s'estoient persuadez que la France tomberoit au seul bruit de la leuée & venuë des forces que sa Sainteté auoit resolu d'enuoyer en ce Royaume contre sa Majesté, & auoit fait ledit Landriano

exprés commandement, comme si la crainte & apprehension desdites forces eussent deu l'autoriser, & rendre les affaires selon leur desir: mais l'euenement leur apprit bien-tost que la France ne veut pas estre maniée de cette façon.

L'ADVERTIS ledit sieur de Fleury de tout cecy, afin qu'il sceust que nos folies alloient ruinant toutes choses; ce fut lors que le pauvre Marquis de Maignelay seruit d'exemple & d'enseignement à plusieurs, & qu'il fut mené deuant la ville de la Fere, laquelle il auoit acquise au party, au hazard de sa vie sur vn soupçon que l'on auoit de luy, qu'il traitoit auec sa Majesté & Monsieur de Longueuille; ce fut le Vis-Seneschal de Montlimarnommé Collas, qui fit ce bel exploit de guerre, auquel ledit Marquis se fioit plus qu'à personne de la Ligue. Il estoit acompagné du Lieutenant des Gardes dudit Duc, mais veritablement les Capitaines dud. Marquis, & le peuple de lad. ville furent cause de son malheur plus que tous autres, tant ses fautes auoient attiré sur luy l'ire de Dieu: car ceux-là estoient ses creatures qu'il auoit eleuées de peu, & preferées à d'autres; & ceux-cy auoient esté mal-traitez de luy depuis la prise de ladite ville: de sorte que les vns par malice, & les autres par animosité coniurerent sa mort; & pour ce faire augmenterent tellement le soupçon que ledit Marquis auoit commencé à donner de luy audit Duc, par mécontentement, de la frequentation de luy & des siens auec ceux du party contraire,

que ledit Duc laissa aller à y remedier par l'enuie dudit Vis-Seneschal, accompagné dudit Lieutenant des Gardes, auquel il donna charge, estant en ladite ville, de faire tout ce qu'ils jugeroient estre necessaire pour la conseruer; & neantmoins ie croy certainement que ledit Marquis, comme ieune & mal-aduisé, vouloit plustost faire peur de luy audit Duc, afin de l'exciter de l'honorer de plus grande charge, que prendre le party de sa Majesté; joint que ledit Duc luy auoit promis de conferer avec ledit sieur de Longueuille: aussi n'a-t'on depuis sa mort peu rien faire prouuer contre luy qui ait peu condamner sa memoire d'infidelité, ny excuser les autres de ce marché, quelque diligence qu'on y aye faite; dont ie parle comme ce-luy qui a veu les depositions mesmes, & les informations qu'ils ont produites, lesquelles condamnent plustost les auteurs, qu'elles ne les déchargent. Mais l'heure dudit Marquis estoit arriuée: i'estois avec ledit Duc quand il en receut la nouuelle, de laquelle ie luy vis tomber les larmes des yeux; & s'il n'eust depuis donné la charge de la place audit Vis-Seneschal comme il fit, ou du moins qu'il n'eust mieux justifié en la justice l'acte qu'il auoit commis, il eust beaucoup fait pour sa reputation.

SON excuse estoit qu'il ne pouuoit aucunement se conseruer; ie croy qu'il s'en est repenty depuis assez de fois, tant pour le respect dudit Marquis, que pour la consequence d'un tel acte, que pour s'estre depuis ledit

Vis-Seneſchal monſtré plus affectionné aux-  
dits Eſpagnols qu'à luy : il ne faillit pas auſſi  
de ſe deffaire bien-toſt des Capitaines dudit  
Marquis qui l'auoient trahy , ne ſe pouuant  
fier en eux apres vn tel forfait , qui eſt le juſte  
payement qui eſt deu à telles perſonnes.

LE DIT Duc partant de Rheims alla ren-  
ter vne entrepriſe ſur Compiègne , qui ne  
reüſſit pas ; ce fut en la ville de la Fere , où il  
eſtablit ledit Vis-Seneſchal , de là il arriua  
à Amiens , où arriua Dom Diego d'Ibarra,  
pour reſider auprès de luy de la part du Roy  
d'Eſpagne. D'Amiens il fut contraint de  
courir à Roüen à cauſe de l'intelligence qui  
eſtoit entre le Comte de Tauanes qui y com-  
mandoit , & de Monſieur de Villars Gouver-  
neur du Havre , auquel il donna la charge  
du premier qu'il retira , & l'emmena avec  
luy fort à propos pour conſeruer ladite vil-  
le , comme il apparut depuis par les euene-  
mens : cela fait il donna iuſques à Pontoïſe  
pour executer vne autre entrepriſe ſur Man-  
te , qu'il faillit auſſi , & reprit le chemin de  
Beauuais , Amiens , & Peronne , pour gai-  
gner Ham ; d'autant que ſa Maieſté auoit  
aſſiégué Noyon , laquelle elle prit en peu de  
temps à la venü dudit Duc , & des forces  
eſtrangères que ledit Duc de Parme luy auoit  
laiſſée , leſquelles eſtoient commandées par  
le Prince d'Ascoli , aſſiſté dudit Diego d'I-  
barra , faiſant peu de compte des comman-  
demens dudit Duc , lequel ie ſuiuis en tout  
ce voyage , attendant le retour d'Eſpagne  
du Preſident Ianin en cette belle aſſemblée ,



sans laquelle ledit Duc protestoit tousiours ne pouuoir prendre party. Or ledit President Ianin arriua en la ville de Ham, où l'on sceut en mesme temps la nouuelle de la sortie & éuasion du Chasteau de Tours de Monsiennr le Duc de Guise, aduenue au iour de Nostre-Dame du mois d'Aoust, s'estant fait descendre & deualer avec vne corde par deux de ses gens, de la fenestre du grenier en bas, comme chacun disnoit en la ville & au Chasteau, & fut recueilly par le Trompette de Monsieur de la Chastre, qui l'attendoit hors le faux-bourg, d'où il fut conduit à Bourges. Cette nouuelle réjouit grandement les étrangers, lesquels en verité monstroient estre tres-mal satisfaits dudit Duc du Maine, partant luy desiroient moins d'autorité.

LE President Ianin auoit esté enuoyé en Espagne pour decouurir au vray l'intention du Roy Catholique sur les affaires de France, que Iean Baptiste de Tassis & Rossieux auoient celé audit Duc, comme ie vous ay cy-deuant dit. Ledit Duc persuadant tousiours que quand le Roy auroit esté bien informé de la verité des affaires, que non seulement il ne s'embarasseroit en la conqueste du Royaume, pour luy ny pour sa fille, comme aucuns disoient qu'il vouloit faire; mais aussi qu'ayant égard au pouuoir qu'il auroit au party, & à ses traualx & merites, il se foudroit à le fauoriser plustost que nul autre: & encore que ledit President ne se promist pas d'en rapporter contentement, comme celuy qui connoissoit bien la disposition des

choses : neantmoins pressé , voire forcé qu'il fut d'entreprendre ce voyage , il s'y resolut volontiers , esperant qu'il dissuaderoit le Roy Catholique du dessein susdit , ou bien qu'à son retour l'on traiteroit : & croy à la verité que l'intention dudit President estoit tres-bonne , & partant que le voyage estoit tres-necessaire ; toutefois il ne seruit ny à l'un ny à l'autre effet , tant il estoit difficile d'effacer des cœurs des Princes , les conceptions qu'ils affectionnoient. Car encore que ledit President se fust estudié de représenter au Roy de tres-grandes oppositions & difficultez qu'il rencontreroit à son dessein , tant de la part de sa Majesté que du party mesme duquel il vouloit s'aider , voire de toute la Chrestienté ; & sur'ce fit la chose comme impossible , en luy representant & faisant apres considerer les autres moyens qu'il auoit d'asseurer la Religion en ce Royaume , & le recompenser de ses peines & frais avec beaucoup moins de peril & dépens , & trop plus de gloire & d'aduantage pour luy , & pour le party : neantmoins au lieu de profiter il s'apperçeut qu'on se déffoit de luy , comme s'il eust proposé telles difficultez , exprés pour fauoriser ledit Duc , & non pour estre veritables & bien fondées. Quoy voyant , ie luy ay ouy dire qu'il fut contraint pour ne rompre & perdre du tout ledit Duc avec le Roy , ou reuenir sans resolution , de se laisser entendre à ses Ministres , & nonobstant ses raisons , ils vouloient traiter de leurs desseins : il estoit donc necessaire pour ne per-

dre la Religion, que tout ce qu'ils y employoient qu'ils l'entreprissent avant tant de forces & moyens; que tant par crainte & nécessité, que par force d'argent & bien-faits, ils en peussent venir à bout. Sur quoy ils résolurent, & l'assurerent qu'ils feroient incontinent entrer en ce Royaume deux puissantes armées, payées & accompagnées d'artillerie, viures, & autres munitions nécessaires & suffisantes pour reprendre & forcer les places de sa Majesté, & en mesme temps l'accumuler en quelque lieu avec son armée; dont l'une seroit commandée par ledit Duc du Maine, & l'autre par celuy de Parme, ou tel autre Chef que sa Majesté Catholique choisiroit, à la charge que l'on assembleroit les Etats du party en mesme temps, pour leur faire approuver le dessein dudit Roy, lequel leur seroit exposé par ses Ambassadeurs. Voila la substance de la réponse que rapportoit ledit President, lequel voulut voir ledit Duc de Parme deuant que d'entrer en ce Royaume, pour sçavoir au vray quel ordre & acheminement l'on auoit donné à ce que dessus, dont il luy donna plus d'assurance que depuis il n'en vit d'effet. Or si ledit President auoit esté deceu de son esperance enuers ledit Roy d'Espagne, il ne le fut moins à son retour, du fruit qu'il s'estoit promis de recueillir auprès dudit Duc. Car non seulement ne il Pébranla de l'opinion en laquelle il l'auoit laissé, mais ie sçay que ledit Duc se plaignoit qu'il ne l'auoit pas bien seruy en ce voyage; soit qu'il le creust ainsi en se flat-

tant luy-mesme, cu se laissant flatter ou abuser, ou bien qu'il fust marry que l'on sceust & connust que le Roy d'Espagne eust fait si peu de conte de luy, dont ie vis ledit President en peine, combien qu'il eust tousiours esté, & fust encore le plus affectionné, franc & digne seruiteur qu'eust ledit Duc, enuers lequel ie cuide bien que la nouuelle de la deliurance du Duc de Guise son nepveu rendoit encore ce déplaisir plus sensible. Or ie ferois tort audit President si i'obmettois à vous dire que passant par la ville de Marseille allant en Espagne, il fit vn tel deuoir & office enuers lesdits habitans de Marseille contre les menées du Duc de Sauoye qu'il y trouua, qu'il les renuersa entierement : car il esperoit s'en rendre maistre, & n'y auoit faute de partisans ; mais comme le peuple entendit que le Duc de Mayenne desiroit bien que le pais s'aidast du Duc de Sauoye contre les ennemis communs, mais non que ladite ville ny les autres se separassent du Royaume pour qui que ce fust, vn chacun s'en réjouit & prit bien-tost le party ; de sorte que ledit Duc de Sauoye s'embarqua avec ledit President pour aller en Espagne, où il reconnut comme fit ledit President, que l'on auoit aussi peu d'enueie qu'il deuinst maistre de la ville de Marseille que de la France ; soit que ledit Roy d'Espagne fist estat que ladite ville ne luy pouuoit échapper, avec le reste du Royaume, ou que l'accroissement de son gendre luy fust aussi suspect qu'aux autres : i'adiousteray encore icy que ledit Duc de Mayenne n'a ia-

mais desiré que l'autre prist pied au païs de Prouence, luy ayant dès le commencement refusé vn pouuoir pour y commander, qu'il a long-temps poursuiuy, & l'eust volontiers acheté & payé bien chèrement.

APRES la prise de la ville de Noyon le-  
dit Duc du Maine alla à Rheims, & de là en  
Lorraine, tant pour conferer avec ledit Duc  
des affaires publiques, & de ce que luy auoit  
rapporté d'Espagne ledit President Ianin,  
que pour receuoir des forces de cheual & de  
pied que le Pape Gregoire quatorzième en-  
uoyoit à son secours sous la charge de son  
nepueu, que l'on nommoit le Duc de Mon-  
temartiano : lescdites forces estoient compo-  
sées d'environ mil hommes de cheual, &  
quinze cens de pied Italiens, & quatre mil  
Suiſſes. La cauallerie estoit mieux en ordre  
que le reste. Mais apres auoir fait monstre &  
parade en l'armée dudit Duc, elle se défit in-  
continent, & ne seruit quasi de rien. C'estoit  
toutefois les forces avec lesquelles ils dis-  
couroient à Rome, que sa Majesté & ses ser-  
uiteurs donneroient bien-tost du nez en terre,  
& que les bulles & fulminations de sa Sain-  
teté, apportées & publiées par ledit Landria-  
no deuoient estre executées.

LE Roy receut au mesme temps l'armée  
d'Allemands que Monsieur le Vicomte de Tu-  
renne auoit leuée, & pour laquelle il l'auoit  
depesché l'année precedente, lors que sa Ma-  
jesté refusa la cessation d'armes que ie pour-  
suiuois. Elle estoit forte, principalement de  
cauallerie, avec laquelle sa Majesté yint cou-

rir iufques auprès de Verdun , où ledit Duc de Lorraine & du Maine eftoient venus avec lefdites forces de la Sainteté , & quelques autres du Païs-bas & de Luxembourg : cette courfe fut fans effet de remarque.

M O N S I E U R le Duc de Lorraine faisoit demonftration d'efre fort las de la guerre, & encore plus mal-content des Efpagnols : fon païs eftoit auffi merueilleufement ruiné, il parloit fouuent des moyens de pacifier le Royaume avec ledit Duc du Maine & nous, mais fans refolution ; feulemment ils promirent de ne traiter du general l'un fans l'autre. Et d'autant que le Roy d'Efpagne auoit remis au Duc de Parme l'accord & refolution de toutes chofes , & que l'on eftimoit qu'il entreroit bien-toft en France , Monsieur de Lorraine enuoya avec Monsieur de Mayenne Monsieur le Comte de Vaudemont fon fils, accompagné du fieur de Baffompierre , pour affifter à la negociation que l'on pretendoit faire avec luy , comme il difoit , en intention d'accorder ce que le Roy d'Efpagne defiroit, mais feulemment d'entendre la propofition & les conditions d'icelle : car ledit Duc de Lorraine faisoit demonftration d'efre fort contraire à ce deffein , & ne le pouoit goûter aucunement ; neantmoins il fouftenoit toujours n'y auoir moyen de traiter avec fa Majesté tant qu'elle feroit de contraire Religion, & eftoit bien empêché d'en trouuer vn bon entre ces deux extremitez.

S I - T O S T que la Majesté fe fut retirée du costé de Sedan , où elle fit le mariage de

Monſieur de Turenne avec l'heritiere de la maiſon , ledit Duc du Maine entra en France , & ſe vint rendre à Montcornet , paſſant par Retel , où arriua ledit Duc de Guiſe, accompagné de Monſieur de la Châtre , & de peu de Nobleſſe au regard de ce que l'on en eſperoit.

LA deliurance de ce Prince auoit émeu les cœurs , & releué l'eſperance des zelez , leſquels jettoient incontinent le principal fondement ſur luy , comme gens qui ſe laſſoient dudit Duc de Mayenne , ſe promettant tout ce qu'ils deſiroient , tout ainſi que s'ils euſſent pû & deu diſpoſer des volontez des plus grands Princes , & les ranger à leurs opinions, tant leur ignorance eſtoit profonde, & leur preſomption extrême , comme ſceut fort bien remarquer ledit ſieur de la Châtre : de ſorte qu'ils ne parloient plus dudit Duc qu'en dédain, choſe qui n'eſtoit deſagréable à ceux qui deſiroient la paix : car ils eſperoient que leur insolence , iointe au peu de conte que leſdits Eſpagnols faiſoient de luy , & au mécontentement qu'ils auoient du ſucces du voyage dudit ſieur Ianin : Enfin ils luy ouuroidient les yeux , & le feroient reſoudre de ſortir des mains des vns & des autres. Sur cela Boucher Docteur en Theologie , le ſieur de Maſparault & Senault arriuerent audit lieu de Retel , enuoyez par ceux de Paris avec des cahiers & demandes , qui preſuppoſoient déjà quelque changement ou malheur en ladite ville : car ils parloient inſolamment , ſe plaignans de ce qu'on leur auoit

osté le conseil de l'Union & le seau, dont sous main ils accusoient ledit Duc, & publiquement blâmerent ceux qui l'assistoient, au nombre desquels ie n'estois pas épargné, ny ledit sieur President Ianin qui eut de grandes paroles avec eux. A la fin ie fus appelé à la resolution de leurs demandes, où l'on eut assez de peine à les contenter : ils estoient couuertement supportez des Espagnols, & sur tout dudit Dom Diego d'Ibarra; neantmoins ils ne rapporterent que des réponses generales, aussi ne leur en pouuoit-on donner d'autres sans faire tort au public, & sur tout à l'autorité dudit Duc, dont toutefois ils firent contenance d'estre aucunement satisfaits : mais l'on apperceut bien-tost apres qu'ils dissimuloient, voire qu'ils couuoient quelque méchef : car Messieurs Brisson President, l'Archer Conseiller au Parlement, & Tardif Conseiller du Chastelet, furent pendus par ceux de leur caballe. Comme lesdits Boucher & Senault estoient près de ladite ville, ledit sieur de Masparault estant demeuré près dudit Duc, l'on dit que leur dessein estoit de changer & cribler le Parlement, & le dresser à leur mode, pour apres disposer du nom & de l'autorité diceluy contre ledit Duc du Maine, & mesme faire reuoker son pouuoir à l'arriuéee en France du Duc du Parme, & apres chercher vn Roy à leur poste, dont ledit Duc de Mayenne eut le vent ; ce qui le fit resoudre d'accourir en la ville pour chastier les mutins, & renuerfer leurs desseins. Il estoit à Laon quand il sceut cette



nouvelle, dont il fut fort troublé, il avoit laissé l'armée audit Montcornet, & encore que ce coup l'eust picqué jusques au vif pour les susdites causes, son esprit fut agité de diverses considerations, & le vit-on en branle de ne passer outre; mais enfin il fut emporté de l'enormité du fait, de l'apprehension de son particulier, & des avis que Madame de Montpensier, & Monsieur de Bélin luy donnerent, par lesquels ils luy manderent qu' allant à Paris, non seulement il puniroit les coupables, mais aussi assureroit du tout à sa deuotion ladite ville, comme il aduint. Car il fit prendre & chastier ceux qu'il voulut, s'empara de la Bastille, où le Procureur le Clerc, dit Buffy, qui a tant mal-heureusement fait parler de luy, commandoit; & punit tellement la grandeur & enormité de ce forfait, que chacun aduoioit qu'il estoit loüé, honoré, craint, & aimé des Principaux Citoyens & Bourgeois: mais aussi ce ne fut sans estre detesté & maudit par ledit Dom Diego d'Ibarra, lequel estoit audit Montcornet, quand ledit Duc partit de Laon pour venir à Paris, qui le suiuit neantmoins en telle diligence, sçachant sa resolution, & le joignit entre Meaux & ladite Ville, en laquelle il entra avec luy; il estoit vne grande partie des habitans sortis au deuant de luy, lesquels à leur contenance monstroient estre tres-aises de sa venue, esperans qu'il feroit punir les auteurs de ce fait, qui avoit remply la ville de crainte & de deuil. Mais ces faulx furent si effrontez qu'ils vindrent en

corps à pied au deuant de luy iufques à faint Anthoine des Champs, ayans les viſages rians & aſſeurez comme meurtriers, leſquels deuant ſa venuë auoient eſté ſi impudens que de ſe preſenter à Meſdames de Nemours & de Montpenſier, & à ceux du Conſeil dudit Duc qui eſtoient en la ville pour leur faire aduoüer ce bel exploit, que ledit Dom Diego excuſoit tant qu'il pouuoit, preſſant & importunant ledit Duc, & ceux qui l'afſiſtoient d'en faire de meſme : mais il n'y gaigna rien, car ledit Duc en fit prendre quatre, leſquels furent pendus & étranglez dans la ſalle baſſe du Louure. Cette execution fut faite ſans forme ny ordre de Juſtice, contre mon aduiſ : car ie deſirois que la Cour les jugeaſt, & que la punition en fuſt publique, pour ſeruir d'exemples aux autres : mais d'autres jugerent plus à propos d'en vſer autrement, à cauſe que le Parlement eſtoit la partie offenſée, qui eſtoit encore ſi effarouchée que difficilement elle les condamneroit ; que l'enormité du fait requeroit vne prompte & extraordinaire punition, & que les priſonniers eſtoient reconnus auteurs & conuaincus d'icelle ; jonit que l'on ne vouloit à la verité en tout tant authoriſer le Parlement, parce que ledit Duc ne ſe fioit pas trop d'iceluy, ny approfondir le fait iufques au bout, pour n'eſtre pas contraint d'en chaſtier plus grand nombre, ny manifefter dauantage la cauſe de ſon courroux, ledit Buſſy encore qu'il fuſt plus coupable que les autres, en fut quitte pour la Baſtille, qu'il

remit entre les mains dudit Duc , lequel pardonna aussi aux autres , lesquels l'ont depuis reconnu , comme sont coustumiers de faire ceux que l'on tire du gibet contre raison, car ils n'ont cessé de le persecuter secrettement & publiquement : sauuer aussi la vie à vn mal-faïcteur, c'est l'oster à plusieurs gens de bien, & offenser Dieu & le public,

A P R E S cette execution ie me retiray à Pontoise , voyant que ledit Duc retournoit en l'armée y attendre ledit Duc de Parme, pour aller secourir la ville de Roüen que sa Majesté tenoit assiegée.

P R E N A N T congé de luy il me pria asseurer ceux que ie verrois, qu'il estoit le plus affectionné & disposé à la paix , & certes ie le croyois : car il me sembloit qu'il en auoit plus grande occasion que iamais, voyant que l'on l'auoit voulu des-authoriser à Paris , & que tous les factieux auoient les yeux tournez sur Monsieur son nepueu ; toutefois comme il auoit lors l'esprit du tout bandé à secourir ladite ville de Roüen pour la consequence d'icelle , il me dit qu'il ne vouloit rien faire qui peust seruir d'excuse audit Duc de Parme de le retarder , connoissant n'y pouoir paruenir sans luy , & que l'autre n'y procedoit desia que trop lentement , ioint qu'estant ledit Duc de Guise demeuré en l'armée, il craignoit offenser dauantage lesdits Espagnols , & qu'ils ne l'authorisassent à ses dépens ; partant il ne donna charge aucune de rechercher ladite paix , ains seulement asseurer vn chacun en termès generaux de sa bon-

ne volonte, comme i'ay dit.

O R Monsieur, vous devez sçauoir que l'Abbé de Chefy ayant esté pris prisonnier par la garnison de Meaux, retournant d'Alincour en son Abbaye, qui est près de Chasteau-Thierry; encores qu'il eust vn passe-port du-dit Duc, que ie luy auois fait donner, il estoit pretendu par ceux qui le tenoient, de bonne prise, & craignant qu'ils le traittassent mal, le fis enuoyer à Montcornet, où discourant avec luy des affaires publiques, ie luy dis le regret que i'auois du peu de conte que l'on faisoit de la paix de part & d'autre; que les Grands qui estoient auprès du Roy se deuoient eschauffer plus qu'ils ne faisoient, & mesmes les Princes du Sang, lesquels perdoient plus que nuls autres à cette guerre apres le Roy: Car encores qu'ils fussent Catholiques ils deuoient croire qu'aduenant le succès de sa Majesté, ils seroient aussi peu reconnus de la Ligue qu'elle, d'autant que les Chefs de la Ligue auoient plus d'enuie de faire leurs affaires que celles d'autrui, & que quand tels morceaux tomberoient entre les Princes armez, ils suiuroient plutôt leur appetit que la raison: que si ie voyois Monsieur le Cardinal de Bourbon ie luy en dirois franchement mon aduis, & qu'un tel ceuvre qui estoit plus difficile & important à la Religion, & mesmes à leur maison qu'oncques se fust présenté deuoit estre entrepris par personne de grande autorité si l'on vouloit qu'il reussist: & les autres s'y morfondoyent, comme il estoit aduenu à ceux qui s'en estoient

mélez comme moy iusques alors; toutefois que ie m'y r'embarquerois encores tres-volontiers, comme i'estimerois que feroit de nostre costé Monsieur le President Ianin, & ledit sieur de Videuille, si ledit sieur Cardinal l'entreprenoit, parce que nous croyons qu'il desiroit le bien, & qu'il ne s'y embarqueroit qu'à bonnes enseignes, & que sa Majesté respecteroit son entremise plus que nul autre, dont ie priois d'aduertir ledit sieur Cardinal au plütoft, d'autant que ie craignois que l'on prist quelque resolution à la venue dudit Duc de Parme qui nous rendist irreconciliables pour iamais: ce que ledit sieur de Chesy fit, quand il fut retourné en son Abbaye par vn de ses gens: car il n'y pouuoit aller à cause du danger des chemins par lequel ledit sieur Cardinal le renuoya, & m'écriuis sur cette occasion de l'aller trouuer à Humieres où il estoit lors, & receus la lettre quelques iours apres estre arriué à Pontoise: me mandant que sa Majesté, à laquelle il auoit fait sçauoir l'aduis que luy auoit donné ledit sieur de Chesy, trouuoit bon qu'il me vist; toutefois ie m'en excusay, d'autant que ledit Duc du Maine, lequel estoit desia party de Paris pour retourner au camp, ne m'auoit promis de ce faire, ny donné pouuoir de conferer ny traiter de ladite paix à personne, comme ie vous ay dit cy-deuant; de sorte que ie craignois, y allant de moy-mesme, le faire inutilement, & luy preiudicier, à cause de la ialousie desdits Espagnols, & du siege de Roüen. Mais ledit seigneur Cardinal m'enuoya Monsieur

de Bellosane à ma priere, auquel ie dis les propos que i'auois tenus audit Abbé de Chesny, les raisons qui m'auoient meu, l'assurance que ledit Duc m'auoit donné de sa bonne volonté, les raisons d'icelle, fondées principalement sur le mécontentement desdits Espagnols, & sur la jalousie de son nepueu; mais qu'il estoit necessaire de sçauoir au vray si sa Majesté vouloit estre Catholique deuant qu'entrer en matiere, parce que ie sçauois que ledit Duc ne traiteroit iamais avec elle tant qu'elle perseuereroit en la Religion. Que i'auois desiré voir Monsieur le Cardinal pour estre éclaircy de ce poinct, croyant qu'il sçeuist mieux l'intention de sa Majesté que personne, & sur ce l'implorer d'employer son credit enuers elle pour aduancer vn si bon œuvre; & si cette difficulté ne pouuoit estre surmontée, aduiser par quels moyens l'on pourroit faire cesser la guerre, d'autant qu'elle continuant, le Royaume courroit fortune de changer de main, & la Religion de se perdre, luy disant sur cela le dessein des Espagnols, les menées qu'ils faisoient en ce Royaume, & l'estat qu'ils faisoient d'y estre assistez de sa Saincteté; dont ledit de Bellosane me dit qu'il aduertiroit ledit sieur Cardinal de mon affection & droite intention à la conseruation de la Religion & du Royaume: il me donna assurance en partant, qu'il ne falloit point douter qu'il ne desirast employer tout son credit enuers sa Majesté pour aduancer sa conseruation, de laquelle elle luy auoit donné souuent bonne esperance, joint qu'il connoissoit

connoissoit certainement n'y auoir autre moyen de conseruer la Religion & le Royaume en leur entier que celuy-là. I'écriuis ces propos audit sieur Ianin, comme à celuy que ie sçauois desirer pour rechercher les moyens de renuerfer les desseins desdits Espagnols; toutefois ie reconnus par sa réponse, qu'il auoit si mauuaise opinion de la conuersion du Roy, qu'il estimoit estre plus à propos de traiter avec ledit Cardinal qu'avec sa Majesté, si l'on ne le pouoit separer d'elle avec les Catholiques qui l'assistoient, remonstrant que par ce moyen l'on n'auroit que faire desdits estrangers pour deffendre la Religion, & partant qu'ils ne ruineroient l'Estat comme ils auoient deliberé, croyant que ce chemin étoit plus court & plus seur que celuy de la conuersion de sa Majesté.

TOUTEFOIS comme il nous conduisoit à la paix, de mesme ie ne pouuois esperer que ledit sieur Cardinal ny lesdits Catholiques quittassent sa Majesté, qu'ils ne fussent au moins éconduits & desesperez de sa conuersion, & que ledit President me prioit seulement de fonder sur ce l'intention dudit sieur Cardinal, sans m'asseurer que ledit Duc fust bien resolu de traiter avec luy. Je m'aduifay de proposer vne trêue, durant laquelle l'on pourroit conferer avec lesdits Catholiques du party de sa Majesté, des moyens d'asseurer la Religion & l'Estat, & enuoyer deuers sa Sainteté pour sçauoir son intention sur la conuersion de sa Majesté, esperant qu'en gaignant le temps l'on arresteroit le cours des menées

desdits Espagnols, & qu'il n'esperoit autre remede à nos maux. Mais ledit sieur President Ianin me manda par sa réponse, que cette voye estoit trop longue & incertaine, parce que de part & d'autre l'on ne vouloit parler de trêve; que le saint Siege estoit vacquant, & qu'il ne falloit esperer que le Pape qui seroit, fust moins contraire à sa Majesté que les precedens, ny que les Espagnols cessassent leurs pratiques, quoy que l'on fust, mesmes quand sa Majesté changeroit de Religion; joint que ledit Duc ne pouuoit consentir qu'on traitast en son nom avec sa Majesté tant elle seroit de contraire Religion, & qu'il n'en eust conferé avec ceux du party, comme il auoit tousiours déclaré: au moyen dequoy il persistoit à dire qu'on traitast avec ledit sieur Cardinal de Bourbon, pour renuerfer les desseins desdits Espagnols, qui aspirans maintenant ouuertement à la Couronne, preissoient merueilleusement ledit Duc de traiter avec eux, ne voulans secourir Roüen qu'il ne leur promist faire élire leur Infante, comme ceux qui vouloient profiter de la necessité publique, & partant traitoient ledit Duc indignement: Toutefois qu'il s'en estoit deffendu iusques alors, mais il estoit à craindre qu'à la longue il ne se laissast emporter: de sorte qu'il estoit necessaire de mettre promptement en jeu ledit sieur Cardinal ou quelque autre Prince de la maison Catholique, encore que l'Euesque de Plaisance Landriano, Nonce du feu Pape, & les Deputez des Estats, estans arriuez, ayant le vent de ce Conseil, fu-



rent si insensez que de le blasmer ; toutefois ils estimoient qu'estant conclud & effectué, chacun l'approuveroit par amour ou par force, tant il seroit trouué & iugé vtile, pourueu que ce Prince Catholique fust aussi suiuy des Catholiques & des Villes principales, & que reconnoissant sa Majesté, me prioit d'entreprendre & poursuiure viuement ce traité, sans m'arrester à sa Majesté, si promptement elle ne quittoit sa Religion à la requeste de ceux qui la seruoient, & ne s'attendre plus d'estre conuié dudit Duc, car il en estoit plus éloigné que iamais ; mais si sa Majesté vouloit prendre cette resolution, ledit Duc donneroit sa foy à tel Prince Catholique qui seroit choisi auprès de sa Majesté, tel que pourroit estre Monsieur le Duc de Nevers, de la reconnoistre avec tous ceux du party qui le voudroient suiure incontinent apres sa conuersion, & pouruoyant aussi aux seuretez de la Religion & de sa maison à conditions raisonnables. Cette réponse m'empescha grandement, voyant d'un costé en quels termes estoient les Espagnols avec ledit Duc, & de l'autre que l'on demandoit vne parole d'assurance du Roy de sa conuersion, comme ie faisois grande difficulté qu'il voulust donner, & que l'on me prioit & pressoit sur cela de rechercher Monsieur le Cardinal de Bourbon & traiter avec luy ; estant incertain comme i'estois de son pouuoir, non moins que de son vouloir ; joint que ie scauois que ledit Duc s'estoit tousiours montré fort peu affectionné à ce party, de sorte que

ie faisois conscience de m'y embarquer, & d'y plonger ledit sieur Cardinal, attribuant ce conseil & mandement audit President Ianin pluſtoſt qu'à la volonté dudit Duc; au moyen dequoy ie me contentay de faire ſçauoir audit ſieur Cardinal ce que l'on deſiroit de ſa Maieſté ſur ſa conuerſion. & à ſon refus l'enueie qu'on auoit de traiter avec luy; mais ce ne fut ſans luy en mander mon opinion, afin qu'il priſt garde à luy, & n'eust occaſion de ſe plaindre de moy à l'aduenir, comme pourra touſiours témoigner ledit Abbé de Belloſane, lequel combien qu'il cherchaſt tous moyens d'auancer la grandeur de ſon Maître faiſoit pareil jugement que moy de cette ouuerture.

MADAME de Longueuille fut lors miſe en liberté avec Madame ſa belle fille, & Meſdamoifelles ſes filles, par le moyen dudit Duc du Maine, lequel fut en cela trauerſé de pluſieurs; de ſorte que ladite Dame qui s'attendoit d'en eſtre quitte pour vingt-cinq ou trente mil eſcus, à quoy du commencement elle auoit eſté taxée, ſous pretexte d'aider à payer la rançon de Monsieur d'Elbœuf detenu priſonnier à Loches par Monsieur d'Efpernon, fut contrainte de s'obliger encore pour pareille ſomme, moyennant certaine promeſſe que luy fit ledit Duc, ſans lequel elle n'eust encore eſté quitte à ſi bon marché. Elle auoit eſté arreſtée en la ville d'Amiens apres la mort de Monsieur de Guiſe, avec ſa fille, & Monsieur le Comte de ſaint Pol ſon ſecond fils, lequel depuis s'é-

toit sauué, comme elle mesme auoit eue-  
nie de faire par deux fois, & auoit esté trai-  
tée tres-indignement durant sa prison, de  
laquelle elle n'eust esté encore déliurée sans  
l'euation de Monsieur de Guise; car on disoit  
qu'elle estoit retenuë pour luy. Cette Prin-  
cesse n'auoit iamais fait mal ne déplaisir à  
personne, estant innocente de tout ce qui  
estoit aduenü à Blois, & n'estant venuë en  
Picardie que pour accompagner Monsieur de  
Longueuille son fils qui en estoit Gouver-  
neur, sans penser à autre chose qu'à faire  
plaisir à ceux du païs; neantmoins elle n'a-  
uoit pû éviter le mal-heur commun, qui  
luy auoit esté d'autant plus grief qu'elle sca-  
uoit ne l'auoir meritë, & que Monsieur son  
fils faisoit la guerre au païs pour sa Majesté:  
mais i'ay souuent admiré la constance avec  
laquelle madite Dame la Duchesse, sa belle  
fille, & Mesdamoiselles ses filles auoient  
supporté leur captiuité; certes si ie ne l'eusse  
veu, ie ne l'eusse pû croire, & puis dire que  
rien ne les auoit tant trauaillées durant icel-  
les, que l'ennuy de Madame leur mere; &  
que tout autre sorte de peril & d'afflictions  
n'auoient seulement pû ébranler leur coura-  
ge, ny leur faire changer de contenance & de  
langage.

COMME cecy se manioit, mon pere  
m'enuoya vne lettre du sieur de Bussy, par  
laquelle il luy mandoit que l'on ne trouuoit  
pas bon que ie traitasse de la paix avec ledit  
de Bellosane, & que si i'auois charge de ne-  
gociier ie m'adressasse droit à sa Majesté, la-

quelle m'oïroit volontiers. Je répondis que ledit Abbé m'auoit dit estre venu parler à moy par la permission de sa Majesté, & que mondit sieur le Cardinal ne faudroit de luy rendre compte de nostre conference; que ie n'auois aucune charge de negocier avec sa Majesté, mais que ie ne me pouuois garder de rechercher la paix pour l'affection que ie portois au Royaume, que la guerre à la longue diuiseroit en plusieurs pieces, comme i'auois dit audit sieur de Bellosane, avec mon aduis, du chemin qu'il falloit tenir pour y remedier, duquel i'estois prest encore à communiquer avec tel autre que sa Majesté ordonneroit, & que i'estois bien marry n'auoir moyen de mieux faire; mais que puis que sa M. ne l'auoit à gré, ie ne passerois plus outre. Ledit sieur de Bussy repliqua qu'il n'étoit ja besoin que personne parlât à moy de la part de sa Majesté, puis que ie n'auois charge de traiter.

T O U T E F O I S quelques iours apres le sieur du Plessis frere dudit sieur de Bussy, estant venu au camp à Mante, manda le sieur de Fleury mon beau-frere, qui estoit arriué fraichement à Alincour, auquel il dit la bonne volonté de sa Majesté à la paix, & que si ie pouuois auoir charge de Monsieur du Maine d'en traiter avec luy; il estimoit qu'estans ensemble nous ferions quelque chose de bon, dont ie le priay de m'aduertir, comme il fit, & moy ledit Duc dès le lendemain par vn trompette exprés.

D E S I A l'armée Espagnole commandée

par le Duc de Parme, estoit entrée en ce Royaume pour secourir la ville de Roüen, & auoit esté contraint sa Majesté, laquelle s'étoit acheminée au deuant avec sa Caualerie seulement, de quitter le logis d'Aumalle; où elle auoit esté blessée, & auoit aussi pris Neuf-Chastel; & tellement encouragé les assiegez, qu'ils auroient renuersé les tranchées de l'armée de sa Majesté, & gaigné quelques pieces d'artillerie, y commandant feu Monsieur le Marechal de Biron: surquoy ledit Duc de Parme s'estoit retiré iusques à Abbeuille, faisant contenance de vouloir assieger Dieppe, comme si ladite ville de Roüen ne deuoit plus auoir besoin de luy; mais exprés pour attendre quelque renfort & enuoyer vers l'armée de sa Majesté, en laquelle il estimoit que les François ne demeureroient quand ils verroient que l'occasion de combattre seroit passée. Ce n'est vne des moindres parties d'un Capitaine de sçauoir prendre aduantage, & ménager ceux qui luy arriuent, & executer ce qu'il entreprend. Ledit Duc de Parme estoit en cela tres-diligent & soigneux, comme sont ordinairement les vieux & experimentez Capitaines; de sorte qu'ils s'étudient plus à éuiter & refroidir l'ardeur & furie de nos François, qu'à les surmonter; comme il fit paroistre deuant la ville de Cambray, quand Monseigneur Frere du Roy la secourut, mais non si heureusement qu'aux deux voyages de France: car au premier il en perdit ledit Cambray tout à fait, avec le temps qu'il y auoit employé deuant, & aux deux autres il

saoua les villes de Paris & de Roüen à point nommé.

I E croy bien que ce bon succez de Roüen fut cause en partie de la recherche que fit lors ledit sieur du Plessis , m'estant apparu souuent tels conseils estre nez de pareille occasion, dont sa Majesté n'estoit pas mieux seruie : car ce qui se fait hors du temps , comme en aduersité ; est attribuée à vne impuissance & necessité , plütoft qu'à prudence & bonne volonté , & partant n'est iamais si honorable ny vtile ; toutefois ledit Duc du Maine estoit lors si mal-mené des Espagnols , lesquels le pressoient plus que iamais de promettre la Couronne à leur Infante , & si incommodé de sa personne à cause de son indisposition, qu'il me manda de bouche par mon fils , & depuis par lettre écrite par ledit President Ianin , que luy & les Princes & Seigneurs qui estoient avec luy , estoient disposez de reconnoistre le Roy , & traiter avec luy s'il vouloit estre Catholique , affermer la Religion & le party, & y proceder de bonne foy sans déguisement ; mais qu'il ne le pouuoit prier ny requerir par écrit public de ce faire , de peur que les Espagnols sous ce pretexte, ne se faüssent à l'instant de plusieurs bonnes villes , esquelles ils auoient de grandes intelligences & pratiques , à quoy l'on pouuoit mieux remedier si rien n'en estoit sceu iusques à l'entiere resolution , outre plusieurs autres considerations qui se remettoient deuant les yeux assez conuüs d'un chacun ; adjoustans estre l'office des Princes qui estoient auprès de sa Majesté de faire cette

pour suite , & de l'éclaircir de son intention, offrant de donner toute l'assurance qu'ils pourroient desirer , & reconnoistre sadite Majesté se faisant Catholique , me priant de conferer avec Monsieur de Neuers ou autre ayant pouuoir , & qu'ils en donneroient leur foy , pourueu que dans peu de iours ils en eussent la resolution , ou bien de traiter avec vn Prince de la maison de Bourbon , si ledit Roy persistoit en son erreur: par la même lettre ledit President m'aduertissoit de la promotion au Pontificat de la personne du Cardinal Aldobrandin Florentin , de la prudence duquel il disoit que l'on pouuoit attendre vn grand secours pour la pacification de nos troubles : toutefois il protestoit que nostre mal ne pouuoit plus attendre son remede, parce que les Espagnols pressoient merueilleusement ledit Duc & les autres Princes & Seigneurs qui estoient avec luy de leur dire la resolution auant que de se separer , & qu'il estoit à craindre estant separez que chacun traitast à part avec eux aux conditions qui regardoient le profit particulier & la ruine publique , proposant sur ce vne surseance d'armes pour cinq ou six mois , afin d'obuiuer à tous inconueniens.

Cette lettre fut écrite par ledit President Ianin au commencement du mois de Mars, & deuant qu'il eust receu celle par laquelle ie luy auois donné aduis des propos que ledit sieur du Plessis auoit tenus à mon beau-frere: il m'enuoya aussi certains articles d'un traité que ledit Duc de Mayenne auoit déjà fait

proposer ausdits Espagnols , dont ie fus en grand'peine , encore que ledit President me mandast qu'ils n'auoient esté mis en auant que pour les auancer. Car par iceux on s'obligcoit d'élire leur Infante à certaines conditions du tout indignes de nostre nation ; & de trop foible & debile étoffe pour soustenir vn tel bastiment, dont ie fusse party à l'heure mesme pour aller dire mon aduis audit Duc, comme'il m'en pressoit, sans l'esperance que i'auois de voir ledit sieur du Pleffis. Partant ie me contentay de récrire audit President, lequel estoit tousiours tres-contraire au dessein desdits Espagnols , & croy qu'il ne faisoit rien en cela qu'à bonne fin.

M O N S I E U R , iamais negociation ne fut plus difficile à enfourner que celle-cy de la paix , car chacun disoit la vouloir , mais personne ne vouloit faire ce qui estoit necessaire pour y paruenir : le Roy faisoit difficulté d'asseurer sa conuersion , & ledit Duc de traiter avec luy sans cette assurance , c'étoit mettre sa Maïesté en peine , voire l'offenser que de s'adresser aux Catholiques qui le suiuiotent , & pour ce poinct , parce que sa Majesté ne vouloit estre par eux pressée ny contrainte en sa conscience , de crainte que son refus les débauchast & refroidist de son seruice , & ceux de sa Religion deffendoient ou excusoient plustost cette difficulté, qu'ils ne vouloient aider à la surmonter ; & n'y auoit pas moins de peine à persuader ledit Duc de se départir de cette demande , & se contenter de semondre sa Majesté de ladite



conuerſion , ou de remettre le tout au Pape, & cependant entrer en traité avec ſa Maieſté pour déliurer le Royaume des eſtrangers & de la guerre ; cela eſtoit cauſe qu'aucuns iettoient les yeux ſur les autres Princes de ladite maiſon de Bourbon , comme vn moyen tres propre entre ces deux difficultez, pour ſauuer la Religion & l'Eſtat , & que d'autres excuſoient aucunement ceux qui en vouloient prendre vn de la maiſon de Lorraine ou vn eſtranger. Mais tout bien conſideré l'on trouuoit autant ou plus de peril en ces deux derniers chemins qu'au premier , où ſouuent les deſeſperez tendent ; l'on abandonnoit au temps & à la fortune , ou pour micux dire au bon vouloir de Dieu , le ſuccés des affaires.

M E trouuant en cette perplexité il aduint deuant le retour du Trompette , par lequel i'auois enuoyé audit Preſident la depeſche qui faiſoit mention du ſieur du Pleſſis , que le ſieur de Lomenie auoit eſté pris & amené à Pontoife où i'eſtois ; & comme ie ſçauois qu'il approchoit de ſa Maieſté, ie luy voulois bien dire la peine en laquelle i'eſtois de la poursuite des Eſpagnols , & qu'il n'y auoit plus perſonne qui y peult remedier que ſa Maieſté, parce qu'on m'auoit écrit que ſ'il luy plaiſoit aſſeurer ſa conuerſion , il y auroit moyen d'aſſeurer ſa reconnoiſſance , comme ie m'offrois de faire plus particulierement entendre à Monſieur le Duc de Neuers en la preſence de Monſieur le Cardinal de Gondy, ſi ſa Maieſté l'auoit agreable, leſquels i'eſtimois deſirer le repos du Royaume, & y pou-

uoient grandement, mesmes à cause du credit que leurs parens auoient avec Monsieur le Duc de Florence, lequel l'on disoit deuoir auoir grande part auprès du nouveau Pape, sans l'aide duquel ie connoissois estre quasi impossible de composer les affaires, tant elles estoient embarassées & trauersées desdits Espagnols, & de leurs adherans : dequoy ie le priay d'aduertir sa Maiesté, parce que ie ne scauois s'il me seroit permis de voir ledit sieur du Plessis, à cause de sa Religion, & craignois que le mal deuinst cependant incurable.

SUR ce propos sa Majesté depescha incontinent le sieur de la Verriere audit sieur Cardinal & à moy, pour nous faire aboucher, sans parler de Monsieur de Nemours, nous donnant esperance d'embrasser les conseils qui luy seroient donnez, par lesquels elle luy pourroit avec honneur satisfaire au desir des Catholiques, & s'aider de l'autorité & puissance de sa Saincteté en cette occasion. Quant & quant sa Maiesté manda audit sieur du Plessis de ne se mettre en peine de conférer avec moy, pource qu'elle auoit aduisé d'en donner la charge audit sieur Cardinal, suivant ce que ie luy auois mandé par ledit sieur de Lorraine, dont il ne fut pas contant, craignant que ie refusasse de traiter avec luy, ou que d'autres eussent dégousté sa Majesté de l'employer en cette negociation : car à la verité plusieurs Catholiques en murmuroient, mais la difficulté ne procedoit de luy ny de moy, qui scauoit combien il importoit de negocier plustost avec personnes confidentes,

qu'avec d'autres, comme ie luy fis sçauoir par celuy qui m'auoit aduerty de son mécontentement, & ie n'attendois que la réponse dudit Duc pour m'en resoudre.

Mais ie fus cependant à Noisi, où estoit ledit Cardinal de Gondy, duquel i'appris la charge que sa Majesté auoit donnée audit sieur de la Verriere, & le fondement d'icelle; surquoy ledit sieur Cardinal & moy aduifames de faire proposer à sa Majesté qu'elle deuoit asseurer son intention à la Religion Catholique dedans vn temps prefix, afin de leuer l'opinion que plusieurs auoient qu'elle ne la mettoit en auant que pour amuser le monde: qu'elle declarast aussi son intention estre de se reünir à l'Eglise Catholique par le moyen de ladite instruction, & eust agreable que les Catholiques qui l'assistoient enuoyassent deuers le Pape pour estre secouru de son bon conseil & autorité en ladite instruction; & cependant qu'il fust aduisé secretement aux moyens d'asseurer la Religion Catholique, & les Communautéz du party de la Ligue pour en vser, soit apres ladite conuersion ou deuant, si l'on iugeoit qu'il fust besoin, pour descharger tant plustost le Royaume du fardeau de la guerre, par vne surseance d'armes ou autrement. Ledit de la Verriere porta à sa Majesté cette ouuerture, & i'en donnay aduis audit Duc du Maine par vn homme exprés.

A mon retour à Pontoise ie trouuay mon Trompette avec la réponse dudit Duc, sur l'aduis que ie luy auois donné dudit sieur du

Plessis, par laquelle non seulement il me promettoit de voir & conferer avec luy ; mais aussi l'asseurer qu'il estoit prest de reconnoistre sa Majesté, & faire faire le semblable par ceux sur lesquels il auoit le pouuoir, si elle vouloit donner assurance de se faire Catholique apres son instruction, offrant en ce cas de me donner pouuoir dès à present de traiter des conditions, & d'en tomber d'accord pour les obseruer, & accomplir de bonne foy apres sa conuersion, & mesmes s'employer sous main enuers sa Saincteté pour la faciliter, suiuant ce qu'il m'auoit mandé & prié de dire ; en quoy il persistoit avec ses amis, encore que le sieur de Giury eust depuis fait sçauoir à Monsieur de la Chastre sur ce qu'il l'auoit prié de l'éclaircir, si sa Majesté changeoit de Religion, luy offrant en ce cas de la reconnoistre; qu'il ne s'y falloit pas attendre, & que sa Majesté vouloit estre reconnuë, & apres se faire instruire. Ce que ledit President me manda auoit fort refroidy nos Princes ; toutefois il esperoit que sa Majesté se reduiroit, ou croyoit qu'il n'auoit dit son secret audit sieur de Giury ; sur tout ledit President me recommandoit de la part dud. Duc, le secret de cette entreueuë & negociation pour les raisons susdites, & pource que i'auois demandé vne lettre écrite de la main dudit Duc pour ma descharge, il me promettoit par la sienne de me l'enuoyer, comme il fit, & la receus depuis par les mains dudit sieur de la Chastre.

Monsieur le Duc de Neuers qui auoit de-

siré & failly de me voir allant à Compiègne, me faisoit écrire tous les iours qu'il n'y faudroit s'en retournant, me pria de m'y disposer, m'assurant que nostre entreueüe ne seroit inutile au public, & me mandoit que vous y assisteriez, ensemble Messieurs le Cardinal de Gondy, l'Euesque du Mans, & de Ramboüillet, & croy qu'il faisoit estat que ce seroit en vostre maison, dont ie me réjouïssois, ne pouuant esperer que tout bien d'une telle assemblée; toutefois ceux qui voyoient ledit sieur du Plessis, manderent que sa Majesté ne vouloit point que ie visse ledit Duc, dequoy i'estois en grande peine: car d'un costé ie ne voulois déplaire à sa Majesté, d'autre ie ne desirois manquer audit Duc, ny à une telle compagnie; d'auantage ie ne voulois decourir audit Duc la ialousie que ie connoïssois que l'on auoit de luy, de peur de broüiller le monde: encore il aduint que le retour d'iceluy, & le iour qu'il me manda l'aller trouuer, se rencontrerent au iour que ie receus ladite depesche de Monsieur du Maine, & que ie deuois aller trouuer ledit sieur du Plessis: surquoy ie pris party de voir ledit sieur du Plessis le premier, pour apres me conduire enuers ledit Duc, selon que ie ferois avec luy.

LE DIT sieur du Plessis se rendoit à Buy, où ie fus trouuer sous pretexte de visite: ie luy dis les propos que i'auois tenus au sieur de Lomenie, ce que le Roy m'auoit mandé par le sieur de la Verriere, l'aduis que Monsieur le Cardinal de Gondy & moy auions donné à

sa Majesté & audit Duc du Maine, & ce que ledit President Ianin m'auoit écrit de la bonne volonté & inclination d'iceluy Duc, & des autres Princes de sa maison à la paix, de laquelle ils estoient d'aduis que ie traitasse avec luy, parce qu'ils s'asseuroient qu'estant seruiteur tres-affectionné de sa Majesté, & tres-aduisé, il y feroit son possible : toutefois ie luy dis que ledit Duc m'auoit fait écrire qu'il ne pouuoit traiter avec sa Majesté qu'elle ne me donnast dès à present assurance de changer de religion apres son instruction, mais qu'il estoit prest de traiter avec elle de bonne foy ; satisfaisant à ce poinct, qu'il étoit donc au pouuoir de sa Majesté de faire cesser la guerre en ce Royaume, & de se faire reconnoistre d'un chacun, que ce faisant elle renuerferoit les menées des estrangers, qui estoient fort grandes & aduancées, elle contenteroit les Catholiques, qui de part & d'autre murmuroient quasi également de la perseuerance de son opinion, & sauueroit la Couronne. Il me répondit que sa Majesté estoit toute disposée & persuadée à la paix, qu'il n'en falloit point douter, que s'il n'étoit question que de l'achepter & payer de son propre sang, elle en seroit tres-liberale, non pour crainte de ses ennemis, mais pour la compassion qu'il auoit de ses sujets ; toutefois qu'il estoit Prince craignant Dieu, & tres-jaloux de sa reputation ; partant difficile à forcer en sa conscience, & à luy faire faire chose indigne de luy, comme il luy sembloit que feroit cette parole d'assurance

que l'on vouloit qu'il donnast presentement du changement de sa Religion : car ce seroit faire trop bon marché de l'une & de l'autre, que de faire vne telle promesse deuant que d'estre instruit & bien informé & éclaircy, s'il erroit, ou non, en la Religion de laquelle il faisoit profession ; que cela sentiroit plutôt son Atheiste que son Catholique, & qu'il ne faisoit aucune difference entre aller à la Messe du soir au lendemain sans instruction, & de le promettre dès à present deuant, ne sçachant encore quel effet elle feroit en sa conscience ; que si ledit Duc s'acheturtoit à cela non seulement il ne vouloit la paix, mais pensoit en ce faisant troubler sa Majesté avec ses seruiteurs ; & que toutefois il luy seroit facile de remedier, mais qu'il approuuoit & louoit grandement cette ouuerture que ledit sieur Cardinal de Gondy & moy auions faite, laquelle m'asscuroit que le Roy l'accepteroit, partant qu'il n'estoit plus question que de sçauoir si ledit Duc en feroit autant, dont il luy sembloit qu'il en falloit entendre la réponse deuant que de passer plus outre en cette negociation, pour laquelle il feroit ce qu'un Gentil-homme deuoit faire, quand ce ne seroit que pour confondre ceux qui l'accusoient de ne desirer la paix. Son aduis me sembla tres-bon, partant nous prîmes resolution de nous reuoir apres la reception de ladite réponse : mais apres auoir entendu les raisons pour lesquelles ie desirois voir Monsieur de Neuers, non seulement il les approuua, mais jugea qu'il

estoit necessaire pour le seruice de sa Majesté que ie fisse ce voyage , & m'en pria.

A v moyen dequoy ie m'y acheminay dès le lendemain , & fus coucher en vostre maison , de laquelle ie trouuay ledit Duc party ; de sorte que ie fus contraint de passer iusques à Montfort. Monsieur , il<sup>e</sup> vous pleût me dire les sages propos que vous auoit tenus ce Prince, les discours qui s'étoient passez entre luy & ledit sieur Cardinal de Gondy & vous , dont ie fus grandement consolé, comme en verité ie fus de la voir : de sa grace il me receut humainement ; il auoit fait prouision de raisons pour me persuader à la paix, fondées principalement sur le besoin que la Religion & la France en auoit , & l'aduantage que Monsieur le Duc de Mayenne & ceux qui l'assistoient en tireroient , mais il trouua que i'estois tout persuadé , & que ie n'auois besoin sinon qu'on m'adressast vn chemin propre pour y arriuer : sur cela nous discourusmes des difficultez , & luy proposay l'expedient que ledit sieur Cardinal & moy auions ouuert , lequel ie luy dis que le sieur du Plessis m'auoit asseuré que sa Majesté approuueroit : & mesmes me pria , sçachant que ie le voulois voir, d'en conferer avec luy , dont ie fus tres-content , comme ils luy vouloient écrire par vne lettre dont il chargea le sieur de Fleury. En verité il se tint tres-entier au seruice de sa Majesté , blâmant les conseils de ceux qui propoisoient vn tiers moyen pour sortir d'affaires , dont il soustenoit que l'on ne pouuoit venir à bout que



par le moyen de la conuersion de sa Majesté, faite toutefois dignement; par ainsi ie le laiffay peut-estre plus satisfait de la Cour, qu'il n'auoit peut-estre en partant d'icelle, contre l'opinion de ceux qui jugeant de la volonté d'autrui par la leur n'auoient desiré que ie le visse, comme ie vous dis, repassant exprés de vostre maison, où i'eus le bien de vous voir, comme ie fis le mesme iour ledit sieur Cardinal de Gondy, lequel dés-lors ie suppliay d'entreprendre le voyage de Rome, puis que sa Majesté l'approuuoit, afin de représenter à sa Sainteté l'estat veritable de la France, & le besoin extrême que la Religion auoit, qu'elle interposast son autorité & prudence pour faire cesser la guerre, que l'ambition & malice Espagnole y nourrissoit avec trop d'imprudence & de foiblesse pour prosperer, & esperant que ledit Duc de Mayenne n'auroit moins agreable que sa Majesté prist cette charge; veu que ledit President Ianin m'auoit déjà écrit qu'il estoit deliberé de fauoriser sous-main enuers sa Sainteté, l'instruction & conuersion de sa Majesté, si elle s'y vouloit disposer: & comme ledit sieur Cardinal a tousiours affectienné le bien public, il me donna esperance d'entreprendre volontiers le voyage, si sa Majesté & ledit Duc luy faisoient paroistre de le desirer.

Partant estant retourné à Pontoise, ie despeschay vers ledit Duc le sieur de Castelnau, qui commandoit en ladite ville en l'absence de mon fils, pour la fiance que i'auois en luy,

exprés pour l'aduertir de l'ouuerture que ledit sieur Cardinal & moy auions aduisé de faire , pour donner acheminement aux affaires , de l'assurance que ledit sieur du Plessis m'auoit donnée de la volonté de sa Majesté , des propos que Monsieur de Neuers m'auoit tenus , de la deliberation d'aller à Rome dudit sieur Cardinal, s'il l'auoit agreable , & de mon aduis sur le retour : & comme il me sembloit qu'il ne deuoit insister davantage sur l'assurance qu'il auoit demandée que sa Majesté luy donnast dès à present de sa conuersion , puis qu'elle s'en excusoit sur sa conscience, laquelle il n'estoit honneste ny seur pour la Religion de violenter , mais qu'il deuoit se contenter qu'elle se soumist d'estre instruite de l'autorité du saint Pere à la poursuite des Catholiques qui l'assistoient , d'autant qu'il falloit esperer que Dieu ne lairroit l'ouurage imparfait , estant vne fois acheminé , & quand par la faute de sa Majesté il en arriueroit autrement , que ce seroit par sa faute & son dommage ; au contraire l'honneur & la justification des armées dudit Duc , lequel en tout cas ne pouoit errer , aduenant qu'on se remist à sa Saincteté & au saint Siege du poinct de la Religion , dont il estoit le premier juge & principal tribunal , qu'il falloit seulement aduiser aux moyens de faire , & cependant cesser la guerre, afin de pouoir conduire toutes choses comme il conuenoit , & en soulageant le peuple , tirer le Royaume du peril auquel les estrangers s'efforçoient de le pre-

cipiter : qu'après sa réponse sur ladite proposition, i'en ferois ouverture & instance audit sieur du Plessis s'il l'auoit agreable, & mettrois peine d'ébaucher les affaires, en attendant que l'on y employast d'autres qui eussent les épaules plus fortes que ie n'auois pour ce fardeau, lequel ie reconnoissois trop lourd pour ma portée, le suppliant donc me renuoyer en diligence ledit sieur de Castelnau avec son intention. Toutefois il me le renuoya deux ou trois iours après sans réponse à tout ce que dessus, sous pretexte de besoin qu'il disoit auoir de faire aduancer mon fils avec sa garnison pour l'accompagner au dernier secours que le Duc de Parme & luy vouloient donner à Roüen : Mais Monsieur le President Ianin m'écriuit par luy qu'il m'enuoyeroit la réponse dans trois ou quatre iours. En verité ledit Duc ne pensoit alors qu'à secourir ladite ville, & à ne perdre l'occasion de la foiblesse de l'armée de sa Majesté, dont il estoit bien aduerty : il estoit aussi si mal de sa personne, qu'il ne pouuoit bonnement entendre aux affaires : Comme ie scauois de Monsieur de la Chastre qui vint passer en ce temps par Pontoise s'en retournant en son Gouvernemen, lequel i'auois prié m'asseurer derechef de son intention à la paix, & qu'il estoit prest de faire traiter si crettement les conditions d'icelle avec sa Majesté, moyennant la susdite promesse & assurance de sa conuersion, mais non autrement pour les raisons predites, & m'apporta la lettre dudit Duc écrite de sa main, portant pouuoir de

conferer avec ledit sieur du Pleffis , de laquelle i'ay fait mention cy-deuant : toutefois parce que ledit Duc n'auoit encore receu la depesche que ie luy auois faite par ledit sieur de Castelnau , quand ledit sieur de la Chastre s'estoit separé de luy , ie ne pris ce qu'il me manda par luy pour sa derniere resolution.

LE sieur de Vitry estant party du camp environ ce temps , vit sa Majesté à Gisors , ou és environs , à laquelle le bruit courut qu'il auoit demandé vn passe-port pour luy & ledit sieur de la Chastre & moy , comme si Monsieur du Maine luy eust donné charge de me prendre à Pontoise , & me mener avec luy deuers sa Majesté, in'enuoya ledit passe-port; & toutefois ledit sieur de la Chastre m'assura n'auoir eu cette commission , aussi passa-il à Paris dès le lendemain. Ce bruit qui courut par tout , incontinent appresta à parler à plusieurs du mécontentement de sa Majesté, & du déplaisir à ceux qui desiroient la paix, mesme offensa, & mit en peine ledit Duc de Mayenne à cause desdits Espagnols.

M O N S I E U R , plusieurs se sont faits de feste en cét affaire , qui n'auoient aucun pouuoir de ce faire , dont l'on a fait plus souuent de conte que des autres , parce qu'ils s'estudioient plus à complaire à ceux ausquels ils s'adrescoient , qu'à dire la verité & decouurir la playe, chose qui a aussi souuent nuy au public; & à ceux qui de bonne foy s'efforçoient de seruir ; car on méprisoit leur aduis , & attribuoit-on à art & malice leurs poursuites, conseils & actions , dequoy se sont grande-

ment seruis les ennemis du Royaume, qui n'étoient en petit nombre de part & d'autre, & a esté besoin à ceux qui s'entremettoient de la paix, faire prouision de constance & de patience pour conseruer iusques à la fin: ce que ie ne dis tant pour led. sieur de Vitry, que pour d'autres qui s'y sont bien embarquez plus auant que luy, & qui toutefois n'y apportoitent l'affection qu'il a tousiours fait: car comme Gentil-homme vraiment François, il a tousiours désiré & affectionné le bien & le repos du Royaume, encore qu'il ne fust des plus mal dressez ny appointez à la guerre, comme celuy qui gaignoit bien ses dépens.

IE fis en grande peine de la réponse dudit Duc, à la depesche que luy auoit portée ledit sieur de Castelnau, parce qu'elle tarda à venir, dont ie sçauois que ledit sieur du Plessis se plaignoit, & que l'on commençoit à me blâmer, comme si i'en eusse esté cause, & ne sçauois à qui m'en prendre, estimant que ledit Duc n'auoit approuué nostre ouuerture, & qu'il retardoit ladite réponse exprés pour me déguiser son intention: mais à la fin nous sceusmes que ce retardement estoit venu de la faute d'un laquais de Monsieur de Grandmont, auquel ledit President Ianin auoit baillé à porter ladite réponse pour m'estre plus seurement renduë, parce qu'il auoit un passeport de sa Majesté; & toutefois ledit laquais nous dit que passant par Pontoise, ayant rencontré des coureurs, & reconnu la lettre du President Ianin, écrite en chiffres, il l'auoit rompuë & iettée, craignant d'estre surpris

avec icelle, dont i'aduertis soudain ledit President, lequel m'enuoya incontinent vn autre double d'icelle. L'original auoit esté écrit dès le 14. Avril, & toutefois ie n'en receus la coppie que le 25. laquelle estoit accompagnée d'une autre lettre dudit President du 22. dudit mois. Desia Roïen auoit esté secouru, sa Majesté ayant esté contrainte faire place au Duc de Parme, pour auoir esté surpris, & son armée estant trop foible pour combattre; & combien que sa Majesté ne tardast gueres à se rapprocher dudit Duc, le pressant grandement d'en venir aux mains, & que plusieurs estimassent qu'il ne s'en pouuoit dédire, d'autant que sa Majesté l'auroit acculé contre la riuere de Seine à Caudebec, où elle est tres-large & difficile à passer à cause du flux de la mer qui y vient; toutefois il s'en démesla honnestement par le moyen d'un pont composé de plusieurs grands batteaux liez ensemble, qu'il dressa auprès dudit Caudebec, sur lequel l'on passoit près de trois cens hommes à cheual à chacune fois, conduits avec des cordages & à voiles assez industrieusement; & délogea vn matin avec des forces qu'il auoit retenues près de luy, & eurent bien-tost gagné Roïen, sans aucunement sejourner, encore qu'il fust blessé d'une arquebusade receuë deuant ladite ville de Caudebec, qu'il auoit assiegée & prise. Apres qu'il eut secouru Roïen, il se rendit à Paris à si grande traite que sa M. ne le peut ioindre: Monsieur, il ne passa loin de vostre maison où vous estiez, partant vous sçavez quelle diligence il fit.

OR

OR la réponse dudit Duc fut écrite au nom du President Ianin, & portoit qu'il auoit veu & fait voir & considerer à Monsieur du Maine mes lettres, les raisons y contenuës, & les moyens qui y estoient representez pour traiter; qu'il ne pouuoit plus reietter le remede qui venoit d'Espagne, qu'il craignoit plus que tout autre mal qui pûst arriuer; que ledit Duc qui luy auoit donné charge de m'écrire qu'il estoit tousiours disposé de traiter avec le Roy qu'il nommoit de Nauarre, en auoit conféré avec Monsieur de la Chastre, pour me dire & chercher avec moy les moyens plus propres pour y paruenir: vray est que lors pour fondement dudit traité, il vouloit estre du tout asseuré de la conuersion de sa Majesté, & neantmoins ie leur auois mandé qu'il n'en pouuoit rien promettre avec certitude auant son instruction; qu'ils jugeoient bien qu'en ce faisant, la conuersion pourroit estre suspecte, & qu'il y auoit plus d'assurance pour la Religion demeurant Huguenot, que s'il se dissimuloit: mais aussi qu'ils auoient crainte que s'ils estoient contrains de traiter ou faire surseance d'armes avec sa Majesté, ne changeant point de Religion, que plusieurs prissent le party d'Espagne, qu'il falloit maintenant regarder si les moyens que i'auois proposez les pouuoient garantir de cet inconuenient: le principal sur lequel ledit sieur du Maine s'arrestoit, estoit que secrettement l'on fust d'accord des assurances, tant pour la Religion & pour le party, que pour luy & ceux de sa maison: cela estant arresté par vn

traité fort secret, l'on pouuoit assez conduire le reste fort aisément; Qu'il falloit lors commencer non par vne declaration ouuerte de la paix, de crainte que le Pape qui n'en auoit eu communication n'en fust offensé, ensemble plusieurs de leurs amis qui estoient éloignez, & le Roy d'Espagne mesme n'eust trop d'occasion de se plaindre & faire du pis qu'il pourroit parmy eux; mais pour vne surseance d'armes pour le reste de l'année, ou pour six mois seulement, aux conditions que chacun demeurast sous son party: cependant que les Catholiques qui estoient avec sa Majesté enuoyeroient si bon leur sembloit, (comme il estoit du tout necessaire, ainsi qu'il estoit porté par l'aduis que ie luy auois donné) deuers le Pape, pour l'exciter à trouuer bonne l'instruction que desire sa Majesté, & y apporter son autorité; que de leur part ils y pourroient enuoyer aussi, sous pretexte de luy faire entendre les raisons qui les auoient meus à faire ladite trêue, & là dessus luy représenter le miserable estat du Royaume, les desseins qui se preparoient pour le ruiner, & disposer sa Saincteté par raisons de recevoir sa Majesté si elle vouloit se reconcilier à l'Eglise, comme le moyen le plus propre pour conseruer la Religion; faire aussi que sa Saincteté interposast son autorité enuers le Roy d'Espagne pour luy faire approuuer ce conseil, & enuoyer à cét effet deuers luy en ce Royaume quelques Cardinaux, sages, & bien instruits de son intention, pour moyenner le bien de toute la Chrestienté; Qu'il se-



roit en mesme temps tous efforts enuers les Espagnols & les Estats, (il entendoit ceux du party que l'on vouloit assembler) pour y disposer vn chacun, ce qu'ils esperoient obtenir : car ils feroient trouuer à l'assemblée, non seulement les Deputez, dont il y en auoit plusieurs de mal choisis ; mais le plus grand nombre d'hommes de qualité qu'ils pourroient trouuer, comme Monsieur de Lion qui estoit mandé instamment, Monsieur de Ricux, Monsieur de Senecey qui estoit desia là, & Monsieur le Cardinal auquel on auoit écrit, & qui auoit promis d'y venir, lesquels sans doute s'accommoderoient à tout, quand ils auroient entendu mes raisons. Ce qui étoit donc expedient de faire en diligence, estoit que ie conferasse pour aduiser aux moyens des seuretez pour la Religion & pour le party, & qu'y ayant de l'incertitude sur la conuersion de sa Majesté, elle deuoit estre donnée plus grande, mesmes pour le party, que sa Majesté ny ses seruiteurs ne deuoient estre de leur part retenus en cela, que l'on ne persuaderoit iamais à ces Princes de traiter, s'ils ne voyoient deuoir estre mis en estat de ne pouuoir estre aisément ruinez, de crainte qu'ayant posé les armes ils peussent iamais faire entreprise : il n'y auoit point d'apparence, parce que personne apres tant de miseres n'y seroit plus disposé, que lescdites assurances pouuoient estre des places des Gouvernemens qu'ils tenoient, & de ne mettre point des garnisons aux Villes qui auoient suiuy le party, & autres que ie pouuois bien

considerer , entre lesquelles ils mettoient l'interuention du Pape, dudit Roy d'Espagne, & autres Princes leurs amis : pour le particulier dudit Duc qu'il en auoit souuent discouru, & qu'il voyoit qu'il pouuoit interrompre ce bon œuvre, & apporter peut-estre ce changement en la volonté des vns & des autres; c'estoit que l'on vouloit aller promptement vers Roüen & faire leuer le siege, ou combattre , & par ce moyen avec quelque raisonnable sujet & vtilité se mettre en plus grand espoir de repos. L'on auoit répondu que quinze iours de temps se couleront pour le moins auant que d'en pouuoir estre d'accord, & que peut-estre au bout du temps il ne se feroit point; & cependant avec ce loisir sa Majesté se pourroit fortifier de toutes les garnisons, où lors ils auroient de l'aduantage: que ledit Duc de Parme disoit ne vouloir perdre ayant pris vne entiere resolution de combattre, laquelle il croyoit veritablement plus qu'il n'auoit iamais fait, que l'on s'étoit aussi souuenu de la trêve que sa Majesté auoit fait proposer apres le siege de Paris leué; lors qu'elle pensoit que ledit Duc de Parme deût faire seiour en France , & qu'elle auoit changé d'aduis tout aussi-tost qu'elle auoit esté aduertie qu'il vouloit sortir; qu'elle en pouoit bien faire autant maintenant , fortifiée par le temps , & se seruir d'un tel aduantage pour prendre Roüen, qu'il n'y auoit que répondre à telles raisons; que peut-estre le siege de Roüen se leueroit sans combattre , & quand l'on seroit près les vns des autres,

chacun pour se racheter du peril se dispoſeroit à la ſurſeance, que s'ils en voyoient l'occafion ils ne la perdroient.

M A I S quoy qu'il arriuaſt, il ſuffiſoit pour maintenant qu'ils auoient retardé le traité deſdits Eſpagnols, que i'euffe à m'éclaircir des moyens pour aſſeurer la Religion & le party, & donner contentement audit Duc de Mayenne, & à ceux de la maiſon. Qu'ils aſſembleroient le plus grand nombre de gens qu'ils pourroient, & croyoient que malgré tous ceux qui auoient mauuaife intention ils prendroient quelque bon conſeil. Que ſi M. le Cardinal de Gondy qui eſtoit ſage & de grand jugement, auançoit cependant ſon voyage à Rome, ce ſeroit touſiours pour le mieux: qu'ils y depeſcheroient des poſtes en attendant qu'ils y enuoyaſſent vn homme d'autorité, qu'ils inſtruiroient bien pour ſeruir en ce que ledit Duc luy auoit donné charge de m'écrire pour ce regard. Quant à ce que l'on luy auoit mandé du mariage de Monsieur le Comte de Soiſſons, & du peu d'intelligence qu'on diſoit eſtre entre ſa Majeſté & luy, ſi ſa Majeſté ne ſe vouloit faire Catholique, ils eſtimoient que c'eſtoit vn remede ſubſidiaire, duquel ſa Majeſté ſe deuoit ſeruir ſecrètement pour les affoiblir, & rompre les deſſeins qui ſe propoſoient, meſme celui de Monsieur de Guiſe, dont le temps les éclairciroit: qu'il ne ſe vouloit opiniaſtrer contre ceux qui auoient plus de jugement que luy. Mais qu'il continuoit à dire avec pluſieurs autres qui eſtoient de cét aduis, que

les Princes du Sang joints ensemble avec les Catholiques , sauueroyent la Religion & l'Estat avec honneur & seureté par tout , & que pour vn si bon effet il luy sembloit qu'on ne luy deuoit refuser aucunes Villes , ny autres conditions qu'ils voudroient demander avec raison.

M O N S I E V R , ce sont les propres termes de la lettre dudit President , écrite à Noyon le 14. iour d'Avril que i'ay voulu vous représenter , pour auoir esté le fondement sur lequel fut bastie la negociation que ie fis depuis ; à quoy i'adiousteray son autre lettre du 22. écrite à Roüen , qui accompagnoit le duplicata.

I L me mandoit par icelle qu'il m'auoit enuoyé l'original de ladite réponse par le laquais du sieur de Grandmont , comme estimant le moyen plus seur qu'aucun autre ; parce qu'il auoit vn passe-port , & que les lettres qui s'adressoient à moy deuoient à son aduis passer sans soupçon : qu'il auoit grand déplaisir de cette faute , laquelle il eust plütoست réparée s'il en eust esté aduerty , iugeant assez que pour le public & pour mon particulier vn retardement estoit dommageable , & sujet à mauuaise interpretation , me priant de ne l'imputer à luy , ny à Monsieur du Maine qui auoit crû qu'il y auoit plus de seureté en ce laquais , qu'en toute autre personne qu'il m'eût pû m'enuoyer : Que Roüen auoit esté secouru depuis sans combat selon son desir , qu'ils auoient bien sceu aussi que les forces du party contraire estoient inégales aux

leurs ; quoy qu'on leur eust mandé de diuers endroits , que le Roy estoit trop sage & bien conseillé pour tenter le hazard foible : que s'ils eussent temporisé, il y eust eu plus de difficulté : que les affaires estoient maintenant en estat pour en deliberer avec loisir pour y prendre bonne resolution ; que Monsieur de Mayenne auoit des irresolutions, mais croyoit que fortifié de bons conseils il suiuroit tousiours celuy que nous iugerions le meilleur : le principal estoit qu'il y eust des gens de bien en cette assemblée que l'on vouloit faire , laquelle estoit fort pressée des Espagnols, & desirée du Duc sans remise, pourueu que l'on y peust auoir des gens de qualité. Que Monsieur de la Chastre luy auoit donné aduis de' nostre Conference , & comment à Paris l'on tenoit que Monsieur le Comte de Soissons se deuoit separer du Roy : que plusieurs Catholiques se ioindroient avec luy, & mesmes que le Roy d'Espagne luy auoit desia donné vne somme d'argent pour faire la guerre aux huguenots , que le mesme aduis luy auoit encore esté donné d'autres endroits ; que ledit sieur de la Chastre luy escriuoit que cela pourroit beaucoup faire de deseruir à Monsieur de Mayenne , & pour son regard il estimoit qu'il pourroit bien diminuer son autorité ; mais aussi qu'ils assueroient le party des Catholiques , & seroit cause indubitablement si nous estions bien sages , de la ruine des huguenots : toutefois que ledit sieur du Maine auoit grande occasion de se plaindre du Roy d'Espagne , s'il

estoit vray qu'il eust dressé cette parrie, les Ministres ayant toujourns reietté les ouuertes qui leur auoient esté faites pour ceux de cette maison là, pour maintenant les rechercher à leur deçeu; qu'il reconnoissoit que plusieurs Catholiques se lassoient de sa Majesté; & encore du dessein auquel on craignoit qu'ils fussent contrains de se precipiter: qu'il preuoyoit quoy que l'on dist de la foiblesse de cette Maison de Bourbon; qu'ils seroient à la fin les mieux suivis de tous; qu'il ne laissoit toutefois de preferer mon jugement au sien, partant me prioit donc de le tenter & conferer secrettement, & preparer la matiere en attendant ladite assemblée, qui seroit sans delay dans la fin du mois de May, pour resoudre, moyennant la grace de Dieu, tout ce que les gens bien trouueroient le meilleur, & que de leur costé il seroit ce qu'il m'auoit mandé par la precedente lettre, de laquelle il m'enuoyoit le double par le porteur d'icelle. Que l'on auoit fort publié en l'armée de sa Majesté le traité qui se faisoit avec moy, & que Monsieur d'Antragues en auoit écrit vne lettre à vn sien amy, qui estoit tombée es mains de Madame de Guise qui l'auoit enuoyée audit Duc de Parme, pour le mettre en soupçon de Monsieur du Maine, que c'étoient artifices qui ne valoient rien, qui nuisoient à tous, & ne seruoient à personne. Que sa Majesté auoit dit à plusieurs, & mesmes au Commandeur de la Romagne qu'on luy parloit tous les iours de la paix, & que c'estoit pour le tromper, qu'il m'asseuroit

que Monsieur du Maine estoit éloigné de tous ces artifices , & qu'il n'en vouloit point user à mes dépens , ny tous y participer pour chose du monde , mesme , & à mon preiudice: Qu'il prioit Dieu seulement que nous puissions aussi bien faire qu'il estoit assuré que luy & moy en auions bonne volonté; que leur armée deuoit attaquer Caudebec pour faire entrer des viures dans Roüen avec plus de facilité; que le Cardinal de Plaisance estoit en ladite ville, lequel il n'auoit point veu , mais auoit sçeu son aduis estre de choisir l'Infante pour Reine, & la marier avec Monsieur de Guise; que les Espagnols vouloient le premier , & non le dernier , & non pas avec les autres Princes François, s'ils en estoient crûs, chose toutefois qu'ils ne se deuoient promettre; qu'il conferoit avec ledit sieur Cardinal, mais qu'il croyoit qu'il n'y feroit rien; qu'il l'auoit desia fait avec Monsieur Bernard député de Bourgongne, lequel auoit beaucoup de creance avec les autres deputez , ce qu'il estimoit auoir fait avec plus de fruit.

CETTE derniere lettre me sembloit plus froide que la precedente; elle estoit faite aussi depuis auoir secouru Roüen , les bons & mauuais succez ayant souuent changé, non seulement nos conceptions , mais aussi nos paroles , témoignage tres-certain & manifeste du fonds de nos intentions : toutefois ie ne voulois laisser de voir ledit sieur du Pleffis après la reception desdites lettres , ce fut le lendemain audit Buhy , avec lequel ie ne voulois user d'autre ceremonie, que de luy faire

lire les mesmes lettres que i'auois receuës, excepté seulement l'aduis qui faisoit mention dudit sieur d'Antragues, afin qu'il vist aussi clair que moy, que luy-mesme iugeast quel estat nous en deuions faire, pour faciliter ce que nous desirions tant : il fit demonstration de se contenter desdites lettres, voyant qu'on me donnoit charge par icelle d'entrer dès à present en conference des moyens d'asseurer la Religion, le party & les particuliers, sans plus remettre les choses apres la conuersion de sa Majesté, comme on auoit tousiours fait, qui estoit ce à quoy il auoit tousiours aspiré, & n'auoit encore pû paruenir, partant il m'assura que le voyage de Rome se feroit, que sa Majesté feroit son deuoir pour contenter le Pape, & qu'elle aduanceroit son instruction, de façon que l'on en verroit bien-tost les effets; mais insistoit d'auancer aussi le fait desdites seuretez, dont il estoit d'avis que l'on fust resolu, mesme deuant cette assemblée que l'on deuoit faire, disant qu'autrement il n'en pouuoit bien esperer, approuuant neantmoins que le tout fust tenu secret, comme le disoit ledit Duc, & sur ce me pressa & coniu-ra de mouuoir les conditions generales & particulieres, afin de gagner le temps; mais ie m'en excusay, luy disant que i'en estois mal informé, qu'il en sçauoit autant que moy, puis qu'il auoit sceu ce que l'on m'en auoit écrit, & aussi que ie ne voulois seul entreprendre ce fait qui estoit trop épineux & embarrassé, partant qu'il eust patience que ie fusse assisté de quelqu'un mieux instruit des pre-



tensions dudit Duc : d'ailleurs l'on me recommandoit tant de secrets en cette negociation, que quand ie me voudrois emanciper d'y entendre plus auant, ie desirerois qu'il me donnast la foy & parole du Roy pour ce regard, sçachant comme on en vsoit ordinairement à la Cour, & que si ie ne pouuois bien faire au public, ie ne voulois au moins nuire au particulier dudit Duc, ny luy donner occasion de se plaindre de moy-mesme, voyant qu'il se plaignoit desia par la derniere lettre dudit President, que l'on en auoit donné aduis à Madame de Guise, sans toutefois nommer l'auteur, & que sa Majesté mesme l'auroit dit au Commandeur de la Romaigne.

LEDIT sieur du Plessis me dit qu'il ne me donnoit cette parole sans vn exprés commandement de sa Majesté, mais qu'il luy en escriroit, & qu'apres sa réponse il me manderoit ce qu'il pourroit faire, & moy me resoudrois aussi de ce que i'aurois à faire pour le mieux.

MONSIEUR, i'auois telle enuie d'acheminer cette negociation, & y engager ces Princes, que ie me resolus si ledit sieur du Plessis me donnoit la foy de sa Majesté, de tenir ce fait secret, d'entrer en matiere, mais de le faire comme de moy-mesme, & sans y obliger ledit Duc, esperant que ledit sieur du Plessis ne faudroit, comme tres-adiusé, de me donner moyen par ces réponses de continuer avec ledit Duc; joint que ie craignois perdant cette occasion de ne m'estre à l'aduenir permis d'en vser.

PARTANT, si-tost que ledit sieur du Plessis

m'eût assuré de la parole de sa Majesté, ie mis en auant comme de moy-mesme, & sans écrire, les articles qui s'ensuiuent. Ie demanday que l'instruction du Roy fust assurée, & qu'il fist telle declaration de son intention & desir sur sa conuersion à l'Eglise Catholique, Apostolique & Romaine, que chacun eust occasion d'en esperer contentement. Que l'exercice de la Religion Catholique fust restably où il auoit esté discontinué, & ladite Religion conseruée, maintenuë & entretenuë par tout en son entier, & les Ecclesiastiques maintenus en tous leurs droits, franchises, libertez, priuileges, biens & possessions: estre fait vn reglement sur la presentation & nomination aux Benefices estans à la nomination du Roy, conforme aux saincts Canons, Decrets & Ordonnances cy-deuant faites à la requeste des Estats generaux du Royaume; que s'il estoit à propos de tolerer à ceux de contraire Religion l'exercice d'icelle, que l'on s'obligeast au moins de ne faire dauantage pour eux sous quelque pretexte que ce fust, que ce qu'ils auoient lors de la guerre commencée l'an mil cinq cens quatre-vingt cinq; que toutes choses faites & passées depuis la mort de feu Monsieur de Guise fussent oubliées, sans estre loisible de faire recherche pour quoy que ce fust; excepté toutefois les cas enormes reservez par les precedens Edicts entre personnes du mesme party, pourueu que la mort du feu Roy ne seruist de pretexte pour trauailler ceux qui en estoient innocens: & restablir l'honneur & la memoire de

feu Messieurs le Cardinal & Duc de Guise, sans toutefois offenser celles dudit feu Roy: casser les Arrests & Iugemens donnez de part & d'autre depuis la guerre, auxquels les parties n'auroient contesté: remettre vn chacun en la iouissance de ses offices, charges & benefices, pour en vser comme l'on faisoit deuant la mort dudit Duc de Guise: faire vn reglement pour la prouision aux Offices de ce Royaume, afin d'éuiter qu'ils ne fussent à l'aduenir donnez à ceux de contraire Religion, sans en cela oublier les Gouuernemens, Capitaineries, & toutes autres charges de Villes, mesme les Ambassades: conseruer les habitans des Villes en leurs droicts, priuileges & franchises: faire sortir les gens de guerre qui y estoient, & n'en tenir qu'aux Villes de la frontiere, n'en mettre point du tout aux Villes qui seront nommées & accordées pour la seureté du party, ou expressement reseruées & spécifiées par le traité; déliurer les prisonniers sans rançon, rendre les meubles aux propriétaires les trouuant en nature, conuenir particulièrement à qui demeureroient les Offices, Benefices, Gouuernemens & charges auxquelles il auroit esté pourueu de part & d'autre depuis la guerre, pour obuier à toutes disputes; pouruoir au soulagement du peuple, regler la Gendarmerie & Infanterie, avec les Officiers d'icelle; & en ce faisant entretenir & soldoyer certain nombre de Compagnies à ceux qui auoient fuiuy le party, & promettre de tenir les Estats generaux pour asseurer les choses

ſuddites à l'aduenir, les aſſembler de ſix en ſix ans, tant pour cét effet que pour donner ordre par leur aduis aux affaires publiques, & meſmes aux abus qui ſe commettoient en l'adminiſtration des Finances; faire interuenir en ce traitté pour la ſeureté d'iceluy noſtre S. Pere, & tels autres Princes eſtrangers qu'il ſeroit aduiſé.

I E luy ſis auſſi quelque ouuerture des moyens de contenter en particulier ledit Duc de Mayenne, & les autres Princes de ſa maiſon, comme de ioindre au Gouuernement de Bourgongne celuy de Lionnois, & en donner vn autre à Monsieur de Nemours, ayant reconnu que ledit Duc auoit cela fort à cœur, luy laiſſer la diſpoſition des Benefices & Offices d'iceluy, l'honorer de quelque charge d'importance en ce Royaume, conſeruer ſon Gouuernement à ſes enfans, & luy donner moyen de payer ſes debtes, traiter honorablement ſa maiſon, conſeruer à Monsieur de Guiſe l'Eſtat de grand Maître, le Gouuernement de Champagne, & à Meſſieurs ſes freres les Benefices que tenoit feu Monsieur de Guiſe, leur donnant auſſi moyen de ſ'entretenir & payer leurs debtes, & en faire autant pour Monsieur de Mercœur en Bretagne, pour Monsieur d'Aumale en Picardie, & principalement aux places du party, pour Monsieur d'Elbœuf en Bourbonnois, & pour Monsieur de Ioyeuſe en Languedoc, pour Monsieur de la Châtre en Berry & Orleans, pour Monsieur de Villars en Normandie, pour Monsieur de S. Pol en Champagne,

pour Monsieur de Rosne en l'Isle de France, & ainsi des autres du party, sans oublier ceux qui le meritoient : ie luy parlay aussi de comprendre en ce traitté les estrangers qui auoient secouru le party, remettant toutefois à parler desdits interets particuliers en ce qui concernoit lesdits estrangers, quand i'en serois mieux instruit, & adjoûter encores ausdites propositions generales ce qui me seroit mandé.

Nous discourusmes sur lesdits articles ledit sieur du Plessis & moy, comme vous sçavez que le suiet le requeroit ; mais d'autant que nous n'auions pouuoir de faire mieux, nous nous promismes l'un à l'autre d'en aduertir les Chefs, & d'en faciliter l'accord de tout nostre pouuoir, & cependant que les voyages de Rome seroient auancez comme chose necessaire pour paruenir à nostre but : ledit sieur du Plessis se departant me promist derechef au nom de sa Majesté, de tenir secret tous nos discours, & les ouuertures que nous auions faites.

L'E C R I V I S dès le lendemain audit sieur President ce que i'auois fait, afin d'en aduertir ledit Duc, pour auoir lettres expresses de son intention, le priant de ne m'abandonner en cette entreprise, en laquelle ie m'estois embarqué à son adueu, poussé de tres-bonne volonté de bien faire au public, & aux particuliers, laquelle ie reconnoissois estre plus épineuse & difficile qu'autre qui se fust encore présentée, & partant auroit besoin d'épaules plus fortes que les miennes.

Et d'autant que le messager que ie luy auois enuoyé ne reuint dans le temps qu'il m'auoit promis, ie luy fis vne recharge par vn trompette exprés, le pressant de me répondre, & ne me laisser en incertitude: toutefois d'autant que les deux armées estoient logées à la veüe l'vne de l'autre, chacun estoit si empesché que l'on ne pensoit qu'au peril present; & neantmoins ledit President ne laissoit de m'écrire par toutes ses lettres, qu'il se défioit plus que iamais de la conuersion du Roy, qu'il ne croyoit pas aussi que le Pape l'approuuast iamais, & partant craignoit, que nous amusans à ce chemin nous perdissions la Religion & l'Estat, remettant encores en jeu celuy des autres Princes du sang, dont ie fus en tres-grande peine, tirant argument d'un changement ou refroidissement de la volonté dudit Duc, & que l'on vouloit reietter sur moy & ma poursuite le blasme du mal qui en reussiroit, & sur ce fonder quelqu'autre resolution; ce qui fut cause que i'écriuis franchement audit President que i'auois pris & suiuis le chemin d'un homme de bien; que ie m'y estois embarqué au mandement dudit Duc, receu par les lettres qu'il m'auoit de sa part écrites, croyant fermement que c'estoit nostre honneur, deuoir, & aduantage, de traiter avec le Roy deuant tous autres, pourueu qu'il voulust estre Catholique, & que peussions' conseruer la Religion, d'autant que la Couronne luy appartenoit, & qu'en traittant avec d'autres nous ne ferions cesser la guerre, &

partant n'asseurerions ny sauuerions le Royaume : qu'en tout cas mon aduis auoit toujours esté de tenter ce chemin, deuant que d'en chercher d'autre, pour plusieurs raisons que i'auois représentées souuent, ausquelles ie perseuerois plus que iamais; joint que ie n'auois occasion de croire que ledit Duc ny Messieurs ses parens, & tous ceux dont ils estoient assisteز fussent plus affectionnez au dernier moyen qu'à l'autre, n'ayant perdu la memoire de ce que ie leur en auois ouy dire, le suppliant me vouloir enuoyer la derniere volonté dudit Duc, & s'il approuuoit que ie ne poursuiuisse plus auant la negociation commencée par son commandement, me le mander librement sans me bailler le change me chargeant d'une autre, car ie protestois que ie la refuserois tout à plat, comme celuy qui ne vouloit seruir d'instrument de tromperie, ny de giroüette pour tourner à tous vents.

MA premiere lettre fut écrite du dernier d'Avril, & cette recharge le 6. May, & le 10. ie receus la réponse dudit President, dattée du 8. laquelle contenoit ce qui s'ensuit. Il me mandoit n'auoir encore pû parler à Monsieur du Maine si particulierement qu'il estoit besoin de ce que ie luy auois écrit, d'autant qu'il estoit tousiours au champ de bataille près l'ennemy, & auoit l'esprit du tout bandé & occupé à la guerre sans intermission, & aussi que ledit President estoit tombé en vn soupçon extrême des Espagnols, & de ceux qui ne vouloient point la paix, qu'il en estoit

regardé de plus près que iamais , mais qu'il en choiſiroit l'opportunité, & au plûtost : ad-  
jouſtant qu'il voyoit auſſi ſi peu d'aduantage  
pour ledit Duc , & d'aſſurance pour le party  
par les articles dont i'auois conſéré, qu'il eſti-  
moit eſtre plus à propos de les luy celer  
maintenant , & differer iuſques à ce qu'il en  
euſt conſéré avec moy , ou qu'il m'en pût  
mander quelques particularitez: qu'il falloit  
que ie creuſſe , encore que le bien de la paix  
fuſt autant deſirable audit Duc qu'à nul au-  
tre, que ſon eſprit eſtoit aſſez ſouuent trauer-  
ſé de ceux qui luy imprimoient pluſieurs  
grandeurs imaginaires pour l'en détourner,  
& que l'vne des principales raiſons qui le  
portoient à ce traité, eſtoit que l'on luy per-  
ſuadoit touſiours que le Roy diſoit à vn cha-  
cun pour luy rapporter, qu'il vouloit luy fai-  
re vn ſi bon , honorable & vtile traitement,  
pour ſa grandeur, ſon bien & ſa maiſon, qu'il  
ne le pourroit eſperer de qui que ce fuſt ; que  
ſa Maieſté auoit encore tenu les meſmes pro-  
pos il n'y auoit que deux iours, au milieu de  
la campagne , dans les armées, au Baronde  
Luz, avec lequel il auoit parlé vne bonne heu-  
re, elle en auoit autant dit auſſi à Monsieur  
de Vitry , & à Monsieur le Mareſchal d'Au-  
mont, lequel s'eſtoit plaint de ce que cét af-  
faire ſe traitoit avec ledit ſieur du Pleſſis hu-  
guenot, & grandement ſuſpect aux Catholi-  
ques, tant pource que les huguenots ne vou-  
loient la paix, craignant que les Catholiques  
qui aſſiſtoient ſa Maieſté, ne la fiſſent deſad-  
uantageuſe pour eux , parce qu'il auoit vn



Gouuernement que la guerre rendoit meilleur que ne feroit la paix: qu'il ne voyoit rien ausdits articles qui apportast autre commodité ou assurance audit Duc: qu'il auoit tant de desir de la paix qu'il ne mettoit en consideration la misere & le mépris de la Ligue, apres qu'elle seroit concludë avec sa Majesté, mais embrasseroit le public seulement, me priant de le croire & de bien prendre les difficultez qu'il me faisoit: que c'estoit pour rendre l'affaire plus facile, qu'il estoit bien raisonnable, que le Roy & les siens, lesquels deuoient retirer pour iamais l'autorité, l'honneur & le profit de la paix, donnaissent quelque contentement audit Duc & aux Princes qui les feroient iouir de cét heur, qu'ils seroient contraints par la confirmation de la guerre acheter cherement, & peut-estre ne l'auoir iamais: qu'ils traitoient non comme vaincus, mais comme puissans, & en estat de faire aussi-tost ruiner leurs ennemis qu'eux lesdits Princes; qu'ils le faisoient comme gens de bien qui vouloient garantir le Royaume du peril qu'il couroit par la continuation de la guerre, aux perils, & à la ruine d'eux-mesmes; partant leur desir à l'embrasser rendoit vn temoignage de leur preud'hommie, non de celle de leurs ennemis, que l'vtilité seule y pouuoit apporter; sinon qu'ils montraissent, la recherchant, vouloir laisser aller quelque chose pour vne fois à ceux qui ne pourroient iamais rien esperer du regne du Roy, auquel ils se soûmettoient par ladite paix. Que ie disois que le fondement

sur lequel il falloit bastir la paix, c'estoit la conuersion de sa Majesté, & qu'à cette fin il estoit bon d'enuoyer en diligence à Rome, qu'il le trouuoit necessaire; mais que i'adioûtois qu'il falloit faire des articles doubles, sçauoir les vns en cas que le Roy se conuertist, & les autres en cas contraire, & toutefois ce deuoient estre articles secrets qui ne deuoient estre publiez, ce luy sembloit, qu'apres ladite conuersion, sans laquelle aussi Monsieur du Maine n'entendoit que ledit traité eust lieu; ainsi les autres à faute de la conuersion estoient inutiles: qu'il n'auoit pû induire Monsieur du Maine à traiter sans icelle, & que quand il le feroit, il ne seroit fuiuy de personne; que les Catholiques aussi qui estoient près de sa Majesté, ne demandoient point qu'on traitast, ny qu'elle fust reconnüe, sinon au cas qu'elle fust Catholique: que Monsieur de Longueuille & Monsieur le Marechal d'Aumont leur auoient fait dire au nom de tous les Princes & Seigneurs Catholiques seruans sa Majesté, que si Monsieur de Mayenne & ceux de la Ligue offroient de la reconnoistre à condition qu'elle se fist Catholique dedans vn temps, qu'ils consentiroient, promettoient & s'obligeoient de leur part, au cas qu'elle ny satisfist dedans ledit temps, de la quitter & se ioindre avec eux, pour ensemble aduiser à la conseruation de la Religion & de l'Estat. Que cette obligation auoit bien plus de seureté pour eux, & seroit aussi honorable que la forme du traité duquel j'auois écrit, me priant de le considerer,

Qu'ils auoient fait vne ouuerture sur cette occasion, qui estoit, induire lesdits Princes & Seigneurs Catholiques d'enuoyer de leur part à Monsieur de Mayenne & le Duc de Parme, pour leur faire entendre qu'ils estoient Catholiques, desirans comme eux, conseruer la Religion, avec offres de deputer aucuns Seigneurs pour en conferer & traiter avec eux au contentement mesmes du Roy d'Espagne: que Monsieur le Marechal d'Aumont auquel le Baron de Luz en auoit communiqué en la campagne avec assez de loisir, approuuoit ce moyen; s'estoit présenté luy mesme pour estre vn des deputez, disant que sa Majesté n'empescheroit cette voye; que là dessus il en auoit de son costé communiqué au Duc de Parme & aux Espagnols; & quoy qu'il leur eust pû dire, mesme que ce seroit vn moyen pour separer les Catholiques d'avec sa Majesté, afin de donner plustost lieu à cette conference avec leur gré, il ne leur auoit peu persuader, non pas à celuy qui estoit le plus sage d'entr'eux, qui estoit Iean Baptiste de Tassis: que cette ouuerture & conference nous eust mis au chemin d'une surseance d'armes, & enfin d'un traité bien certain, mais que Dieu ne l'auoit voulu permettre. Que là dessus on me deuoit mander pour estre autheur d'un si bon œuvre, auquel il m'eust tres-volontiers assisté, qu'il auoit veu par mes lettres que ledit sieur du Plessis ne vouloit point de surseance d'armes maintenant, que c'estoit contre ce qu'ils auoient desiré qu'ils le faisoient, ou pour ce qu'ils

pensoient auoir maintenant quelque aduantage en cela , & qu'ils témoignoient qu'ils ne remettroient iamais rien de leurs vtilitez ; que pour ce regard ils esperoient si bien se garantir de mal & inconuenient , qu'ils esperoient faire voir dedans peu de iours que l'aduantage leur demeureroit : qu'ils ne cedoient pas maintenant au Roy en bonté & nombre de forces : mais peut - estre qu'ils fuyoient le combat pour des considerations , & que sa Majesté en auoit de contraires qui luy faisoient le desirer : que l'autre raison qui pourroit faire crainte audit sieur du Plessis de ladite surseance d'armes estoit , que ce loisir deuoit estre employé à l'instruction & conuersion de sa Majesté , apres lequel s'il ne la faisoit il ne la falloit plus esperer , ce qui separeroit d'auec sa Majesté les Catholiques : qu'il auoit connu par le discours de mes lettres , que pour les Villes de seureté l'on n'en vouloit point donner , & que sa Majesté aux Villes Catholiques qu'elle tient , de la fidelité desquelles elle se vouloit asseurer par la force , & non par la bien-veillance , y vouloit tenir des garnisons ; que ie considerasse de là son but & intention.

QUE si on ne voyoit cela aussi clair que luy , il en dissimuleroit pour n'en remuër aucunes difficultez qui peussent retarder la paix , tant il la desiroit : que pour le particulier de Monsieur de Mayenne l'on offroit son gouuernement , & quelques moyens de payer les debtes par ses mains ; mais qu'il pourroit recommander au Roy pour les benefices qui

vacqueroient en son gouvernement, & le feu Roy luy auoit promis auant la mort de feu M. de Guise luy donner vn breuet secret, par lequel il luy accordoit de pouruoir aux benefices, offices, capitaineries & charge dudit gouvernement à sa nomination : que ie ne parlois point de tout cela, ny de l'engagement du domaine pour l'argent qu'il auoit employé, ny pour rendre ledit gouvernement hereditaire pour luy & ses enfans, & des places qui y estoient tenuës par les ennemis, des charges & grades qui le mettoient hors du commun ; ains au rang des Princes de sa qualité, dont il auoit quelquefois conféré avec moy ; qu'il estoit besoin luy tenir autre langage pour l'induire à traiter ; que ie iugeasse & que ie creusse que quand il n'y auroit autres difficultez que celle qu'il feroit, il n'y en auroit point : que i'adioustois qu'il falloit faire vn Edict d'abolition ou oubliance des choses passées : pour ce qui estoit de la prise & continuation des armes, qu'ils ne vouloient pas estre traitez à la huguenotte, leurs armes estant trop justes ; que toute abolition presupposoit vn crime, & laissoit tousiours quelque notte sur ceux auxquels on la donnoit : qu'ils desiroient que chacun creust auoir eu de l'honneur & de la raison à la prise des armes, & qu'ils auoient beaucoup de peine à les quitter, au moins ne vouloient-ils pas se condamner eux-mesmes en receuant vne abolition : qu'il y auoit des moyens pour ce regard plus honorables pour eux, & qui n'offenseroient personne ; qu'il faudroit aussi ré-

tablir la memoire de feu Monsieur de Guise & de son frere, parler sur la mort du Roy, comme il conuenoit, sans toucher audit Duc, ny contre ceux qui viuoient, ou s'en taire du tout, & se contenter de quelques mots qui fussent coulez en la narration dudit traité, non pas au dispositif, où ils feroient paroistre qu'ils n'y auoient point participé; que cette paix ne deuoit pas estre vn simple Edict des subjets à leur Roy, mais vn traité par lequel ils le reconnoistroient pour Roy à certaines conditions, ayant eu sujet & raison de ne le pas faire du viuant de Monsieur le Cardinal de Bourbon, ny depuis pendant qu'il estoit huguenot; que pour le regard des Gouuernemens, il n'estoit pas raisonnable que les Princes de Lorraine les eussent tous, qu'il y en auoit ausquels l'on ne pouuoit les dénier, parce qu'ils les auoient desia; des autres qu'il falloit voir si l'on pourroit y adjouster d'auantage que ceux qui en auoient, comme Monsieur de Mercœur, de Nemours, de Guise, de loyeuse & autres, ie creusse que dans vn temps comme de cinq ou six ans, ils demanderoient qu'il fust pourueu aux places qu'ils tenoient à leur nomination, aduenant le deceds pendant ledit temps de ceux qui les tenoient que cette seureté estoit l'vne des principales; que l'on leur pourroit donner, & qu'ils ne consentiroient iamais qu'aux villes & places qu'ils auoient occupées par force, ou qui auoient suiuy leur party, on ostant les Capitaines & Gouuerneurs qui y estoient de present, pour y remettre les anciens qui estoient

estoyent leurs ennemis: qu'il faudroit vne conference bien particuliere pour s'en éclaircir; que c'estoit chose estrange que l'on fist difficulté de rendre à Monsieur de Guise la charge de grand Maistre, & à ses freres les Benefices de Monsieur le Cardinal de Guise leur oncle, qu'il sembloit en traittant ainsi qu'ils fussent desia les maistres, mais que personne ne croyoit où il en estoit, & qu'il me pouuoit asseurer que si l'on parloit de cette sorte ausdits Princes, ils s'en éloigneroient du tout, & se rendroient pour iamais irreconciliables: car ce premier refus encores qu'on vinst à l'accorder apres, les offenseroit par trop; que ce n'estoit sans raison qu'ils auoient demandé de comprendre en leurs societez les Princes estrangers: car de ceux du dedans qui estoient du party, ils sçauoient quelle estoit leur affection enuers eux, & qu'elle seroit l'autorité de sa Majesté sur eux apres qu'elle seroit reconnuë pour Roy. Toutefois voulant qu'ils s'en abstinsent il estoit raisonnable qu'ils fussent au moins compris en la paix, & qu'on fist l'un maintenant, & que l'autre demeurast en longueur: car apres que le traitté seroit fait ils ne pourroient plus parler qu'avec supplication à celui qui seroit le maistre absolu, pour ne faire que ce qui luy plairoit, où aujourd'huy ils auoient part en l'accord comme parties presentes, & peut-estre que le Roy d'Espagne n'en voudroit point luy-mesme, & qu'il trouueroit plus de gens pour l'assister en ce Royaume & le brouiller qu'il n'en seroit besoin; toutefois qu'ils vouloient tout

faire avec honneur , & si en cas que ledit Roy d'Espagne voulust consentir d'y estre compris il y auroit plus d'assurance , mais il ne l'esperoit pas , d'autant qu'il y auroit trop de gens de leur party qui monstroient ne se vouloir separer d'avec luy , entre lesquels M. de Nemours estoit l'un qu'il auoit mandé exprés , afin que ie creusse que si le Roy se faisoit Catholique plusieurs feroient de mesmes ; & que s'il vouloit auoir bon marché d'eux & rompre toutes mauuaises entreprises , il se deuoit faire instruire dans quelques iours , puis se rendre Catholique ; que ie verrois grand changement aux affaires , & la paix plaire à tant de gens , que les contradicteurs auroient honte de continuer la guerre , où il seroit aisé de les ruiner ; que pour luy il desiroit qu'elle se fist , mais qu'il preuoyoit un million de difficultez , lesquelles il ne scauoit si l'on pourroit iamais surmonter : il desiroit que l'on prist ce chemin qu'il auoit obmis , à me faire réponse touchant le Gouvernement du Lionnois , qu'il seroit difficile , ou plustost impossible de faire quitter à M. de Nemours pour auoir desia basti en iceluy sa souueraineté , à laquelle ie creusse qu'il n'oublioit rien pour paruenir , qu'ils continuoient pour faire mander pour les Estats tous ceux qu'ils pensoient y pouuoir seruir ; mesmes M. de Lion , M. de la Chastre , M. de Lisieux , M. de Noyon , & autres de pareille qualité me priant de les aller voir , qu'il scauoit que j'estois trop constant pour me laisser surmonter aux difficultez qui se presenteroient en



cette affaire, que rien aussi ne l'empesche-  
roit d'y apporter tout ce que deuoit vn hom-  
me de bien, iusques à sa vie propre, & qu'il  
desiroit tousiours se conduire à mon iuge-  
ment plus que tout autre. Cette lettre estoit  
écrite de Caudebec le 8. de May, laquelle é-  
toit accompagnée encore d'un passe-port, par  
où il me prioit prendre en bonne part sa ré-  
ponse, & croire des personnes qui faisoient  
des difficultez pour mieux disposer toutes  
choses à auoir bien-tost la paix, qu'il en auoit  
depuis parlé à Monsieur de Mayenne, mais  
non avec tant de loisir qu'il eust desiré pour  
l'occupation qu'il auoit, & qu'il estoit fort  
mal disposé, & contraint vouloir ou non, se  
retirer en quelque Ville pour vn mois pour  
sa santé; qu'il ne perdoit le temps; qu'il estoit  
trauaillé tous les iours en cét affaire avec ar-  
deur; que i'essayasse seulement à faire épou-  
ser la Religion Catholique à sa M. qu'il ap-  
prouuoit ce conseil comme moy, & le iugeoit  
le plus certain remede; mais où sa Majesté  
ne s'y accorderoit, à tout le moins qu'un de  
la maison se disposast à se ioindre à eux, &  
que Monsieur le Cardinal de Gondy deuoit  
pendant auancer son voyage.

M O N S I E U R, pour appointer vne querel-  
le, il faut que les parties conte leur fait, dient  
leurs plaintes & raisons, & proposent libre-  
ment leurs demandes, car il faut decouurir la  
playe qui la veut guarir; ie fus bien aise d'é-  
claircy par écrit, comme ie fus par ladi-  
te lettre de l'intention dudit Duc du Maine,  
tant sur le general que sur le particulier, pour

donner quelque acheminement à ce traité; car c'estoit chose que ie n'auois encores pû gagner sur luy trois ans durant que ie l'auois continuellement pourſuiuy, d'autant que ledit Duc auoit tousiours fait difficulté de s'ouuir, s'excusant sur ce qu'il en vouloit conferer avec les deputez des Prouinces & Villes du party, ainsi que vous auez entendu par ce discours; toutefois il faut que ie confesse que ie ne pûs acheuer de lire ladicte lettre sans soupirer, voyant à quels termes la continuation de la guerre auoit conduit l'autorité Royale, & desolé ce Royaume: & m'auoit aussi en particulier reduit à malheur, me contraignant pour bien faire au public de proposer des choses contraires, contre lesquelles ie pensois cy-deuant me bander plus que nul autre, & vous assure que sur cela ie fus en doute si i'en aduertirois ledit sieur du Plessis ou non, craignant qu'il prist en tres-mauuaise part, non seulement les demandes portées par lescdites depeschés, mais aussi que i'en fusse le parrain: neantmoins à la fin ie me resolus de commettre toutes choses à sa discretion & prudence, plustost que de faillir à lier cette negociation, considérant qu'un bon marché ne se conclud du premier coup, que les hommes ne demeurent ordinairement à un mot: que pour en acheuer un il le faut commencer; joint qu'il me sembloit qu'encores que tout n'allast selon mon desir, i'auois toutefois beaucoup gagné d'auoir d'un costé fait parler ledit Duc, & de l'autre engager sa Majesté à rechercher les moyens de

sontenter le Pape , & partant deuoir plûtoſt découurir que celer les difficultez , afin de les ſurmonter ſi ie pouuois , ſans preparer comme à l'aduanture ie ferois ſi i'eſtois ainſi retenu , vne excuſe de rupture aux vns ou aux autres , voire avec deux parties enſemblement , & à moy vn regret extrême d'auoir laiffé eſchapper cette occaſion d'éleuer vn ſi bon œuure , ou du moins découurir & faire connoiſtre à vn chacun celuy qui y contrediroit , & à qui le blaſme en deuroit eſtre donné. Au moyen dequoy i'écriuis vn memoire contenant les principaux poincts de ladite lettre , que ie conceus en termes les plus doux dont ie me pûs aduiſer , pour ſeulement donner ſentiment audit ſieur du Pleſſis de la répoſe que l'on m'auoit faite , & des propoſitions que l'on faiſoit , le priant d'en bien uſer , & conſiderer qu'eſtant le Royaume ſi malade qu'il eſtoit , non ſeulement il ne pouuoit eſtre guarý du premier coup , mais eſtre auſſi neceſſaire que ceux qui vouloient y ſeruir auallaffent doucement & ſagement pluſieurs mauuiſes humeurs & amertumes , deuant que de ſurmonter cét humeur malin qui le troubloit ; & partant qu'il n'eust pas tant d'égard à la conſequence du remede qu'on propoſoit , qu'au beſoin extrême que le Royaume & le Roy auoient de la paix. I'adreſſay ledit memoire audit ſieur de Fleury pour la fiance que i'auois en luy , offrant d'aller encores trouver ledit ſieur du Pleſſis pour en conſerer avec luy plus particulierement s'il iugeoit qu'il fuſt à propos , le ſuppliant auſſi de tenir tout

secrét comme il m'auoit promis, s'il ne vouloit renuerfer entierement cette negociation.

M A I S ledit sieur du Pleffis se laissa tellement surprendre à ce changement, soit qu'il en eust esperé ou promis à sa Majesté toute autre chose, ou pour autre consideration, comme les courtisans sont ordinairement subjets à diuers mouuemens; qu'estans sa Majesté arriüée comme ie croy à l'heure mesme que cela luy fut dit à Buhy où il estoit, au lieu de remperer & adoucir les affaires, l'on m'écriuit que d'abord il auoit demandé pardon au Roy, en la presence de plusieurs de son Conseil de la tres-grande faute qu'il auoit faite, d'auoir crü & esperé que la paix se feroit apres auoir conféré avec moy; en quoy il confessoit s'estre grandement abusé, non par malice, mais par vn tres ardent desir qu'il auoit eu de la paix, & d'y seruir sa Majesté, que ie luy auois fait lire la réponse que l'on m'auoit faite sur ce que nous auions deuant conféré, laquelle contenoit des demandes & conditions si hôteuses pour sa Majesté, si dommageables pour le Royaume, & si iniques en tout & par tout, que non seulement elles témoigneroient que ledit Duc de Mayenne & les siens ne vouloient la paix, mais aussi estoit d'aduis que sa Majesté ne leur fist pas cét honneur de les ouïr, ny faire plus traitter avec eux, comme gens qui en estoient indignes, & qu'il estimoit estre engagé ailleurs, & partant ne faire parler de la paix que pour endormir sa Majesté, troubler les bons serui-

reurs & subjets , & donner ialousie aux Espagnols pour en tirer plus d'argent , & amender leur marché avec eux. Sur cela l'on me manda qu'il s'estoit mis à discourir & représenter en la mesme compagnie tout ce qui s'estoit passé entre luy & moy , les lettres que ie luy auois fait voir , les ouuertures que ie luy auois faites, & finalement tout ce que m'auoit écrit Monsieur le President Janin par sa derniere lettre, dont ie luy auois donné aduis; de façon que l'on me dit que sa Majesté mesmes ceux qui y estoient , demeurèrent quasi autant offensez de ces propos , que desdites demandes ; enfin suivant les enuies ordinaires de la Cour , ie fus plustost blasmé que loué.

I E m'estois retiré à Pontoise , où l'on m'écriuit ces choses , & que sa Majesté desiroit parler à moy , & que i'eusse à me trouuer sur le chemin de Senlis quand elle iroit à Compiègne: l'on me donna aduis combien le bruit qu'auoit fait ledit sieur du Plessis auoit fait changer les affaires, dont ie fus tres-marry, car ie n'attendois cela de luy ; ce n'estoit pas aussi garder la foy du Roy, qu'il m'auoit donnée, ny le moyen de guarir la playe : partant ie me resolus d'aller droit à Alineour, & chercher vn autre moyen de parler au Roy, qu'en la compagnie d'vn chacun, sçachant que ledit Duc de Mayenne ne le desiroit , & qu'il seroit assez offensé de ce que ce fait auoit esté diuulgué par ledit sieur du Plessis , dont ie sçauois qu'il seroit bien-tost aduertty : & d'autant que sur la fiance que i'auois dudit sieur

du Plessis , ie l'auois quasi asseuré que cela n'arriueroit point, ie m'attendois bien qu'il s'en prendroit à moy , & blasmeroit ma credulité ou ma franchise ; car il m'auoit plus recommandé le secret en cette negociation que tout autre chose, ce que ie iugeois deuoir estre encore plus desiré de luy que iamais, parce qu'il estoit demeuré à Roüen tres-malade; que ledit Duc de Parme & luy s'estoient separez tres-mal contens l'un de l'autre, que l'on parloit d'auancer Monsieur de Guise à son preiudice, & d'oresnauant manier les affaires sans luy.

E S T A N T arriué audit Alincour, ie sceus que sa Majesté estoit partie dudit Buhy vn iour plustost que l'on ne m'auoit mandé, partant ie ne le vis, mais i'enuoyay vers ledit sieur du Plessis qui estoit demeuré à Buhy pour sçauoir ce que i'auois à faire, luy mandant que ie desirerois aller à Roüen voir Monsieur de Mayenne, & luy rendre compte de ce que i'auois negocié, & m'éclaircir de sa derniere volonté, comme il me sembloit qu'il estoit necessaire, & en estois aussi sollicité dudit sieur Ianin. Le Roy ayant laissé à Gisors Messieurs les Marefchaux de Biron & de Bouillon, & Monsieur d'O, lesquels auoient assisté aux contes que ledit sieur du Plessis auoit fait à sa M. de nostre negociation, au moins les deux premiers avec quelques autres. Ils m'écrivirent & prièrent de les aller voir, afin de conferer avec eux de ce qui concernoit le bien du public, dont ils me mandoient que sa Majesté auoit trouué bon qu'ils commu-

niquassent avec moy. Je leur fis réponse que ce me seroit honneur de les voir pour recevoir le commandement, tant sur le bien public que pour leur service particulier, & particulièrement leur dire mon advis sur les affaires qui se presentent s'ils le desiroient; mais que n'ayant aucun pouvoir de Monsieur de Mayenne ny d'autre d'en traiter, ny d'y servir, ie les suppliois de m'excuser de ce voyage, que ie ne pouvois entreprendre, que comme personne priuée: neantmoins m'en ayant fait vne recharge expresse, i'y fus, esperant qu'ils m'aideroient peut-estre à reparer ce que ledit sieur du Plessis auoit gasté: toutefois ie ne le voulus faire sans son advis, afin de ne le mal contenter d'auantage, puis que sa Majesté m'auoit mis entre ses mains. Il vint à Alincour, & allasmes ensemble iusques à Gisors, sans me dire toutefois ce qui s'estoit passé audit Buhy, ny le desespoir qu'il auoit du succez des affaires; mais seulement qu'il eust esté bien aise que ieusse veu sa Majesté, comme il estoit necessaire que ie visse lesdits Seigneurs Mareschaux, avec lesquels ie ne fis pas grand profit pour ce regard: car ils auoient leurs gousts tant differens les vns des autres, que combien qu'ils protestassent vouloir la paix, chacun la desiroit à sa mode. Je le vis à part, afin d'apporter moins d'ombrage: & comme ie scauois qu'on leur auoit communiqué tout ce que i'auois negocié, ie leur en fis vne briefue repetition, les exhortant & suppliant de fauoriser ce bon œuvre, & ne permettre qu'il fust estouffé à sa naissance.

ce : & comme ils estoient tous deux maistres passez en matiere d'affaires & negociations, ne s'estoñner, ny se rebuter des premieres difficultez, mais aider à les surmonter, m'estant aduis que le Roy ne pouuoit faire vn mauuais marché, s'il pouuoit recouurer l'obeïssance qui luy estoit deuë, mettre son Royaume en paix, & en bannir les armes estrangeres : qu'il auoit tousiours desiré & demandé, que Monsieur de Mayenne parlast & demandast pour le public & pour son particulier, ce qui luy seroit besoin, disant par tout le vouloir contenter, qu'il s'estoit enfin ouuert, non sans peine, que sa Majesté & eux en fissent donc leur profit, & ne laissassent tomber le fruiet que l'on auoit eu tant de peine à cultiuer, croyant que s'ils le méprisoient qu'ils languiroient apres, & peut-estre inutilement. Tous blâmerent ce voyage de Rome, trouuant le circuit trop long : & comme ie leur disois que le moyen de l'accourcir, estoit que sa Majesté aduançast donc son instruction & conuersion; ils me répondirent que c'estoit vn œuvre de Dieu, qu'il falloit que le saint Esprit & le temps y missent la main : l'on vouloit que l'on traitast sans attendre la volonté du Pape, ny ladite conuersion; & l'autre, que sa Majesté allast à la Messe apres s'estre fait instruire, sans s'arrester à sa Saincteté, & tous estoient ce me semble ialoux de ce que ledit sieur du Pleffis auoit seul negocié ce fait. Je leur dis que c'estoit s'abuser d'esperer que Monsieur de Mayenne conclud aucun traité avec le Roy qu'il ne fust Catholique, ou que



le Pape n'y eust mis la main, & ie voyois qu'ils ne me donnoient aucune assurance de la conuersion de sa Majesté, ny autres paroles que generales pour presenter à Monsieur de Mayenne, lequel i'auois deliberé le voir bien-tost; que ie craignois que cela le refroidiroit de la paix, & le iettast en des irresolutions fascheuses, prenant leur silence pour vn mépris, & leurs remises pour manquement de bonne volonté; ce que ie ne pourrois empescher puis qu'on ne m'en donnoit le moyen, dont ie me déchargeois entre leurs mains, les supplians de le dire au Roy, & se souuenir du regret que i'en auois. Enfin ils m'assurerent puis qu'il en falloit passer par là, qu'ils auanceroient le voyage de Rome, & feroient tout ce qu'ils pourroient enuers sa Majesté pour faire contenter Monsieur de Mayenne comme ils connoistroient estre tres-raisonnable. Rencontrant Monsieur d'O & Monsieur de Beaulieu par la ruë, ils me demanderent s'il estoit vray que ie fusse d'accord avec Monsieur du Plessis du poinct de la Religion, parce qu'il auoit dit que cela estoit resolu, & qu'il n'estoit plus qu'à pourvoir aux interests particuliers: ie leur répondis que si pour auoir le iugement & la decision de ce poinct du Pape, l'on vouloit dire que nous en fussions d'accord, qu'il estoit veritable. Car nous nous estions soumis comme à celuy que nous reconnoissons pour nostre Chef en l'Eglise, & croyons ne pouuoir errer estant assisté de Dieu comme il estoit, mais qu'il n'y auoit point d'autre accord pour ce regard, &

que c'estoit abuser du Roy, & se mo  
du public de luy donner esperance de la  
que sa Majesté ne fust Catholique, & que  
te difficulté ne fust vuidée au gré & conte  
ment de sa Sainteté, croyant que ce p  
resolu, l'on viendroit apres à bout facilement  
des autres, & principalement des inter  
particuliers. Car il faudroit que chacun  
contentast de raison, quiconque lors ne le  
roit seroit en danger d'estre mal suivi; ce  
ie luy priay faire entendre ainsi *clairement*  
par tout où il seroit à propos, d'autant qu  
affectionnoient le service du Roy, le bien  
salut du Royaume. Estant de retour à Ali  
cour, ie receus vne lettre dudit President  
nin, en laquelle il me mandoit que Monsieur  
de Biron leur auoit fait dire par le sieur de  
Courbouson, que chacun se scandalisoit de  
ce que Monsieur du Maine faisoit traiter  
avec ledit sieur du Plessis, & qu'il voyoit bien  
que la ialousie que lesdits sieurs auoient l'un  
de l'autre seroit cause de diuulguer, & par  
tant trauerser & détruire en tout les affaires;  
car chacun commenceroit d'en decouurir, &  
des plus particuliers projets que i'auois trai  
tez avec ledit sieur du Plessis, lequel mesme  
ils sçauoient l'auoir dit & écrit à plusieurs, &  
qu'en passant à Vernon il auoit asseuré Mon  
sieur le Cardinal de Bourbon auoir conclud  
le marché avec moy. Et que le premier arti  
cle estoit que le Roy seroit reconnu à la  
charge de se faire instruire dedans six mois,  
sans donner autre asseurance de sa conuersion,  
dequoy mesmes les Catholiques seruiteurs

de sa Majesté murmuroient que ie pensasse à ce qu'en diroient ceux du party, & mesmes nos zelez, qui les premiers auoient fait prier Monsieur de Mayenne ne passer si legerement par dessus les articles, apres auoir tant tra-uailé & fait pour asseurer la Religion, la conseruation de laquelle ils connoissoient dependre de ladite conuersion de sa Majesté, mandant ledit sieur President que Monsieur de Mayenne estoit fort mal content & courroucé de ces bruits, dont il me prioit l'éclaircir au plustost, & mesmes de l'aller trouuer pour cét effet. Au mesme temps l'on m'écri-uit de Paris, qu'un personnage de qualité, que ie ne nommeray point, parce qu'il est viuant, auoit enuoyé dire par homme exprés à Mesdames de Nemours & de Guise, que ledit Duc de Mayenne traitoit sans parler de Messieurs leurs enfans, & mesmes au preiudice de Monsieur de Nemours, & que i'en estois le ministre pour l'intérest que i'y pretendois pour mon fils, afin qu'elles aduisassent & pourueussent à leurs affaires, dont elles firent beau bruit, belles plaintes & reproches dudit Duc, qui aggrauoient sa maladie, & me faisoient du tout desesperer du progres de cette negociation, laquelle estoit si necessaire à tous, & toutefois si trauersée de toutes parts, que i'ay souuent crû que Dieu nous auoit jugez indignes de jouir de la paix en nos iours. De là ie fus à Roüen, où ie trouuay ledit Duc commençant à se mieux porter. Il me fit d'abord tres-grande plaintes des aduis que l'on auoit donnez de ma negociation.

contre la foy qui m'auoit esté donnée, à laquelle il s'estoit confié apres moy, dont il s'estoit tres-mal trouué & s'en repentoit, mais qu'il en feroit son profit, & seroit cy-apres plus retenu qu'il n'auoit esté. Je luy dis par le menu comment i'auois negocié & m'estois conduit en toutes choses depuis le premier pas iusques au dernier, tant avec ledit sieur du Plessis qu'avec les autres que i'auois veus: Et comme il eut reconnu que ie n'y pouuois apporter autre soin & deuoir que i'auois fait, & aussi que ie n'estois moins picqué desdits aduis & bruits queluy, d'autant que le mal qui en arriuoit, passoit premierement par dessus moy, qui auois les reins vn peu foibles pour vn tel fardeau: ie le suppliy de faire à ce Royaume le bien qu'il auoit proposé, que nous ne sçauions pas seulement de quelle boutique lesdits bruits & aduis estoient sortis, mais que connoissant les auteurs d'iceux, craignoient plus la paix qu'ils ne vouloient que l'on les creust, & qu'il en sçauoit les raisons mieux que nul autre; qu'il estoit certain qu'ils en auoient vsé ainsi par art, exprés pour le dépiter, & luy nuire, non tant pour les considerations particulieres, comme pour la cause publique. Que ie n'auois veu le Roy pour parler & répondre particulièrement de son intention; mais estant Prince bien aduisé, & qui vouloit sortir d'affaires, ie l'osois assurer que non seulement il seroit marry & offensé desdits bruits pour les raisons publiques, mais aussi pour le peu de soin qu'on auoit eu de sa parole, & partant qu'il nous en

feroit raison ; qu'enfin il ne pouuoit estre blâmé & repris d'auoir desiré la paix avec l'honneur de Dieu, qui deuoit estre le but de ses armes : & quand il seroit sceu qu'il auroit remis au jugement de sa Sainteté le poinct de la Religion comme il auoit fait, chacun l'en loueroit plutôt que de l'en reprendre. Car quelle autre meilleure réponse pouuoit-il faire ; quel moyen & plus court chemin pouuoit-il prendre pour ne faillir point ; eust-il du tout reietté la paix, & reputé ceux qui luy en parloient ; ç'eust esté vn trop mauuais conseil, qui eust esté plus accusé d'ambition qu'attribué à zele de Religion, & duquel ses amis & compartisans eussent peu estre plus affligez, que plusieurs n'estimoient qu'il ne pouuoit trop justifier ses actions & intentions, quoy qu'il pretendoit faire ; que c'étoit le moyen de releuer ses amis de peine, & les lier à sa fortune, & affoiblir ses ennemis, qu'il sçauoit qu'elle estoit l'affection que les Espagnols luy portoient : car Monsieur le President Ianin l'en auoit éclaircy au retour d'Espagne, le dessein qui auoit causé la mort du President Brisson l'en auoit confirmé, & depuis les comportemens dudit Duc de Parme en son endroit, l'ayant delaisné à Roien quasi comme vn homme perdu, dequoy ils eussent esté bien aises d'estre depeschés ; que desia le Cardinal de Plaisance & les Partisans desdits Espagnols parloient ouuertement de preferer Monsieur son nepueu à luy, voire d'en faire vn Roy avec l'Infante à ses dépens, se reuestissant & couronnant de ses travaux.

sans auoir égard à ses merites , dont ils faisoient peu de conte , parce que c'estoit leur honneur , c'est à dire , qu'il ne vouloit laisser vsurper l'Estat ; qu'estant tel leur but , & luy si mal avec eux , sans espoir d'y estre mieux , qu'à la ruine de la France ; pourquoy se pouuoit-il arrester dauantage à eux , pouuant avec honneur & vtilité tres-grande pour luy & pour les siens , conseruer la Religion & le Royaume en leur entier ? que le Roy auoit promis , & estoit resolu d'enuoyer à Rome pour contenter le Pape au fait de la Religion ; que ce deuoir engendreroit sa conuersion ou sa ruine , d'autant que manquant à celle-là , il estoit tres-certain que les Catholiques qui le seruoient ne faudroient de l'abandonner , dont s'ensuiuroit sa ruine à la gloire dudit Duc , lequel aussi auoit meilleure part que tous autres en sa conuersion si elle aduenoit , de sorte qu'il ne pouuoit faillir d'attendre quel seroit le succez de cette recherche afin d'en faire son profit ; mais qu'il feroit encore mieux de son costé , s'il le fauorisoit à Rome , comme quelquefois il m'auoit fait écrire par ledit sieur President auoir volonté de faire : que ie l'estois venu trouuer exprés pour apres auoir rendu conte de ma negociation , sçauoir sa deliberation , & ce qu'il vouloit que ie fisse , tant pour le public que pour son particulier , estimant que sa Majesté n'épargneroit chose aucune qui fust en sa puissance & jugeast raisonnable pour le contenter.

M O N S I E U R , si l'on m'eust donné de quoy le faire , i'en eusse paré ma remonstrance , la

quelle eust eu bien meilleure grace, & n'eust peut-estre esté inutile comme elle fut ; mais ie ne pouuois sans mentir en la déguisant sortir des termes genereux, puis que Monsieur le President Ianin m'auoit écrit ne luy auoir osé parler des premieres ouuertures que i'auois fait audit sieur du Pleffis, & qu'il ne m'auoit fait donner aucune charge ny réponse sur les dernieres. Or comme il est Prince tres-aduisé, il prit party incontinent, & me dit, qu'il reconnoissoit bien que le Roy ou ses seruiteurs ne vouloient point la paix, & qu'ils n'en auoient parlé que pour la ruiner, s'estant seruy de sa franchise pour le diuiser d'avec les siens, & luy faire perdre l'honneur & le credit : Car il ne se passoit iour qu'il ne receust quelques aduis de l'alarme qu'on leur auoit donné de ma negociation, & du mécontentement d'un chacun : mesme il m'en fit voir plusieurs lettres de ses parens, qui se plaignoient qu'il faisoit ses affaires non seulement sans eux, mais à leur dommage, que Monsieur le Legat l'en blâmoit, partant comme faisoient les Ministres du Roy d'Espagne, & plus que nous autres les deputez venus des Prouinces à son mandement, lesquels disoient tout haut que c'estoit vrayement trahir la cause que de preuenir le jugement & la resolution de l'assemblée, estant à la veille de la faire, comme ils l'accusoient de faire, & que chacun alloit bastissant sur cela des desseins à part, tous à ses dépens, où ie n'étois pas aussi oublié : que ie sçauois toutefois qu'il n'auoit point eu l'intention mauuaise,

comme il vouloit aussi répondre de la mienne; qu'il auoit désiré & demandé d'estre assuré de la conuersion du Roy, qu'il nommoit de Nauarre, & des moyens de conseruer la Religion & le party; qu'au lieu de ladite assurance l'on auoit proposé de remettre le tout au Pape, ce qu'il auoit approuué, croyant comme ie luy auois remonstré qu'il ne deuoit estre blâmé, & qu'il ne pouuoit faillir en ce faisant: qu'en parlant de son particulier, il n'auoit oublié celui de Messieurs ses parens, ny le contentement & interest du Roy d'Espagne, & des autres Princes qui l'auoient secouru, non plus que de ses autres amis, desquels aussi il ne se vouloit separer, quoy qu'il peust arriuer, aimant mieux manquer à soy-mesme & à ses enfans, qu'à l'obligation qu'il leur auoit, ny à vn seul poinct de deuoir enuers la Religion & le public, que les ouuertures qui auoient esté faites estoient aussi venuës de moy & non de luy, non pour faire tort à personne, mais pour sonder quel moyen il y auoit de composer les affaires; qu'il me remercioit de la peine que i'en auois prise, & m'asseuroit n'auoir pour tous ces bruits changé d'intention, tant il desiroit seruir au repos du Royaume, en conseruant & assurant la Religion & le party Catholique; mais qu'il ne pouuoit plus traiter ny conferer avec personne des moyens d'y paruenir qu'il ne sceust l'intention du Pape sur l'instruction & conuersion de sa Majesté, & qu'il n'en eust communiqué avec ceux du party, lesquels il esperoit assembler bien-tost.



pour prendre avec eux vne resolution sur le general, pour apres ne s'en departir iamais: qu'il me prioit de voir sa Majesté, toutefois le plus à propos & secrettement que ie pourrois, pour luy dire sa deliberation, & que c'estoit le tromper que de luy promettre la paix, ny que ceux de la Ligue le reconnussent iamais, qu'il ne fust Catholique, reconcilié à l'Eglise; estant certain que quand il se dispenserait d'en user autrement, il seroit fuiuy de si peu de gens, que les miseres publiques augmenteroient plutôt qu'elles ne finiroient; partant sa Majesté deuoit penser à elle sans se flatter, ny plus s'attendre qu'autre peust remedier au mal qu'elle: qu'il approuuoit pour cette cause que l'on enuoyast à Rome; que Monsieur le Cardinal de Gondy prist cette peine, & que le Marquis de Pisany y fust employé; que de son costé il y depecherait & feroit ce qu'il deuoit, mais que la diligence estoit tres-requise, afin d'estre éclaircy de l'intention de sa Sainteté à l'ouuerture de l'assemblée, qu'il estoit resolu dedans vn mois ou deux au plus tard: qu'il me prioit luy faire sçauoir aussi le plustost que ie pourrois la dernière volonté & réponse de sa Majesté touchant sa conuersion, pource que n'en estant assuré il falloit qu'il aduisast à prendre quel qu'autre party, les choses ne pouuant plus temporiser ny subsister en l'estat qu'elles estoient, à cause du mécontentement que les Espagnols auoient de ce qu'il ne les assistoit en leur dessein selon leur desir, des forces & moyens desquels il ne pouuoit se passer, par-

tant qu'il les vouloit ménager & conseruer avec ses autres amis; qu'il en sçauoit & auoit le moyen graces à Dieu , sans plus donner barre sur luy à ses ennemis , comme il auoit fait se fiant en leur parole , & pensant bien faire.

I L me semble n'y auoir que repliquer à cette réponse , veu le tort qu'on luy auoit fait, & le peu de moyen qu'on m'auoit donné de le contenter en sa protestation, de vouloir continuer à seruir à la paix de tout son pouuoir , joint que ledit Président Ianin avec lequel i'auois conseré plus particulièrement, m'auoit dit qu'il estoit attaché à ce but , & qu'il n'y auoit plus de moyen de l'en faire departir , dont il accusoit les auteurs desdits bruits , & les enuies & ialousies de la Cour, en laquelle i'appris que l'on auoit plus blâmé & trauersé ma poursuite qu'en nul autre endroit.

L O R S aucuns mirent en jeu vne nouvelle pratique avec Monsieur le Cardinal de Bourbon , mais ledit Duc ne s'y vouloit engager non plus que l'autre, soit qu'il n'en eust point d'enuie , comme certainement il n'auoit iamais eu , ou qu'ils craignist d'offenser les Espagnols & ses parens ; en ce faisant , autant que s'il prestoit l'oreille à sa Majesté : car ils estoient aussi contraires à l'un qu'à l'autre: ou qu'il vouloit remettre toutes choses à ladite assemblée , comme pourroit bien témoigner Monsieur le Comte de Brissac & d'autres qui y estoient employez,

D E là ie reuins à Alincour en delibéra-

tion de voir sa Majesté, & m'acquitter de la charge que ledit Duc m'auoit donnée, dont l'aduertis ledit sieur du Plessis, lequel me fit parler à Gisors, ce fut de nuit, afin d'estre moins veu; toutefois chacun ne laissa de le sçauoir le lendemain, apres luy auoir rendu compte sommairement de tout ce que i'auois negocié avec ledit sieur du Plessis, & des voyens que i'auois tenus pour renforcer cette negociation. Le luy dis les plaintes dudit Duc, fondées sur les faux bruits & le manquement de sa parole, sa resolution de ne plus traiter ny faire conferer avec luy & ses seruiteurs qu'il ne sceust la volonté du Pape sur son instruction & conuersion, & qu'il n'en eût communiqué avec ceux du party, qu'il m'auoit assuré n'auoir toutefois changé d'intention de bien faire, & que ie croyois en verité qu'il n'estoit encore engagé avec les Espagnols, mais que i'estimois qu'il seroit contraint de ce faire bien-tost, si sa Majesté ne contentoit le Pape pour sa Religion en se reconciliant à l'Eglise: car ie reconnoissois qu'il estoit resolu de ne faire iamais accord avec elle qu'elle n'eust changé de Religion, me l'ayant dit ouuertement afin de l'en aduertir; & dauantage, qu'il ne pouuoit plus prolonger ny remettre sa resolution à vn autre temps, tant il estoit pressé d'vn chacun, & connoissois aussi que le party en auoit besoin: partant ie suppliois sa Majesté d'y donner ordre sans plus promettre autre chose, quoy que d'autres luy fissent entendre que ledit Duc m'auoit donné charge de luy mander si.

delement sa derniere volonté , & la ré-  
qu'il me feroit pour sur icelle aduifer à  
affaires , afin de ne demeurer entre deux  
les ; au moyen dequoy ie la suppliois de  
la faire telle que ledit Duc n'eust occasi-  
on boucler avec d'autres, comme ie sçauois  
en estoit sollicité , luy representant sur  
combien il luy importoit d'éteindre ce  
quelque prix que ce fust , & là où elle  
pourroit faire , que l'on reconnuist au m-  
n'estre sa faute , comme plusieurs l'en-  
soient à cause de sa Religion; que si elle a-  
à changer , elle ne deuoit attendre à ce f-  
que le party tout ensemble eust engagé sa  
ailleurs, comme il estoit à la veille de ce  
re , & seroient contrains d'accomplir  
pretexte de la Religion & par necessité  
sa Majesté aduançast donc les voyages de  
me , comme elle auoit arresté ; que si elle  
mettoit la main elle mesme , ie preuo-  
qu'ils seroient rompus ou retardez , p-  
que ie verrois plusieurs Catholiques &  
guenots qui ne les approuueroient ; & ne-  
moins ores qu'ils deussent estre. inutiles  
les jugeois estre du tout necessaires p-  
acheminier les affaires , & apporter quel-  
esperance & consolation aux gens de bien  
desiroient la paix , & non la subuersion de  
stat qui estoit abboyé d'infinis , de par-  
d'autre: que ledit Duc m'auoit promis d'y  
pescher de son costé , & faire vn bon off-  
mais i'estimois qu'il'attendoit de mes nou-  
les deuant que de faire partir les gens , p-  
selon cela leur commander ce qu'ils auroi-  
à faire.

SA Majesté me dit le déplaisir qu'elle auoit desdits bruits ; qu'il ne sçauoit à qui s'en prendre , mais qu'elle reconnoissoit assez n'y auoir faute de gens auprès d'elle comme ailleurs : qui craignoient autant la paix & la prospérité de ses affaires , qu'elle la desiroit, & que cette faute n'estoit venue d'elle & de son consentement, ny à son aduis de ceux qu'il y auoit employez, voulant entendre ledit sieur du Plessis, que puis que Monsieur de Mayenne ne vouloit continuer à traiter que le Pape n'eust parlé & qu'il n'en eust eu communiqué avec ses partisans ; qu'elle feroit partir au plûtoſt Monsieur le Cardinal de Gondy , le Marquis de Pinay , & qu'il ne seroit rien obmis de sa part pour contenter le Pape & les Catholiques qui affectionnoient son instruction, ie creusse qu'elle y marchoit de tres-bon pied & non pour crainte de ses ennemis , ou pour mieux faire ses affaires , mais pour le desir qu'elle auoit de contenter ses subjets , les déliurer de la guerre , & mettre son ame en repos , comme elle feroit paroistre par effet. Mais que ledit Duc deuoit prendre garde que l'assemblée qu'il pretendoit faire fust composée principalement de personnes de qualité & d'honneur , autrement elle preuoyoit qu'il s'y prendroit des résolutions tres-perilleuses pour le Royaume & pour luy-mesme , qu'il se vouloit contenter de m'en donner aduis, estimant que Monsieur de Mayenne en seroit aduertty, & qu'il y pouruoyeroit comme chose qui luy importoit autant ou plus qu'à nul autre : que chacun luy

disoit que ledit Duc estoit si engagé avec les Espagnols qu'il ne s'en pouvoit plus separer, que le Comte de Brisfac l'auoit dit à S. Luc, que le Legat le disoit tout haut, & qu'il se mocquoit de tout ce que ie disois & faisois; toutefois qu'il ne se vouloit arrester à tout cela, considerant les raisons qui le deuoient garder de se ietter à tel precipice: la candeur & franchise en laquelle elle reconnoissoit maintenant que i'y procedois, dont elle auoit plus de contentement qu'elle n'auoit eu cy-deuant, aussi que le temps decouueroit assez-tost la tromperie ou dommage de celuy qui en seroit l'autheur, sans qu'il fust besoin d'aller au deuant; que si ledit sieur de Mayenne se vouloit accorder avec elle, il s'en trouueroit tres-bien: car il le contenteroit d'honneurs & de biens, plus qu'il n'en tireroit iamais d'autre, & mesmes desdits Espagnols, lesquels le haïssoient & déchiroient autant qu'ils pouuoient, encore qu'il fust meilleur Capitaine qu'eux tous ensemble, & qu'il eust trop fait pour eux; qu'elle me prioit luy faire sçauoir sa réponse & volonté, de crainte qu'il ne s'engageast ailleurs, & que ie continuasse à y faire tous bons offices comme i'auois commencé, me promettant de le reconnoistre. En verité sa Majesté me tint ce langage d'une telle franchise & de si bonne façon, que ie creus certainement qu'elle parloit selon son cœur, me faisant paroistre qu'elle auoit non seulement goûté mes raisons, mais aussi qu'elle auoit volonté de contenter les Catholiques, dont ie partis tres-satisfait, me contentant

tentant de la laisser en cette deliberation, & la supplier sur tout d'aduancer lesdits voyages de Rome, comme chose necessaire pour donner allegement aux affaires.

A P R E S cela ie suppliai sa Majesté me donner vn passe-port pour me retirer en ma maison en attendant ladite assemblée, & le retour de Monsieur de Mayenne à Paris, parce que ie ne voulois y aller, tant à cause desdits Espagnols qui y estoient, lesquels Monsieur de Mayenne m'auoit dit y auoir esté receus contre sa volonté, & qu'il en sçauoit tres-mauuais gré au Preuost des Marchands, Escheuins, & mesmes à Monsieur de Belin, lesquels il disoit s'estre laissez surprendre en cela par ceux qui fauorisoient lesdits Espagnols, contre ce qui leur auoit mandé par le leur de Bourg, lequel il auoit enuoyé vers eux exprés pour cét effet; & parce que ie ne voulois estre sujet de rendre compte de ce que i'auois negocié à autre qu'audit Duc de Mayenne, dequoy allant là il seroit impossible de m'exempter à cause des bruits qui y couroient de ma negociation, qui augmenteroient bien dauantage quand l'on sçauroit que i'auois parlé à sa Majesté, dont ie ne doutois point que toute la ville ne fust bien-tost abreuée, comme il aduint. Sadite Majesté m'accorda ledit passe-port, mais elle me fit promettre que si ie connoissois que ledit Duc n'eust volonté de traiter avec elle en pouruoyant au poinct de la Religion, comme aucuns disoient, que ie l'en aduertirois, afin qu'elle ne s'y attendist plus, & qu'elle adui-

last à contenter ses subjets, & pouruoir par autre voye à ses affaires.

LE bruit de ma negociation auoit tellement émeu tout le monde, que Monsieur de Mayenne me manda auoir esté contraint d'en donner aduis par tout, assurant vn chacun qu'il ne traiteroit rien sans l'autorité du Pape, l'aduis des Princes souuerains qui assistoient le party, & de l'assemblée qu'il esperoit tenir bien-tost, comme celuy qui auoit eu pour visée de ses actions sa conscience, son honneur, & l'vtilité publique, sans laquelle, & le salut commun de tous, il n'en vouloit point esperer pour luy, n'en auoit iamais recherché à part, & n'en rechercheroit iamais ailleurs qu'avec tout le party, & m'enuoya vn double de la lettre pour en répondre.

M E S D A M E S de Montpensier & de Guise m'enuoyerent aussi Bremont Secretaire, exprés pour me dire, qu'en traitant les affaires de Monsieur de Mayenne, i'eusse soin aussi de celles de Monsieur de Guise, & mesme de proposer son mariage avec Madame sœur du Roy, moyennant quoy elles esperoient qu'il reconnoistroit le Roy, & le seruiroit tres-fidelement. Je fis réponse audit Bremont, que Monsieur de Mayenne n'alloit pas si viste en besongne que lesdites Dames pensoient; que i'auois bien discoursu avec aucuns seruiteurs de sa Majesté des moyens de pacifier le Royaume, en quoy ie n'auois oublié les affaires de Monsieur de Guise non plus que celles des autres, ayant tousiours reconnu que ledit Duc de Mayenne en estoit aussi soigneux que



des siennes propres, mais que i'auois fait cét office de moy-mesme, desiréux de la paix publique, & du bien & contentement desdits Princes, dont ayant rendu compte audit Duc, il m'auoit remercié, & prié toutefois de ne passer outre: qu'il desireroit enuoyer à Rome pour sçauoir la volonté du Pape sur le tout, & pareillement en conferer avec les Princes & l'assemblée du party, deuant que de s'engager en ce traité. Quoy estant, comme ledit Duc m'auoit lié les mains, ie ne pouuois aussi traiter pour ledit Duc de Guise, ny autre, & n'estois d'aduis que lesdites Dames en vlassent aucunement. Voila comme ma poursuite & les bons aduis que l'on en auoit donné à Paris, auoient réueillé & mis la puce à l'oreille à tout le monde, & comme chacun pensoit bien autant à ses affaires particulieres qu'aux publiques, dont i'eus en somme grand mal au cœur. l'aduertis ledit Duc de Mayenne des bons propos que sa Majesté m'auoit tenus, & encore que par iceux il ne me donnast assurance de sa conuersion; neantmoins ie luy voulus mander que i'estimois qu'elle estoit resoluë de donner contentement aux Catholiques, puis qu'elle vouloit que Monsieur le Cardinal de Gondy & Monsieur le Marquis de Pisany allassent à Rome, esperant que l'un en engendreroit l'autre, afin qu'il bastist sa resolution sur ce fondement, sans arrester ailleurs: Je luy escriuis aussi que sa Majesté enfin prist en bonne part le delay de negocier, qu'il auoit demandé pour auoir loisir d'enuoyer à Rome & conferer avec ses

partisans en ladite assemblée, sans oublier le commandement que sa Majesté m'auoit fait; qu'il prist garde de la composer, de façon qu'il n'eust occasion de s'en repentir pour son particulier, & pour le public de l'auoir conuoquée pour les raisons qu'il luy auoit plû me dire.

A LLANT en ma maison, ie vis ledit Cardinal de Gondy à Noisy pour s'informer de tout ce que i'auois fait, & appris depuis nostre veuë, tant avec sa Majesté qu'avec Monsieur de Mayenne, & le supplier de haster son voyage, luy remontrant combien il estoit pressé à cause de ladite assemblée, que ledit Duc pretendoit commencer dans vn mois ou deux au plus tard, & de l'enuoy qu'il faisoit à Rome de Monsieur l'Euesque de Lisieux & Desportes, lesquels ie desirois n'arriuer là plustost que luy, encore que l'on m'eût asseuré qu'ils n'y estoient enuoyez que pour sous-main secourir & fauoriser le bien. Le sieur Zamet se trouua lors à Noisy, qui fit pareil office enuers ledit Cardinal que moy. Ledit Cardinal nous fit voir des lettres qui venoient d'Italie: par là on luy donnoit occasion d'esperer vn bon succez de son voyage, dont ie fus tres-aïse: car c'estoit ce que ie desirois le plus, & reconnoissois aussi pouuoir plus aduancer nostre repos, d'autant que s'il plaisoit à sa Sainteté d'entreprendre & fauoriser ladite assemblée, c'estoit sans doute que personne ne pourroit l'empescher, tant chacun estoit desirieux & disposé de l'embrasser.

Le Cardinal de Plaisance & ses Espagnols ne pouuoient gouster aucunement lefdits voyages de Rome, lesquels ils blâmoient & trauerfoient ouuertement. Je m'apperceus bien-toft aussi qu'ils vouloient r'amadoïer ledit Duc de Mayenne, voyant qu'il commençoit à se bien porter, peut-estre contre leur esperance, craignant qu'il s'engageast à traiter avec sa Majesté deuant ladite assemblée, de laquelle ils se promettoient merueilles, de sorte qu'ils refuserent à Monsieur de Guise le commandement des forces que le Duc de Parme auoit laissée en Champagne, encore que ce fust en son gouuernement, que ledit Duc en fist grande instance durant l'absence & indisposition de Monsieur son Oncle, & qu'ils eussent grande enuie de l'aduan- cer, & vouloient que le sieur de Rosne y com- mandast en qualité de Mareschal de Camp de l'armée. Ils commencerent aussi à mettre en auant sous-main plusieurs sortes d'honneurs & aduantages qu'ils disoient vouloir faire audit Duc de Mayenne, afin de le retirer: Voi- la le fruit que produisoient les bruits que l'on auoit semez de ma negociation, qui ont plus nuÿ au public, que n'y seruiroit iamais les auteurs d'iceux.

LE DIT Duc estant marry & ayant failly l'entreprise de Quillebeuf, prit le chemin de Picardie par la ville de Beauuais, & en- uoya à Paris ledit President Ianin, où ie me rendis incontinent à sa priere, & sur l'aduïs qu'il me donna que ledit Duc y deuoit arri- uer bien-toft apres.

IL me dit que Monsieur de Mayenne vouloit voir Monsieur le Duc de Lorraine, & assembler tous ses parens auprès de luy, pour aduifer & resoudre ensemble ce qu'ils feroient en ladite assemblée, deuant que la commencer, comme il vouloit faire au plû-tost, tant pour l'esperance qu'il auoit qu'elle seroit tres-vtile au public, & pour contenter ledit Cardinal de Plaisance & les Ministres du Roy d'Espagne, qui l'en pressoient extremement, afin d'estre resolu & éclaircy de ce que l'on vouloit faire pour le Roy.

ON parloit lors de tenir ladite assemblée à Soissons ou à Reims pour la commodité du Duc de Parme, lequel s'y deuoit trouuer: mais Monsieur de Mayenne fut conseillé de la faire tenir à Paris, sans auoir égard aux dangers des chemins, ny à la chereté & incommodité des viures, tant pour contenter les habitans de la ville qui en faisoient tres-grande instance, & par ce moyen les consoler & tenir en deuoir, dont ils auoient besoin, pour rendre ladite assemblée plus libre, & ne hazarder ladite ville de Soissons ou de Reims. Car l'on consideroit que ledit Duc de Parme y venant accompagné selon sa coutume, pouuoit s'en faire maistre, & mesme tiendrait l'assemblée en subjection, ce qui luy seroit difficile de faire en ladite ville de Paris, tant pour sa grandeur que pour estre plus éloignée de la Frontiere, & enuironnée de villes & places du party de sa Majesté, remplies de forces & garnisons, desquelles en vn besoin l'on pouuoit estre assisté pour empes-

cher vne violence ; ioint que ladite ville de Paris estoit plus disposée au bien qu'elle n'auoit encore esté, combien que les zeletz y continuassent leurs jeux accoustumez sous la protection & faueur des garnisons Espagnols, car le reste de la ville estoit las d'eux & de la guerre ; ce fut ledit President Ianin qui fut auteur de ce Conseil pour les raisons susdites, & pour auoir reconnu que la presence dudit Duc en ladite ville y estoit necessaire pour la seuerité d'icelle, à cause des diuers mécontentemens dont elle estoit agitée, les vns fondez sur la trop longue continuation de la guerre, & les autres sur ce que l'on n'éliroit assez-tost vn Roy à leur poste.

CE Conseil fut incontinent embrassé dudit Duc de Mayenne, au grand déplaisir des Espagnols qui vouloient nommément ladite assemblée estre tenuë en lieu où ils peussent estre fauorisez de l'armée qu'ils faisoient venir ; & croy que si ledit Duc de Parme, lequel mourut en ce temps eust vécu, qu'il n'eust permis le changement que les autres Ministres dudit Roy n'eurent apres sa mort pouoir d'empescher, ioint qu'ils furent persuadez par leurs partisans de ladite ville de Paris, lesquels comme ils n'ont iamais eu faute de presumption, cuidoient aussi estre assez forts pour tourner ladite assemblée à leur volonté, & troubler ladite Ville ; mais ils s'y sont trompez comme en plusieurs autres choses, & tiens tres-assuré que ce coup fut donné tres à propos pour le salut du Royaume. Car si ladite assemblée eust esté tenuë ail-

leurs, l'on eust gourmandé les gens de bien, & tiens pour certain que l'on eust fait cette Royauté, qui nous eust rendus irreconciliables pour iamais, & du moins lesdits estrangers se fussent rendus maistres de la ville où elle eust esté tenuë.

I E. demeuray à Paris vn mois ou six semaines attendant la resolution, car ie la reconnoissois d'importance, comme i'ay dit, & repris apres le chemin de ma maison, où i'entendis que nostre Saint Pere auoit mandé à Monsieur le Cardinal de Gondy, & audit Marquis de Pisany, 'de n'aller à Rome, que Desportes auoit entierement trauersé leurs voyages contre l'esperance, voire l'assurance que l'on m'auoit premierement donnée, puis moy audit Cardinal. Que le Cardinal de Pelleuë venoit en ladite assemblée pour y presider comme Archeuesque de Reims & Cardinal, plein de fiel & de haine contre la maison de France, & que de toutes parts l'on y faisoit venir des gens qui preschoient la guerre, & qu'il falloit promptement créer vn Roy au gré du Roy d'Espagne, que ledit Roy y enuoyoit aussi ledit Duc de Feria, accompagné d'vn Docteur, exprés pour debattre nostre loy Salique, & nous demander la Couronne pour leur Infante. Qu'il faisoit entrer en même temps en ce Royaume vne armée nouuelle pour fauoriser les partisans & ses desseins, lesquels estoient pour cét effet affectionnez du Cardinal de Plaisance au nom de sa sainteté, & que de toutes parts l'on faisoit des menées aux Villes, & enuers les Princes de la

maison de Lorraine pour faire vn effort à l'ouuerture de ladite assemblée , au contentement dudit Roy d'Espagne : dequoy ie fus tres-marry , connoissant que le secours de Rome nous manquoit en cette occasion, & que tant de ressorts estoient bandez contre le Roy , que les gens de bien auoient prou d'affaires à souffrir , & ne sçauoient en cette perplexité quel conseil prendre pour y remedier , joint qu'il ne nous apparoissoit encore aucuns signes de la conuersion de sa Majesté. Je connoissois bien que le general du Royaume estoit las de la guerre, que le nombre de ceux qui desiroient la paix croissoit tous les iours , qu'il seroit tres-difficile faire goustier & reccuoir aux François vne domination estrangere : qu'il ne seroit pas plus facile d'accorder lesdits Princes au choix d'vn de leur maison pour souuerain , ny de les faire departir de leurs esperances en faueur d'vn Prince de la maison de France Catholique: Toutefois comme sa Majesté de son costé ne s'aydoit point , mais estoit sous-main blasmée & trauerfée d'aucuns qui la suiuients; enfin ie m'auisay pour ne nous laisser du tout aller aux torrens de cette confusion , de proposer & moyenner que les Catholiques seruiteurs de sa Majesté recherchassent ceux de ladite assemblée à l'ouuerture d'icelle, d'vne confiance, pour ensemble aduiser aux moyens plus propres pour conseruer la Religion Catholique & le Royaume , esperant que non seulement elle seroit approuuée de part & d'autre , comme chose qui ne pouuoit estre

justement blâmée ny refusée, mais aussi qu'elle pourroit engendrer des effets qui nous deliureroient de ce peril, dont ie donnay aduis au sieur de Fleury mon beau-frere, afin qu'il fist sçauoir à Monsieur le Duc de Neuers, ou à tel autre qu'il aduiferoit estre à propos auprès sa Majesté, que nous defaillant le secours du Pape, il ne nous restoit autre moyen de nous garantir que cettui-cy, lequel fut incontinent & certes soigneusement & soudainement embrassé, & mesmes fondé fort à propos sur la declaration que fit publier lors Monsieur le Duc de Mayenne, par laquelle il sembloit qu'il conuiast luy-mesme lesdits Catholiques à vne generale reünion pour mesmes effets. Sur cela i'aduançay mon acheminement à Paris, exprés pour en conferer avec Monsieur de Lion qui y estoit arriué, & ledit sieur President Ianin, lesquels à l'abord approuuerent les aduis, & mesmes me prierent de faire exhorter lesdits Catholiques d'en vser, comme i'écriuis soudain audit sieur de Fleury.

Ie me trouuay à l'ouverture de ladite assemblée, exprés pour fauoriser les conseils des gens de bien, & m'opposer aux autres, & fus appellé au Conseil quand la lettre & proposition desdits Catholiques fut faite pour obtenir ladite Conference, qui fut receüe, ouuerte & leuë desdits Cardinaux de Plaisance & de Peleué, & avec eux Dom Diego d'Ibarra Ministre du Roy d'Espagne, deux Prelats estrangers de la suite dudit Cardinal de Plaisance, Messieurs de Lion, de Rosne, de Belin,



de Tauanes, Ianin, & quelques autres du conseil dudit Duc, qui estoit au liect malade : soudain apres la lecture faite par ledit President Ianin, ledit Cardinal de Plaisance se leua, & sans aucune consultation & deliberation, dit en colere que cette proposition estoit pleine d'heresie, sortant de mains heretiques, & que ce seroit heresie d'y auoir égard & s'y arrester, partant qu'il falloit la regler, & plütoft faire punir celuy qui l'auoit apportée que d'y faire réponse ; ce qui fut approuué dudit Cardinal de Pelleué, & grandement loüé dudit Dom Diego : toutefois sur ce qu'il fut remonstré que ladite lettre ne s'adressoit pas seulement à Monsieur de Mayenne, mais aussi à tous ceux de ladite assemblée, partant il falloit aduiser si l'on la leur communiqueroit ou non, deuant que de la reietter, d'autant que le Trompette d'icelle auoit dit à la porte de ladite Ville qu'il estoit chargé d'un écrit de la part des Catholiques qui estoient auprès du Roy, s'adressant à ladite assemblée, de sorte que chacun en estoit desia abregé : Il estoit à craindre que les deputez se mécontentassent, si à l'ouuerture de ladite assemblée qui deuoit estre libre, l'on leur ce-  
loioit vne telle chose, & qu'elle fust supprimée sans leur communiquer : il fut aussi arresté que chacun y penseroit, & qu'il en seroit deliberé le lendemain, ou encore que le Cardinal de Plaisance eust renforcé la partie de quelques-uns qui auoient concerté leurs opinions avec luy deuant que de venir là, & fait prouision d'argumens pour fortifier la sienne;

toutefois il fut resolu que ledit écrit seroit apporté en ladite assemblée : ce que Monsieur de Mayenne fauorisa , & croy que sans luy il fust passé autrement, tant cette ouuerture déplaisoit aux estrangers & à leurs adherans. Je ne puis vous représenter les contestations & disputes que cette proposition engendra en ladite assemblée , parce que ie n'y fus point , à cause des brigues & partialitez dont elle étoit ja remplie, lesquelles estoient ordinairement accompagnées de reproches, aigreurs & violences insupportables à vn esprit nourry au conseil de nos Rois , comme i'ay eu l'honneur d'estre ; ledit Cardinal de Plaisance qui y vouloit plustost regenter que presider, m'ayant quelques-iours deuant commencé à attaquer , parce que ie m'opposois à vn certain serment qu'il vouloit que ladite assemblée fist à l'entrée d'icelle , par lequel on s'obligeoit de ne faire iamais paix ny traité avec le Roy de Nauarre , ses fauteurs & adherans, lequel n'eust point de lieu , pource que ledit Duc sur la plainte & remonstrance qui luy fut faite de la consequence d'iceluy l'empescha ; joint que l'on auoit commencé à en distraire & bannir ceux qui n'estoient du corps des trois Ordres , contre l'ordre avec lequel l'on auoit premierement arresté de former & tenir ladite assemblée , & sur lequel les gens de bien s'y estoient embarquez. Car il auoit esté resolu que Messieurs du Parlement & des Comptes , & ceux du Conseil dudit Duc , ensemble les Princes , ceux qu'ils appelloient officiers de la Couronne , & les Gouverneurs.

des Prouinces y assisteroient , & que chacun Corps feroit sa voix à part , outre celle des deputez qui prenoient le nom des Estats, composez desdits trois Ordres ; ce qui auoit esté composé ainsi exprés pour contrepeser les voix de ceux-cy , lesquels estoient pour la pluspart factieux , necessiteux , & ennemis du repos public , affamez du bien d'autrui, sans experience ou jugement aux affaires publiques, élus & venus exprés pour fauoriser les desseins desdits Espagnols : toutefois ils auoient tant de pouuoir , qu'apres auoir fait renuerser la deputation des Ecclesiastiques de Paris contre les formes ordinaires , ils auoient aussi commencé d'exclure de ladite assemblée lesdites compagnies, du moins rendu leur assistance inutile, parce que leurs voix n'estoient plus comptées. Dauantage l'on ne donnoit loisir aux particuliers d'opiner, ie dis à ceux desdites compagnies que l'on vouloit assujettir à suiure les opinions des grands, de sorte qu'un homme de bien ne se pouoit contenter ny seruir au public ; aussi tout dependoit plus du bon plaisir & vouloir dudit Duc de Mayenne , encore qu'il fust souuent trauersé de quelques-vns plus que de tout le demeurant : partant ie me contentay de faire en son endroit pour faire approuuer la proposition desdits Catholiques , l'office que ie deuois à ma patrie & au public.

M A I S comme l'on estoit sur cette deliberation, Monsieur de Mayenne partit de la ville de Paris pour aller receuoir l'armée que conduisoit le Comte Charles de Mansfeld , &

pareillement le Duc de Feria avec son Docteur nommé Dom Inigo de Mendoze, & le susdit Iean Baptiste de Tassis, tous deputez pour le Roy d'Espagne pour venir en ladite assemblée, laquelle ledit Duc de Mayenne pria deuant que de partir ne deliberer des principaux affaires iusques à son retour, lequel il promettoit estre brief, remonstrant qu'il falloit attendre les Ambassadeurs de sa Majesté Catholique; Monsieur de Guise son nepueu, & plusieurs autres personnages de qualité & deputez des Prouinces qui estoient encores en chemin, deuant que de mettre en auant le point, pour lequel principalement ladite assemblée auoit esté conuoquée, qui estoit de l'élection & choix d'un Roy, comme chose qui importoit à tous, & qui requeroit un consentement vniuersel de tous ceux du party, & nommément dudit Roy d'Espagne, sans l'aide duquel comme le party ne s'estoit iusques alors maintenu, il estoit encores impossible de se deffendre à l'aduenir, ny faire ladite election sans luy: à quoy il adjousta qu'il estoit necessaire aussi d'aller recevoir leur armée & l'employer à son arriuée, qu'elle estoit forte & gaillarde pour faire quelque bel exploit, qui fauorisast les vœux de ladite assemblée, laquelle enfin il aimamieux laisser là, que de laisser prendre à un autre le commandement de ladite armée, avec laquelle venant à faire quelque chose de remarque, il esperoit aussi s'en rendre plus recommandable; ioint qu'il n'estoit sans ialousie, que Monsieur son nepueu prist cette place

sous pretexte de son absence.

LE DIT Duc m'assura auant que partir que ladite Conference auroit lieu , donna charge à ses amis de la fauoriser & faire approuuer en ladite assemblée , non à mon aduis qu'il pensast qu'il en deust succeder ce qu'il aduint ; mais parce qu'il n'estoit content du Cardinal de Plaisance ny des Espagnols , lesquels monstroient plus de faueur à son nepueu qu'à luy , & auoient des desseins contraires aux siens ; il vouloit auoir plusieurs cordes en son arc pour se faire respecter & s'en seruir au besoin , estimant qu'il luy feroit facile de rendre ladite Conference inutile, toutes les fois qu'il voudroit. Neantmoins ie croy qu'après son parlement elle eust esté renuersée, si Messieurs de Lion & Ianin ne s'y fussent viuement employez , avec les gens de bien qui estoient encores en ladite assemblée : car ledit Cardinal de Pelleué ne la pouuoit gouster, & lefdits Espagnols avec leurs partisans y contredisoient ouuertement, & les Cours souveraines n'y estoient appellées qu'à la discretion d'aucuns, & quand elles y alloient, leurs voix estoient debattuës. Mais à la fin ledit Cardinal de Plaisance se laissa persuader sur ce que l'on luy remonstra, que ladite Conference ne pouuoit estre rejetée sans faire murmurer la Noblesse & le Tiers Estat qu'ils desiroient & affectionnoient , comme ceux qui estoient las de la guerre, ne goustoient volontiers le dessein desdits Espagnols , & se persuadoient de pouuoir par cette Conference gaigner vn grand aduantage pour la Re-

ligion & leur soulagement, d'autant qu'elle estoit demandée par les Catholiques du party contraire, afin d'aduiser avec eux au moyen de conseruer la Religion & le Royaume, dont ils esperoient qu'il aduiendroit, ou que le Roy de Nauarre seroit contraint d'obeïr à l'Eglise, ou que lesdits Catholiques l'abandonneroient. De sorte que si maintenant l'on venoit à les priuer de cette esperance en re-jettans d'autorité leurs aduis & moyens, il seroit à craindre qu'ils fissent pis, attribuant ce refus à ambition plustost qu'à zele de Religion, comme plusieurs publioient desia sur les difficultez que l'on y faisoit, dont on le taxoit plus que nul autre. Mais que si l'on vouloit leur laisser éprouuer ce remede, il leur reussiroit tout autrement qu'ils n'esperoient, car ils seroient par iceluy rendus plus capables d'en embrasser apres vne autre, pourueu que l'on n'employast en ladite conference quelques personnes, de la fidelité desquelles l'on fust bien assuré au party, comme il estoit facile de faire : car il n'y auoit aucune apparence que le Roy fust pour quitter sa Religion, estant bien aduerty qu'il n'auoit consenty l'ouuerture de ladite conference que pour contenter & amuser lesdits Catholiques, au nom desquels elle auoit esté proposée; & allentir aussi la resolution de nostre assemblée, faisant desia dire sous main audit Duc de Mayenne qu'il la falloït reietter & empescher, comme chose qui enfin leur estoit à tous deux plus desaduantageuse qu'autrement : qu'il y auoit peu d'apparence d'esperer

que lesdits Catholiques quittassent le Roy par le moyen de ladite conference, refusant sa conuersion : car premierement ils n'y employeroit que gens qui seroient du tout à sa deuotion, lesquels ne rapporteroient de ladite conference autre chose que ce qu'il leur commanderoit. Secondement, comme les deputez de nostredite assemblée n'auoient charge de promouuoir ladite conuersion, mais seroient plustost aduertis sous-main de se monstrier éloignez d'en faire compte, ils estimeroyent que les autres se garderoient bien de la proposer, & quand ils feroient autrement, il y auoit tousiours moyen de la faire éuanouïr, & s'en deméler, en renuoyant le tout au Pape & saint Siege, de la volonté & des commandemens duquel il protestoit mourir plustost que de se departir. Tiercement, cependant l'armée estrangere approcheroit & feroit quelque effet qui releueroit les courages & l'esperance des peuples, intimideroit les Politiques, & fortifieroit les zelez : que le Duc de Feria viendrait aussi avec sa suite, lequel avec les propositions qu'il deuoit faire au nom de ce grand Roy, & les moyens que l'on disoit qu'il auoit, rendroit toutes choses plus aisées & faciles qu'elles n'estoient; enfin que l'on pouuoit se conduire en ladite conference, de façon que le party en seroit plustost fortifié qu'affoibly. Ce sont les raisons auxquelles le Legat se laissa vaincre : Ioint qu'il craignoit d'en estre blasmé à Rome, & tenu en France pour estre du tout Espagnol, comme il sçauoit que plusieurs desia le dépei-

gnoient, dont il estoit marry, parce que cela rendoit sa conduite si suspecte, que l'autorité de nostre S. Pere avec laquelle il agissoit, en estoit moins respectée.

LE Loy fit en ce temps-là vn voyage à Tours, qui luy fut tres-preiudiciable, car il donna loisir à ses ennemis de prendre la ville de Noyon, qui fut lors attaquée par ledit Duc du Maine & le Comte Charles, & fut contraint de leuer le siege de deuant Selles en Berry avec peu de reputation, & certes tres-mal à propos, sur l'enfournement de cette assemblée de Paris: Or il deuoit se monstrier plus puissant que iamais, pour renuerfer les menées desdits estrangers: cela ioint aux defaveurs que le Cardinal de Gondy & le Marquis de Pisany retenoient de sa Sainteté, haussioient grandement les cœurs ausdits estrangers & à leurs adherans, lesquels estoient encorés fortifiez non seulement de la diuision & mauuaise intelligence, que l'on sçauoit estre entre les Princes de la maison de Lorraine, lesquels en leur assemblée & conference de Reims, s'estoient pluost diuisez & trompez, que resolus & accordez; mais aussi de certaines recherches & petites menées qu'aucuns du party de sa Majesté faisoient parmy nous. Dauantage la mort du Duc de Parme, ores qu'elle eust affoibly le party d'un grand Chef de guerre, auoit toutefois tellement remis Monsieur de Mayenne en goust desdits Espagnols, que chacun s'apperceuoit qu'il vouloit se rapatrier avec eux, esperant que le Roy d'Espagne apres la perte d'un tel



Capitaine & seruiteur se relascheroit de ses premiers desseins, lesquels ne pouuoient estre conduits par ses autres Ministres avec telle authorité que par l'autre; ou bien qu'il n'y auroit plus de difficulté qu'il n'eust cy-apres la principale & entiere charge des forces & deniers que ledit Roy enuoyroit en France, avec quoy il pourroit faire tellement ses affaires, que s'il n'obtenoit le premier lieu, il s'establiroit si bien au second, que celuy qui seroit élu Roy ne le seroit en effet plus que luy. Toutefois comme ledit Duc ne peût ou voulût se resoudre de quitter du tout les esperances de l'un, dont il s'estoit tousiours repû pour s'attacher à l'autre, rencontrant à Soissons ledit Duc de Feria, accompagné dudit Docteur & de Iean Baptiste de Tassis, ils traitterent avec luy comme à celuy duquel ils ne se pouuoient bonnement fier, & luy avec eux comme personne qui estoit irresoluë de ce qu'elle deuoit faire; de façon qu'il eut beaucoup de peine d'en tirer de l'argent, & fut contraint de leur promettre des choses qu'il ne leur obserua, ainsi qu'ils ont publié depuis.

Je m'estois retiré à Pontoise apres le parlement de Paris de M. de Mayenne, attendant la resolution de ladite Conference & le retour dudit Duc, me reconnoissant inutile en ladite ville de Paris en son absence.

Le Roy reuint trop tard pour secourir Noyon, mais aussi ladite armée estrangere se desfit en ce siege, de façon qu'elle ne peût rien entreprendre depuis, dont les Parisiens se

plaignoient grandement, parce qu'ils n'en receurent aucun soulagement, comme on leur auoit promis, & à son arriuée elle eust esté employée plus près d'eux; dequoy ils accusoient ledit Duc, dont Dom Diego d'Ibarra & les zelez faisoient grand bruit, comme s'il l'eust tempesché exprés pour tenir tousiours ladite Ville en necessité, luy faire de plus en plus detester la guerre & la desesperer du secours d'Espagne: toutefois il est certain que ce fut le sieur de Rosne qui fut cause plus que nul autre que ladite armée fut employée contre ladite ville de Noyon, laquelle il auoit failly à surprendre quelques iours deuant, & la vouloit auoir pour sa retraite: i'estime aussi que ledit Comte Charles ne se sentant trop fort, fut bien aise d'estre arresté sur la frontière sans s'engager plus auant dans le Royaume.

Ladite conference arrestée de part & d'autre, Monsieur, vous fustes mandé en vostre maison par le Roy, pour y seruir, certes au grand contentement des gens de bien des deux partis pour vne probité & experience aux affaires, non moins reconnüe & désirée d'un chacun, que necessaire en cette tourmente & confusion publique.

Dés-lors aussi nous commençâmes non seulement à mieux esperer des affaires, mais aussi à voir vn meilleur acheminement que deuant; car comme vous eustes joint la prudence & la force, qui n'auoit encore esté pratiqué, la raison surmonta bien-tost la passion & fut le voile leué qui couuroit les artifices & déguisemens, avec lesquels le public & les

particuliers auoient esté abusez de part & d'autres iusques alors; à quoy si on eust pourueu plûtoſt, nos maux n'eussent pas tant duré. La conference fut commencée sur la fin du mois d'Avril, & cette premiere petite trêve aux enuirs de Paris, accordée deuant le retour dudit Duc de Mayenne qui n'en fut pas content, soit que l'on se fust plus aduancé, ou que l'on eust plus entrepris qu'il ne desiroit, ou que la joye qu'il trouua qu'en demenoient les Parisiens, luy apportast quelque crainte & apprehension de l'aduenir.

IE ne fus comme vous sçauiez à l'ouuer-ture de ladite conference, parce que ie ne fus compris au premier nombre des deputez, pour lesquels on auoit demandé passe-port, encore que l'on m'eust mandé que ledit Duc de Mayenne m'auoit nommé & écrit de m'y trouuer de sa part: mais M. de Belin y fut employé en la place que l'on m'auoit ordonnée, par l'aduis d'aucuns, que pour mon absence il fut jugé à propos d'en vser ainsi, & pour complaire aussi aucunemēt ausd. Espagnols & Zel-lez, lesquels ne m'y desiroient pas; car i'étois trop découuert d'eux; toutefois i'y fus ad-jouſté du depuis, mais ayant reconnu qu'on se vouloit seruir de ladite conference, plus pour abuser le monde que pour bien faire au public, ie voulois attendre le retour à Paris de Monsieur de Mayenne deuant que d'y retourner pour me joindre aux Conſeils des gens de bien auprès de luy, sans aller en ladi-te conference, connoissant, comme i'ay dit, que l'on n'y marchoit de bon pied.

M O N S I E U R, vous sçavez mieux que personne quelle en a esté la conduite, & ce qui s'est passé, partant il ne m'appartient d'en parler devant vous, ie diray seulement que la patience dont sa Majesté vſa en icelle par vostre aduis & des gens de bien qu'elle y employa durant & depuis le ſiege de Dreux, fut cause d'un grand bien, car chacun commença à louer sa bonté & à reconnoistre & detester la foiblesse, la presumption & l'imprudence desdits Espagnols, mesmes quand ils s'opposerent à la trêve proposée au nom de sa Majesté, par le moyen de laquelle l'on eust sauué ladite ville de Dreux, qu'ils ne peurent secourir faute de forces: mais ils aimerent mieux boire cette honte, que d'approuver ou tolerer ladite trêve, tant ils craignoient qu'elle engendrast la paix, voyant le peu de conte que l'on auoit fait de leurs propositions, & que ledit Duc de Mayenne ne les assistoit en leurs pretensions comme ils desiroient; joint qu'ils esperoient suiuant leurs premiers conseils nous persuader & auoit plûtoſt par neceſſité que par raison, tant ils se desioient de nous & d'eux-mesmes, & connoissoient mal nostre naturel François.

N E A N T M O I N S ils furent si mal aduisez & temeraires qu'ils ne laisserent de faire proposer & déduire en pleine assemblée les droits & pretensions de leur Infante sur ce Royaume, & demander la Couronne pour elle & l'Archiduc Ernest, les marians ensemble; dont aussi ils furent mocquez & blâmez d'un chacun, & mesmes repris d'aucuns qui

leur auoient esté affectionnez , voyant contre leur esperance qu'ils nous vouloient faire violer nos loix , & rendre nos maux eternels pour contenter leur ambition , & se garantir à nos dépens sous pretexte de pieté , encore estant foibles , haïs & méprisez comme ils estoient , & non pressez & desesperez comme nous estions , tout ainsi que s'ils eussent eu à faire à gens perdus , & sans sentiment & memoire des belles & precieuses protestations qu'ils nous auoient faites du commencement de la guerre, que leur Roy ne pretendoit rien en ce Royaume , & qu'il ne nous assistoit que par zele de Religion , & pour empêcher le regne d'un heretique sur un peuple si Chretien qu'estoit celuy de la France. Ce qui leur fut depuis reproché assez à propos en vne assemblée particuliere par un Prelat qui les auoit tousiours crûs à leur parole, leur disant qu'ils auoient par cét acte decouvert leur turpitude , dequoy ils furent plus scandalisez que dissuadez.

TOUTEFOIS voyant que nos oreilles Françoises ne pouuoient entendre cette domination du tout estrangere, ils offrirent peu apres , qu'élisant leur Infante Reine , ils la marieroient à un Prince François en y comprenant ceux de la maison de Lorraine , au choix de leur Roy, lequel ils rendirent apres en secret à Monsieur le Cardinal de Lorraine ou à Monsieur le Duc de Guise , pensant par ce moyen nous faire franchir le sault qu'ils desiroient. Cecy fut receu diuersement , & vous assure que s'ils eussent esté aussi rusez

qu'ils pensoient estre, la beste estoit prise, car l'on leur offroit sur cette ouverture d'élire dès à present en ladite assemblée ladite Infante Reine, coniointement & solidairement avec le Prince susdit, que sa Majesté Catholique choisiroit pour l'épouser; à condition toutefois que la declaration & publication seroit surseüe iusques à ce que ledit mariage fust accompli : & pour ce qu'ils remonstrent, qu'ils ne vouloient que ladite Infante pour sa dignité, partist d'Espagne deuant ladite declaration, l'on adjousta que ladite assemblée dès à present depescheroit ou donneroit pouuoir à Monsieur de Mayenne de deputer certains Ambassadeurs ou Procureurs qui passeroient en Espagne avec le Prince, que ledit Roy d'Espagne choisiroit pour gendre pour y faire manifester ladite declaration & reconnoissance, au nom de tous, en contractant & affectuant ledit mariage, mais ils reiettoient ledit offre comme indigne de la Majesté de leur Roy, & l'obligation que le party luy auoit.

I E m'estois rencontré par hazard en yne compagnie particuliere où cecy auoit esté proposé, que i'auois contredit tant que i'auois pû, non que i'eusse opinion que ledit Roy d'Espagne fust pour iamais marier sa fille à vn desdits Princes, mais pource qu'on vouloit que ladite assemblée fist dès à present ladite election, & donnast sa procuration pour ce faire, considerant que quand ladite resolution auroit esté passée, encore qu'elle fust conditionnée, toutefois qu'il seroit apres facile

cile d'en oster ou changer la condition , & de la faire obseruer sous pretexte du bien public; partant que ladite Infante iouïroit seule de ladite élection sans faire ledit mariage: car quand ladite assemblée seroit séparée apres auoir déterminé cette élection, personne ne pourroit deffendre l'exécution conforme au decret d'icelle , & si elle nous auroit rendus irreconciliables à iamais avec le Roy & les Princes du sang : neantmoins ma remonstrance fut inutile , car non seulement il fut arresté que l'on feroit ladite proposition aux Ambassadeurs dudit Roy , mais aussi que l'on n'en diroit rien en ladite assemblée generale qu'apres leur réponse : dont ie fus si scandalisé , qu'à l'heure mesme ie pris congé dudit Duc de Mayenne , luy disant ne vouloir demeurer en lieu où l'on faisoit si bon marché de l'honneur & des loix de nostre nation , & de tout le Royaume ensemble à la ruine de nostre Religion.

LA ville estoit en grande crainte & ru-  
menr de tous ces traitez , voyant qu'ils é-  
toient écoutez & fauorisez des Grands , ce  
qu'il n'estoit permis à personne d'y contredire ; le Parlement plus que tous autres s'en al-  
teroit & émouuoit dauantage ; quelques-vns  
sollicitoient Monsieur de Mayenne de prester  
l'oreille à vne pratique qui se faisoit sous le  
nom de Monseigneur de Bourbon , combien  
que i'estime qu'il en fust ignorant, avec lequel  
ils le conseilloyent de traiter pour se déli-  
urer desdits Espagnols , lesquels vouloyent  
preferer tout le monde à luy , & n'estre con-

traint aussi de composer avec sa Majesté, étant de contraire Religion, d'autant qu'il ne pouvoit plus maintenir le party sans Roy : l'on luy disoit que ledit Cardinal seroit suivi des Catholiques qui seruoient le Roy ; que plusieurs villes du party de sa Majesté en feroient de mesme , & qu'il assureroit mieux & plus honorablement sa fortune avec luy qu'avec tous les autres. Cecy passa si auant que l'on écriuit & fit-on signer des articles audit Duc, qui furent baillez à vn personnage d'honneur pour en estre porteur audit sieur Cardinal , ie ne fus employé en cette negociation : toutefois elle me fut communiquée , & me sembloit que ledit Duc y entroit mal volontiers ; mais aucuns esperoient qu'à la fin il s'y resoudroit , & que chacun en feroit de mesme , iusques aux Espagnols ; ie n'estois de leur aduis, ains preuoyois que ledit Cardinal seroit trompé : dont me plaignant à vn de ceux à qui ce traité auroit esté decouvert, il me dit que quoy que l'on abusast ou non ledit Cardinal, il falloit mettre peine de le retirer, parce que l'on affoibliroit d'autant le Roy de Nauarre, & troubleroit-on ses affaires, de quoy ie ne me peus garder de me plaindre, & mesme en dire mon aduis à vn Gentil-homme , seruiteur dudit Cardinal, qui oyant parler de ce traité s'estoit adressé à moy , & m'auoit conuié de ce faire en homme de bien. Ie veux croire que ledit sieur Cardinal , comme i'ay crû, ignoroit cette pratique ; mais il est certain que ceux qui se disoient ses seruiteurs qui la poursuioient, ne voyoient goutte aux



affaires ny aux volontez de Monsieur de Mayenne & des autres Princes du party : celui auquel lefdits articles furent confiez, ne fut pas si-tost parti de Paris que ledit Duc se repentit de la charge qu'il luy auoit donnée, & l'enuoya prier d'en differer l'exécution ; de sorte que bien luy prit de ne s'y estre ingeré legerement, ce qu'il fit par prudence & conseil, car il eust esté responsable du mal qui en fust arriué s'il s'y fust embarqué, dont il eust eu grand regret, car il y alloit à la bonne foy : mais les mécontentemens publics que lefdits Espagnols reconnoissent qu'on auoit d'eux, avec l'aduis qu'ils eurent du traité susdit qui se brassoit avec ledit Cardinal, furent cause qu'ils declarerent, apres auoir refusé l'offre cy-deuant dit, qu'il leur auoit esté fait, que le Roy d'Espagne marieroit plustost & sacrifieroit sa fille avec Monsieur de Guise pour le bien de la Religion, que de manquer à vn seul poinct de son deuoir pour ce regard, pourueu que dès à present elle fust élueë Reine, & luy avec elle Roy de France, esperant par cette proposition qui estoit tres-advantageuse & honorable à la maison de Lorraine, non seulement assoupir lefdits mécontentemens & traitez contraires à leur dessein, mais aussi obtenir facilement ladite éléction de ladite assemblée : Et veritablement plusieurs d'abord s'en resiouïrent, pensant auoir ville gagnée, & que c'estoit chose qui deuoit estre embrassée d'vn chacun. A quoy tels se laisserent aller, qui auparauant n'auoient fait cas de toutes les ouuertures &

promesses desdits Espagnols , transportez d'affection enuers ledit Duc de Guise. Cecy estonna Monsieur de Mayenne , soit qu'il crût que lesdits Espagnols vouloient tromper Monsieur son nepueu & le party, ou qu'il n'eust pas enuie qu'il fust preferé à luy : sur cela il fut conseillé de demander ausdits Espagnols quel pouuoir ils auoient de leur Roy de faire ladite proposition, & de la dire, & la monstrier, s'ils l'auoient, qu'il y consentiroit, & s'assemblerent pour cela en la maison du Cardinal de Plaisance , où celuy de Pelleué se trouua avec les Ministres dudit Roy d'Espagne & quelques autres, & luy firent voir vn endroit de leurs instructions qui faisoit mention de ladite ouuerture par forme d'alternatiue, soit que ladite alternatiue y eust esté adioustée par eux exprés, ou non, mais il aduint que ce qu'ils esperoient leur donner gain de cause les en éloigna plus que deuant , & accrût leur honte : Car ledit Duc de Mayenne par ialousie ou autrement , s'opposa lors ouuertement à ladite élection , mesmes avec alteration: le Parlement s'aduança aussi de donner vn Arrest contre icelle , qui fut tres-magnanime & de grande efficace enuers vn chacun, l'assemblée mesmes en fut plus diuisée & troublée que deuant : car plusieurs creurent que ce party auoit esté mis en auant par lesdits Espagnols pour éblouir la compagnie, & la conduire comme insensiblement à l'élection de ladite Infante , & par consequent à la ruine de l'Estat, sous l'allechement dudit mariage , lequel ils ne pouuoient croire que le

Roy d'Espagne eust aucune enuie de ce faire, pour les raisons qui contredisoient. Ledit Duc plus que nul autre soustenoit cette opinion, demandoit d'estre mieux assésuré dudit mariage deuant qu'il fust procedé à ladite élection; voir aussi les forces & deniers necessaires pour la soustenir, & pareillement qu'il fust procedé à la recompense de ses peines & travaux, qu'il faisoit valoir; & comme ledit Duc auoit plus de credit en ladite assemblée que tous autres, & que son opinion estoit plausible, il appaisa facilement ceste resolution, assisté des Politiques, au grand regret des Zelez & des seruiteurs dudit Duc de Guise, lequel neantmoins se monstra en cette occasion plus sage & temperé que son âge & le sujet ne le permettoit, dont il fut grandement loué & estimé: lesdits Espagnols crurent que ledit Duc de Mayenne auoit poussé le Parlement à donner vn Arrest: mais cela n'estoit point, car ladite Cour auoit pris ce conseil d'elle mesme, meüe de son honneur & deuoir, comme gens qui aimoient mieux perdre la vie, que manquer à l'vn & à l'autre en cette occasion, en conuiuant au renuersement des loix du Royaume, dont par leur institution ils sont protecteurs, & à ce faire obligez par les sermens de leurs receptions, apres aussi par l'accueil que receut Monsieur le President le Maistre, & ceux qui l'assistoient dudit Duc de Mayenne, & ceux qui l'accompagnoient quand il luy porta ledit Arrest, & fit la remonstrance de la Cour qu'il n'y auoit consenty, & s'entendoit tres-mal avec icelle, dont

cette action fut d'autant plus loüée que le peril en estoit plus grand , & certainement elle seruit grandement , & faut que ie die que le Royaume en demeure obligé à ladite Cour.

Cette varieté & diuersité de demandes & propositions desdits Estrangers , faites si à coup , offensa plusieurs personnes , decouurit leur ambition avec leur foiblesse & impudence , ce qui les rendit encore plus méprisez que deuant , chacun croyant qu'ils n'auoient mis en auant Monsieur de Guise , que pour faire élire plus facilement leur Infante, diuiser nos Chefs, perpetuer nos miseres sous pre-texte de pieté ; l'on trouuoit sur tout estrange qu'ils eussent entrepris ce fait mal garni de forces , d'argent & de reputation , comme ils estoient : car lors leur armée s'estoit retirée & mutinée par faute d'argent , le Roy venoit de prendre Dreux à leur barbe , & n'auoient dequoy donner à viure à personne , ils viuoient eux-mesmes tres-mecaniquement ; de sorte que tels qui estoient venus disposez de les fauoriser & seruir en payant , les maudissoient , voyant qu'il n'y auoit rien à gagner avec eux ; toutefois ils estoient si impudens , ou nous tenoient pour si sots & stupides , qu'ils s'offensoient & disoient s'émerueiller dequoy nous refusions & faisons doute seulement de sacrifier à leurs fumées , nos consciences , nos libertez & nos biens.

Et comme nous estions en ces perplexitez , Dieu ayant compassion de la France & de nous , voulut toucher le cœur du Roy de la connoissance de nostre Religion, qui étoit

le seul remede à nos maux qui nous restoit. Cette nouuelle fut receuë de ceux qui sans passion desiroient la conseruation de la Religion & du Royaume, avec autant d'allegresse que si l'on leur eust donné la vie, & comme naturellement nous doutons de ce que nous desirons iusques à ce que nous voyons l'effet reüssir, chacun discourroit de ce changement entre l'esperance & la crainte, non sans émotion & alteration, mais diuersement les Estrangers & leurs adherans faisoient prouision de moyens pour décrier & trauerfer vne si sainte & loüable resolution, blâmant couuertement ceux qui s'en réjouissoient, & s'efforçant de faire degouster mesmes sa Majesté, laquelle n'ayant legerement & à demy pris ce party, se rendit à saint Denis, où elle fut admise & receuë en l'Eglise par les Prelats & Docteurs assemblez pour cét effet, avec les ceremonies & solemnitez qui l'y furent gardées, où vous estiez pour en parler mieux que nul autre. Et comme apres tant de declarations & protestations que M. le Duc de Mayenne & plusieurs du party auoient faites & publiées de reconnoistre sa Majesté apres sa conuersion, rien ne nous pouuoit plus excuser de ce faire, si nous ne voulions estre tenus pour méchans & ennemis de nostre patrie, & de nostre Religion. Ceux qui craignoient cette reconnoissance, mirent en auant qu'il estoit necessaire de consulter avec le Pape de ce fait, & que sa Majesté receust l'absolution des mains mesmes de sa Saincteté pour rendre sa conuersion valable, ne l'osans ou-

nettement reietter du tout. Et combien que plusieurs soupçonnerent, voire crurent que cette difficulté de remise au Pape, auoit esté proposée autant pour empescher l'effet de ce bon œuvre, que pour le rendre entier & parfait: toutefois comme chacun crût aussi que sa Majesté n'auoit point franchy ce saut, pour apres refuser ce deuoir & respect enuers sa Saincteté & le saint Siege, l'on embrassa ce Conseil, qui fut aussi-tost approuué & bien receu de sa Majesté & de ses seruiteurs avec grande prudence & franchise, au grand contentement des gens de bien.

Partant il fut aduisé de faire vne cessation d'armes pour trois mois, durant laquelle on enuoyeroit à sa Saincteté de part & d'autre pour sçauoir son intention: le fus mandé & employé en ce traité avec vous, Monsieur, & les autres Seigneurs qui y furent deputez, où sa Majesté fit bien paroistre qu'elle desiroit à bon escient arrester le cours des miseres publiques, car elle traita quasi du pair en toutes choses avec ledit Duc de Mayenne, sans auoir égard à sa dignité ny à son autorité, cōme l'on a veu par les articles qui furent accordez & publiez; ce qui fut blâmé d'aucuns, qui ont depuis esté connus par les eueneimens aduenus, & que sa Majesté auoit esté tres-bien conseillée. C'est grande prudence aussi de ceder quelquefois au temps & aux occasions qui se presentent, car par ce moyen l'on éuite souuent de grands perils, lesquels passez l'on recouure apres facilement, voire au double, ce que l'on y a mis. Si sa Majesté eust voulu

s'opiniastrer , & ne traiter avec ledit Duc du Maine , que comme avec son sujet , iamaïs il n'eust accordé la trêve , quoy aduenant l'assemblée de Paris ne se fust separée sans traiter avec lesdits Espagnols & faire vne Royauté : Car le party ne pouuoit plus soustenir la guerre sans faire l'vn ou l'autre, ce qui eust perpetué nos miseres , & eust à l'aduanture osté le moyen & la commodité à ceux qui ont depuis reconnu sa Majesté de ce faire , car personne n'auoit encore bien concerté cette deliberation & execution, & si peut-estre que plusieurs eussent crû n'estre juste ny honorable de ce faire , si la guerre eust tousiours duré, mesmement estant reconnuë sadite Majesté estre seule cause du refus de ladite trêve pour sa particuliere consideration: car tout le peuple luy eust imputé le mal-heur public , & eust excusé sur la necessité tout ce que ledit Duc eust fait pour deffendre au contraire de ce qui est aduenü. Car pour auoir sa Majesté si franchement & librement accordé ladite trêve & la prolongation d'icelle , & ledit Duc refusé de traiter la paix durant icelle avec sa Majesté , elle a tellement justifié ses intentions & ledit Duc condamné les siennes, qu'elle a acquis & luy perdu plus de seruiteurs & de villes en trois mois qu'ils n'eussent peut-estre fait en dix ans, tant la justice & le droit ont de puissance sur les hommes , spécialement apres que les maux les ont fait sages.

Depuis ladite cessation d'armes ie me suis trouué avec vous aux deux assemblées & con-

ferences qui ont esté faites à Andrecy & à Milly, pour aduifer aux moyens de pacifier le Royaume, comme de part & d'autre nous disions auoir volonté de faire, où vous sçauiez qu'il auoit esté proposé, debattu, & comme accordé plusieurs poincts & articles concernans le general & le particulier, qui nous donnoient esperance d'un meilleur succez que celuy qui s'en est ensuiuy, & croy certainement que s'il nous eust esté permis de conclure & parfaire le marché que nous l'eussions fait lors tres-aduantageux pour la Religion, voire pour ceux de la Ligue, tant vous nous faisiez paroistre sadite Majesté estre disposée d'accorder pour ce regard tout ce qu'honnestement l'on pouuoit desirer d'elle, dont ie ne diray les particularités, car vous les sçauiez comme moy, & me semble aussi qu'il suffit d'en parler en termes generaux. Mais comme il fut dit & arresté qu'il falloit attendre la volonté du Pape deuant que passer outre, il fut aussi resolu & promis que chacun feroit son deuoir enuers sa Saincteté en faueur de la paix publique: pour moy ie l'entendois & croyois ainsi, parce que ie connoissois que c'estoit nostre deuoir, & le bien & aduantage de tous.

QUE ledit Duc de Mayenne m'auoit asseuré que c'estoit son but, qu'il me sembloit qu'il auoit trop mal traitté les Espagnols pour s'attendre plus à eux, & que Monsieur le President Ianin estoit employé en cette negociation, qui estoit celuy de tous ses seruiteurs & amis auquel il se fioit le plus, & qui



connoissoit mieux aussi l'interieur de son cœur, comme ie dis audit Duc, quand il me pria d'aller à Andresy, & partant que ie ne voulois prendre autre assurance de son intention, allant en cette commission, que la compagnie dudit President, avec lequel il ne falloit craindre que ie fusse desaduoué, comme i'auois esté auparauant; ioint qu'il me sembloit qu'il estoit trop aduisé & bien conseillé pour laisser perdre à cette fois l'occasion & les moyens qu'il auoit de s'accommoder avec sa Majesté, comme ie luy auois souuent dit de sa part, & par son exprés commandement, qu'il feroit si-tost qu'elle feroit Catholique; luy remonstrant qu'en ce faisant il assureroit grandement nostre Religion, qu'il ne fortifieroit pas moins le party Catholique, iustificeroit ses armes & les nostres, nous deliureroit de la tyrannie des estrangers, qui auoient iuré sa ruine & la nostre, acquereroit vne gloire immortelle, obligeroit à luy non seulement la France, mais aussi toute la Chrestienté qui gémissoit avec nous de nos miseres.

Qu'il demeureroit en ce faisant chef, non seulement de ceux de son party, mais avec le temps des autres Catholiques qui auoient suivy sa Majesté, pour à l'aduenir accourir à luy, & se r'allier au premier effort que l'on entreprendroit contre la Religion, comme ceux qui attribuoient à sa conduite & à ses armes l'honneur & le gré de la conseruation d'icelle, & mesmes de la conuersion de sadite Majesté, qu'il ne deuoit craindre d'auoir faite

d'autorité & de seureté tandis qu'il y auoit des Huguenots en ce Royaume, à cause de l'enuie & inimitié que leur portoient les Catholiques, lesquels seroient plus vnis en paix qu'en guerre, d'autant que le besoin qu'ils auoient en icelle les vns des autres les faisoient viure & compatir ensemble, ce qu'ils feroient difficilement sans cela, de sorte que lesdits Catholiques auroient soin de luy & de sa grandeur comme de leur protecteur: bref qu'il retiendrait les Villes du party à sa deuotion, & ses amis interessez à sa conseruation s'il leur procuroit ladite paix, sans laquelle ie n'estimois pas qu'il les peust longuement conseruer apres la conuersion de sa Majesté, tant chacun estoit las de la guerre, & mal edifié des Espagnols; qu'il ne deuoit point douter aussi que le Pape & le Roy d'Espagne n'eussent soin de luy apres ladite paix autant & plus que deuant. Car comme il auroit moins de besoin d'eux, il en seroit plus estimé & recherché, comme il se pratique ordinairement entre les Rois & Princes, lesquels n'affectionnent que ce qui leur est necessaire, & méprisent ordinairement ceux qui ne se peuuent passer d'eux, qu'ils trauerferoient & empescheroient ladite paix de tout leur pouuoir deuant qu'elle fust conclüe. Mais quand elle seroit vne fois accordée & publiée, s'ils ne l'approuuoient soudain, ie m'asseurois qu'ils ne s'y opposeroient ouuertement, & qu'avec le temps ils s'y accommoderoient: car ce que la passion empesche pour vn temps est enfin emporté par la raison & l'vtilité, soit que sa

Saincteté s'opposast à l'vñion de toute la France, & que le Roy d'Espagne se voulust charger d'une telle querelle sur la fin de ses iours, épuisé d'hommes & d'argent comme il estoit. Je ne pouuois, & me sembloit aussi qu'il ne deuoit croire l'un ny l'autre, le premier estant obligé comme pere commun d'auoir trop de soin de ce Royaume tres-Chrestien pour n'en desirer le repos avec la conseruation de la Religion : & l'autre trop mal voulu en iceluy avec ses Ministres pour esperer à l'aduenir d'y faire ses affaires mesme-ment apres ladite paix ; mais quand ils en v-feroient autrement, que l'experience apprendroit bien-tost à l'un, & la necessité à l'autre, qu'ils auroient pris vn tres-mauuais & peril-leux conseil pour la Religion Catholique & leurs propres Estats, comme pour toute la Republique Chrestienne. Que tous Messieurs les parens s'attacheroient aussi à sa fortune de bonne volonté ou par necessité : car comme ils le verroient accompagné & suivi en cette resolution, ainsi qu'il seroit indubitablement des principales Villes du party & Gouverneurs d'icelles, ils se garderoient bien de demeurer derriere, ny de perdre cette occasion de pouruoir avec luy à leur feureté & à leurs affaires ; que ie ne scauois pas quel ad-uañtage on luy feroit, car c'estoit chose de laquelle il n'auoit encore esté parlé, mais que ie ne doutois point qu'on ne luy accordast en honneurs, en charges & dignitez, & en argent pour luy & pour les siens, tout ce qu'honneste-ment il pouuoit desirer & demander, & que

le tout ne se fist au gré d'un chacun de part & d'autre, tant seroit grand & estimé son merite enuers le public moyennant ladite paix. Que ie luy conseillois bien de le contenter plustost de mediocrité, que de se surcharger d'enuie, parce que l'une estoit plus seure que l'autre; qu'il auoit des enfans qu'il aimoit, à la fortune desquels il deuoit penser, comme de la sienne: Ioint que i'auois toute ma vie remarqué que ceux qui anoiient voulu precipiter la leur, l'auoient plustost reculée qu'auancée, chaque fruit voulant estre cueilly en sa saison pour estre de bonne garde. Qu'il ne m'appartenoit de luy représenter l'estat du Royaume ny celuy de la Cour, parce qu'il en estoit à mon aduis mieux informé de l'un & de l'autre que ie n'estois; mais qu'il me sembloit luy pouuoir & deuoir dire en conscience, que s'il l'épluchoit & consideroit bien, il trouueroit plustost matiere d'esperer que de craindre à l'aduenir. Partant i'estois seulement d'aduis qu'il eust soin de conseruer sa reputation, maintenir les Catholiques, ménager ses vieux amis, en acquerir d'autres, bien allier ses enfans, faire prouision d'argent, & se tenir loin de la Cour apres auoir fait ladite paix, assuré ce faisant, d'estre à l'aduenir plus recherché, utile & necessaire que iamais, sans dauantage s'opiniastrer à poursuiure par les armes vn dessein pour s'agrandir, qui estoit plus imaginaire que bien fondé, au peril de la Religion, du Royaume, de sa reputation, de ses amis, de sa vie & de ses enfans, blâmé, enuié & trauersé d'un

chacun dedans & dehors la France iusques à ses propres parens , plein d'iniustice & d'impossibilitez de luy éprouuées, & encore mieux reconnu de tous , croyant si cette fois il ne s'en departoit que chacun l'abandonneroit pour traiter sans luy avec le Roy , ou avec celuy d'Espagne, dont plusieurs estoient déjà recherchez , & à mon aduis resolu, connoissans n'y auoir plus de salut enuers luy, estant mal comme il estoit avec les Espagnols, & sans resolution de ce qu'il auoit à faire enuers sa Majesté: que c'estoit bien fait de rendre au Pape le respect qu'il auoit proposé, deuant que de conclure tout à fait à ladite paix & la publier ; mais qu'il ne deuoit pas laisser cependant de la faire ébaucher, de façon qu'il n'y eust plus rien à redire, tant pour le general que pour le particulier, quand il receuroit l'intention de sa Saincteté, laquelle embrasseroit bien plustost le party de nostre repos, quand elle scauroit auoir esté pourueu à la seureté de nostre Religion pour aduis commun des Catholiques , que quand on se remettroit à sa Saincteté, d'autant qu'elle feroit difficulté, & peut-estre conscience de se charger de ce soin & d'une telle enuie, mesmes estant tenuë de court par les Espagnols comme elle estoit : loint que sa Saincteté ne pouuoit juger ny connoistre si bien que nous ce qui estoit necessaire de faire pour ce regard, pour estre loin de nous, & luy auoir tousiours esté la verité des choses déguisées: que la reuerence que l'on portoit en ce Royaume à sa Saincteté & au saint Siege, estoit

grande, mais qu'il estoit certain que tel bien ne seroit deormais assez fort pour maintenir le party en vnion contre les efforts de la necessité, & le dégoûtément que l'on auoit desdits Espagnols, mesmement si sa Sainteté méprisoit l'obeïssance & submission de sa M. comme aucuns osoient desia dire qu'elle feroit; estant certain que ceux qui s'attacheroient à ce pretexte pour faire durer la guerre sans auoir égard à la conuersion de sa Majesté, en seroient mauuais marchands, d'autant que la longueur & rigueur de nos maux nous auoient ouuert les yeux & rendus plus sensibles que nous n'estions au commencement de la guerre, que transportez de zele ou de passion nous croyons en paroles, & pouuoir mieux conseruer la Religion & asseurer nos fortunes par la guerre que par la paix. Par tant ie le suppliois & conseillois de l'embrasser viuement, & s'y conduire de façon, que si Dieu nous vouloit tant punir qu'elle ne se fist, que chacun sceust & connust au moins n'auoir tenu à luy, afin de n'attirer sur luy le blasme, la haine & malediction publique, que ne pouuoient éuiter ceux qui l'empeschoient.

IL fit demonstration de prendre en bonne part ma remonstrance, m'asseura qu'il desiroit la paix de cœur & d'affection, qu'il ne tiendrait à luy qu'elle ne fust faite, connoissant que c'estoit encore le meilleur moyen de tous ceux qui se presentoient pour conseruer la Religion & asseurer sa fortune, à cause de la foiblesse & mauuaise conduite desdits

Espagnols, avec lesquels il me disoit ne pou-  
voir plus compatir , & principalement avec  
Dom Diego d'Ibarra qui estoit insupporta-  
ble; mais qu'il falloit conduire & manier les  
choses dignement, afin de contenter le Pape,  
& que le Roy d'Espagne & ses amis dedans  
& dehors le Royaume n'eussent occasion de  
se plaindre de nous , apres avoir employé  
pour le party ce qu'ils y auoient mis; & aussi  
qu'il estimoit ce poinct estre des moins im-  
portans pour assseurer la Religion & sa for-  
tune , & que le salut public dependoit princi-  
palement de l'vnion & bonne intelligence  
du party avec sa Saincteté & ledit Roy d'Es-  
pagne , laquelle il ne pouuoit conseruer s'il  
concluoit ce traité sans eux ; partant qu'il en-  
uoyeroit vers eux gens exprés pour cét effet,  
& qu'il ne cesseroit de pourfuiure ce bon œu-  
re qu'il ne fust resolu. Que ce seroit aussi le  
bien du Royaume comme celuy de la Reli-  
gion & de toute la Chrestienté, que la paix  
fust faite generale pour donner relasche à la  
France , & moyen aux Princes Chrestiens de  
s'opposer aux armées du Turc, dont la Chre-  
stienté estoit menacée ; joint qu'il ne pouuoit  
croire que le Pape approuuast la paix en Fran-  
ce pour reietter la guerre sur le Roy d'Espa-  
gne, qu'il respectoit & craignoit par trop,  
tant pour le pouuoir qu'il auoit en Italie, que  
pource qu'il le tenoit pour le plus seur appuy  
& protecteur de nostre Religion & du S. Siege,  
contre ledit Turc & les heretiques; au moyen  
dequoy il ne pouuoit se separer du Roy d'Es-  
pagne sans offenser sa Saincteté , ny la mal

contenter sans manquer à son deuoir, & peut-estre diuiser le party, & rendre inutile & honteux l'accord qu'il feroit, chose qu'il vouloit éuiter au peril de sa vie : Mais qu'il esperoit que chacun s'accommoderoit à l'vtilité publique, à quoy le Roy de Nauarre pouuoit plus aider que personne, en contentant sa Sainteté, & luy donnant occasion d'approuuer sa conuersion, qui estoit le poinct auquel il falloit principalement trauailler & pouruoir, comme il me prioit de faire entendre aux deputez de sa Majesté en cette conference, protestant qu'il y procederoit de bonne foy, & en homme de bien, & qu'il ne me donneroit la peine d'y aller, ny à Monsieur de Bassompierre, ny à Monsieur le President Lannin, s'il n'auoit enuie de bien faire.

LADITE Conference d'Andrefy engendra celle de Milly, comme i'ay dit, nous discourusmes assez franchement & rondement des moyens de faire la paix & contenter ceux qui y pouuoient seruir; toutefois sans rien accorder ny resoudre, parce que nous n'auions charge ny pouuoir de ce faire, voulans par ce discours nous attendre à la volonté du Pape, enuers lequel chacun promettoit faire son deuoir. Monsieur de Belin se trouua en cette derniere assemblée au lieu de Monsieur de Bassompierre qui s'en estoit allé en Lorraine: l'on pourueut du mieux que l'on peût aux plaintes & contrauentions de la trêve qui auoit esté bien receuë & embrassée du general du Royaume, mais estoit mal obseruée des Gouverneurs des Villes & Prouinces, &



des gens de guerre , trop accoustumez à leur profit & au pillage , de sorte que le pauvre peuple en fut plus oppressé que soulagé: il fut parlé en cette dernière assemblée de prolonger encore pour quelque temps ladite trêve, pour donner plus de loisir d'enuoyer à Rome , car ceux qui y deuoient aller n'étoient encore partis , & toutefois le temps accordé par icelle estoit déjà fort aduancé.

SA Majesté parla aussi au President Ianin à Fleury , & sembloit que toutes choses fussent disposées au bien, chacun faisant demonstration de l'affectionner , & d'estre marry de ce qui se faisoit au contraire : les peuples quoy qu'ils fussent mal traitez s'en éjouïssent , esperans d'estre bien-tost déliurez de leurs maux, comme faisoient les habitans des Villes , & quasi toute la Noblesse , & les Ecclesiastiques du Royaume , les factieux & ceux qui viuoient de la guerre ou profitoient du mal d'autrui seul s'en attristoient , & la trauersoient par diuers moyens , comme par predications , factions , menées , écrits , rapports , & plusieurs autres attentats , à quoy il estoit difficile de remedier , tant la guerre auoit accru la licence, & dépraué nos mœurs; joint que les Grands au lieu de se formaliser comme ils deuoient , y conuiuoient plustost qu'autrement , sous pretexte de conduire les affaires doucement , mais à mon aduis fort imprudemment , & quelquesfois à mauuaise fin.

A v retour dudit voyage de Milly , Monsieur de Mayenne me pria de receuoir sa Ma-

jesté pour luy parler de la prolongation de ladite trêve, laquelle il disoit estre necessaire, pource qu'il auoit aduisé de prier Monsieur le Cardinal de Ioyeuse de prendre la peine d'aller à Rome pour seruir le public en cette occasion, esperant qu'il seroit tres-vtile & propre, à cause de son bon zele, de sa qualité & suffisance, & comme il estoit en Languedoc, c'estoit chose en laquelle il ne pouuoit pas pouruoir dedans le temps de ladite trêve; joint que les Ambassadeurs de sa Majesté n'étoient encore hors du Royaume. Ledit Duc me renouella lors l'assurance qu'il m'auoit donnée de sa droite & sincere intention & resolution à la paix, vsant de termes plus exprés qu'il n'auoit encore fait, iusques à me prier d'en resoudre; ce qui me fit encore plus volontiers entreprendre cette commission. Je fus trouuer sa Majesté à Fontaine-bleau qui me receut de sa grace tres-humainement: Vous y estiez, Monsieur, mais elle voulut auant que d'entendre ma charge, que ie visse vne depesche à Rome du Cardinal de Plaisance, qui auoit esté prise & enuoyée à sa Majesté & fraichement déchiffrée: elle me fut leuë en vostre presence, & de Messieurs de Schomberg, de Sancy, & de Reuol, le sieur de Zamet que ie trouuay à Fontaine-bleau y fut appellé, elle estoit fort longue & particuliere, accompagnée de la coppie d'un certain serment fait à Paris, le 23. du mois de Iuillet, entre les mains dudit Cardinal sur les sainctes Euangiles, en la presence du Duc de Feria & des autres Ministres du Roy d'Espa-

gne, par ledit Duc de Mayenne, du Cardinal de Pelleué, des Ducs de Guise, d'Aumale & d'Elbœuf, les sieurs de la Chastre, de Rosne, & de saint Paul, en qualité de Mareschaux de France, & de Tournabon Florentin, agent du Duc de Mercœur; par lequel estoit porté que reconnoissant pour plusieurs grandes considerations n'estre à propos de faire alors vne Royauté Catholique, mais plustost la differer à vn autre temps plus opportun; cependant estoit necessaire que le party Catholique déjà composé, dressé & éably, depuis quelques années de l'vnion generale des Catholiques, dont depuis auoit esté chef ledit Duc de Mayenne demeurast entier & ferme en sa premiere resolution, d'empescher pour tousiours la ruine de la Religion Catholique, Apostolique & Romaine en ce Royaume de France, & pour la maintenir, conseruer, & restaurer, s'opposer à tous les ennemis d'icelle & leurs auteurs, & extirper l'heresie autant que faire se pourroit. Ledit Duc de Mayenne comme Lieutenant de l'Estat & Couronne de France, & les autres dessusdits iuroient sur les saintes Euangiles es mains dudit Cardinal de Plaisance comme Legat de la Saincteté, & promettoient sur leurs paroles de Princes & de Gentils-hommes, & sur leur foy & honneur de maintenir inuiolablement la ligue Catholique, & ce qui est compris sous icelle, & de se tenir liez & vnis pour l'effet susdit, comme ils auoient fait iusques à present, & ne s'en departir iamais pour quelque cause que ce fust, ny de s'accoster en general ny en par-

ticulier du Roy de Nauarre , ny faire paix avec luy , quelque acte de Catholique qu'il fist ; promettant encore sa Majesté Catholique vne armée de douze mil hommes de pied , & dix mil cheuaux , & semblablement des commoditez pour maintenir quelque temps la Cauallerie & Infanterie Françoisé que l'on pourroit mettre ensemble , & estre aussi d'accord des conditions de proceder sans aucun retardement à l'élection de la susd. Royauté Cathol. laquelle n'auoit pû estre pour lors : & si aucuns d'eux refusoient encore de ce faire , les autres seroient tenus & obligez les abandonner , de ne les tenir plus en aucune maniere du nombre des vnis dessusdits , pour la conseruation de la Religion , ains leur estre ennemis , & sans auoir égard à eux , passer outre sans difficulté à ladite élection de Royauté Catholique ; ledit Duc de Mayenne promettant en particulier & en general , que pour effectuer ladite élection les Estats generaux se tiendroient ensemble , ainsi nommoient-ils l'assemblée de Paris , & qu'aucune personne d'iceux ne s'en separeroit , ou qu'ils seroient tenus à Paris ou ailleurs , selon qu'il seroit trouué plus conuenable , pourueu qu'il fust pourueu de la part de sa Majesté Catholique de huit mil escus par mois , pour distribuer ausdits Estats , par les mains de leur President , comprenant ledit Duc de Mayenne , comme Lieutenant general de l'Estat & Couronne de France , le susdit party en general , & plusieurs Prouinces , Villes & Communautéz , en ce compris le Duc de Nemours , le Comte de

Brissac, le sieur de Villiers, & tous les autres, lesquels il asseuroit qu'ils se tiendroient obligez comme s'ils se fussent trouuez presens, & eussent soubigné la mesme écriture avec ledit Duc de Mayenne, s'obligeans particulièrement & les autres susdits soubsignez pour les Prouinces, Villes & Places qu'ils auoient en charge, & faisant le semblable : lors ledit sieur Legat de la part de sa Sainteté, & le Duc de Feria pour sa Majesté Catholique, dirent qu'ils continueroient la protection dudit party pour le bien & conseruation de la Religion, comme ils auoient fait iusques alors, en foy dequoy ils auoient tous signé ladite promesse de leurs mains, & à icelle fait apposer le sceau de leurs armes en ladite ville de Paris, le 13. Iuillet 1593.

V o u s sçauiez, Monsieur, si ie demeuray estonné apres la lecture dudit serment, lequel estoit si contraire aux paroles dudit Duc de Mayenne, & aux assurances qu'il m'auoit données de son intention à la paix, & mesmes à ce qu'il nous en auoit fait dire & traiter en nos Conferences, que du commencement i'eus opinion qu'il auoit esté fait à plaisir, ou seulement projectté sans auoir esté effectué, iusques à ce que i'oüy lire les lettres dudit Legat surprises, avec ledit serment du 24. dudit mois de Iuillet, par lesquelles il rendoit si bon & particulier compte des assemblées, allées & venuës faites, tant pour cela que pour ce qui s'estoit passé à Paris, des raisons mortües dudit serment, & de ceux qui auoient esté occupez, & de plusieurs autres particu-

laritez qui décriuoient la verité du fait, qu'il ne fut plus question que de soupirer & de me plaindre de la fortune publique, & de la mienne, me voyant embarrassé avec des gens qui faisoient si peu de compte de l'une & de l'autre; dequoy ie fus si scandalisé, qu'à l'heure mesme ie me resolus de n'accomplir la charge que ledit Duc m'auoit donnée, d'aller prendre congé de luy, & ne me mêler plus de ses affaires. Toutcois vous ne fustes de cét aduis, ny ces Messieurs qui estoient presens, pour l'opinion que vous auiez de moy, que ie pouuois encore seruir de quelque chose à remettre & composer les affaires, reconnoissant que sa Majesté, ny vous autres Messieurs, comme bien conseillez, n'estiez d'aduis de rompre encore la poursuite ny priver le Royaume de l'esperance de la paix, nonobstant les sermens, considerant que ledit Duc pourroit peut-estre auoir changé d'opinion, veu les propos qu'il auoit fait tenir par le President Ianin, & le mauuais predicament auquel il apparoissoit, par lesdites Lettres du Legat, qu'estoient avec luy les Espagnols, & aussi que la tromperie sur le mariage de Monsieur de Guise avec leur Infante, & leur foiblesse & imprudence estoient aucunement decouvertes par les mesmes lettres, estimant qu'estant communiquées à l'oncle & au nepueu sans leur faire paroistre de l'aigreur, les pourroient eschauffer à la paix plus que deuant: au moyen dequoy ie fus conseillé & persuadé de la consideration publique, de ne rompre encore avec eux, mais assseurer de retirer profit de

fit de cette occasion pour porter les affaires au but des gens de bien, à quoy notamment seruit bien à me faire resoudre de n'auoir trouuë esdites lettres les noms de Messieurs de Bassompierre & Ianin, me promettant de les auoir pour compagnons en ma plainte & en mon mécontentement, comme en effet ils estoient à l'iniure qui m'auoit esté faite, puis que nous auions esté depuis employez ensemble aux traittez de la trêve de la paix, & assureur & ioindre de la bonne volonté dudit Duc, sans toutefois auoir eu connoissance ny communication aucune dudit serment, comme en verité ie n'auois eu en sorte quelconque.

Le sieur Zamet & moy leusmes à part audit Duc lesdites lettres & ce serment l'un apres l'autre, deuant que de luy faire paroistre aucune alteration: & comme il reconnut, tant par la suite & substance d'icelles, que par les originaux que vous nous auiez coniez, qu'elles estoient veritables, & qu'il n'y auoit moyen de les déguiser, changer ny adjoûter, il fit contenance de n'estre moins offensé dudit Legat, pour la façon de laquelle il parloit de luy par icelles, qu'estonné & marry de la decouuerte dudit serment, aduenü contre son attente & tres-mal à propos pour ses desseins. Lors i'adjoûstay ma plainte particuliere en termes les plus exprés & preignans dont ie me pûs aduiser, comme celuy qui estoit picqué iusques au sang du tort qu'il m'auoit fait, non de m'auoir celé ledit serment, mais de s'estre depuis seruy de ma credulité &

franchise, non moins que de mon honneur & de ma foy, pour amuser le monde en beaux traitez, ausquels il m'auoit employé apres auoir couru sa fortune cinq ans durant avec toutes les incommoditez & ruines de mes biens, & mesme de ma reputation, qu'il étoit impossible de plus : laquelle plainte i'accompagnay encores d'une remonstrance que ie luy fis de son auuglement, pour ce qui le concernoit luy-mesme, de ce qu'encores qu'il reconnuist par infinies preuues & effets, la haine que le Legat & lesdits Espagnols luy portoient avec leurs adherans, leur malice & pernicieuse intention enuers le Royaume, avec leur foiblesse & impudence au soustien & à la conduite des affaires, il ne vouloit toutefois se dépestrer de leurs mains, ains continuoioit à se laisser beffler par eux, pour destruire la Religion & le Royaume, & se rendre le plus miserable homme du monde ; qu'il voyoit maintenant par lesdites lettres quelle foy & credit il deuoit adiouster aux belles paroles dudit Legat, puis qu'il faisoit si peu d'estat de sa parole & de ses promesses, encores qu'elles fussent si solennelles, le tenant pour le plus grand trompeur du monde, & pour tel le depeignoit au Pape & à Rome ; quoy qu'il s'attendist apres cela que sa Saincteté fauorisast ses desseins, & que son Legat fist ses affaires, quelle apparence y auoit-il de l'esperer, aussi s'estoit-il bandé ouuertement pour Monsieur son nepueu ; en quoy l'on decouuroit par sa depesche qu'il persueuroit plus candidement & fidellement que plusieurs n'esperoient, car



il estoit soupçonné de s'entendre du tout avec les Ministres du Roy d'Espagne, pour abuser ce ieune Prince de l'esperance du mariage de leur Infante; ne pouuant croire qu'estant personnage clair-voyant & bien informé des affaires du monde, il eust opinion que ledit mariage se deust iamais effectuer; & toutefois il apparoissoit le contraire par lesdites lettres, car il accusoit lesdits Ministres de ne proceder en ce fait rondement, & soit qu'il le fust pour plaire au Pape à sa descharge, ou ioiant au plus fin à l'usage du pais, ou qu'en verité il fust marry de la tromperie desdits Ministres à l'endroit de ce Prince, quelle esperance deuoit-il plus auoir d'auancer sa fortune par son moyen. Car si la Saincteté affectiounoit celle de Monsieur de Guise, la mauuaise odeur que ledit Legat donnoit encore de luy à sa Saincteté ne luy faisoit changer d'auis: d'ailleurs il ne deuoit esperer, ny ne vouloit faire son profit de la tromperie & honte de Monsieur son nepueu, estant en si mauuais predicament enuers le Legat & les Ministres du Roy d'Espagne; ioint qu'il donneroit iuste occasion à sondit nepueu de luy reprocher son malheur, outre qu'il pensoit en auoir, dont il pourroit aduenir plus de mal au party, à sa personne & aux siens, que de bien; & d'autant que i'auois appris à Fontainebleau la prise de Lion & de Monsieur de Nemours: ie luy dis encore que chacun la luy imputoit, publiant qu'il s'estoit aidé de Monsieur de Lion, & du mécontentement que la ville & le pais auoient des deportemens du

dit Duc , pour le chasser de son Gouverne-  
ment , afin de l'adjouster au sien par la guerre  
ou par la paix. Qu'il pouvoit penser sur cela  
comment sa conuoitise estoit blasonnée, puis  
qu'elle n'épargnoit son propre sãg, le fils bien  
aimé de la mere, laquelle il deuoit faire estat  
de voir d'oresnauant fondre en larmes & sei-  
cher d'ennuis & de dépit à ses pieds, sans auoir  
toute fois le pouuoir de la deliurer, ny la con-  
tenter, d'autant que l'on ne dispoit du peu-  
ple comme l'on vouloit , & estoit encore plus  
difficile de bien reparer vne iniure faite à vn  
Prince , mesmement quand elle estoit fondée  
sur ses propres fautes & delits , executée par  
inferieurs, & attribuée à ses plus proches, que  
cecy auoit renouuellé la memoire des propos  
tenus par le sieur Alfonse Corse sur la mort  
de Messieurs ses freres , dont l'on disoit qu'il  
auoit monstré peu de sentiment , l'ayant en  
puissance , & y adjoustoit-on encore l'assassi-  
nat du Marquis de Maygnelay , de la charge  
& dépouille duquel il auoit reueltu l'autheur  
d'iceluy. Que joignant maintenant à ce que  
dessus l'oppositon qu'il auoit publiquement  
& fraichement faite à sondit nepueu encore  
qu'elle fast grandement excusée des clair-  
voyans & gens de bien, le tout ensemble fai-  
soit quasi tenir de luy vn mesme langage,  
tant à ses amis qu'à ses ennemis , veritable-  
ment à son grand desauantage, dont il ne de-  
uoit point douter que luy & les siens tost ou  
tard ne receussent & sentissent à bon escient  
le dommage , & ne verroient point qu'il y  
eust autre moyen de se garantir qu'en faisant

la paix , par laquelle il déliureroit la Religion de peril , se tireroit des mains du Legat & des Espagnols , purgeroit ses actions passées , mettroit l'esprit de sa mere en repos , & la personne de son frere en liberté avec honneur , auanceroit la fortune dudit Duc son nepveu , feroit & assureiroit la sienne comme il voudroit , & obligeroit le Royaume & le party Catholique à l'honorer , & le Roy à l'aimer & respecter eternellement: qu'il étoit encore en sa puissance de ce faire , d'autant qu'encore que sa Majesté fust à bon droit tres-indignée & mal edifiée dudit serment, & de la façon de laquelle il auoit esté depuis procedé avec elle; toutefois sadite Majesté s'estoit promis que quand il auroit veu & bien considéré la depesche dudit Legat, le peu d'estime qu'il feroit de luy , avec ce qu'il pouuoit esperer desdits Espagnols, il traiteroit apres avec elle plus sincerement qu'il n'auoit fait , comme elle m'auoit donné charge de luy dire ; & qu'en ce faisant elle ne laisseroit de le gratifier , & faire pour luy comme celuy qu'elle vouloit honorer & contenter plus que iamais il ne pouuoit esperer de l'estre desdits Espagnols : adjoustant pour fin que pourueu qu'il prist ce party , & fit paroistre par effet , & y marcher de bon pied , i'auois opinion que sadite Majesté accorderoit la continuation de la trêve encore pour vn mois ou deux, afin de donner loisir à Monsieur de Neuers d'acheminer son voyage & sa legation à Rome. Ledit Duc commença sa réponse en soupirant, me demandant s'il estoit vray que sa Majesté

eust nouvelles certaines de l'emprisonnement de Monsieur de Nemours, parce qu'il en auoit bien quelque aduis, mais il ne le pouuoit croire, & en estoit en grande peine, tant pour le respect de Madame sa mere, que pour plusieurs autres raisons qui importoit grandement au public & à son particulier, encore que ledit Duc se fust mal comporté en son endroit, iusques à suborner ses seruiteurs, & les prendre bien auant en son Gouvernement: toutefois il ne pouuoit qu'il ne fust marry de ce qu'il luy estoit aduenü, ne doutant point que cela fist parler beaucoup de gens à son desaduantage, mais qu'il y apporteroit tel remede que les effets justifieroient son intention, protestant ne luy estre arriué accident de long-temps, dont il eust receu plus d'affliction que de cettui-cy. Et veritablement ie m'apperceus bien qu'il en estoit grandement trauaillé, & tant qu'il en oublioit le demeurant: Mais apres auoir repris ses esprits, il me dit qu'il auoit esté contraint de faire ledit serment pour arrester le cours de cette Royauté que poursuiuoient ledit Legat, les Espagnols & leurs partisans avec tant d'ardeur & de violence, que s'il n'eust vü de ce moyen, ils l'eussent peut-estre decerné sans luy, tant qu'ils estoient depitez de la conuersion de sa Majesté, & reconnu que ce coup renuerseroit leurs dessein: que si ladite Royauté eust esté faite, le Pape eust esté obligé de la soutenir, & partant refuser à sa Majesté son absolution, ce qui eust perpetué nos calamitez; car il n'eust esté apres en sa puissance

d'y remedier ; mais qu'estant toutes choses entieres comme elles estoient demeurées par cette inuention , ils ne pouuoient garder sa Saincteté de receuoir sa Majesté, qui estoit le poinct auquel il estoit necessaire de pouruoir sur tous autres, d'autant que l'obtenant, tous moyens & prétextes de troubler le Royaume & sa Majesté cesseroient ; qu'il auoit deliberé d'y aider & seruir de tout son pouuoir comme il auoit souuent promis , mais que Monsieur le Cardinal de Ioyeuse qu'il vouloit faire chef de cette negociation, ne pouuoit faire ce voyage deuant l'extirpation de la tréue, partant falloit aduiser à la continuer, comme il m'auoit prié de remonstrer à sa Majesté: qu'il enuoyeroit avec ledit Cardinal , Messieurs de Senecé & Ianin, qui luy estoient tres-confidens , & desiroient le bien du Royaume, de sorte qu'il ne falloit seulement qu'auoir patience, sans s'arrester audit serment, lequel estoit fait à la requeste du Legat , & entre ses mains , & deuoit estre du tout remis & différé au Pape , sous le bon plaisir duquel il auoit entendu & protesté le faire & non autrement, mesme estimoit qu'on le trouueroit ainsi écrit en l'original , si ledit Legat pour fauoriser les Espagnols ne l'auoit fait obmettre exprés, comme il y auoit en la coppie que ie luy auois apportée ce mot de Catholique , où il estoit fait mention de ne reconnoistre le Roy de Nauarre , quelque acte qu'il fust pour faire trouuer le serment à Rome moins rigoureux: Qu'enfin il n'estimoit estre obligé par ledit serment de desobeir à sa Saincteté, quand elle

auroit receu & absous sa Majesté, ny de re-  
ietter la paix, pourueu qu'il reconnust le pou-  
voir faire à l'honneur de Dieu, & en saine  
conscience. Que s'il eust eu autre intention  
il ne m'eust employé en ces traitez, ny Mon-  
sieur le President Ianin, que ledit Legat mes-  
me ne faisoit estat dudit serment, comme l'on  
voyoit par ses lettres, par lesquelles il n'es-  
pargnoit lesdits Espagnols, ayant oüy parler  
qu'il vouloit cōtinuer la trêve, desespéroient  
desia de cette Royauté & de l'accomplisse-  
ment dudit serment, encore qu'ils assura-  
sent que l'armée & les moyens qu'ils auoient  
promis par iceluy seroient prests à la fin d'i-  
celle. Qu'il alloit aussi faire débander les  
Deputez des Estats, signe euident de son in-  
tention: car quand ils seroient vne fois sepa-  
rez il n'y auroit plus moyen d'élire vn Roy.  
Partant le principal estoit de fléchir le Pape,  
le joindre à nostre desir, & estre assuré de  
luy auant l'expiration de ladite trêve: car s'il  
falloit recommencer la guerre, il seroit con-  
traint de s'aider encore desdits Espagnols,  
lesquels luy encheriroient leurs danrées plus  
que iamais, & mesmes voudroient estre payez  
auant la main, & luy pour auoir moyen de  
se deffendre, seroit forcé de les contenter, au  
moyen dequoy il prioit ses amis de plaindre  
plûtost sa condition & luy aider à conduire  
les affaires à bon port, que de s'offenser de  
ses actions, estant toutes forcées comme el-  
les estoient, qu'il ne m'auoit rien dit dudit  
serment, & n'en auoit aussi communiqué au-  
dit President, parce qu'il scauoit bien que

nous n'eussions iamais approuué l'vsage de ce remede, & qu'il auoit iuré aussi de n'en parler qu'à ceux qui l'auoient fait avec luy, & sur tout de ne le nous communiquer ny à Monsieur de Bassompierre, pour la ialousie extrême que ledit Legat & les Espagnols auoient de nous; qu'enfin son intention estoit bonne, qu'il m'en assureoit derechef & le feroit paroistre par effet, spécialement enuers sa Sainteté; mais qu'il estoit necessaire d'obtenir ladite prolongation, non pour vn ou deux mois, mais plustost pour quatre, afin de ne precipiter les affaires, si l'on ne vouloit aduancer celles desdits Espagnols, dont il me pria d'aduertir sa Majesté par vostre moyen, & d'en auoir réponse bien-tost, parce qu'il n'en estoit assuré, il falloit qu'il se preparast plustost à la guerre qu'à despescher à Rome.

Et d'autant que vous m'auiez prié, comme i'ay desia dit, avec ces Messieurs qui vous assistoient en ces affaires, de ne desesperer ledit Duc, ny rompre avec luy, i'acceptay encore cette commission, & vins vous trouuer à Estampes, où sa Majesté vous auoit laissé exprés pour entendre la réponse dudit Duc, & la charge qu'il m'auoit donnée, laquelle ie vous representay telle que ie l'auois receuë, dont vous me promistes d'auertir sa Majesté, & me faire sçauoir sa volonté.

Depuis vous & Monsieur de Reuol vintes à Poissy, où ie me trouuay, & accordasmes que ladite trêve seroit continuée encore pour deux mois, sçauoir est, Nouembre & Decembre; toutefois, que la publication ne

s'en feroit que pour vn mois, que dans le dixiesme Nouembre elle seroit publiée pour l'autre, ce que sa Majesté voulut estre ainsi passé pour certaines considerations qui importoit pour son seruice; pareillement il fut accordé que l'on s'assembleroit dedans huit iours audit Poissy pour donner ordre aux contrauentions de ladite trêve, dont chacun de part & d'autre se plaignoit; & sur ce vn bon reglement pour la faire mieux obseruer à l'aduenir. Cecy fut traité & accordé le 13. d'Octobre, dequoy i'aduertis ledit Duc qui m'en enuoya la ratification, laquelle ie vous fis tenir, comme vous fistes apres celle de sa Majesté; mais ie ne me voulus engager en la conference desdites contrauentions, tant le serment & l'acte de Lion m'auoient donné mauuaise opinion du succès des affaires, comme plusieurs autres lesquels n'eussent iamais crû que ledit Duc eust voulu vser de tels moyens pour aduancer les siennes.

Monsieur de Belin fut depesché de luy à sa Majesté en ce temps-là, sur l'aduis qu'il eut que sadite Majesté estoit allée à Dieppe exprés pour faire la guerre à Monsieur de Villars, en faueur du sieur de Boisfroyer qui commandoit au Fort de Fescamp, lequel sa Majesté disoit s'estre donnée à elle deuant la trêve, & partant ne pouuoit l'abandonner audit sieur de Villars qui luy faisoit tous les iours la guerre, pour la supplier de n'vser de voye de fait en cette deffence pour n'alterer les affaires, mais faire que le tout fust traité amiablement, & par les Deputez conformément.



aux articles de la trêve, laquelle ne pouuoit estre rompuë en vn lieu qu'elle ne le fust par tout. Je n'estois auprès dudit Duc quand ledit sieur de Belin fut depesché, car i'estois demeuré à Pontoise, exprés pour me mieux excuser de la conference susdite, que l'on deuoit faire audit Poissy, mais ie sceus que ledit Duc auoit donné charge audit sieur de Belin de sonder sad. Majesté, sur vne plus longue prolongation de ladite trêve que celle qui auoit esté accordée iusques à la fin de l'année, disant ne pouuoir dans ledit temps auoir nouuelles de Rome & d'Espagne, d'où il falloit qu'il eust aduis deuant que de traiter la paix. Et combien que i'eusse aduertý ledit Duc que vous vous trouueriez audit lieu de Poissy au temps que nous auions ordonné pour donner ordre ausdites contrauentions, afin qu'il fist aussi trouuer ses Deputez : neantmoins ie ne vous en manday rien par ledit sieur de Belin qui passa à Mante près de vostre maison, où vous estiez demeuré exprés pour vous acheminer audit Poissy, sans vous donner aduis de son passage, ny de l'occasion de son voyage; dequoy estant retourné à Paris, ie fis plainte audit Duc sur celle que chacun faisoit, de ce que l'on différoit tant à pouruoir ausdites contrauentions: toutefois il voulut attendre le retour dudit sieur de Belin deuant que d'enuoyer audit Poissy, soit qu'il fust en peine de ce feu, que l'on disoit qu'il s'alloit allumer du costé de Normandie, à cause du différend d'entre le sieur de Villars & Boisfroyer, ou qu'il s'attendist d'obtenir la susdite pro-

longation plus longue de ladite trêve par le moyen dudit sieur de Belin, lequel luy en auoit donné quelque esperance : & combien que ie luy remonstrasse qu'il ne s'y deuoit attendre, veu les difficultez que sa Majesté & ceux de son Conseil auoient faites d'accorder les deux moyens que i'auois obtenus; neantmoins comme c'estoit le but auquel il aspireroit par dessus tous autres, il croyoit que ce que ie luy en disois, & le sieur Zamet qui en parloit comme moy, procedoit plustost de mauuaise volonté que de iugement, en quoy le confirma plus que deuant le rapport que luy fit ledit sieur de Belin au retour de son voyage : car luy dit que s'il luy eust donné pouuoir de traiter ladite prolongation, il la luy eust rapporté pour tel temps qu'il eust voulu, mais que ne luy ayant commandé que de sçauoir sur cela l'intention de sa Majesté, il n'auoit voulu s'y engager dauantage; & quant au differend dudit sieur de Villars, il n'eut agreable son entremise, comme celuy qui ne vouloit que l'on sceust gré à autres qu'à luy de ce qui en succederoit : mais voyant qu'il ne pouuoit estre assisté dudit Duc, des Espagnols, ny de Monsieur de Guise en cette querelle, d'autre chose que de belles paroles & promesses, il en fit depuis luy-mesme l'accord avec sa Majesté, auquel i'ay ouy dire que vous fustes employé, de sorte que ledit sieur de Belin ne rapporta de son voyage qu'une lettre de sa Majesté, adressante à vous, par laquelle elle vous mandoit de donner iusques à Paris si ledit Duc vous en prioit, &

connussiez qu'il fust à propos, dequoy ayant eu la communication, ie fus d'aduis que ledit Duc parlast à vous, pour luy-mesmes vous dire ses raisons sur ladite plus longue prolongation, de laquelle il continuoit à faire plus grande instance que iamais, & apprendre aussi de vous la disposition de sadite Majesté sur icelle; ce qui fut cause que vous vinstes en ladite ville bien-tost apres, où vous parlastes par deux fois audit Duc, & ne tint à vous qu'il ne prist autre conseil sur le traité de la paix, que celuy qu'il auoit suiuy iusques alors, sans plus s'amuser aux contrauentions de ladite trêve comme il faisoit: car vous luy distes qu'on auoit eu peine à faire approuuer celle qui auoit esté accordée par sa Majesté, contre l'aduis quasi de tous ses seruiteurs, lesquels estoient blâmez dedans & dehors le Royaume, & sa Majesté aussi, comme de chose que l'on estimoit auoir fait tort à sa reputation & à ses affaires: joint que sa Majesté esperoit estre aduertie par Monsieur de Neuers de l'intention de nostre saint Pere deuant que ladite trêve fust expirée, pource qu'il scauoit qu'il estoit arriué à Rome, & que selon qu'il manderoit à sa Majesté elle se resoudroit de ce qu'elle auroit à faire, mais que si en cinq mois que ladite trêve deuoit durer, ledit Duc ne pouuoit enuoyer à Rome, & scauoir la volonté du Pape, c'estoit sa faute & non celle de sa Majesté, laquelle pour ce regard s'estoit acquittée de son deuoir comme elle auoit promis, encore que ledit Duc de Neuers, auquel elle auoit donné la charge, fust, tant

pour la qualité que pour son indisposition, moins portatif que les autres : que sa Majesté ne pouuoit endurer que son peuple payast la taille à deux partis plus long-temps de son consentement, comme elle auoit souffert iusques alors, esperant que la trêve engendreroit la paix, par le moyen de laquelle elle pouruoiroit à son soulagement plus commodement, mais qu'elle ne voyoit pas à son grand regret les choses estre pour ce regard plus aduancées qu'elles estoient le premier iour, ains au contraire auoir assez d'occasion de croire que l'on n'auoit recherché ladite trêve que pour mieux se preparer à faire durer la guerre : que si ledit Duc eüst eu volonté de bien faire il en seroit autrement, car chacun sçauoit qu'il en auoit le pouuoir, & que tout dependoit de luy ; ioint que sa Majesté estoit resoluë de passer tout ce qu'honnestement elle pouuoit accorder pour le contenter, tant au general qu'au particulier, comme elle luy auoit fait souuent dire : Mais aussi qu'il estoit deliberé de ne se repaistre plus de parole, & qu'il falloit des effets.

QV'ELLE auoit rendu au Pape & au saint Siege l'honneur & le respect qui leur estoient deus, & tels l'on leur auoit désiré ; & si la faction d'Espagne estoit si forte à Rome que sa Majesté n'y peust estre receuë, il estoit question de sçauoir en ce cas ce que ledit Duc pretendoit faire, & s'il traitteroit ou non, d'autant que selonc cela sa Majesté seroit conseillée de se gouverner en son endroit, le priant de bien peser ce fait auant que d'y faire réponse, afin

de ne perdre cette occasion, & d'obliger à luy  
ladite Majesté & toute la France, voire la  
Chrestienté, avec beaucoup de gloire & d'v-  
rilité pour luy & pour les siens, laquelle estoit  
encores entre ses mains : adjoustant que s'il  
continuoit à remettre au Pape ce que l'on sça-  
voit dependre de luy entierement, sans par-  
ler de luy plus clairement qu'il n'auoit fait  
iusques alors, sa Majesté feroit mauuais iu-  
gement de son intention, de sorte que vous  
n'aurez moyen, à vostre grand regret, de ser-  
uir au repos du Royaume selon vostre desir.

MONSIEUR, vous amplifiastes ce dis-  
cours de plusieurs autres raisons tres-confide-  
rables, fondées sur le besoin que le Royaume  
auoit de la paix, & toute la Chrestienté de  
l'vnion des Princes Chrestiens pour s'oppo-  
ser aux armées du Turc : Toutefois vous ne  
peustes ébranler ledit Duc, la premiere & la  
seconde fois que vous parlastes à luy, de sor-  
te que vous en partistes tres-mal édifié com-  
me il vous pleût me dire, & moy audit Duc,  
lequel pour cela ne s'en émeut pas dauanta-  
ge, & me semble qu'il attribuoit les difficul-  
tez que vous luy auiez faites sur la continua-  
tion de ladite trêve qu'il affectionnoit plus à  
vn commun aduis que nous auions pris en-  
semble, vous, le sieur Zamet & moy, qu'à la  
verité du fait, d'autant que nous luy en auions  
autant dit que vous, & que ledit sieur de Be-  
lin luy en auoit donné toute autre esperance,  
de laquelle neantmoins vous ne voulustes le  
reietter entierement, le voyant si attaché à  
ce poinct, afin comme ie croy, d'en remettre

la resolution à sa Majesté, & luy faire sçavoir & à moy son intention dedans huit ou dix iours au plus tard; ce que vous ne peustes faire à cause de l'eloignement de sadite Majesté, qui estoit encoré à Dieppe, & de vostre indisposition, mais ledit Duc m'enuoya à Pontoise apres vostre partement afin d'estre plus près de vous, où ie receus vos lettres du 25. Novembre, par lesquelles vous me mandiez que ie vous reuerrois bien-tost aupres dudit Pontoise, nous donnant tousiours peu d'esperance de la prolongation de ladite trêve, mais esperant de bien traiter à bon escient la paix, si l'on y vouloit entendre, comme l'on pouuoit faire deuant que la trêve fust expirée, dedans lequel temps vous esperiez estre assuré de la volonté du Pape, concluant que sa Majesté desiroit & auoit tant de besoin de la paix, que vous estimiez qu'elle ne precipiteroit rien.

Ie presentay vostre réponse audit Duc, laquelle luy donna plustost esperance d'obtenir ladite prolongation qu'elle ne l'en desespoiroit, en verité contre mon aduis, tant il est difficile d'arracher de l'esprit d'un Prince l'opinion d'une chose qu'il affectionne, partant il me pria de retourner à Pontoise pour vous voir, se persuadant que ie vous persuaderois de faire à la fin ce que vous n'auiez enuie, ny peut-estre pouuoir de ce faire, quoy que ie luy peusse dire au contraire: & comme il connut que i'auois besoin d'estre en cela persuadé autant que vous mesmes, parce que ie n'estois assez eschauffé à son gré, il y usa d'un artifice

nouveau pour me remettre en train, c'est qu'il me voulut faire croire qu'il auoit tant fait avec Monsieur son neveu qu'il l'auoit du tout gaigné & tourné à la paix, de sorte qu'estant maintenant bien vnis en ce dessein, si sa Majesté luy donnoit le loisir de conduire les affaires, il ne falloit point douter qu'elles ne succedassent heureusement, & sur ce il me dressa vne partie pour me faire parler à Monsieur son neveu, lequel s'en acquitta, de façon qu'il ne me donna pas grande occasion de croire qu'il eust certe volonté : toutefois ie ne laissay pas de retourner à Pontoise, afin d'auoir ce bien que de vous voir; ioint que i'eusse en verité desiré que l'on eust prolongé ladite trêve encore vn mois, pour leuer toute excuse audit Duc, & en ce faisant le mettre de plus en plus en son tort, estimant que cela ne pouuoit estre que tres-vtile au public.

Mais quand ie vous vis, vous me fistes bien connoistre qu'il ne se falloit plus attendre à ladite prolongation, me disant que sa Majesté auoit de nouveau decouvert par plusieurs autres lettres qui auoient esté prises, que ledit Duc ne la demandoit que pour donner loisir aux Espagnols de s'armer, & au sieur de Montpesat faire le voyage d'Espagne où ledit Duc l'auoit enuoyé, ce qui vous estoit confirmé par la demeure en France du President Ianin; lequel au lieu d'estre allé à Rome avec le Cardinal de Ioyeuse & le sieur de Senecé comme il auoit promis de faire, s'il connoissoit comme il disoit, que l'on voulust bien faire, n'auoit pas passé Lion, & auoit

laissé aller les deux autres , auxquels l'on auoit autant de défiance qu'en luy.

I e reuins à Paris exprés pour dire audit Duc , que sa Majesté estoit resoluë de ne continuer ladite trêve le mois de Decembre passé , afin qu'il ne s'y attendist plus , & luy conseillay d'entendre à la paix sans plus remettre le traitté à vn autre temps , luy disant que si la guerre recommençoit sans estre assisté de forces suffisantes pour s'opposer à celles du Roy , & sur tout déliurer la ville de Paris de captiuité , que plusieurs , tant de bonne volonté que par necessité se separeroient du party , & composeroient avec sa Majesté , à present qu'elle faisoit profession de la Religion Catholique , & que ceux qui demeueroient constans dans le party , traitteroient encore sans luy avec les Espagnols , lesquels recherchoient vn chacun de ce faire : dont ie luy disois , qu'entr'autres ils s'estoient adressez à mon fils , lequel ils auoient fort pressé de traiter avec eux à son deçeu , combien qu'il fust reconnu d'eux & d'vn chacun luy estre tres-affectiéonné , par où il pouuoit connoistre quel estoit leur but , ce qu'il deuoit esperer d'eux , & quelle seroit sa condition s'il aduenoit que chacun traittast sans luy avec sa Majesté , ou avec lesdits Espagnols , comme ie scauois que l'on feroit.

Tout cela ne le peût destourner de son premier chemin , qui estoit d'attendre les nouuelles de Rome & d'Espagne deuant que prendre party : de sorte qu'il se resolut de s'aider encore de Monsieur de Belin pour tenter



derechef s'il pourroit auoir ladite trêve, pensant que ie l'en desespérois exprés pour le contraindre à faire la paix; joint que ledit sieur de Belin continuoit à luy en donner esperance; mais à son retour il en desespera du tout ledit Duc, lequel neantmoins ne changea d'aduis, ains pria ledit sieur Zamet de tenter encor ce remede, nous disant que Monsieur le Legat & luy' auoient depesché à Rome le sieur Montorio pour deuancer ses deputez, & faire que le Pape luy permist de traiter avec sa Majesté. Toutefois ie sceus qu'il luy auoit donné autre charge, & que de nouveau il s'estoit laissé persuader que le Pape & le Roy d'Espagne ayant veu n'auoir pû faire élire Monsieur de Guise, demanderoient qu'on eleust le fils aîné dudit Duc, moyennant le mesme mariage de l'Infante; ce qui auoit esté apposté pour renuerser la paix avec sa Majesté, laquelle il luy faisoit remonstrer ne se pouuoir euitier que par ce moyen: en quoy il se laissoit entretenir du sieur Iean Baptiste de Tassis, lequel comme le plus fin luy donnoit esperance que son maistre y condescendroir, pourueu que la chose fust bien conduite. Cettui-cy ayant eu cette astuce, embouché des partisans d'Espagne qui enuironnoient ledit Duc que de luy faire croire qu'ils affectionnoient son contentement & la grandeur de sa maison, plus que toute autre chose, au lieu que Dom Diego d'Ibarra faisoit le contraire avec ledit Duc de Feria, lesquels se monstroient plus affectionnez à Monsieur de Guise, tout cela ne se faisoit que pour les

abuser tous deux, & par ce moyen nous faire franchir le fault de cette Royauté afin de perpetuer nos miseres.

Q u o y voyant, & que la trêve alloit expirer, de sorte qu'il falloit se refoudre de recommencer la guerre à sa Majesté, ou s'accommoder avec elle, comme celuy qui estoit entré en la Ligue par necessité, & qui y estoit depuis demeuré pour servir au repos de son païs pour auoir éprouué cette guerre, ie pris congé dudit Duc le vingt-troisieme de Decembre, & me retiray à Pontoise avec les miens, pour les disposer à reconnoistre sa Majesté avec moy, puisque Dieu luy auoit fait la grace de se ranger au giron de l'Eglise; que ledit Duc ne vouloit faire la paix, & que le dessein des Espagnols estoit d'vsurper & diuiser le Royaume & le destruire. Et par tant ie suppliy derechef ledit Duc de mieux aduiser à ses affaires, & considerer que l'esperance de la paix auoit contenu plusieurs Villes & personnes au party & en bonne opinion de luy, qui s'en separeroient & murmure-roient contre luy quand la trêve expireroit; tant pour estre lassez de la guerre que pour ne vouloir porter les armes contre sa Majesté puis qu'elle estoit Catholique, suiuant en cela leurs protestations & declarations sou- uent reïterées & publiées de sa propre bouche & par escrit, dequoy il seroit difficile qu'elles fussent retenues pour le respect du Pape, sur lequel ledit Duc s'excusoit, puis que sa Majesté s'estoit mise en deuoir de le contenter, joint que l'on estimoit que sa Sain-

eteté ne luy pouuoit justement refuser son  
absolution, la demandant d'un cœur penitent,  
si humblement qu'elle faisoit : de sorte que  
si sa Sainteté en faisoit difficulté, comme dé-  
jà l'on commençoit à dire sous-main qu'elle  
estoit resoluë de faire, l'on l'imputeroit au  
pouuoir qu'auoient à Rome les Espagnols,  
ayant veu que le Legat fauorisoit ouuerte-  
ment leurs pratiques & desseins que ie ne vou-  
lois pour mon regard que la guerre me sur-  
prist à Paris, tant pour ce que ie voulois estre  
en lieu où ie fusse libre pour disposer de moy  
comme Dieu me conseileroit, que pour ce que  
ie ne pouuois compatir aux humeurs dudit Le-  
gat, & desdits Espagnols, lesquels ie tenois  
auteurs & cause de la ruine du party Catho-  
lique & de la France, que de demeurer auprès  
de luy sans y adherer, ce seroit me perdre &  
me faire mocquer de moy; & dauantage, luy  
faire tort, parce qu'en recommençant la  
guerre il seroit contraint d'espouser entiere-  
ment leurs passions, deuenir leur esclau, ou  
d'estre abandonné de toutes parts. Que si ie  
voyois qu'apres cela il nous restast encore  
quelque sorte d'esperance de faire la paix, ie  
ne laisserois de m'y employer comme i'auois  
fait depuis la mort du feu Roy, que ie l'auois  
suiuy & accompagné exprés : Mais qu'il ne  
s'y faudroit plus attendre apres ladite trêue,  
la fin de laquelle apporteroit vn merueilleux  
changement aux affaires, que ie ne voulois  
plus luy représenter les mal-heurs qui luy en  
arriueroyent, parce qu'il y deuoit voir plus  
clair que moy, & que ie les luy auois remon-

fré si souuent , que i'estimois l'en auoir importuné. Mais seulement que ie luy voulois dire que s'il n'estoit retenu comme il disoit, que du respect qu'il portoit à sa Saincteté en ce traité, l'on pourroit peut-estre obtenir de sa Majesté, que tout seroit fait sous le bon plaisir d'icelle, afin de la contenter : adjoustant que i'estimois qu'il feroit plaisir à sa Saincteté d'en user ainsi, afin de la soulager au jugement qu'on luy auoit remis, auquel chacun reconnoissoit qu'elle estoit agitée & combattuë de diuerses considerations, concludant que si apres la trêve il ne trouuoit moyen de contenter & retenir les Villes au party, elles luy eschapperoient plus viste qu'elles n'y estoient venuës apres la mort de Messieurs ses freres, tant l'ambition & la foiblesse des Espagnols, avec les maux qu'elles auoient endurées par nostre conduite en routes choses leur auoient fait desirer, & leur faisoit maintenant approuuer la conuersion de sa Majesté comme estant l'vnique, plus prompt & asseuré remede à leurs calamitez, le suppliant si mes raisons & remonstrances ne pouuoient l'esmouuoir, au moins se ressouvenir quelquesfois du deuoir auquel ie m'étois mis de l'assister, conseiller & seruir en cette occasion, l'asseurant que ie regretterois eternellement de n'auoir pu acquerir en cinq ans que ie l'auois accompagné, plus de créance en son endroit pour son propre bien & seruiçe, non moins que pour conseruer la Religion & le Royaume.

L A D I T Duc auoit derchief deuesché M.

de Belin deuers sa Majesté, pensant obtenir à la fin ladite prolongation, & vouloit que l'attendisse son retour auant que partir: mais ie le suppliy de m'en excuser, sçachant que ledit sieur de Belin n'en rapportoit qu'un refus, craignant qu'il n'aduinst quelque chose qui rendist mon partement plus difficile & moins honnesté: partant ie me retiray à Pontoise, où on eut ce bien de vous voir bien-tost apres avec Monsieur de Sancy, où se trouua ledit sieur Zamet qui reuenoit de Mante. Là ie vous assure de ma deliberation apres l'auoir esté de vous, qu'il ne falloit plus esperer de trêve generale, mais ie vous priay de m'en faire accorder vne particuliere pour Pontoise, tant pour me donner moyen de gagner mon fils & ceux de la garnison, que pour auoir loisir de voir quelle resolution Monsieur de Mayenne prendroit à Paris, apres auoir entendu la volonté du Pape, & ce que M. de Neuers en rapporteroit sans poser les armes contre sa Majesté, laquelle la nous accorda pour trois mois, dont i'aduertis Monsieur de Mayenne qui la ratifia, mais à regret, à cause de ce qui estoit aduenü à Meaux, où les habitans auoient reconnu sa Majesté avec Monsieur de Vitry leur Gouverneur, dont ledit Duc estoit tres-offensé, & non sans cause, car la declaration de ceux de ladite Ville refucilla les courages des armées, leur fit gouster les raisons qui les auoient meuz, avec le bon traitement que sa Majesté leur auoit fait; de façon que plusieurs commencerent à detester la guerre & les auteurs

de Brissac, & ledit sieur Zamet vers sa Majesté chargez de nouvelles offres, ainsi que i'ay entendu, dont sa Majesté fit aussi peu de conte que des premiers, disant tousiours qu'il vouloit faire la paix tout à fait, ou la guerre, sans plus s'amuser ausdites trêves, tant elle auoit mauuaise opinion de la volonté dudit Duc.

S y R. cela sa Majesté alla à Chartres, où elle se fit sacrer au grand plaisir & contentement d'un chacun: & le Cardinal de Plaisance publia vne lettre adressante aux bons Catholiques, par laquelle il leur faisoit sçauoir que nostre saint Pere n'auoit admis & receu Monsieur de Neuers, que comme Prince d'Italie, & non en qualité d'Ambassadeur de sadite Majesté, à laquelle il nous aduertissoit qu'il ne donneroit iamais absolution quoy qu'elle fust, dequoy chacun fut extrêmement scandalisé & offensé: car par sa lettre il ne rendoit aucunes raisons de ce refus, qui étoit jugé de tous trop rigoureux, pour celuy qui tenoit lien de Pere commun des Chrestiens, mesmes à l'endroit d'un tel Prince que sa Majesté, laquelle l'auoit recherché avec tant de submission & d'humilité: de sorte que la rencontre de ces deux actions, sçauoir du sacre de sa Majesté, & de ladite declaration, fit resoudre plusieurs personnes de reconnoistre sa Majesté, encore plustost qu'elles n'eussent fait, voyant d'un costé que sadite M. faisoit ce qu'elle deuoit, & pouuoit, pour asseurer ses subjets de sa veritable & entiere conuersion; & de l'autre que ledit sieur Cardinal

nous desespéroit entièrement de l'assistance de sa Sainteté en sa faueur contre toute raison, par où nous nous voyons plongez pour jamais en vne abisme de calamitez au péril de la Religion, sans nous faire apparoir d'aucun moyen ny remede propre pour nostre consolation.

Dequoy chacun vit aussi bien-tost sortir des effets par la resolution que prirent les principales Villes du Royaume, de recourir à sa Majesté, & luy iurer fidelité & obéissance, comme firent plusieurs Seigneurs & Gentils-hommes, lesquels jugerent ne deuoir plus differer à ce faire sous pretexte d'attendre la volonté de sa Sainteté, puis qu'elle auoit condamné sa Majesté sans l'ouïr, comme nous apprenions par la lettre dudit Legat imprimée; joint que sa Majesté auoit communiqué aux saints Sacremens de l'Eglise, & fait les sermens accoustumez aux Sacres de nos Rois.

M O N S I E U R, vous sçavez que Dieu m'a fait cette grace que i'ay esté des premiers qui se sont rangez au deuoir, auquel comme il a plû à sa Majesté me receuoir tres-fauorablement par vostre moyen & de mes autres amis qui s'y sont employez, ie vous ay voulu aussi adresser ce compte de mes actions durant ma miserable fortune, tant pour vous témoigner l'obligation que ie reconnois vous en auoir, que vous donner occasion de me continuer vostre amitié, de laquelle ie sçay que vous n'honorez pas volontiers ceux qui ont l'amertume : ie jure aussi que ie ne la

rechercherois, si en ma conscience ie scauois m'enestre rendu indigne, voire ne demeurerois en ce Royaume, ny ne pourrois viure ailleurs en aucun repos, tant i'abhorre vn malefice, & suis ialoux de mon honneur: ce que nous faisons par force & necessité ne nous doit entierement estre imputé, mesmes quand en nostre cheute nous nous efforçons de l'amender en seruant au public, comme vous voyez par ce discours que ie me suis mis en peine de faire.

I E scay bien que l'on ma long-temps blâmé de la poursuite de ladite paix, voyant qu'elle estoit infructueuse, comme si i'eusse eu part à l'artifice dont elle a esté accusée; les vns croyans que i'auois tel pouuoir auprès dudit Duc qu'il faisoit vne partie de ce que ie luy conseillois, & les autres que ie le deuois abandonner dès le commencement, & que ie deuois auoir reconnu qu'il ne marchoit de bon pied: i'excuse les vns & les autres, car en verité ayant esté nourry aux affaires; voire si i'ose dire dedans le sein des Rois, la raison vouloit que ledit Duc fist plus de compte de mes conseils qu'il n'a pas fait; & de l'autre, mon deuoir m'obligeoit de le quitter les voyant mesprisez: car i'aduoüe n'auoir peché par ignorance, mais le succez des affaires, & ma derniere resolution me iustificient assez, estant certain que ie n'eusse esté si vtile au public que ie pense auoir esté, si i'en eusse vscé autrement, comme ie m'assure que tesmoigneront tous ceux qui ont suiuy ce changement qui est aduenü, ie n'en recuse vn seul.



dauantage, ie ne me fusse satisfait moy-mesme, ny peut-estre contenté sa Majesté & mes amis, comme i'estime auoir fait.

Car il me fust demeuré vn regret, & à l'auenture vn perpetuel reproche d'estre auantement cause de la longueur de nos calamitez publiques si i'en eusse abandonné la Cour cependant que par raison & iugement le Roy mesme & ceux qui le seruoient, comme plusieurs gens de bien qui seruoient le party de Monsieur de Mayenne, croyoient que ie pouuois y servir; l'on eust dit que i'eusse preferé mon particuliere au public par timidité, ou pour ma commodité: dauantage, ie ne scay point deuant la conuersion de sa Majesté i'eusse pu persuader aux miens de faire ce qu'ils ont fait pour le seruice de sa Majesté, tant ils estimoyent leur honneur estre engagé à suiure l'opinion commune de la guerre, laquelle estoit colorée du pretexte de la Religion.

I'aduouë bien auoir reconnu dès le commencement que ledit Duc n'auoit pas grande enuie de faire la paix, mesmes lors qu'il refusa de faire semondre sa Majesté de se faire Catholique, car c'estoit le chemin qu'il y falloit tenir pour y paruenir; mais aussi ie descouurois en mesme temps quelle estoit la cause qui l'en degoustoit, & si ie me suis trompé en quelque chose, ç'a esté d'auoir esperé que le temps & l'experience luy feroient changer d'aduis; aussi s'il n'est aduenü, ç'a esté plus par vn vray iugement de Dieu que par raison: car ie puis dire que le Ciel & la terre ont comme à l'enuie l'vn de l'autre

combattu son dessein depuis le commencement iusques à la fin, & neantmoins chose quelconque n'a pû l'en diuertir, & souuent a esté pour cela, mais à tort, accusé d'irresolution au fort de la constance, lors que la nature, les vœus d'un chacun, & mesmes les propres paroles & actions le couuroient & desguisoient entierement, & spécialement aux yeux de ceux qui discouroient & iugeoient des choses par ce qui luy estoit plus honorable & vtile, comme ie confesse auoir fait souuent.

Mais le desir de regner & tenir le premier lieu a tousiours transporté ce Prince, s'estant promis de pouuoir par les armes & sa vertu atteindre ce degré pour luy & pour les siens, fauorisé du pretexte de la Religion, lequel luy auoit acquis la bien-veillance publique, assisté des forces & moyens du Roy d'Espagne, & peut-estre que s'il eust eu plus d'heur, proude gens n'eussent fait conscience d'excuser, voire fauoriser son dessein, à cause des aduantages que Dieu luy auoit mis en main, lesquels donnoit occasion de croire qu'il vouloit faire vn changement en cet Estat, comme d'aventure il fust aduenu, s'il n'eust rencontré sa Majesté, laquelle a eu le courage de deffendre la justice de sa cause, assisté de Dieu & de la Noblesse : mais ledit Duc se deuoit au moins departir apres la bataille d'Iury, en laquelle il esprouua sa fortune; ou bien au retour d'Espagne du President Ianin, par lequel il fut esclaircy que le Roy d'Espagne pretendoit à la Couronne pour luy &

pour sa fille , & sur tout apres la conuersion de sa Majesté , que le pretexte de la Religion avec la bien-veillance publique luy manquoient avec les moyens & la faueur du Pape & dudit Roy d'Espagne , les Ministres desquels vouloient qu'on preferast à luy Monsieur son nepueu. S'il eust pris ce party comme il en estoit conseillé par tous ceux qui l'aimoient , quelle gloire n'eust-il acquise ? Il eust iustifié la memoire des siens , ses actions passées , & celles de ses amis & du party : l'on luy eust attribué vne grande partie de l'honneur de la conuersion de sa Majesté , la France eust estimé luy deuoir son salut & son repos : quelle fortune aussi n'eust-il faite ? car il eust vny à luy d'un lien indissoluble les bonnes Villes du Royaume , auxquelles il auoit commandé , & la foiblesse qui l'auoit suiuy. Plusieurs estiment aussi qu'aucuns Catholiques qui ont suiuy sa Majesté , se fussent apres ce deuoir tres-volontiers attrachez à sa fortune pour asseurer les leurs , sujets à ce changement , comme sont ordinairement celles qui se forment durant vne telle guerre & confusion qu'a esté la nostre depuis cinq ans , & si le Roy traitant avec luy eust accordé quelque aduantage aux Catholiques , comme i'estime qu'il eust fait , l'on luy eust donné l'honneur & le gré , de sorte qu'il eust esté difficile d'empescher qu'il n'eust esté reconnu à l'aduenir chef du party Catholique en ce Royaume , & que par ce moyen il n'eust conserué ses intelligences estrangeres , lesquelles se fussent d'autant plus volontiers entretenues avec

luy, qu'estant son credit & pouuoir plus grand & asseuré, son amitié eust esté aussi plus utile: dauantage, le Roy eust esté contraint pour auoir la paix, de luy accorder, & à ceux de sa maison & autres ses amis & partisans, plusieurs aduantages particuliers, qui l'eussent rendu plus puissant que iamais, dont il eust esté difficile, voire impossible, que sa Majesté l'eust priué quand elle l'eust voulu faire, principalement tant que la diuersité de la Religion eust duré en ce Royaume: car ce pretexte eust tousiours seruy d'arboutant & d'appuy à sa conseruation: bref il pouuoit par la paix s'establir avec tant d'honneur & telle autorité & puissance que sadite Majesté n'eust guere moins eu besoin de luy & de son seruice, qu'il eust eu de sa bonne grace & bienveillance, le Royaume estant en l'estat qu'il est.

Mais Dieu n'a voulu qu'il soit ainsi succédé pour manifester sa justice, neantmoins ie diray que si vn autre que ledit Duc eust conduit ces affaires, que le Royaume eust plus pâty qu'il n'a fait: car certainement il a tousiours contredit aux violences publiques & priuées, & à la dissipation de l'Estat, de quoy se plaignoient ceux qui vouloient rendre nostre guerre perpetuelle; & à dire le vray, il a fait paroistre auoir trop bon naturel pour durer & compâtrir avec telles sortes de gens, lesquels vouloient à quelque prix que ce fust ruiner le Royaume, pensant s'agrandir aux despens d'vn chacun.

Mais le bon-heur de la France s'y est op-

posé, fauorisé de la grace de Dieu, qui s'est  
feruy de la magnanimité & vertu de sa Ma-  
jesté, à laquelle apres sa diuine bonté, la  
gloire en est deuë principalement. Toutefois,  
Monsieur, la playe est encore ouuë de sor-  
te que sa Majesté a besoin d'estre mieux ser-  
uie que samais pour la garde du tout; car vn  
petit accident la peut rendre aussi dangereuse  
que deuant. Sur tout nous deuons supplier sa  
Majesté de mieux mesnager sa personne  
qu'elle n'a fait, car en sa conseruation con-  
siste le salut du Royaume, elle a voulu iusques  
icy, & peut-estre qu'il a esté nécessaire se ha-  
zarder pour asseurer les autres; mais il faut  
d'oresnauant que les autres se hazardent  
pour l'asseurer: car s'il en mes-aduenoit, nos  
maux deuiendroient à l'instant plus perilleux  
que iamais: c'est peut-estre ce qui nourrit &  
entretient encore le reste des factions qui  
nous troublent, voire qui en preparent de  
routes nouuelles, non moins dangereuses  
que les autres; vous y voyez plus clair que  
moy, & scauez encor mieux par quel moyen  
l'on y peut remedier; partant ie m'en tairay,  
& mettray fin à mon discours. Ie vous sup-  
plieray le prendre en bonne part, & croire  
qu'il est veritable, & ie demeureray eternal-  
lement.

Vostre seruiteur, D E N E V V I L L E.

*Les presens Memoires acheuez d'im-  
primer, l'Imprimeur en a recauert une  
coppie plus ample que celle dont il s'estoit*

*seruy, de laquelle il a tiré les lieux cy-dessous, qui seruent à rendre cet ouurage plus parfait, & font voir que M. de Villeroy y auoit mis la main plus d'une fois.*

**P**Age 174. ligne 18. apres ce mot, *d'oppression*, adjoustez.

A v resté qu'elle loioit la resolution que ie prenois de me retirer en ma maison quand la paix seroit desesperée: que c'estoit le vœu d'un homme de bien, obligé à la France comme i'estois, & qu'elle me donneroit pour ce faire toutes les assurances & sauuegardes qui me seroient necessaires; mais qu'elle vouloit que ie la visse encore vne fois auant que me retirer, quand ce ne seroit que pour luy rendre compte de la réponse & volonté dudit Duc.

Page 176. ligne 22. apres ce mot, *la paix*, adjoustez. Tout cela me seroit fort peu, car ledit sieur Marechal péchoit en cette opinion aussi bien que les autres, & sa Majesté mesme estoit de cet aduis, encore qu'elle me fist vne ample declaration de sa bonne volonté au repos public, & au contentement particulier dudit Duc, comme de sa grace elle en fit en mon endroit.

Ie retournay encores à Soissons vers ledit sieur Duc de Mayenne, à qui ie rendis compte de tout ce que dessus, sans toutefois luy dire ce que i'estimois le pouuoir aigrir & éloigner du desir de la paix; ie connus bien qu'il n'estoit pas trop content de mon retour, & que

ie luy eusse fait plus de plaisir de gagner ma maison , & que durant mon absence aucuns luy auoient fait trouuer mon voyage tres-mauuais & preiudiciable à sa réputation & au party , à cause que les zelez qui possédoient lors la ville de Paris & les estrangers en monstrent estre mal contents, nonobstant les lettres de desadueu qu'il leur auoit écrit, à quoy il estimoit que moy n'estant auprès de luy il les confirmeroit de plus en plus.

Page 206. ligne 4. apres ce mot , *parlé*, adjoûtez.

Nous nous separasmes là dessus , certes à mon grand regret , parce que j'auois bien fait estat d'engager si auant ledit affaire par l'accord de ladite cessation , que l'on eust esté contraint de part & d'autre de passer outre; mon pere n'en fut moins marry que moy, car il s'en estoit fait fort , & m'auoit fait venir exprés pour cela. Toutefois ie receus , &c.

Page 206. ligne 27. apres ces mots , *tendoit de plus* , adjoûtez : Cecy fut consulté avec ledit Duc de Parme & l'Euesque de Plaisance, lesquels ie reconnus craindre extremement que l'on attachast quelque negociation avec sa Maiesté pour quoy que ce fust , tant ils se desioient desia dudit Duc de Mayenne, auquel aussi ils déguisoient encores le but du Roy d'Espagne: car Iean Baptiste de Tassis ayant remis à l'en éclaircir , quand il arriua , apres que la ville de Paris seroit secourüe , comme il fut blessé d'une grande arquebuzade deuant Corbeil , de laquelle l'on pensoit qu'il deust mourir , il ne luy en dit rien du tout,

non plus que ledit Rossieux qui l'auoit accompagné en Espagne, lequel disoit que sa Majesté Catholique auoit chargé du tout ledit Tassis : Et toutefois Monsieur le President Ianin m'a dit auoir appris en son voyage d'Espagne qu'il n'en auoit esté rien, celé audit Rossieux, mais qu'ils l'auoient si bien gaigné qu'il estoit plus à eux qu'à son Maistre, comme il témoigna tres-bien en cette occasion, que ledit Duc de Parme & les autres Ministres du Roy d'Espagne resolurent couvrir audit Duc de Mayenne la volonté de leur Maistre, parce qu'ils reconnoissoient qu'il auoit quelque autre dessein que ledit Duc de Parme s'en vouloit retourner avec son armée, & que leur partie n'estoit pas encores si bien dressée qu'ils desiroient pour la manifester à d'autres qu'à ceux desquels ils estoient bien asseurez : Et si ledit Rossieux eust esté fidele à son Maistre, il l'eust lors éclaircy de toutes choses, surquoy il eust pû prendre quelque autre party que celui qu'il prist : Et veritablement plusieurs iugeoient que ledit Duc de Parme n'auoit secouru Paris pour le déliurer ; mais pour en acquerant à son Maistre & à luy la gloire & obligation de ce succez, rendre ses forces plus necessaires, car il eust pris la ville de Corbeil plustost & à meilleur compte s'il eust voulu : & s'il se fust adressé à Melun deuant l'autre, peut-estre qu'il en eust eu bon marché.

DAVANTAGE, il pouuoit encore retenir l'armée, & apres la prise de Corbeil entreprendre encore quelque autre chose, & mes-



mé s'attaquer à saint Denis qui n'estoit encorés fortifié; car sa Majesté estoit foible; & ledit Duc de Parme n'auoit faute de moyens d'entretenir, voire de rafraîchir son armée: Mais il fut possible bien aise qu'elle se deffist & consumast deuant ledit Corbeil, tant il donna mauuais ordre à la nourriture d'icelle; exprés pour auoir excuse de s'en retourner, & en ce faisant laisser l'adite ville de Paris & le party en necessité, car ledit siege de Corbeil dura plus de six semaines: Et si d'abord il eust voulu l'assaillir par où il le batrit & prit à la fin, comme il luy fut remonstré, il l'eust forcé en huit iours, sans reietter comme il fit, cette longueur sur la faute des poudres & balles à canon, & partant sur ledit Duc de Mayenne, lequel faisoit plus qu'il ne pouuoit pour le secourir; & toutefois l'autre le decrioit tant qu'il pouuoit. S'il le faisoit pour mieux faire les affaires du Roy Catholique ou non, comme aucuns ont voulu dire, ie m'en rapporte à ce qui en est; mais il est certain qu'il y fit plus de mal que de bien, s'y gouuernant comme il fit: car les hommes, & principalement les François, se gaignent & acquierent bien plustost par les beaux faits que par la necessité, comme les Espagnols ont depuis éprouué.

Page 211. ligne 10. apres ces mots, *s'iroient enuoyez*, adjoustez.: Doncques suivant l'aduis desdits sieurs ie m'acheminay à Soissons, & vis sa Majesté en passant à Senlis, à laquelle ie dis, & pareillement à Monsieur d'O & de la Nouë, le desplaisir que j'auois receu des-

dites lettres, les plaintes qu'en auois faites, & auois deliberé de renoueller, ce que le President Ianin m'en auoit escrit, & comme i'allois trouuer ledit Duc exprés pour les faire reformer, & remedier au mal qu'elles auoient fait; mais qu'il estoit question de sçauoir si sa Majesté feroit renoueller & prolonger lesdits passe-ports, si ledit Duc vouloit changer sa depesche, puis que les deux mois accordez par les premiers estoient quasi expirez; remonstrant à sa Majesté que c'estoit chose qu'elle deuoit accorder, afin que cette faute que l'on disoit ne proceder de mauuaise volonté, comme ledit Ianin m'auoit escrit; ne fust cause de rompre ladite assemblée, sans laquelle la paix ne se pouuoit faire. Sa Majesté me'promit faire rafraischir lesdits passe-ports, pourueu qu'elle vist & fust d'accord de la forme & substance des lettres que l'on escriroit aux Prouinces.

Et d'autant que ledit sieur Ianin m'auoit escrit que ledit Duc l'enuoyoit en Espagne; & qu'il desiroit sçauoir deuant son partement si sa Majesté en traitant la paix se laisseroit aller, de vider par accord aussi les differens qu'elle auoit avec le Roy d'Espagne, afin d'en répondre où il alloit, ie pris la hardiesse d'en demander à sa Majesté sa volonté, & luy dis que c'estoit pour la faire sçauoir audit President; adioustant qu'il me sembloit que sa Majesté ne deuoit faire difficulté d'en donner parole, d'autant que cela pourroit seruir grandement à faire ladite paix, estant certain que le vent qui venoit de ce costé-là nourris-

loit plus qu'autre chose la tourmente qui troubloit ce Royaume : ioint que ie scauois que ledit Duc de Mayenne ne traiteroit iamais sans ledit Roy , & que ce seroit l'honneur & l'aduantage de sa Majesté de mettre la Chrestienté en paix avec son Royaume. Ce qu'il prist de sa grace en tres-bonne part , me disant qu'elle auoit si grande enuie de deliurer son peuple d'oppression , qu'elle estoit resoluë d'y ceder du sien pour y paruenir , & suiure en cela le conseil des plus sages , pourueu qu'on le fist dignement & honorablement , & non autrement , car elle vouloit plustost perdre la vie que de rien faire & passer indigne de sa Majesté , & de la memoire de ses predecesseurs ; dequoy elle me promit de donner aduis audit President Ianin, comme à vn chacun , de son affection au repos du Royaume. Cecy fut par l'aduis de Monsieur de la Nouë que i'ay tousiours trouué très-fidelle à son Maistre, & prudent en toutes choses , mais principalement en ses derniers iours à desirer & conseiller ladite paix, comme il faisoit ordinairement , combattant l'opiniaistreté ou malice de certains flatteurs ou ignorans , lesquels soustenoient que sa Majesté pouuoit mieux venir à bout de ses ennemis par la guerre que par vn accord ; & partant la dissuadoient d'entendre à toute reconciliation , & toutefois eussent esté bien marries de se relascher d'vn seul poinct de leurs profits & commoditez ordinaires pour pourvoir aux necessitez de sa Majesté & du Royaume.

ESTANT en la ville de Senlis le fleur Alphonse d'Ornano Colonnell des Corfes qui auoit passé à Guise, où il auoit veu ledit Duc de Mayenne, me dit en la présence de sa Majesté par son commandement, qu'il auoit appris de bonne part, que ledit Duc estoit si bien lié & engagé avec les Espagnols qu'il ne pouuoit plus traiter avec sa Majesté sans eux, comme celuy qui dependoit du tout de leur volonté, dont ie luy répondis que ie n'en auois encores rien sceu, mais que l'on luy auoit peut-estre voulu dire que ledit Duc auoit promis aux Espagnols de ne traiter sans eux, comme ie ne doutois point qu'il n'eust fait, que ie l'estimois honneste & raisonnable, veu le secours qu'il en auoit receu. Toutefois qu'il ne s'ensuiuoit pas que pour cette promesse il despendist d'eux entièrement, ny fust obligé de preferer leur contentement au bien de la Religion, du Royaume & de sa maison.

Page 212. ligne 25. apres ces mots, *ladite assemblée*, adioustez.

LEDIT Duc ayant veu ladite reformation l'approuua, mais voulut que ie fisse dire à sa Majesté qu'il n'entendoit pour cela prescrire aux deputez qu'il enuoyeroit querir, la charge qui leur seroit donnée aux Prouinces, avec lesquelles il vouloit sçauoir s'ils ne pourroient pas venir seurement, quand bien elle leur seroit donnée contraire au seruice & aux intentions de sa Majesté, & au contenu desdites lettres reformées; afin que personne de part & d'autre ne fust trompé, & eust occa-

sion de se plaindre de ce quien succederoit, disant aimer mieux n'auoir lesdits passe-ports que de répondre desdites commissions, assuettir lesdits deputez & ceux qui les enuoyent à la volonté d'autrui, & mettre ses amis en peine & hazard à faute d'éclaircissement & intelligence.

Page 213. ligne 32. apres ce mot, *Chartres*, adioustez.

No v s demeurasmes plus de six sepmaines sans auoir réponse dudit sieur de Fleury à la depesche qui luy auoit esté enuoyée par ledit Trompette, dont il s'excusoit sur ledit siege qui occupoit du tout sa Majesté, & certaines lettres interceptes, lesquelles il disoit auoir mis sa Majesté en plus grande deffiance que iamais de ladite assemblée; & mesmes vne dudit Duc de Mayenne adressante à l'Euesque d'Amiens du second de Février, par laquelle il luy mandoit ne vouloir entendre à la paix avec sadite Majesté, & que tout ce qu'il faisoit avec elle n'estoit que pour faciliter ladite assemblée, & avec icelle pouruoir à leurs affaires: Mais ledit sieur de Fleury vint sur la fin de Mars auprès de Soissons avec la coppie desdites lettres & plusieurs memoires qui auoient esté surpris, lesquels il auoit charge de faire voir audit Duc, & sur ce entendre & s'asseurer encore de sa volonté, & de l'effet auquel il vouloit employer ladite assemblée deuant que de liurer lesdits passe-ports. Entr'autres interceptes, il y en auoit vne de l'Euesque de Plaisance au Cardinal Cajetan, par laquelle il luy mandoit que

L'on ne se deuoit fier audit Duc de Mayenne ny à moy : que cette assemblée dont l'on parloit ne luy pouuoit estre que suspecte, combien que ledit Duc l'eust asseuré la faire pour mieux affermir & establir le party: il apporta aussi vne certaine remonstrance de Panigarolle au Duc de Sauoye, par laquelle il luy persuadoit d'entreprendre la conqueste de ce Royaume, comme celuy qui y deuoit auoir plus de part, & y mieux faire ses affaires que tous autres: adioustant que le Roy seroit bien-tost maistre de la ville de Chartres, & qu'après il auoit deliberé de faire vne assemblée seulement des Princes, Officiers de la Couronne & de plusieurs Prelats, & mesmes y appeller ceux du Parlement, pour donner ordre à ses affaires par leur aduis, & sur tout au fait de Religion: où si l'on pouuoit faire que Monsieur de Mayenne fist trouuer quelques-uns de sa part, plusieurs estimoient qu'il en reüssiroit vn grand bien: qu'il auoit charge de le dire audit Duc, & que par mesme moyen l'on y pourroit traiter & accorder le commerce general, me priant d'entreprendre le voyage de la part dudit Duc avec Monsieur de Videuille. Et d'autant que ie luy dis qu'il ne falloit pas esperer que ledit Duc le nous promit si ce n'estoit pour traiter dudit commerce, il escriuit que l'on nous enuoyast des passe-ports fondez sur ce ~~subter en atten-~~ dant qu'il vist ledit Duc, lequel estoit party de Soissons, & allé à Meaux, pour voir si de là il pourroit secourir ladite ville de Chartres, qui commençoit à estre pressée. Il don-

na iusques au bois de Vincennes , où il fut  
 conseillé de reformer le Parlement de Paris,  
 & en ôter quelques Officiers , à la poursuite  
 des Zelez de ladite ville , lesquels estoient  
 lors si supportez des Grands , & redoutez des  
 autres, qu'ils osoient & faisoient tout ce qu'ils  
 vouloient , & souuent deffaisoient ou blas-  
 moient au soir ce qu'ils auoient fait ou ap-  
 prouué le matin , comme il aduient ordinai-  
 rement à ceux qui suiuent plustost leurs pas-  
 sions que la raison , lesquels accusent d'inius-  
 tice tout ce qui leur déplaist : ceux-cy en fi-  
 rent de mesme en cette occasion , car quel-  
 ques iours apres ils blasmerent ladite purga-  
 tion , faite toutefois à leur postulation , com-  
 me disoient ceux qui auoient fuiuy ledit Duc :  
 car il m'auoit laissé en ladite ville de Soif-  
 sons , mais l'ayant aduertty de l'arriuée dudit  
 sieur de Fleury , de ce qu'il auoit apporté , &  
 de l'instance qu'il faisoit de parler à luy , il  
 me manda le mener à Chasteau Thierry , où  
 il estoit rebroussé , ne se sentant assez fort  
 pour secourir ladite ville de Chartres : ioint  
 qu'il ne disposoit des forces étrangères com-  
 me il vouloit, de sorte que ladite ville se ren-  
 dit bien - tost apres.

Page 216. ligne 7. apres ces mots, *tost apres,*  
 adioustez.

M A I S ledit sieur de Fleury s'estant ren-  
 contré avec le sieur de Rosne deuant que de  
 partir , recueillir de luy certaines ouuvertures  
 pour faciliter ladite paix , & croyant qu'il  
 ne les mettroit en auant sans dessein, il les rap-  
 porta à sa Majesté, laquelle en fit cas , parce

qu'il disoit qu'il ne falloit s'arrester à ladite  
assemblée generale pour traiter, mais seule-  
ment en faire vne particuliere en quelque  
lieu, sous pretexte de parler de la déliurance  
de Monsieur le Duc de Guise, & là enfoncer  
vne bonne negociation en laquelle on em-  
ployast des personnes qui affectionnassent le  
bien & aduantage particulier de Paris, sans  
tant s'arrester au general comme on auoit  
tousiours fait, & s'offroit d'y seruir volon-  
tiers si l'on trouuoit bon qu'il y fust em-  
ployé, comme celuy qui desiroit & affection-  
noit plus le bien dudit Duc que toute autre  
chose, adioustant que ce ne seroit iamais fait  
que de remettre ses affaires à ladite assem-  
blée : cela fut cause que sa Majesté enuoya  
ledit sieur de Fleury avec d'autres passe-ports  
lesquels faisoient mention de la déliurance  
dudit Duc de Guise, entre lesquels il y en  
auoit vn pour ledit sieur de Rosne: mais d'au-  
tant qu'apres que ledit sieur de Videuille &  
moy eusmes reueu les premiers que l'on nous  
auoit enuoyez pour traiter dudit commerce,  
ledit Duc nous auoit pressé de partir, i'arri-  
uay à Fleury aussi-tost que le maître de la  
maison avec ces derniers passe-ports, où il  
me dit lors le langage que luy auoit tenu le-  
dit sieur de Rosne, l'estime que sa Majesté en  
auoit faite, & ce qui s'en estoit enuiuy, de-  
quoy ie fus assez estonné, car il ne m'en auoit  
rien dit, & n'auois point ouïy parler de ce  
moyen ny de chose qui en approchast, & vous  
assure que i'en fis plus d'estat, connoissant  
l'humeur de l'auteur : neantmoins voyant



que sa Majesté l'auoit pris autrement avec ceux de son conseil, lesquels sur cela attendoient peut-estre que Monsieur de Videuille & moy leur ferions d'autres ouuertures que celle dont ledit Duc de Mayenne nous auoit donné charge, ie ne voulus passer outre sans leur faire sçauoir que ledit sieur de Videuille & moy n'auions autre pouuoir que de parler du commerce pour la ville de Paris, & écouter ce que l'on nous voudroit proposer pour le public, pour à nostre retour informer & aduertir ledit Duc du changement afin qu'il despeschast ledit sieur de Rosne, ou nous éclaircir de sa volonté sur les ouuertures qu'il auoit faites, & mesme sur la déliurance de Monsieur son nepueu, laquelle ie luy conseil-lois d'embrasser & affectionner puis que l'oc-casion s'en presentoit. Ce fait ledit sieur de Fleury qui y alla, &c.

Page 217. ligne 11. apres ces mots, *l'incom-modest grandement*, adioustez.

Q V A N D ledit Duc me vit il fit dire à M. Pinard que ie desirois parler à luy, sans que ie le sceusse: ledit sieur Pinard fit réponse qu'il seroit bien aise de me voir. Je fus mandé sur cela & prié par ledit Duc de me presenter, ce que ie fis à la mesme heure: ledit Pinard m'apperceuant par vne canoniere d'une porte de la ville laquelle estoit terrassée me pria de passer du costé du pont, par où il me pourroit receuoir & parler plus commodement; ce qu'il fit accompagné des Gentils-hommes & principaux Capitaines & habitans qui l'assistoient, & m'ayant retiré en vne bou-

tique entre la porte du pont & celle de la ville, ie luy dis en la presence de cinq ou six qu'il auoit retenus, n'estre venu là pour luy donner conseil de se rendre ou faire chose indigne d'un homme d'honneur, ny luy ny son fils, d'autant qu'aimant mes amis comme moy-mesme, ie ne voulois aussi leur conseiller chose que ie ne voulusse faire estant en leurs places; ioint que i'auois si bonne opinion d'eux, & de ceux qui les assistoient, que quand i'en vserois autrement ils en feroient peu de compte: partant ie desirois seulement qu'ils sceussent que i'estois en l'armée prest à les assister & seruir avec mes amis quand ils en auroient besoin, n'estant arriué que depuis un iour avec le sieur de Fleury, venu pour parler de la paix, Ledit sieur Pinard me remercia de mon conseil & de l'offre que luy faisois; & me dit qu'ils estoient tous resolu de mourir plutôt que de commettre vne lacheté; qu'ils estoient plus de mil hommes de guerre sans les habitans qui regorgcoient de courage & de bonne volonté de ce faire, l'ayant ainsi promis & iuré tous ensemble sur les saintes Euangiles depuis le siege, & esperoit que Dieu les fortifieroit iusques à la fin: qu'ils s'estonnoient comme ledit Duc s'estoit attaqué à eux avec vne armée si foible & mal pourueüe de munitions qu'estoit la sienne, pour forcer vne telle place, garnie de tout ce qui estoit necessaire pour bien se deffendre; qu'apres que la ville seroit prise il auroit encore affaire au Chasteau qui estoit imprenable, & qu'il scauoit aussi qu'il auoit desia

consumé ses poudres & ses balles sans rien aduancer , & que son canon estoit allé à la picorée : que ledit Duc feroit bien mieux au lieu de s'opiniastrer à ce siege de se seruir de luy & de cette occasion pour faire la paix à l'honneur de Dieu ; qu'il sçauoit que sa Majesté y estoit tres-disposée & ne l'en éconduiroit, & que de sa part il sacrifieroit volontiers sa vie : Qu'il estoit bien aduertty que sa Majesté auoit pris Chartres, & qu'on la verroit bien-tost aux tranchées de l'armée dudit Duc; toutefois il l'auoit supplié de ne se haster, tant il estoit assuré de son baston. En vérité, Monsieur, ie ne fus marry de le voir en ces propos , croyant certainement , veu sa contenance , laquelle estoit encore plus assurée que ses paroles, qu'il auoit le jeu encore meilleur qu'il ne disoit , de sorte que ie luy dis seulement qu'il ne s'attendist à cette negociation de la paix , ny que ledit Duc se departist dudit siege que par force ; que ie sçauois qu'il auoit enuoyé querir des balles & des poudres , & qu'elles deuoient arriuer le lendemain, ~~pourtant~~ tant qu'il songeast seulement à se bien deffendre, & ne se fier pas tant à la bonté de sa place & de ses forces , que de mépriser ny retarder vn bon secours s'il le pouuoit auoir. Estant en ces termes l'allarme se donna dedans la ville à cause de quelque boutique enfoncée dedans la riuiera, qu'ils apperceuoient que nos soldats vouloient retirer à la faueur de la trêve accordée durant ce Parlement , de sorte que ie fus contraint de retirer sans voir le Vicomte de Combli-

zy, ny entretenir dauantage son pere, qui ne parla iamais à moy que tout haut & en la presence de ceux qu'ils auoient appelez.

M A I S la ville fut prise bien-tost apres par faute de garde à la bresche; l'on dit que ceux qui y auoient esté commis n'estimoient pas qu'on deust aller alors à l'assaut, pource qu'il y auoit plus de quatre heures que le canon auoit cessé, de sorte qu'ils auoient réparé ladite bresche; que la montée d'icelle s'estoit renduë plus difficile à cause qu'il auoit pleu, & que le iour commençoit à faillir, telles longueurs procedant des difficultez que faisoient les Capitaines estrangés d'aller à l'assaut, encore qu'ils eussent obtenu la pointe, au grand déplaisir des François; mais ils vouloient qu'on ostast encore quelques places qui les voyoient tout à decouuert, auant qu'aucun y allast, & ledit Duc n'auoit pour ce faire, tant il estoit mal pourueu de balles & de poudres, ayant consumé celles qui luy estoient arriüées: Mais comme l'on estoit en cette contestation, les soldats s'ennuyans de telle longueur, l'vn d'eux se coula d'une tour rompuë, où il s'estoit logé avec quelques autres iusques sur la brèche avec vne pique à la main, où ne voyant que trois ou quatre soldats en garde commença à les combattre & à appeller ses compagnons, qui furent suivis du reste de l'armée, de sorte que ladite ville fut ainsi forcée alors que l'on y pensoit le moins.

*A D V I S*  
*DE M. DE VILLEROY*  
*à Monsieur le Duc de Mayenne,*  
*publié à Paris apres la mort*  
*du Roy, sur la fin de l'an 1599.*

**M** O N S I E U R,  
Chacun dit n'y auoir que trois moyens  
par lesquels l'on puisse remedier aux desor-  
dres du Royaume.

L'vN de composer avec le Roy de Na-  
uarre.

L'AUTRE de reünir tous les Catholiques  
pour s'opposer ensemble à l'establissement  
du Roy de Nauarre, sous la reconnoissance  
& obeissance d'un Prince du sang, nommé &  
éleu Regent du Royaume, durant la prison  
de Monsieur le Cardinal de Bourbon, & de-  
clarer son successeur apres son deceds, du gré  
& consentement de nostre S. Pere le Pape &  
du Roy d'Espagne.

Le troisieme est, de se ietter entre les bras  
du Roy d'Espagne, & luy donner telle part &  
autorité en ce Royaume, qu'il aye occasion  
de ne rien épargner pour nous proteger & ga-  
rentir.

Surquoy ie vous diray, qu'il me semble  
que vous deuez aduiser sur toutes choses à  
rendre la resolution que vous prendrez la plus  
iusto

iuste & vtile au public que vous pourrez , afin qu'elle prospere.

A v moyen dequoy il faut que vous ayez deuant les yeux & pour fondement principal, de ne rien desirer , entreprendre ny poursuiure qui soit contraire à l'honneur de Dieu , ny au bien public du Royaume.

C E V X de vostre maison ont acquis le credit & pouuoir en iceluy , & la reputation en la Chrestienté dont vous iouïssiez à present, ayant constamment deffendu la querelle de Dieu contre les heretiques, & fait paroistre leur affection au soulagement du peuple.

V O U S ne deuez en façon quelconque vous departir du chemin qu'ils vous ont tracé, car c'est la plus belle roze de vostre chapeau, de laquelle s'il aduenoit que vous fussiez priué par vostre faute, vostre nom deuiendroit aussi contemptible qu'il a esté honoré iusques à present . les vostres en ont esté aussi si ialoux & soigneux, que toutes les fois que nos Rois ont traité avec lesdits heretiques & surchargé leurs sujets, ils ont plûtoist souffert qu'approuvé lesdits traittez & surcharges , & ont esté les premiers à monter à cheual, & les derniers à en descendre , quand il a esté question de faire la guerre ausdits heretiques.

C'est pour cela que nous auons veu apres la mort de Messieurs vos freres ( que Dieu absolve ) tant de Villes, de Noblesse, & d'autres personnes , conspirer ensemble contre leur souuerain naturel Prince & Seigneur , ayant crû qu'il auoit auancé leurs iours exprés, parce qu'ils soustenoient les Catholiques , &

poursuiuoient le soulagement du peuple.

Et si en la prise & leuée des armes & depuis, nous eussions témoigné par effets auoir plus de soin de l'un & de l'autre que nous n'auons eu, vostre party seroit à present plus fort qu'il n'est; mais il semble que Dieu ait permis vne telle & signalée souleuation, autant pour nous chastier nous mesmes, que pour faire sentir la rigueur de la iustice aux auteurs de nos miseres: qu'ainsi ne soit depuis la mort du Roy, les choses nous ont moins succédé heureusement que nous esperions car nous nous promettons, & non sans raison, que la Noblesse Catholique qui l'auoit assisté se r'allieroit avec nous pour nous aider à deffendre nostre Religion, & qu'elle ne s'assujettiroit iamais à vn Prince heretique: que nous retirerions incontinent Monsieur le Cardinal de Bourbon qui estoit entre les mains d'un Catholique, & que les heretiques seroient contraincts se retirer de la riuere de Loire où nous porterions la guerre.

M A I S au contraire de cela nous voyons non seulement ladite Noblesse plus affectionnée au seruice du Roy de Nauarre quasi qu'elle n'estoit au feu Roy, & celle qui nous assiste tres-froide & degoustée de continuer à ce faire. Ledit sieur Cardinal auoit esté liuré entre les mains des heretiques, dont il nous reste bien petite esperance de le retirer par la force, & le Roy de Nauarre plus puissant en ses Prouinces que deuant.

Dequoy nous deuons à bon droit d'autant plus nous accuser nous-mesmes que les Ca-

tholiques qui assistent le Roy de Navarre: car par nos deportemens nous les auons plùtost effarouchez & degoustez de nostre party que conuiez d'y entrer, ils ont esté constituez prisonniers, rançonnez, pilliez en leurs maisons, & bastouiez par tout, nonobstant vos commandemens & declarations, de sorte qu'ils ont reconnu n'y auoir avec nous aucune secreté pour eux: dauantage, vos gens de guerre ont vécu si licentieusement & débordement, qu'ils vous ont fait haïr (s'il m'est permis d'ainsi le dire) de Dieu & des hommes.

**Q**ui croira que vous combattez pour la Foy Catholique & pour le soulagement du peuple, voyant à vostre suite Dieu mal seruy comme il est, son saint Nom blasphemé, les Eglises pillées, mesmes celles que nos aduersaires auoient conseruées, les Benefices conferez à personnes indignes, les biens des Ecclesiastiques ravis, & toutes sortes d'impietez, sacrileges, volleries, ravissemens & autres meschancetez commises sans iustice, police, ordre, ny regle aucune? Estimez-vous que Dieu & le peuple vous fauorisent tant que ces desordres regneront? Il suffit bien aux personnes priuées de viure honnestement & sans faire tort à autrui; mais cela n'est assez aux Princes qui gouernent les affaires publiques, il faut qu'ils donnent ordre que personne ne fasse mal ny outrage à autrui, car il n'importe gueres à ceux qui souffrent quelque iniure, qui que ce soit qui la leur fasse, & s'en prennent tousiours aux superieurs.

**N**OSTRE vnion abonde en des-vnion de-



puis les pieds iusques à la teste , nos Villes sont remplies de desobeïssances , de violences , de confusion & pauureté , la charité & la iustice , vertus tres-agreables à Dieu , & les anciennes marques des Catholiques en sont bannies entierement , l'auarice & l'enuie qui sont les nourrissees de la discorde y dominant totalement , les Magistrats & Officiers y sont gourmandez & sans autorité , & principalement ceux qui n'approuuent telles violences , ils ne iouissent de leurs gages ny de leurs rentes & biens , non plus que les bons Bourgeois & Marchands qui sont outre cela priuez du commerce , dequoy ils souloient nourrir leur famille ; & les artisans ont si peu de pratique , qu'ils sont cōtraints de quitter leurs mestiers , & quelquefois deuenir voleurs pour viure. Les gens d'Eglises ny sont pas plus à leurs aises , car leurs biens des champs estant pillez & rauagez autant ou plus que les autres , ils n'ont dequoy subuenir aux charges de leurs Eglises , ny à leur nourriture , & neantmoins sont tous les iours compris aux daces & coruées comme les autres habitans , ausquelles il faut qu'ils contribuent.

Si quelqu'un s'en lamente , & blasme les auteurs de tels desordres , il est incontinent accusé d'heresie & de trahison , l'on l'appelle Catholique simulé , fauteur d'heretique ou politique. Il est iugé & condamné , & quelquefois executé sans estre ouï ; neantmoins qui haït la police humaine , haït quant & quant la iustice diuine : car ce sont deux choses coniointes si estroittement , qu'elles ne

peuvent subsister aucunement entre les hommes l'une sans l'autre : vn Magistrat ne peut estre bon politique , qu'il ne soit premiere-ment tres-grand zelateur de la Religion, car la Religion est le fondement principal de toutes Republiques , & la fin d'un bon politique est d'instituer les mœurs de ses concitoyens à vne iustice ciuile , & s'accorder les vns avec les autres ; & entretenir & conseruer vne paix & tranquillité commune , faire que chacun soit gardé en ce qui est sien ; que les hommes communiquent ensemble sans fraude , & que l'insolence des meschans soit punie , lesquelles choses ne peuvent auoir lieu ne durée , si elles ne sont basties sur ce premier base de Religion & de pieté.

Et toutefois nous reconnoissons & confessons tous estre du tout impossible , que les choses subsistent long - temps en l'estat auxquelles elles sont , car toutes personnes desesperent de leur salut , & sont si incommodées , qu'elles n'ont quasi plus dequoy viure : Les Gentils-hommes qui vous assistent sont priuez de la iouissance de leurs biens, & neantmoins subjets à des dépenses tres- grandes à cause de vostre séjour aux Villes , de sorte qu'il faut qu'ils abandonnent , ou que vous les secouriez d'argent, à quoy il est impossible de fournir , qui est ce qui en rend tant de mal contens comme il s'en voit : car celuy qui souffre en seruant attribué ordinairement à faute de bonne volonté ce qui procede d'impuissance, tant la necessité est indiscrete. D'autre-part les Villes sont grandement tourmen-

rées par les ennemis qui sont répandus au  
environs d'icelles, où ils ne permettent entr  
aucuns viures, de sorte qu'elles sont reduit  
en telle necessité, qu'il est fort à craindre qu  
les habitans changent la bien-veillance qu'  
vous ont portée iusques à present, qui est  
seul gage avec lesquels vous les pouuez dir  
vostres, en vn desespoir tres-dommageable  
& croyez que l'exemple d'une en attirera plu  
sieurs autres à ce poinct, vous sçavez que les  
peuples sont naturellement enclins à esperer  
plus qu'ils ne doivent, & à endurer moins  
qu'il n'est necessaire.

M O N S I E U R, les choses estans reduits  
aux termes susdits, le mieux que vous puis  
siez faire pour le service de Dieu, la conser  
vation du Royaume, & pour vostre particu  
lier honneur & bien, est d'élire vn chemin  
par lequel vous puissiez bien-tost par la ri  
gueur des armes ou par la douceur, déliurer  
ces peuples des vexations qu'ils endurent, afin  
qu'ils ayent moyen de viure, & en vivant  
glorifier Dieu, & vous continuer leur bien  
veillance.

P O U R ce faire l'on vous a proposé les trois  
moyens predits, pour lesquels ie vous supplie  
prendre en bonne part que ie vous represente  
ce qu'il m'en semble, avec la liberté & la  
mesme affection qu'il vous plaist me porter,  
le service que ie vous ay voué & ma conscien  
ce m'obligent de ce faire.

I E commenceray par le premier, sçavoir est  
de composer avec le Roy de Navarre, mais ie  
vous diray estre chose à laquelle il me semble

que vous ne deuez entendre aucunement tant qu'il demeurera separé de l'Eglise comme il est, d'autant que vous pécheriez mortellement, & pareillement vostre honneur & tous les Catholiques du Royaume & de la Chrestienté, de sorte que chacun attribuerait à pleine ambition vos actions passées, les presentes & futures, & seriez abandonné de Dieu & des hommes.

ET aussi que vous tomberiez en tel mépris mesmes dudit Roy de Nauarre, qu'il ne feroit aucun conte de vous, parce qu'il ne recueillerait de vostre amitié & reconciliation le fruit qu'il auoit attendu, car les Catholiques éliroient incontinent vn autre Chef que vous pour les deffendre contre le Roy de Nauarre, sous l'obeïssance duquel vous n'aurez en ce faisant le credit de les ranger.

M A I S si le Roy de Nauarre vouloit de cœur & d'affection, comme il conuient retourner au giron de l'Eglise, & nostre saint Pere luy receuoir & le rendre digne de porter le Sceptre François, en ce cas comme il n'y auroit plus à vider que l'interest de M. le Cardinal de Bourbon, auquel l'on pourroit pouruoir par quelque expedient de son aduis & consentement mesme; i'estime qu'il seroit plus vtile au public & à vous mesme d'accorder avec luy, que de suiure toute autre voye.

CAR vous rempliriez ce Royaume d'une paix vniuerselle, & pourriez par mesme moyen estre cause de composer les differens qui troublent la Chrestienté, parce que ie

pense que ledit Roy de Nauarre ne feroit difficulté de remettre & ceder quelque partie de ses droicts pour paruenir à la iouissance paisible de cette Couronne.

QUELLE plus grande gloire pourriez-vous acquerir que d'estre autheur d'un tel heur en ce Royaume & en la Chrestienté; l'un vous deuroit sa saluation, & l'autre vous l'obligeriez à vous honorer eternellement: car si votre guerre dure, ie tiens le premier pour détruit, & croy aussi que l'autre en pâtira grandement.

Pareillement ie ne doute point que n'obtinssiez facilement dudit Roy de Nauarre, le reconnoissant pour Roy, tout ce qu'en pourriez honnestement desirer pour vostre particuliere satisfaction: tel aduantage seroit à vous & aux vostres plus honorable, certain & paisible, que ne seroient à l'aduanture tous les autres, que les occasions qui se presentent vous pourroient promettre, car il ne seroit sujet à reproches, & toutes grandeurs qui ne sont fondées & basties sur fondement legitime, ne peuuent estre honorables ny durables; si vous desirez que vos enfans heritent du fruit de vos traux, & rendre votre memoire heureuse; cheminez en iustice, & preferez par effet l'honneur de Dieu & le bien de vostre patrie à toute autre consideration.

Pour negocier ce fait comme il appartient, il seroit necessaire au prealable d'en aduertir nostre S. Pere le Pape, afin de l'entreprendre avec sa permission, d'autant qu'estant

Chef de l'Eglise, les portes d'icelles ne peuvent estre ouuertes audit Roy de Nauarre que par son autorité.

IL seroit raisonnable aussi d'en aduertir le Roy d'Espagne, pour l'obligation que la cause & vous luy auez de son assistance, & ne luy donner occasion de se plaindre de vous, ny trauerser ce dessein, par laquelle il seroit asseuré vostre intention estre de vider la querelle du Royaume de Nauarre à son aduantage & contentement, & quant & quant l'obliger à ne donner secours ny assistance à ceux qui troublent ses affaires aux Païs-bas, par les moyens & termes qui seront iugez les plus propres & conuenables.

IL seroit pareillement à propos d'en faire sçauoir autant à Monsieur le Cardinal de Bourbon, puis que nous l'auons reconnu pour Roy, & que nous auons iuré & déclaré le Royaume luy appartenir, afin de n'estre arguez de legereté ny d'infidelité.

CES devoirs accomplis, il faudroit enuoyer quelque personnage de qualité deuers ledit Roy de Nauarre, pour luy faire entendre vostre deliberation, & s'éclaircir de la sienne, & voudrois cette Legation estre publiée & sceuë d'un chacun.

CAR il aduiendroit que ledit Roy de Nauarre se resoudroit & obligeroit de se reconcilier à l'Eglise, aux charges & conditions qui luy seroient proposées pour la seureté des Catholiques, & pour la paix publique, ou qu'il refuseroit de ce faire.

S'IL en faisoit refus, vous destourneriez

par ce moyen plusieurs Catholiques qui fuient , auxquels il a promis de se faire Catholique , & a imprimé en l'esprit qu'il tient qu'à vous qu'il ne l'aye desia fait , & mesmes que ne desirez aucunement la paix & conseruation du Royaume ; mais que vous voulez l'occuper & démembler , ou en inuésir ledit Roy d'Espagne, dequoy ils seroient éclaircis par vostre proposition , de sorte qu'ils ne pourroient plus douter avec raison de son intention ny de la vostre. Ce qui rendroit les opiniaîtres au party dudit Roy de Navarre, apres vostre-dite Declaration, sans excuse, conuaincus tout à fait de crime de lèze-M. diuine & humaine, & iustificeroit grandement vostre dessein envers Dieu & les hommes , qui est ce qui vous peut autant honorer que profiter.

M A I S ledit Roy de Navarre éliroit l'autre voye , comme par raison il semble qu'il deuoit faire , tant pour le salut de son ame que pour asscurer sa grandeur , il ne seroit plus question que de chercher les moyens d'en aduancer l'execution le plus promptement & diligemment que faire ce pourroit, pour tant plustost déliurer ce pauvre Royaume du danger où il est , & des maux qu'il souffre.

P O U R ce faire , ie serois d'aduis qu'on commençast par vne cessation d'armes pour six mois, tant pour donner relasche au pauvre peuple , que pour pouuoir plus commodément & seurement conuoyer les Estats du Royaume par l'aduis & autorité desquels

il me semble que toutes choses deuroient estre concludë & executées, pour plus grande seureté.

A cette fin il seroit expedient que lesdits Estats fussent assemblez en vne ville, en laquelle ils fussent libres de dire & faire ce qu'ils iugeroient estre vtile au public, & qu'ils fussent seulement assistez des Officiers de la Couronne.

QVE ledit Roy de Nauarre, Monseigneur le Cardinal de Bourbon & vous, promissiez de suiure, obseruer & accomplir de bonne foy, tout ce qui seroit resolu & arresté par ladite assemblée, qui ne seroit contraire ny preiudiciable à la Religion Catholique, ny aux loix du Royaume, ny seulement aux droits des Princes nos voisins & amis, à tous lesquels ie desirerois procurer pareil repos qu'à nous mêmes. Je desirerois sur toutes choses estre aduisé & resolu en icelles, des moyens pour pouuoir asseurer les Catholiques, de l'obseruation de la foy & des promesses dudit Roy de Nauarre, iusques à ce qu'il eust donné occasion par lesdits comportemens d'en prendre entiere assurance.

COMME seroit de luy faire iurer, promettre & accorder de pouuoir aux Offices de la Couronne, aux Gouvernemens, charges de Lieutenans Generaux des Prouinces, Presidens des Cours souueraines, Aduocats & Procureurs generaux d'icelles, Capitaineries de Places & Citadelles, & autres pareilles charges de conséquence, sinon personnes ayans fait profession de la Religion Catholique de



puis certain temps qui seroit prescript, de ne mettre aussi aucune garnison dans les Villes de l'Vnion, & autres qui sont dans le Royaume, qui pourroient apporter ialousie aux Catholiques, de suivre le reglement qui seroit fait pour la nomination des Benefices, la conseruation des personnes & biens Ecclesiastiques, de l'observation du Concile de Trente, la reünion à l'Eglise Catholique de ceux qui en sont separez, la succession à la Couronne apres son deceds, & mesmes pour l'effet de son mariage, avec protestation & declaration solemnelle d'absolution, resolution & descharge entiere du serment de fidelité en son endroit, en cas de contrauention, reuocation & rupture de sa part des choses susdites, & autres qui y seroient arrestées & accordées, en laquelle obligation seroient priez d'interuenir nostre S. Pere le Pape, & autres Princes que Von iugeroit estre plus à propos en la forme & maniere qui seroit resoluë.

IL faudroit aussi aduiser à donner tel contentement à Monseigneur le Cardinal de Bourbon, que toutes choses s'effectuassent de son bon gré & consentement, ce que les Catholiques qui l'ont reconnu pour Roy, sont obligez de procurer & obtenir pour luy, pour satisfaire à leur honneur & deuoir, & ne doute point que M. le Cardinal pour l'affection singuliere qu'il porte à nostre Religion & à l'Estat, ne cedast beaucoup au desir public, quand les choses seroient traitées avec le respect & la dignité qu'il conuient: ce luy seroit aussi plus de gloire d'estre cause de la restau-

ration de la Religion & du salut du Royaume, que de consentir que la guerre fust continuée & poursuivie plus avant sous son nom; avec tel hazard de l'un & de l'autre, qu'est celuy qu'elles courent par la longueur d'icelle.

L'ON traiteroit aussi de la déliurance de Monsieur le Duc de Guise, avec la dignité & l'aduantage que merite la memoire de feu Monsieur son pere, & pareillement de celle de Monsieur le Duc d'Elbeuf, la liberté desquels est desirée d'un chacun.

L'AY parlé de composer & vuider tout à fait le differend qui est entre le Roy d'Espagne & ledit Roy de Navarre, à cause dudit Royaume de Navarre, & quant & quant obliger le Roy de Navarre sous les conditions susdites à ne donner aucun aide, force ny assistance à la Reine d'Angleterre ny aux Estats des Pais-bas, qui font la guerre audit Roy d'Espagne, afin de retrancher entiere-ment toutes les occasions qui pourroient à l'aduenir rompre & alterer la paix entre les Catholiques, à quoy il faudroit aussi pourvoir par l'entremise & à la requeste desdits Estats, pour procurer de tout nostre possible à nos amis & voisins pareille paix qu'à nous-mesmes; & vous diray que si chacun vouloit embrasser cette reconciliation de cœur & d'affection, elle pourroit estre cause d'establi- r une telle paix & concorde en la Chrestienté, que le nom de Dieu en seroit grandement glorifié: car ie croy que ledit Roy d'Espagne seroit tres-content de recouurer

ses païs de Holande & Zelande, & autres Villes qu'on luy detient, & laisser tous ses voisins en paix, & ses Estats paisibles au Prince son fils; à quoy peut-estre que la Reine d'Angleterre ne contrediroit aussy de son costé, pour déliurer ses subjects de l'incommodité de la guerre qu'elle soustient contre le Roy d'Espagne, & faudroit apres conspirer de faire la guerre au Turc pour occuper les ambitieux, & ceux qui ne peuuent demeurer en repos.

Voilà ( Monsieur ) le bien & aduantage duquel i'ay considéré que vous pourriez estre auteur suiuant ce premier chemin, mais il faudroit que vous vous y resolussiez au plûtost, si vous desiriez vous en seruir, d'autant que le retardement rendra tous les iours les choses plus difficiles, à cause des desseins & preparatifs que font nos voisins des necessitez qui nous accablent, & des engagemens plus grands, auxquels le Roy de Nauarre embarque iournellement la Noblesse Catholique qui l'assiste.

Doncques ie serois d'aduis que vous tentassiez ce moyen par preference à tous autres pour les raisons susdites, encore que ie ne sois sans doute que ledit Roy de Nauarre y veuille entendre, considéré ses deportemens passez & actions presentes enuers nostre saint Pere le Pape & Monsieur son Legat, & aussi pour sa grande confiance qu'il a ausdits heretiques, avec lesquels il s'est grandement obligé, & les moyens dont il vse enuers les Catholiques qui l'accompagnent, auxquels il

distribué tous les iours les biens de l'Eglise, & de ceux qui portent les armes contre luy, en la iouissance & possession desquels il promet les maintenir par la crainte & apprehension qu'il leur donne d'une nomination étrangere, qu'il espere vaincre ses aduersaires, & s'establiir avec sa Religion en dépit de tous ceux qui s'y opposent, desquels il dit reconnoistre la foiblesse procedante de la diuision des Chefs, de l'ambition des Princes estrangers qui les assistent, des desordres qui regnent parmy eux qui desesperent tout le monde, de manquement de zele & affection à l'aduancement de nostre cause, de la legereté & inconstance des peuples qui se lassent d'endurer, & finalement du desespoir auquel chacun est de pouuoir sortir de cette guerre, la poursuiuant par le mesme chemin que nous l'aons commencée & continuée iusques à present.

Mais (Monsieur) luy ayant mis ce marché en la main, le refusant, comme il seroit seul coupable enuers Dieu & les hommes des maux de la guerre, que vous seriez contraint de continuer pour desfendre l'honneur de Dieu à cause de son obstination : ie suis certain que cela iustificeroit grandement vostre party dedans & dehors le Royaume, & pourriez apres librement & en saine conscience auoir recours au deuxiesme moyen qui a esté proposé, comme ie serois d'aduis que fissiez; & pour ce faire, que missiez peine de gagner les Catholiques qui suiuent le Roy de Navarre, & les obliger à s'opposer avec vous à

l'establissement d'iceluy : & pour y paruenir plus fâcilement , il faudroit veritablement donner contentement aux Princes du Sang Catholiques , & spécialement à Monsieur le Cardinal de Vandomme & Comte de Soissons, en leur accordant le rang & lieu que leur Maison & condition le merite , apres toutefois s'estre faits absoudre suffisamment par sa Sainteté de la faute qu'ils ont fait d'auoir reconnu & seruy ledit Roy de Nauarre comme ils ont fait.

CAR retirant & contentant lesdits Princes , vous iustificerez aussi grandement vos desseins & intentions , attirerez à vous les Catholiques qui en sont separez , confirmeriez & asseureriez grandement ceux qui nous assistent, & peut-estre que Messieurs les Ducs de Neuers & Longueuille s'y rangeroient, & pareillement le grand Prieur de France , & les Ducs de Montmorency & de Retz , & les autres Officiers de la Couronne qui sont Catholiques , comme desesperez de la conuersion du Roy de Nauarre , tous lesquels Princes & Seigneurs reconnoistroient qu'avez esté autheur d'un tel bien

PLVSIEURS pensent que n'aurez grande difficulté à gagner les Princes du Sang, d'autant qu'on dit qu'ils sont assez mal edifiez du Roy de Nauarre , lequel fait peu de conte d'eux , comme ceux desquels il n'est sans ialousie , faisant demonstration de vouloir preferer à eux le fils du Prince de Condé, né depuis sa mort , aduenue comme chacun sçait, auquel on dit qu'il a donné le Gou-

nermen  
mier P  
uantag  
l'oblig  
neur de  
roit en  
& mes  
Roy C  
ce desle  
A qu  
de l'au  
l'un, l  
pour  
gens d  
C A  
accom  
l'allie  
encore  
ledit R  
gleter  
sans ,  
sa Sain  
quels  
conter  
A q  
l'on co  
bur est  
appart  
car l'on  
de l'E  
sont d  
Franç  
person  
sant n

uernement de Guyenne en qualité de premier Prince du Sang, mais l'honneur & avantage qu'ils tireroient de vostre amitié, & l'obligation qu'ils ont de deffendre l'honneur de Dieu & nostre Religion, les y attireroit encore plustost que toutes autres choses, & mesmes s'ils voyoient que le Pape & le Roy Catholique fussent joints avec vous en ce dessein.

A quoy il faudroit tendre pour le fortifier de l'autorité, du nom & des moyens de l'un, & de la force & puissance de l'autre, pour rendre les effets d'iceux tels que les gens de bien desirent.

CAR encore que lesdits Princes du Sang, accompagnez desdits Catholiques, fussent ralliez avec vous, neantmoins vous ne seriez encore assez fort & puissant pour subiuguer ledit Roy de Navarre, estant appuyé de l'Angleterre, & des Princes & Cantons protestans, comme il seroit, sans l'estre aussi de sa Sainteté, & dudit Roy Catholique, auxquels il seroit nécessaire à ceste fin donner contentement.

A quoy personne ne contrediroit quand l'on connoistroit par les effets, que vostre but est de conseruer la Couronne à qui elle appartient, en conseruant nostre Religion; car l'on n'entreroit en doute du changement de l'Estat, ny du démembrement d'icelle, qui sont deux choses que redoutent le plus les François, & lesquels font eschapper plusieurs personnes avec ledit Roy de Navarre, pensant n'y auoir moyen quelconque d'éuiter

l'un & l'autre que par son establissement, d'autant qu'ils pensent que veüillez partager l'Estat avec vos amis, ou en inuestir ledit Roy Catholique, tant pour ce que vous auez iusques à present reietté toutes voix & ouuertes d'accord & reconciliation avec ledit Roy de Nauarre, jaçoit qu'il ait fait sentir assez qu'il se fera Catholique, comme pour auoir attendu à faire declarer & proclamer Roy M. le Cardinal de Bourbon, qu'il ait esté tout à fait entre les mains & au pouuoir dudit Roy de Nauarre, & n'aez deuant ny apres aucunement recherché l'amitié des autres Princes du Sang, en quoy les confirment encore dauantage que toute autre chose les propos, articles & escrits publiez en cette ville en faueur dudit Roy d'Espagne, les pratiques que font ses Ministres, & leurs procedures en toutes choses.

M O N S I E V R, vostre dessein estant iuste, seroit loué & approuué d'un chacun dedans & dehors le Royaume; il n'y auroit Prince ny Potentat Catholique qui n'y entraist apres sa Saincteté & ledit Roy d'Espagne; de sorte que ledit Roy de Nauarre demeureroit seul avec les heretiques, facile à dompter.

L E S D I T S Princes du Sang vous seroient si obligez de leur auancement & grandeur, qu'ils reconnoistroient enuers vous & les vôtres selon vostre desir, à quoy vous pourriez encore les astringre dauantage par quelque alliance que l'on pourroit faire avec vostre maison: dauantage, ils auroient tousiours tel besoin de vous & de vos amis, qu'ils dépen-

droient  
driez d  
ses par  
pourro  
vos am  
riez tré

E t  
tion vo  
le bien  
rations  
plus aie  
faisez  
nion de  
taine d

D A  
reconn  
chemi  
entrep  
dauant  
princi  
ment  
uent p

A  
confe  
ne por  
mon r  
courte  
nous si  
me &  
donne  
à vous  
& anc  
de la  
rescu

droient plustost de vous que vous ne dépendriez d'eux : car ayant le Roy de Nauarre & ses partisans pour ennemis coniuerez , ils n'y pourroient resister sans vostre aide & celle de vos amis, lesquels ie m'assure que vous sçauriez tres-bien ménager & augmenter.

Et pour ce faire , ie dis que cette resolution vous seroit fauorable , car en preferant le bien & salut du Royaume à toutes considerations particulieres , vous seriez pour cela plus aimé & honoré d'un chacun , que si vous faisiez autrement , estant certain que l'opinion de la vertu & equité , est la vraye fontaine d'honneur & d'amitié.

DAVANTAGE , les Princes estrangers reconnoissant que vous pourriez suiuant ce chemin vous mieux passer d'eux que si vous entrepreniez quelqu'autre vol , priseroient dauantage vostre amitié , car les hommes , & principalement les Grands , sont ordinairement moins de compte de ceux qui ne se peuvent passer d'eux que des autres.

Au moyen dequoy ( Monsieur ) ie vous conseille de suiure cette seconde voix, si vous ne pouuez tenir la premiere , laquelle pour mon regard i'estime plus vtile au public, plus courte & assurée que l'autre: car que sçauons nous si mesdits sieurs le Cardinal de Vandosme & Comte de Soissons voudroient abandonner ledit Roy de Nauarre , & se ioindre à vous, pour la ialousie & deffiance ordinaire & ancienne que leur maison a teusours eue de la vostre; qui nous assurera quand ils s'y resoudroient , qu'ils soient suivis des Catho-



liques qui assistent ledit Roy de Nauarre, sans lesquels peut-estre leur venuë & assistance troubleroit & diuiferoit bien autant nostre party, & partant l'affoiblirait plus qu'elle ne le fortifieroit, parce qu'il seroit tres-difficile de faire gouster à Messieurs les Ducs de Saouye & de Lorraine l'aduantage que lesdits Princes pretendoient, & qu'il seroit raisonnable leur donner, car chacun pense bien autant à soy & à ses affaires qu'au public; & neantmoins i'estime que l'amitié desdits Ducs nous est necessaire, lequel se voyant assailly de cette façon, desesperé de vostre amitié, ne faudroit à les rechercher & mettre toutes pierres en œuvre pour nous mal faire; & croy qu'il aimeroit mieux promettre le partage de l'Estat que sa ruine, & nostre prosperité.

**D A V A N T A G E**, il est tres-certain que pour vaincre le Roy de Nauarre tout à fait, & mesmes pour luy resister, nous auons quasi autant de besoin que deuant des deniers & des forces du Pape, & du Roy d'Espagne, spécialement iusques à ce que nous eussions nettoyé quelques Prouinces du Royaume, des moyens & reuenus, desquels nous peussions estre secourus, car la guerre ne se peut faire sans argent, dont vous estes tres-mal fourny; qui sçait encore à quelles conditions sa Sainteté & le Roy d'Espagne voudroient continuer leur assistance: serions-nous si mal-aduisez de croire que l'un & l'autre, & principalemēt le dernier voulussent employer leurs moyens, reculer & incommoder leurs affaires, qui ne

sont pa  
stres &  
par ra  
uroit p  
en ce R  
dément  
en son  
mettre  
Duché  
de Bre  
lemen  
d'Auue  
droit e  
seroit  
seroit  
uinces  
tes du  
foiblir  
aussi qu  
siera t  
en ses  
Prince  
quelqu  
maria  
avec le  
de ce  
l'ong p  
cez de  
le bien  
culier  
de disp  
à quoy  
difficu  
desque

sont pas petites, seulement pour faire les nôtres & conseruer ce Royaume en son entier par raison d'Estat ledit Roy d'Espagne deueroit plustost nous aider à nourrir la guerre en ce Royaume qu'à l'acheuer & finir, & à démembre la Couronne qu'à la conseruer en son entier, s'il perdoit l'esperance de se la mettre sur la teste; ses Ministres disent que le Duché de Bourgogne luy appartient, celui de Bretagne aux Infantes ses filles, & pareillement les Comtez de Blois, de Coucy & d'Auuergne, pour le moins ledit Roy voudroit estre assuré pour son argent, qu'il luy seroit fait droit desdites pretensions, & qu'il seroit receu paisible possesseur desdites Provinces, qui sont les plus nobles & importantes du Royaume, & dont la distraction l'affoibliroit grandement: nous deuons croire aussi que sa M. Catholique fauorifera & assiera tousiours plustost M. le Duc de Sauoye en ses desseins, pour estre son gendre, que nos Princes, si d'auanture il n'en vouloit élire quelqu'un, & luy donner sa fille aisnée en mariage, & pour dot les susdites pretensions, avec les moyens de le rendre Roy paisible de ce Royaume, auquel cas certainement l'on pourroit esperer tout bon & heureux succez de ce dessein, tant pour le seruice de Dieu, le bien de la Chrestienté, que le salut particulier de ce Royaume; mais il seroit question de disposer sa Majesté Catholique à ce point, à quoy faire ie reconnois y auoir plusieurs difficultez & longueurs, durant la decision desquelles il seroit fort à craindre l'empire.

ment de nos affaires, à cause des preparatifs qui sont de toutes parts pour nous engloutir.

D'AVANTAGE, il faut considerer que ledit Roy d'Espagne preferera tousiours la grandeur de sa maison à toutes autres; il n'a qu'un seul fils assez delicat & de foible complexion, qui est ieune, si Dieu l'en priuoit, sa fille aînée heriteroit de tous ses Estats, & par consequent celuy qui l'auroit espousée: c'est la raison pour laquelle il ne l'a encore mariée, & semble qu'il l'ait dediée à un Prince de son Nom & Sang; toutefois ie ne veux m'opposer à ceux qui desirerent qu'on traite ce moyen avec ledit Roy d'Espagne pour obtenir de luy, s'il est possible, ce mariage; car ie reconnois que ce seroit un souverain remede à nos affaires, ne pouans traiter avec ledit Roy de Navarre: mais ie desire grandement si c'est chose que l'on veuille faire, qu'on n'y perde vne seule heure de temps pour les raisons susdites, & que nous ne nous repaissions d'esperance qui nous bande les yeux, & nous conduise à nostre ruine & perdition entiere, au lieu de nostre saluation: car cependant & en attendant que nous en soyons éclaircis, nous serons contraincts pour nous deffendre contre ledit Roy de Navarre de faire entrer en nostre Royaume les forces étrangères qu'on nous offre, lesquelles y estans nous assuiettiront facilement à la volonté de ceux de quielles dependront, qui est ce à quoy il semble que tendent ceux qui ne se donne pas grande peine du changement & dilipation de l'Etat.

IE  
Pape  
celle  
s'est d  
vn Pri  
du Ro  
nal de  
comm  
ner oc  
nir à f  
& con  
bon,  
que sa  
dépen  
re tel  
sans q  
tir, c  
mes,  
riuée  
l'afflit  
coup  
tous l  
ne fer  
sera te  
la seu  
leur e  
avec l  
tiendr  
sont  
mort  
C'E  
en fa  
voudi  
à fair

IE ferois moins de doute de la volonté du Pape à nous assister en cette occasion, que de celle du Roy Catholique, car sa Sainteté s'est desia laissé entendre qu'il falloit choisir vn Prince du Sang Catholique pour heritier du Royaume apres le deceds de M. le Cardinal de Bourbon; laquelle elle disoit tenir comme pour mort en ce monde, afin de donner occasion à tous les Catholiques de se réunir à son obeïssance contre lesdits heretiques, & conseruer le Royaume à la maison de Bourbon, à laquelle il appartient. Mais i'estime que sa Sainteté ne pourroit fournir seule aux dépens & frais necessaires pour faire la guerre telle qu'il conuient audit Roy de Nauarre, sans quoy il nous seroit impossible d'en sortir, estans si dénuiez d'argent que nous sommes, dequoy l'on se pourra éclaircir à l'arriuée de son Legat. Mais il est certain que l'assistance de sa Sainteté apporteroit beaucoup moins d'ombrage aux François & à tous les autres Princes de la Chrestienté, que ne feroit celle du Roy d'Espagne, laquelle sera tousiours si suspecte aux François, que la seule ialousie que ledit Roy de Nauarre leur en donnera sera d'oresnauant la chaisne avec laquelle ne se faisant Catholique, il retiendra à son seruice les Catholiques qui sont avec luy, & les menera gayement à la mort pour s'estabir avec sa Religion.

C'EST pourquoy ie ne pourrois approuuer en façon quelconque l'opinion de ceux qui voudroient que nous nous reiettassions tout à fait entre les bras dudit Roy d'Espagne, que

luy donnassions des marques & tiltres d'une souveraine puissance en ce Royaume, & que luy engageassions nos Villes & nostre foy, qui est le troisieme moyen de remedier à nos maux qui vous a esté proposé, car ce seroit ouvertement enfreindre nos loix, & par trop offenser nostre honneur & deuoir.

C E seroit nous precipiter entre les mains d'un Prince caduc, qui n'a qu'un fils tres-delicat & ieune, sous la puissance d'une nation tres-contraire à la nostre, en mœurs & façon de viure, de laquelle depuis une certaine année auons esté nourris en telle ialousie que nous en auons quasi oublié l'ancienne haine que nous souldions porter aux Anglois.

C E seroit aussi mettre nostre Saint Pere le Pape & le S. Siege avec le College des Cardinaux, & tous les autres Princes & Potentats de la Chrestienté, en telle ialousie pour la crainte qu'ils ont desia de la grandeur & puissance Espagnole, que nous les aurions en ce dessein plutôt pour contraires que fauorables; ce qui nous preiudicieroit grandement.

D A V A N T A G E, il ne faut pas croire que les thresors & moyens du Roy d'Espagne soient infinis, c'est veritablement un puissant & tres-grand Prince, mais il est aussi chargé de tres-grandes & excessiues dépenses pour la conseruation de ses Estats, qui sont separez les vns des autres: il a la guerre au Pais-bas qu'il a soustenuë à tres-grands frais depuis vingt-ans, laquelle durera encore long-temps, ayant affaire à la Reine d'Angleterre qui est en tres-grande prosperité, &

l'incom-

l'incommode grandement sur la mer.

Et s'il aduenoit que le Turc luy recommençast la guerre, comme il ne faut pas douter qu'il n'en fust recherché & sollicité par ledit Roy de Nauarre, qui n'oublieront rien pour se deffendre & mal faire à ses aduersaires : Sadite Majesté Catholique seroit contrainte d'y employer ses meilleures forces & moyens, car il preferera tousiours le salut & la deffense de ses Estats à toute autre chose, quoy aduenant il luy seroit tres-difficile de nous continuer l'aide & secours qu'il nous auroit promis.

DAVANTAGE nous aurions formellement contraire à cette resolution les Estats du Royaume, & mesmement toute la Noblesse & les Officiers qui font la plus grande partie d'iceluy, tant ils ont leur honneur & deuoir en recommandation, & apprehendroient vne domination estrangere : les Ecclesiastiques n'en feroient peut-estre pas moins, voyans & sentans les impietez, les maux & calamitez que la longueur de la guerre apporte ; à quoy ils se resoudroient bien plus ouuertement si sa Saincteté n'approuuoit ce dessein, & croy qu'ils seroient suiuis en cela des principaux Bourgeois & habitans des Villes du Royaume, & peut-estre du corps mesme entier d'icelles pour se deliurer des maux & necessitez de la guerre, & euitier la domination estrangere ; de maniere que vous seriez abandonné quasi de toute la France, & contraint de poursuiure cette guerre avec des estrangers, desquels vous

vous trouueriez peut-estre bien empesché.

**D A V A N T A G E**, comment pourriez-vous engager vostre foy & personne au seruice dudit Roy d'Espagne, luy promettre nos Villes, & luy donner autorité & puissance en ce Royaume sans la permission de M. le Cardinal de Bourbon, puis que vous l'auiez reconnu pour Roy & souuerain Seigneur, ou du moins sans l'aduis & consentement des trois Estats du Royaume, & légitimement assemblez : car estant François comme vous estes, & officier de la Couronne, vostre honneur & deuoir vous obligent aussi de conseruer & garder les loix du Royaume. Vous pourriez encore moins avec raison disposer des droits des Villes & de la souueraineté d'icelles en qualité de Lieutenant general de l'Estat Royal & Couronne de France, d'autant que cette charge ne vous a esté commise que par prouision en attendant l'assemblée generale des Estats, pour conseruer & maintenir ce Royaume en son entier avec la Religion Catholique ; dequoy si vous vous dispensiez, tenez tout assésuré qu'en seriez blasimé, ce qui vous seroit reproché eternellement, & que peu de personnes vous y assisteroient & seruiroient, spécialement si elles connoissoient pouuoir sans ce faire estre maintenus en leur Religion.

**I E** croy aussi que ceux qui procureroient vn tel aduantage audit Roy d'Espagne, feroient peu pour sa reputation, & pour le bien de ses affaires, & mesmes pour son mescontentement, car c'est vn Prince tres-curieux

& jaloux de son honneur, qui n'a iamais rien entrepris contre ses voisins sans raison & consideration, & qui a demonsté vouloir plutôt entretenir la paix de la Chrestienté que de la troubler; ce seroit aussi l'embarquer à vne guerre tres-perilleuse, incertaine & difficile, pleine de peines, d'ennuis & de soucy, & dont les mauuais succez luy pourroient à l'aduanture engendrer en ses propres Estats, & mesme apres son deceds, des affaires tres-fascheuses & dommageables: car ayant les François & le Royaume sur ses bras, il s'attireroit pour luy & les siens à iamais l'inimitié d'une nation tres-belliqueuse, qui voudroit s'en ressentir lors que l'occasion s'en presenteroit, chose qui luy seroit d'autant plus facile à faire, si elle se trouuoit commandée & regie par vn Prince genereux & guerrier, particulierement offensé de luy, & qui auroit pour amis & adherans l'Angleterre & les Princes & Cantons protestans, avec ceux qui auroient desir de s'accroistre aux dépens dudit Roy d'Espagne & de ses Estats, ou diminuer son autorité & puissance en la Chrestienté, laquelle on sçait desia estre par trop enuieée & insupportable à plusieurs.

MONSIEUR, ie ne vous représenteray les hazards & desaduantages que courriez, & ausquels vous pourriez estre sujet en vostre particulier, vous donnant tout à fait audit Roy d'Espagne, combattant avec ses forces & deuenant son pensionnaire & sujet; car ie croy que vous les auez sagement considérées comme chose qui concerne particuliere.



ment vostre personne, & la fortune de Messieurs vos enfans, lesquels ne sont à mépriser, ny l'expérience que vous en avez déjà faite, que ie ne cotteray ny spécifieray point pour n'offenser personne, seulement ie vous supplie de me permettre de vous dire, que s'il faut que vous continuez à rendre obéissance & subjection à quelqu'un, vous acquererez tousiours plus de gloire, de grandeur & de biens pour vous & les vostres; en vous assujettissant aux loix du Royaume, & au commandement d'un Prince François, qu'en faisant autrement, pourueu que vous connoissiez pouuoir en ce faisant conseruer nostre Religion, laquelle ie feray tousiours d'aduís, comme i'ay déjà dit, que vous preferiez à toute autre consideration.

M A I S l'on dit que si vous ne contentez du tout ledit Roy d'Espagne, il se seruira d'autres que de vous, & que vous demeurerez en ce faisant sans appuy entre deux forces qui vous maistriseront avec honte & dommage.

M O N S I E U R, ceux qui mettent en auant tels propos, ont ce me semble bien petite connoissance de l'estat auquel se trouue le Royaume; de la force & puissance d'iceluy & quant & quant des moyens que vous & les vostres aurez tousiours de bien & mal faire à vos amis.

S i les Ministres dudit Roy d'Espagne vo-  
loient prendre ce chemin, il faudroit qu'ils  
serussent des François ou estrangers.

Ils publient qu'ils traiteront avec M

seurs les Cardinaux de Vandosme & Comte de Soissons, qui seroient accompagnez de Messieurs les Ducs de Neuers, de Longueville, & de Montmorancy, lesquels ils veulent que nous croyons qu'ils attireront facilement à leur dessein avec la Noblesse & plusieurs Villes du Royaume.

P E V T - E S T R E que ce seroit chose à laquelle il y auroit quelque apparence d'ajouter foy & auoir égard, si vous alliez à l'étourdy reconnoistre ledit Roy de Nauarre pour Roy, & vous joindre à luy sans la permission du Pape, & sans le consentement du Cardinal de Bourbon, deuant qu'il se fust reconcilié à l'Eglise, & auoir pourueu à la seureté des Catholiques du Royaume; d'autant que lesdits seurs Princes & Villes Catholiques indignées de ce, pourroient se resoudre de se r'allier avec ledit Roy d'Espagne pour defendre nostre Religion, laquelle ils verroient que vous auriez abandonné; mais c'est vne faute que vous n'avez garde de faire, & en laquelle personne ne vous conseillera iamais de tomber; dauantage, ie fais grand doute que lesdits Princes, Noblesses & Villes fussent si disposées à contenter ledit Roy d'Espagne, comme ses Ministres se promettent, ny à s'attacher à luy, pour les mesmes raisons qui vous en auroient empesché, sçachant aussi que la coustume d'Espagne est de faire de leurs filles deux gendres, c'est à dire, de donner esperance du mariage d'icelle à plusieurs pour s'en aider, sans les leur déliurer: mais que quand lesdits Princes s'embarqueroient, cha-

cun ſçait qu'ils n'auroient pas grande ſuite en ce Royaume ſans vous & les voſtres , car l'on attribueroit ce qu'ils feroient avec leſdits Eſpagnols à pure ambition , attendu les deportemens paffez des vns & des autres.

M A I S au deffaut deſdits Princes du Sang & des autres fuſdits , on adjouſte que le Roy d'Eſpagne ſe ſeruiroit de Meſſieurs les Ducs de Sauoye & de Lorraine , avec leſquels & ſa puiſſance il ſ'empareroit du Royaume , ou le demembreroit. Veritablement ie voy que leſdits Princes ne feroient pas grande conſcience ny difficulté de ſe joindre au deſir dudit Roy d'Eſpagne en ce deſſein , pour l'affeurance qu'ils auroient de ſ'en preualoir & ſ'agrandir ; & de fait il ſemble deſia qu'ils n'y ſoient que trop diſpoſez & preparez , & meſmes que ce ſoit leur reſolution , qui eſt la raiſon entre toutes les autres qui émeut & incite plus les vrais François & vos bons ſeruiteurs à vous conſeiller, Monsieur , d'entendre à compoſer nos diuiſions , & d'aduifer à vous mieux aſſeurer des moyens avec leſquels vous pourrez preſeruer ce Royaume du peril qui le talonne , que vous n'avez encore fait : mais ie tiens pour certain que s'ils entreprenoiſent de ce faire ſans vous & vos amis , qu'ils maudiroient l'heure de l'auoir commencé , meſmement ſi vous vous accordiez avec ledit Roy de Nauarre en la forme qui a eſté dite , car le nombre deſdits François qui les aſſiſteroient ſeroit bien racourcy , & n'y auroit faute de moyens de leur tailler de la beſongne en leur propre païs

avec ceux auxquels leur dessein plein d'ambition feroit defagreable & à contre-cœur: & si la France a résisté autrefois à toutes les puissances & forces de toute la Chrestienté ensemble, comme elle a fait, sans qu'elle aye rien gagné sur icelle, à present qu'elle regorge de gens de guerre, qu'elle seroit assistée de ses voisins, qu'il n'y a bon François qui ne voulust auoir achepté cherement vne guerre estrangere, pour se déliurer de l'intestine; ie vous laisse à penser si nous aurions le moyen de nous deffendre desdits Princes joints audit Roy d'Espagne.

Monsieur, certainement ie ne croiray iamais que le Roy d'Espagne entreprenne vn si haut dessein avec lescdits Ducs seulement, quoy que dient ceux qui mettent telles propositions en jeu, lesquels parlent & iugent des affaires du Royaume, comme personnes qui sont informées de l'Estat d'iceluy par gens qui les flattent, & qui veulent pescher en eau trouble, & s'enrichir par leur moyen, lesquels seroient peut-estre les premiers à les vendre & trahir en la poursuite de leur entreprise: ie yeux croire aussi que les desseins dudit Roy d'Espagne seront tousiours plus considerez & moderez que ne sont les paroles de telles gens, lesquels ie pense qu'ils iettent au vent autant & plus pour vous picquer & esmouuoir à faire ce qu'ils desirent, en vous donnant martel desdits Princes, que pour enuie qu'ils ayent de vous quitter, & s'adresser à ceux desquels l'aduancement & grandeur leur seroit à bon droit plus suspecte que la vostre.

Q V O Y qu'il y ait, quiconque entreprendra d'assubjettir les François à vn Prince estrangier, y fussiez vous resolu, Monsieur, il faut qu'il fasse estat qu'il sera tres-mal accompagné & suiuy d'eux, & partant qu'il faudra qu'il fasse la guerre avec des estrangers seuls, chose que ie vous conseille d'éuiter tant qu'il vous sera possible, comme la plus vituperable & perilleuse de toutes celles que vous pourriez entreprendre.

M A I S ie vous supplie tres-humblement, & vous coniure par vostre propre bien & honneur, par le salut de vostre patrie, & le zele que vous portez au seruice de Dieu, de vous resoudre bien-tost en ces affaires.

C A R le Royaume ne peut long-temps subsister sous le faix qu'il porte, ny en la confusion en laquelle il est, vous ne possédez les Villes qui se sont vnies avec vous, que de leur gré & bonne volonté; les necessitez & pauuretez que les habitans d'icelles souffrent, les incommodez & pressent de telle sorte, que vous deuez craindre grandement qu'ils changent d'aduis, d'autant qu'ils s'étoient promis d'estre déchargez d'oppression par vostre moyen, dequoy ils se trouuent tres-éloignez: car vous sçauiez qu'il n'y a Villes ny Prouinces qui ne vous demandent secours, & qui n'en ayent ttes-grand besoin: ne croyez pas qu'elles puissent longuement demeurer en cette sorte, speciallement si le dit Roy de Nauarre leur peut persuader qu'il se fera Catholique, ou qu'il les maintiendra en leur Religion: pareillement la Noblesse

qui vous suit n'en peut plus, & vous n'avez dequoy la secourir & gratifier; les champs s'en vont estre deserts & sans culture à cause des volleries que font les gens de guerre; le traffic est empesché du tout par terre & par mer, sans lequel le Royaume ne peut s'entretenir, & seront nos greniers bien-tost dégarnis de sel par les violences & desobeïssances qui sont ordinaires: & comme c'est vn aliment necessaire pour la vie de l'homme, ie preuoy que ce deffaut engendrera infinies putrefactions, qui troubleront grandement toutes sortes de personnes. En somme il n'y a celuy qui ne desire la fin de ses miseres, de sorte que si bien-tost vous ne faites voir que vous auez moyen de nous en déliurer, faites estat, Monsieur, que chacun cherchera à se faire de soy-mesme, & que la premiere Ville qui en monstrera le chemin sera suiuite de plusieurs autres.

Et comment nous ferez-vous connoistre que vous nous puissiez procurer vn tel bien pour la continuation de la guerre, puisque vous ne tirez ny pouuez plus esperer vn seul sol de tous les reuenus du Royaume, dont souloient iouir nos Rois, lesquels sont ravis par nos aduersaires, consommez par vos soldats, ou rendus infertiles par la pauureté & destruction du peuple: c'est aussi se mettre au hazard de reuolter les Villes que de leur parler d'emprunts & contributions, & mesme de receuoir des gens de guerre en icelles pour les deffendre & conseruer; & toutefois comme sans argent vous ne pouuez conti-

nuer la guerre, il est impossible que vous deliuriez lesdites Villes de vexations que leurs voisins leur font sans forces; de sorte que c'est comme reduire les choses à l'impossible, que de vous dénier l'un & refuser l'autre, & neantmoins vouloir que vous continuiez la guerre.

A quoy c'est abus de penser & esperer que la puissance seule du Roy d'Espagne soit bastante de remedier; ie vous predis que l'entrée en ce Royaume de armées, desquelles ses Ministres promettent de vous secourir, scandalisera & offensera plus grand nombre qu'elle n'en consolera ny contentera, & verrez que les portes des Villes leur seront fermées, & qu'elles auront peine de viure en la campagne.

E T si d'un costé nous sommes assistez desdites armées, lesquelles s'efforceront de faire les affaires de leur Roy plustost que les nôtres; n'estimez-vous pas que ledit Roy de Nauarre n'en appelle aussi à son secours, qui destruiront aussi de leur costé ce que les autres auront épargné, & empescheront vos desseins?

M O N S I E U R, tant s'en faut que nous deuions esperer de sortir de nos miseres par le moyen desdites forces, que nous en deuons plustost attendre nostre entiere & totale ruine; aduenant laquelle, & la guerre durant, ie dis que la Religion & l'Eglise Catholique en ce Royaume auront plus grand peril, qu'elles ne feroient par la pacification d'icelle avec ledit Roy de Nauarre, aux conditions susdites.

CAR si Dieu permet qu'il prospere par la guerre, & qu'il s'establisſe avec les armes, il changera comme il voudra la Religion en ce Royaume, & peut-eſtre qu'il paſſera plus auant au domage de la Chreſtienté, à quoy le ſeul accident du trépas du Roy d'Eſpagne luy donnera ville gaignée, ou la perte d'une ſeule bataille, & meſme celle de voſtre perſonne, que Dieu veuille bien garder.

CE qui peut-eſtre ne ſuccederoit ſi aduantageuſement pour nous, quand pareil accident leur arriueroit; d'autant que le party de ceux de la Religion eſt plus accouſtumé à ſouffrir, & à mieux garder les places qu'ils occupent, comme nous n'auons que trop expérimenté.

Dauantage, pour noſtre proſperité nous verrions naiſtre tant de partis & factions entre nous-meſmes, à cauſe des diuiſions qui nous accompagnent, qui procedent des diuerſes fins auxquelles tendent nos Chefs, que nous ne ferions noſtre profit de noſtre proſperité, comme ils feroient de la leur, d'autant qu'ils ſont tous d'accord à vn meſme but.

ET la ſeule continuation de la guerre rendroit les Eccleſiaſtiques ſi pauvres, la Nobleſſe ſi volontaire & peu ſoigneuſe de la Religion, les Villes troublées & les champs ſi deſerts, qu'il ſeroit impoſſible que la Religion Catholique n'en diminuast, & patist grandement, & partant n'en couruſt plus grand hazard qu'elle ne feroit par le moyen de la ſuſdite paix, avec laquelle vous pourriez r'allier & vnir tous les Catholiques enſem-



ble à conseruer & deffendre ladite Religion en force & authorité, nonobstant les desseins & ruses desdits heretiques, auxquels s'opposeroient lesdits Ecclesiastiques par leur vigilance, bonnes mœurs & prieres, la Noblesse par sa reünion & bonne intelligence obtenüe par vostre moyen, assistée de vostre authorité & prouidence & de tous ceux de vostre maison. Et les Villes par leur ialousie & deffiance ordinaire, fortifiées du deuoir qu'y feroient les Officiers, & particulièrement de l'authorité de sa Sainteté, & de la correspondance que les Catholiques entretiendroient pour ce seul effet avec les Princes Catholiques.

A v moyen dequoy ie conclus qu'il seroit plus expedient & vtile de traiter avec ledit Roy de Nauarre, aux conditions susdites, pourueu que le Pape & le S. Siege s'y accordent, que de suiure toute autre voye, puis que par vn tel moyen vous déliureriez du tout le Royaume de la guerre avec moins de hazard & peril pour la Religion Catholique, laquelle ie prie Dieu vous faire la grace de deffendre & conseruer à son honneur & gloire, & au salut du Royaume.

*HARANGVE FAITE PAR  
Monsieur de Villeroy, pour estre pro-  
noncée en l'assemblée des pretendus  
Estats de Paris, l'année mil cinq cens  
quatre-vingt treize.*

**M**ESSIEURS,  
Si iamais il a deu estre permis, & fut  
enques necessaire de parler librement en v-  
ne deliberation, c'est en celle qui se presente,  
en laquelle il s'agit de la deffence de nostre  
Religion, & de la disposition du Royaume;  
& de nos personnes, croyant fermement que  
si en la recherche & éléction du remede à nos  
maux, nous nous oublions tant que de pren-  
dre le nom de Dieu en vain, & abuser de ce-  
luy de la Religion en nous flattant nous-mes-  
mes, ou voulant plaire à autruy il confondra  
nos desseins, & nous fera perir honteusement:  
c'est pourquoy ie supplie la diuine Majesté,  
me faire la grace que ie ne die, ne propose  
rien en cette compagnie, s'il est possible, qui  
ne soit à la gloire & au salut du Royaume,  
comme ie proteste estre mon seul but. Mais ie  
vous supplie, Messieurs, de prendre en bonne  
part, que pour ce faire i'vse de la liberté &  
franchise d'un homme de bien, laquelle i'ay  
accoustumé du gré de nos Rois, tant que ie  
les ay seruis comme celuy qui veut plustost  
manquer à soy-mesme qu'à son deuoir en cet-

te occasion , eſperant que Dieu qui connoiſt mon cœur , & vous , Meſſieurs , qui m'avez veu autrefois en beſongne , excuſerez mes fautes. Je proteſte auſſi de ne vouloir eſtre opiniaſtre , & que ie cederay touſiours au iugement & conſeil des plus ſages: vray eſt qu'il me ſemble que ce tiltre eſt deu principalement à ceux qui ont la crainte de Dieu , & la connoiſſance & experience des choſes du monde pour ſçauoir diſcerner l'ombre d'auec le corps , & ne ſe laiſſer emporter à des deſirs & deſſeins imaginaires & impoſſibles, qui ne ſont ordinairement ſuiuis que de honte & dommage.

M E S S I E V R S , perſonne ne peut nier que la cauſe que nous deffendons ne ſoit juſte, ayant pour fondement l'honneur de Dieu , & le ſoulagement du peuple ; neantmoins pour auoir eſté entrepriſe & commencée auec plus d'ardeur que de prudence , & depuis pourſuiuie auec plus d'eſperance que d'ordre , non ſeulement nous y auons plus perdu que gagné , mais auſſi nous auons donné matiere à nos aduerſaires de la blaſmer, dont ils n'ont tiré peu de profit à noſtre dommage dedans & dehors le Royaume , tant a de force & de puissance ſur les hommes ce qui eſt juſte, mais auſſi ce qu'ils eſtiment l'eſtre : à quoy il me ſemble qu'il nous importe grandement de pouruoir pour l'aduenir , ce que nous ferons quand nous donnerons ordre pour noſtre conduite , & que nos actions répondent vrayement & d'un commun accord au deffaut ſuſdit , choſe que nous deuons eſperer de la re-

folution qui se prendra en cete assemblée, laquelle pour cette cause a esté il y a vn long-temps recherchée & désirée des gens de bien; & toutefois ie veux croire, que si elle n'a eu lieu plustost, que Dieu l'a ainsi permis, afin que le temps & nos maux seruissent d'enseignement à ceux qui en auoient besoin.

Pour bien delibrer de nos affaires & du remede d'icelles, il me semble qu'il faut commencer par nous représenter deux choses: la premiere, ce que nous auons gagné à la guerre pour le party Catholique, depuis que nous auons pris les armes; & la deuxieme, en quel estat & disposition le Royaume se trouue maintenant, afin que nous ne nous abusions en nostre poursuite, & ne bastissions nostre resolution, s'il est possible, sur vn faux fondement: car il s'en faut beaucoup, ie ne diray que ne soyons si ardens & affectionnez à la guerre, mais si forts & puissans pour soutenir, que nous estions au commencement d'icelle; nous auons fait comme ceux lesquels courent si viste au partir de la carriere qu'ils perdent l'halcine auant qu'ils soient arriuez au milieu d'icelle: de maniere qu'il faut reconnoistre que c'est maintenant la necessité & non la raison qui nous rend plus circonspécts, & considerez que nous n'estions, dont il aduient que nous fassions nostre profit, l'allegement que nous en receurons aidera à nous faire oublier & porter plus doucement nos fautes & pertes passées. Mais n'attendons, ie vous supplie, que cette necessité qui ne nous presse desia que trop, opere dauantage

en nous & en nos affaires, ce que la prudence y doit apporter; car vous sçavez que ses effets sont ordinairement tres-violens & perilleux, spécialement quand ils agissent és cœurs d'un peuple.

M A I S comme pouuons-nous, ie veux dire ceux qui se sont embarquez en ce party pour le respect seul de la Religion, déduire au vray & par le menu les changemens aduenus en ce Royaume, au desaduantage d'iceluy depuis la guerre, sans soupirer, voire desespérer de sa conseruation, s'il est ainsi que l'on doie iuger des choses à venir par les passées: certainement si les gens de bien n'auoient plus d'esperance en la bonté & protection de Dieu qu'en la conduite des hommes & en leurs forces, leur desespoir pour ce regard seroit quasi arriué à son période; mais ie ne puis croire que son courroux émeu par la grauité & multitude de nos pechez s'estendent si auant que de nous vouloir priuier du tout de la Religion avec laquelle nos peres & nous l'auons adoré & seruy iusques à présent, sinon, avec telle integrité qu'il conuient, au moins avec la foy de l'Eglise vniuerselle, de laquelle nous deuons plustost mourir que nous departir: & toutefois il est certain que nos armes ont plus seruy iusques à present à l'affoiblir qu'autrement, combien que nous protestions les auoir prises & employées seulement pour la deffense d'icelle, tant sont les iugemens de Dieu incomprehensibles, & les prieres des hommes vains & abusifs.

Q V A N D nos mouuemens ont commencé, l'ordre Ecclesiastique en ce Royaume estoit tres-florissant & puissant, il estoit reueré, supporté & bien vny ; nos Eglises estoient garnies de Prelats autant dignes de leurs charges qu'elles auoient esté cinquante ans auparavant, où Dieu estoit seruy honorablement, comme en plusieurs bonnes Abbayes & Monasteres d'hommes & de femmes, & specialement des Religieux, où la charité & hospitalité estoit exercée exemplairement. Les Curez administroient leurs Cures aux Villes & aux champs en toute seureté, & contenoient leurs Parroissiens en la Foy de l'Eglise : mais depuis la guerre, la misere & la pauureté ont tellement persecuté lesdits Pasteurs, que les vns ont esté contraints d'abandonner leurs troupeaux, les autres ne peuuent quasi plus viures, la mort en a aussi banny plusieurs : de sorte que maintenant il y a autant ou plus d'Eglises en ce Royaume vaccantes & priuées d'iceux que d'autres, & ne sont les maisons de Religion en meilleur estat ; car les Religieux & Religieuses les ont laissez & laissent tous les iours, errans par tout avec grand mépris & scandaleuses offenses, cherchans à viure, & viuant tres-licentieusement : les Curez aux champs sont encore pis, tant ils sont outragez & mal traitez des vns & des autres : Il y a aussi infinies Parroisses où le peuple est priué tout à fait de l'exercice de Religion, & de la consolation des saints Sacremens. Dauantage, combien d'Eglises ont esté saccagées & dépoüillées de leurs reliques.

& ioyaux, & mesme abatuës depuis la guerre, & à l'occasion d'icelle, qui n'a mis la main dedans leurs biens pour s'en acommoder? que deuons-nous attendre de la disposition que fõt nos aduersaires des Archeueschez & Eueschez, Abbayes & autres Benefices qui vacquēt ou sont tenus par ceux de nostre party, sans distinction d'Ordre ny de Religion, qu'un renuersement entier de cette Hierarchie & Eglise Gallicane, que nos majeurs ont avec tant de pieté, honneur & loüange fondée, augmentée & conseruée. Pouuons-nous faire mention aussi de la separation & diuision de ceux du desordre & de l'assistance qu'en reçoient les ennemis de l'Eglise & du schisme qui est prest à éclatter, sans horreur & frayeur. Messieurs, si ceux de nostre party sont du tout innocens de ces desordres, vous le sçavez mieux que moy; il me suffira de vous requerrir qu'il y soit pourueu comme il est necessaire, si nous voulons que Dieu nous aide, & que la posterité ne nous reproche la ruine & subuersion de son Eglise, aussi bien qu'à nos aduersaires.

A P R E S, considerons nos Villes, lesquelles estoient deuant la guerre tres-riches & opulentes, nos aduersaires en ont pris plusieurs, dont les gens estoient tres-affectionnez au party, qui en est maintenant affoibly dautant; & celles qui nous sont demeurées, combien qu'elles soient les principales, sont toutefois remplies de tant de partialitez & affections, & si chargez d'impositions & coruées extraordinaires mises sus autant par nous mesmes.

comme par ceux qui nous font la guerre, qu'elles sont tres-miserables & necessiteuses: les habitans y sont sans commerce, priuez du payement de leurs rentes, de la iouissance de leurs heritages, & sans justice de leurs debtes, ayant mangé & consommé leurs reserues & biens de leurs magasins: la justice qui souloit y presider n'y est pas quasi reconnoissable, tant elle y a esté mal-traitée, & encore outrée de regret; les Ministres & Officiers d'icelle y sont sans autorité & sans gages, y viuans en grande crainte & pauvreté avec leurs familles, apres auoir tout vendu & souffert pour y durer comme ils ont fait iusques à present; bref, tout y regorge de confusion, de diuision, necessité, frayeur & mécontentement, principalement en cette noble ville de Paris, la constance de laquelle est certainement admirable, & doit seruir de consolation & d'exemple à toutes les autres; elle est, Messieurs, la capitale du Royaume, le vray thrône de nos Rois, le premier siege de leur siege, la residence de cette fameuse Eschole & Faculté de Theologie, la garde de nos Reliques plus saintes & precieuses, & des thresors de la Couronne; où i'ose dire que la charité a eu tant de vogue, & la pieté a esté de tout temps aussi ardemment embrassée, & continuellement exercée qu'en nul autre endroit du monde; celle qui a tousiours seruy de fanal & de regle à toutes les autres du Royaume: pouuons-nous considerer son changement sans douleur? & souffrirons-nous qu'il en mes-adienne, elle qui importe tant à la



cause de Dieu , & au party pour lequel elle a iouï de son reste ? Toutefois , Messieurs , il est impossible qu'elle persiste , si elle n'est déliurée des charges & incommoditez qui la pressent, élargie & remise en estat qu'elle puisse se substantier, & par elle-mesme, conseruer d'elle-mesme, & par elle-mesme, comme elle souloit faire, & non par conuois & à force de garnisons & d'argent, ainsi qu'elle a esté gouvernée & nourrie depuis le siege; autrement il ne nous en demeurera que les corps bié debiles & extenuéz, si encore nous les pouuõs retenir.

S i nos Villes sont desolées, que dirons-nous du plat païs, en tout & par tout en proye & à l'abandon ? Il semble que de part & d'autre nous en ayons entrepris & coniuéré par enuie l'entiere ruine & vastation; ces pauvres peuples payent double & triple taille par tout, sans conter les autres subsides, contributions & coruées que l'on exige d'eux à discretion, qui excède de trop toutes lesdites tailles ; outre infinies autres sortes d'outrages, excez & violences que l'on luy fait souffrir, dont rien ne le peut garentir que la seule mort : car toute espeece de refuge, aide, consolation & justice luy est déniée ; c'est quasi honte que d'en auoir compassion, c'est peine perduë que d'interceder & parler pour luy, & crime que d'en demander & poursuivre le soulagement. Nos villages en sont deserts, & la face de la terre hideuse, & en friche en plusieurs endroits : & toutefois, Messieurs, c'estoient les vrais thresors de la France, nos Minieres & nos Indes que ces bonnes

gens lors qu'ils cultiuoient nos terres en toute liberté & seureté, avec le bestail dont ils souloient estre garnis, estant destruits, où trouuerons-nous dequoy viure? qui nourrira nos armées, & entretiendra nos garnisons la guerre durant? tout nous manquera en vn instant: Messieurs, il me semble que nous en deurions craindre & apprehender la ruine plus que nous ne faisons, autant & plus pour l'aduenir que pour le present; car soit que Dieu nous donne la paix ou la victoire, ce deffaut & manquement des peuples, de labour & bestiaux, nous incommodera grandement, & sera sans remede, sinon avec vn long-temps.

M A I S quelle mention ferons-nous de nostre Noblesse Catholique, qui souloit estre deuant la guerre tres-vnie à la deffense de nostre Religion, la voyant maintenant separée comme elle est, combattre l'une contre l'autre aussi furieusement qu'elle faisoit ensemble du temps de nos Rois contre les ennemis d'icelle? Pouuoit-il aduenir au party Catholique par la guerre vn affoiblissement plus grand que cettuy-cy, comme ainsi soit que l'vnion des Catholiques soit la vraye erreur des heretiques, lesquels aussi ne sont forts auourd'huy, & ne nous resistent que de l'alliance qu'ils tirent d'eux? quel creue-cœur en deuons-nous auoir? que ne deuons-nous tenter & employer pour les retirer & reünir ensemble? Messieurs, il est certain que si nous auions gagné ce point, nous aurions acquis à la cause vn tres-grand aduantage: le nom de Roy duquel nosdits aduersaires s'ap-

puyent , le fortifie grandement , mesmes autant ( à mon aduis ) que fait la diuision de la Noblesse Catholique, & le secours qu'ils en tirent. Dauantage, combien de Princes, & quels Princes , Chefs d'armées , Seigneurs & Gentils-hommes Catholiques auons-nous perdus depuis ces mouuemens ? ie comprens & regrette en ce nombre ceux qui sont morts avec nosdits aduersaires comme les autres: car s'ils eussent vécu peut-estre que le temps & les occasions vous eussent r'alliez ensemble plus que deuant , comme encore ie ne puis desesperer que ne fassent quelque iour ceux qui resistent , lors que Dieu aura compassion de nos miseres. Bref , nosdits aduersaires estoient deuant la guerre combattus de l'autorité Royale, & de l'vnion desdits Catholiques , pauures, necessiteux & reduits, comme abandonnez , en trois Prouinces du Royaume , où encore ils estoient tres-foibles ; à present ils nous opposent la mesme autorité , nous combattent de nos armes par nostre diuision , disposent mieux que de nous des deniers Royaux & moyens publics, auxquels ils ne souloient auoir aucune part , & sont cependant logez & establis par tout le Royaume , allans du moins de pair avec nous en tous lieux.

VOILA , Messieurs, ce que nous auons profité à la guerre pour le party Catholique, & l'estat present du Royaume que ie vous ay representé le plus sommairement & simplement qu'il m'a esté possible (pource que vous en sçaez plus que moy ) & que la chose parle

assez d'elle-mesme. Je vous supplie de n'estimer qu'en ce faisant i'aye voulu blasmer personne, car ce n'a esté mon intention, & moins m'adresser à nos Chefs & Superieurs qu'à tout autre; spécialement à vous, Monseigneur, duquel ie sçay comme celuy qui a eu cét honneur que de vous suiure & accompagner longtemps, que la violence de la tourmente qui nous a agitez, a souuent forcé vos conseils & volentez, & qu'avez autant ou plus travaillé & enduré que fit iamais Prince de vôt्रे qualité, pour soustenir les affaires: en quoy ie puis dire sans flatterie, que i'ay souuent admiré vostre patience & constance, l'vne à supporter vertueusement, comme vous avez fait les grandes incommoditez, necessitez & deffauts qui vous ont esté ordinaires, principalement depuis les batailles de Senlis & d'Iury, & l'autre à mépriser & reietter toutes sortes de recherches & ouvertures qui vous ont esté faites de diuers endroits, pour tirer de vous quelques consentemens ou promesses en ce qui concerne le general de la Religion & de l'Estat deuant cettē assemblée; ayant tres-religieusement & fidèlement gardé & conserué le saint depost de l'vne & de l'autre qui vous auoit esté confié, comme il vous pleût nous declarer & faire entendre dernièrement à l'ouverture d'icelle, dont certainement nous vous sommes tous tres-obligez; & vous rends graces tres-humbles en mon particulier, comme bon Caholique & vray François.

M E S S I E U R S, apres cette deduction, par

laquelle le malade vous a esté représenté avec vne partie de ses playes, il conuient traiter des remedes, c'est où gist nostre labeur, & la difficulté en laquelle nous auons besoin, sur toutes choses, de l'aide de Dieu, & de n'vser de flatterie, dissimulation, ny conuiuence. L'implore donc sa grace & vostre permission pour m'en acquitter dignement & fidèlement, en quoy ie seray plus brief & plus modeste qu'il me sera possible, pour ne vous ennuyer ny desplaire à personne si ie puis, car ce n'est mon but, mais seulement de seruir la cause à vostre gré & à ma descharge.

O R il est certain, Messieurs, que nous ne pouuons conseruer nostre Religion que par trois moyens, par la singuliere & speciale grace de Dieu, de nous mesme, & avec l'aide & assistance de nos amis.

I E ne m'estendray sur le premier, car c'est matiere plus propre & mieux seante à la bouche de Messieurs du Clergé qu'en nulle autre, seulement ie me dispenseray de dire deux choses; l'une; que si nous voulons que Dieu aye soin de nous, il faut que nous deuenions plus charitables & equitables, moins vicieux, & en effet meilleurs Chrestiens que nous ne sommes; & l'autre, qu'il se faut bien garder de tenter Dieu, & abuser de l'esperance que nous pouuons auoir en luy par temerité, presumption ou autrement, comme à l'aduanture nous ferions si nous choisissons des remedes impossibles, nous fondans & confians du tout sur nos bonnes intentions, & sur la iustice de nostre cause, sans dauantage éplu-  
cher

cher ny conferer les choses; car souuent Dieu permet qu'une mauuaise cause prospere avec ceux qui la deffendent, pour matter & châtier les autres qui combattent au contraire, comme nous n'auons que par trop éprouué en ce Royaume depuis trente-cinq ans contre les mesmes aduersaires, & en la mesme cause de laquelle il s'agit maintenant, sans qu'il soit besoin pour nous enseigner que nous iettions les yeux sur nos voisins, ny sur la terre sainte, tombée par nos dissensions & pour nos vices & pechez au pouuoir des infideles.

Le moyen qui depend de nous gist aux forces qui nous restent, & en nostre conduite.

Nos forces consistent en la vertu de nos Chefs, en la richesse & bonté de nos Villes, au nombre & en la valeur de nos gens de guerre, & en nos deniers communs & publics: Nostres Chefs sont genereux & experimentez, & tres-affectionnez, & croy certainement que nos affaires ne demeureront par eux, ie souhaite seulement qu'ils soient mieux reuez, obeïs & vnis, comme il est necessaire pour nous bien faire. Nous auons encore nos principales Villes, mais elles sont fort décheuës & appauuries depuis la guerre, comme ie vous ay representé, de sorte que si du commencement elles se gardoient d'elles-mesmes, voire regentoient autour d'elles, fortes de zele, de nombre d'habitans, de commoditez & d'esperance; maintenant il faut que nous les gardions du dehors, & par le dedans avec force & moyens, d'ailleurs non sans peine & sollicitude tres-grande, tant el-

les sont diuifées, dénuées de peuple, pleines de neceffité, de crainte & de deffiance de l'aduenir : Quoy eftant il fera difficile qu'elles contribuent d'orefnauant aux affaires publiques autre chofe que le nom & la reputation de leur ancienne grandeur, avec la retraite & feureté de ceux du party : ce qui procede du mal qu'on leur a fait par le dehors, & qu'eux mefmes fe font fait par le dedans, dont chacun fçait & ressent les particularitez ; mais comme elles ne peuuent eftre remifes ny reftaurées qu'avec le temps, il conuient pour cette heure aduifer pluftoft au moyen de les foulager & fecourir pour les conferuer, que de faire eftat (fi on ne me trompe) d'en tirer de l'aide, & principalement en deniers pour fouftenir la guerre. Quant aux gens de guerre du party, le nombre en eft grand, mais mal reglé & discipliné : car l'ambition & l'auarice les dominent par trop, & tous quafi penfent plus à s'agrandir & enrichir, qu'à l'vtilité publique, vice ordinaire des guerres ciuiles, ores tres-perilleux & contagieux, qui fe prend par exemple, non feulement entre égaux, mais aufsi du petit au grand : cecy engendre toutes fortes de maux, entr'autres vne licence effrenée, vne defobeiffance generale, & vne ialoufie & combustion extrême, qui corrompt, énerue, & affoiblit tellement la bonté defdits gens de guerre, que nous ne deuons faire eftat d'en eftre bien feruis pour le public tant que cela durera. Le fecours que nous pouuons tirer des deniers publics eft encore plus incertain, d'autant que lefdits gens

de guerre le prennent ; & comment , tout par tout , sans ordre ny regle , encore n'en ont-ils pas à demy : Dauantage , il faudroit faire reuiure le peuple qui est mort depuis la guerre , & remettre le plat païs en culture , pour en tirer commodité , chose tres-difficile , voire impossible de faire , sinon avec le temps. Toutefois si nous pouuions reprendre l'ordre & les reglemens anciens en l'administration des Finances , comme font sagement nosdits aduersaires ; peut-estre que nous en tirerions quelque chose pour subuenir aux despens de nos armées , tout ainsi qu'ils font de leur costé , lesquels n'ont quasi autres deniers pour faire la guerre ; mais il faudroit y mettre bien-tost la main & viuement , & ne se laisser vaincre aux importunitéz & mécontentemens de ceux qui s'en accommodent particulièrement , comme l'on a fait iusques à present , de façon que le public n'en a eu aucun secours : doncques estans nos Villes pauvres & troublées comme elles sont , nos gens de guerre mal creéz & disciplinez , & nos deniers publics mal ménagéz & incertains , il faut que nous reconnoissions & aduoiiyons estre tres-difficile que nous resistions à nosdits aduersaires , & nous maintenions de nous mesmes.

Nous voyons ce que nous pouuons esperer de nostre conduite , Messieurs , si nous voulons la rendre bonne , & faire qu'elle prospere ; il faut que nous la iustifions tellement , que Dieu & les hommes en demeurent satisfaits : Nous la iustificerons , quand vraiment & sincerement nous chercherons la gloire de



Dieu , & l'vtilité publique , comme nous ferons quand nous prendrons le chemin , par lequel nous pourrons plus feurement & promptement déliurer le Royaume de l'heresie & de la guerre ; car tant qu'il sera battu de ces deux fleaux , il ne faut esperer que nous restaurions la Religion ny le public , comme nous auons éprouué aux dépens de l'vne & de l'autre depuis nos mouuemens ; au moyen dequoy tout ainfi que ceux qui se veulent preualoir de la ruine de nostre Religion & du Royaume , s'accordent en ce point , ſçauoir est de fomentier & nourrir la guerre & nos diuifions par tous moyens & artifices qu'ils peuvent inuenter , ſi nous voulons ſauuer l'vn & l'autre , il faut au contraire nous efforcer de les aſſoupir & terminer le pluſtoſt qu'il nous ſera poſſible. C'eſt le vray moyen auſſi de faire ceſſer les enuies , partialitez , & paſſions , qui troublent & deſtruifent nostre vnion , ſ'il en faut esperer quelque choſe : car il n'y a rien qui puiſſe plus aider à ranger à la raiſon , & ramener les particuliers à leur deuoir enuers le public , que l'exemple & la bonne conduite d'iceluy.

A quoy i'adjouſteray l'opinion de ceux qui diſent que nous deuons promptement élire & créer vn Roy ſur nous , comme vn moyen tres-propre , voire qui ſeul nous reſte , pour releuer nos affaires & les garder de naufrage , attribuant à ce deffaut , non ſeulement toutes nos infortunes paſſées & nos diuifions , partialitez & mauuiſes procedures , mais auſſi les aduantages que noſdits aduerſaires ont

gagné sur nous dedans & dehors le Royaume , pour la reuerence & affection que les François , nourris & accoustumez de tout temps à la Royauté, portent naturellement à leurs Rois, & par le credit & pouuoir qu'à ce nom enuers les Princes & Potentats estrangers , lesquels desirans pour leur interest la conseruation entiere de la Couronne, fauorisoient tousiours plus volontiers celuy qui en portera le tiltre qu'ils ne feront toute autre sorte d'administration, laquelle ne peut qu'elle ne leur soit d'autant plus suspecte & odieuse , & moins agreable aux sujets d'icelle, qu'elle semble aucunement aspirer & tendre à vne alteration ou mutation d'Estat , chose que i'estime estre à considerer avec beaucoup de raison par ceux qui affectionnent ce conseil ; partant ie ne veux estre des derniers à y ioindre mes vœux , toutefois ie desire que nous pesions & considerions bien & meurement la nouueauté & importance du fait deuant que nous y engager. Car , Messieurs, ce n'est pas comme vous sçauiez trop mieux , le nom ny le tiltre , la Couronne & le Sceptre qui donne autorité, force & puissance aux Rois, & les fait reuerer & aimer; c'est le droit d'une legitime succession que la nature leur donne par la grace & permission de Dieu, suivant les loix & constitutions des païs, & leurs vertus & bonne conduite : & si quelquesfois l'on s'est dispensé de déroger & contreuenir ausdites loix en faueur de quelqu'un , ç'a esté avec l'acclamation , approbation , & du consentement vniuersel de tous les Estats & peu-

ples d'iceluy , pour vne vtilité & paix publique , & non pour se ietter & plonger en vne guerre immortelle , tres-peſſeule & douteuſe , comme certainement fera celle que nous épouſerons par toutes nos vies , faiſant ladite élection. Parquoy ie diſ qu'il eſt neceſſaire au préalable d'aduifer à deux choſes: la premiere , ſ'il n'y a point de moyen ny d'eſpoir de conſeruer noſtre Religion ſans vſer de ce remede. L'autre , ſ'il y a Prince auquel nous puiſſions nous donner, qui ſoit fort & puiſſant aſſez pour nous ſauuer & déliurer de la guerre , & des vexations d'icelle , afin que l'on n'attribuë à paſſion , ce que la neceſſité ſeule de conſeruer noſtre Religion nous doit contraindre, & doit excuſer de faire, & qu'au lieu meſme d'y profiter & à nous meſmes , nous n'aduancions la ruine d'icelle & la noſtre; mais d'autant que ce point eſt le principal de noſtre deliberation , dont ie dois attendre à dire mon aduiſ , & m'expliquer dauantage à la fin & conſeſion de mon diſcours , ie me contenteray d'en auoir touché ce mot en traitant des moyens & remedes qui dependent de nous , afin que l'on n'eſtime que ie le veuille obmettre.

M A I S enfin il faut confeſſer que nos forces domeſtiques ſont trop foibles , avec toute noſtre conduite , pour ſortir d'affaires par les armes ſans l'aide de nos amis : partant il ne nous reſte plus qu'à examiner ſi c'eſt choſe à laquelle nous deuions eſperer de paruenir par leurs moyens ou non , pour ſur ce baſtir noſtre reſolution.

Messieurs, nous tenons à bon droit pour nos principaux, plus asseurez, & speciaux amis nostre saint Pere le Pape, le Roy d'Espagne, & avec eux Messieurs les Ducs de Lorraine & de Sauoye, lesquels n'ont rien espargné iusques à present pour nous secourir & fortifier: de sorte qu'il faut reconnoistre veritablement que sans eux nous eussions esté contrainsts de composer avec nos aduersaires, ou de souffrir beaucoup plus que nous n'auons fait. Nostres saints Peres y ont employé les vns apres les autres leur autorité & leurs thresors spirituels & temporels tres-largement, comme nous voyons qu'ils continuent encore sans épargne: en quoy ils ont esté tres-bien secondez dudit Roy d'Espagne, lequel a eu tant de soin de nous, qu'il faut que nous aduouïyons, si nous ne voulons estre tres-méconnoissans que nous luy deuons la gloire & la reconnoissance entiere de nostre estre: car sans luy les Villes de Paris & de Roïen, qui sont les deux principales colonnes de nostre cause, ne seroient plus nostres, & n'auons soustenu la guerre depuis le commencement iusques à present que de ses deniers & avec ses forces, ayant souuēt delaislé ses propres affaires pour mieux nous secourir: ce que nous pouuons dire semblablement que lesdits Ducs ont fait aussi de leur part, tant que leurs moyens se sont estendus, dont nous voyons que leurs affaires sont en arriere, & leur païs grandement incommodez.

Et neantmoins ie ne vois pas qu'avec tout cela, joint ce que nous auons pû y contribuer

de nostre part, lors que nous estions encore plus frais & mieux pourueus de toutes choses que nous ne sommes, & ne pouuons estre cy-apres, nous ayons gaigné tel aduantage sur nosdits aduersaires, que nous ayons grande occasion de nous réjouir, ny espc:er qu'en continuant nous voyons de long-temps la fin d'eux par les armes: les fulminations de nosdits saints Peres ont plustost aigry leurs cœurs, & leurs exhortations & admonitions souuent reïterées enuers les Catholiques qui les assistent, ne les ont pas encore ébranlez: Les gens de guerre qu'ils nous ont aussi par force & à grands frais enuoyez, ne nous ont guerés plus profité, & jaçoit que ledit Roy d'Espagne nous ait enuoyé plusieurs armées l'une après l'autre, qu'il ait aussi secouru à part la Bretagne & le Languedoc d'hommes & d'argent, & qu'il n'ait rien obmis à faire pour nous: toutefois le fruit de sa bonne volonté, & des frais qu'il y a faits tres-grands, n'a répondu à nos esperances ny à nostre besoin. Si ce mal-heur nous est aduenu par nostre faute ou celle d'autrui, pour n'auoir esté les choses conduites, administrées ou employées comme elles deuoient estre, ou par impuissance & foiblesse, procedant de nostre part, ou de ceux qui nous secourent, ie m'en rapporte à ce qui en est: tant y a qu'il est veritable & notoire à tous, que nostre condition est plustost empirée qu'amendée, combien que celle de nosdits ennemis soit quasi aussi languissante que la nostre, n'estant moins incommodez & mattez de la guerre:

Toutefois d'autant que leur force principalement gist en eux ; qu'ils sont mieux vnīs que nous ; qu'ils tendent & trauaillent tous à vn meſme but ; qu'ils obſeruent & ſuiuent en leurs affaires , tant à la conduite des armées qu'en l'adminiſtration de la juſtice & police, & au manieiment des Finances, l'ordre ancien du Royaume, par lequel chacun eſt authoriſé & ſouſtenu en ſa charge & fonction , comme il doit eſtre ; qu'ils ſont argent de tout, comme nos Rois ſouloient faire en temps de paix ; que les Villes ſont riches des dépouilles & deſordres des noſtres , & que le party huguenot va touſiours ſe fortifiant autant que celuy des Catholiques ſ'afſoiblit par la continuation de leurs diuiſions , ils ſe maintiennent mieux que nous, Nous ne faiſons rien qu'à force d'hommes & d'argent, & qu'auec toutes les longueurs , peines & difficultez du monde , au lieu que nodits aduerſaires ſ'entretienhent de peu de choſe , & ſont tous les iours quelque effet, comme gens qui diſpoſent de leurs forces & moyens ainſi qu'il leur plaist, & qui ſeruent leur party, ou pour mieux dire leur maiſtre de cœur & d'affection, attendant la recompenſe de leurs ſeruices de ſa proſperité : dauantage , ils ont gagné ce point ſur nous que chacun croit dedans & dehors le Royaume , qu'ils cherchent le combat & que nous le ſuyons ; choſe qui fait craindre leurs armes , & mépriſer les noſtres , & principalement parmy nous autres François, accouſtumez à reſpecter ceux qui ſont non ſeulement genereux & vaillans, mais auſſi

hazardeux ; joint que nous estimons que c'est le vray moyen d'abreger nos miseres , desquelles nostre langueur & necessité nous rend tous les iours plus impatiens , mesmement voyant les excez & desordres que font sur nous sans distinction de party lefdites forces estrangeres , & pareillement les diuerfes pratiques & menées qu'aucuns font par toutes nos Villes , qui tendent plus à nous precipiter qu'à nous sauuer.

Quoy estant , quelle raison auons nous d'esperer que nos affaires succedent mieux cy apres qu'elles n'ont fait depuis quatre ans ; mais peut-estre que le Roy que nous parlons d'élire , comme vn souuerain remede à toutes nos playes , y apportera le changement que nous desirons. Quoy ! rendra-il nostre cause plus iuste & nostre vnion plus parfaite qu'elle n'est ? réchauffera-il nostre ardeur esteinte par la necessité , ou s'il restaurera nos Villes & fera cesser les partialitez qui acheuent de les dépeupler & détruire ? remettra-il nos champs en culture , & s'il fera reuiure nos laboureurs que la guerre a ravis , afin que nous puissions recueillir nos fruits pour viure , & en tirer les deniers publics pour continuer la guerre : ou bien s'il nous emplira de tant de commoditez , & nous rapportera en peu de temps vn tel aduantage que rien ne nous manquera , ny sera difficile à executer contre nosdits aduersaires , pour nous élargir & contenter ? Messieurs , si le zele que nous portons à nostre Religion , & si nostre perplexité nous fait desirer & volontiers esperer ce secours

d'une telle resolution, faut-il pourtant s'asseurer quels effets s'en ensuiuent sans en estre mieux éclaircis ? Croyons-nous que le Roy, qui sera peut-estre composé & créé de nature estrangere, estant adjousté & receu au corps de nostre party, autant parauanture par contrainte, que par raison, aye les fonctions aussi vigoureuses & vtilles, que si nature nous l'auoit donné ? Messieurs, ouurons les yeux, & reconnoissons que nous sommes hommes; que l'on peut bien imiter la nature, mais non atteindre à sa perfection.

PARLONS plus clairement, s'il faut que nous prenions vn Prince dedans nostre party pour estre nostre Roy, il faut necessairement que nous le choissions au gré du Roy d'Espagne & de son desir : car nul des autres ne peut estre assez puissant pour se maintenir en ce degré, & nous sauuer sans son aide, quelque reputation, parens, amis & moyens qu'il puisse auoir. C'est chose reconnuë de tous, au moyen dequoy si ledit Roy veut auoir cette Couronne pour luy ou pour l'Infante sa fille aînée, comme nous font entendre ses Ministres, & qu'il n'y ait moyen de l'en diuertir, l'obligation que nous luy auons, & le besoin que nous auons de luy, s'il faut que nous continuions la guerre, requierent que nous passions plustost par dessus nos loix & toutes autres considerations pour le contenter, que de l'offenser en nous adressant à vn autre: car tout ainsi que nosdites loix n'ont esté faites que pour bien faire au public, l'observation nous en doit estre chere & recommandée, si-



non autant qu'elle peut estre vtile à iceluy, & sur tout à la deffense & conseruation de nostre Religion que nous deuons preferer à toutes autres choses. Quoy estant il ne nous reste plus qu'à sçauoir, si en élisant ledit Roy d'Espagne, ou ladite Infante sa fille, nous y trouuerons les benedictions & aduantages qui nous seront necessaires, comme aucuns se promettent, afin que nous ne soyons si temeraires & mal-aduisez de franchir ce saut qui est si sujet à infinis perils & inconueniens, difficiles à preuoir, mais encore plus à éuiter apres le coup, deuant que d'auoir bien considéré & pesé comme il appartient les euénemens d'iceluy pour éuiter le dommage, le blâme & le regret d'un tardif repentir qui suit de près ordinairement vne resolution precipitée, sans souffrir que nos passions, ou attendre que nos necessitez soient si grandes qu'elles nous violentent en ce fait.

P O U R mon regard ie suis d'aduis, s'il faut que nous contentions ledit Roy, que nous nous donnions à luy plustost qu'à sa fille, sans nous arrester qu'elle est issuë d'une fille de France : car s'il est necessaire que nous violions nos loix, ce doit estre pour le party plus vtile, & non pour celuy qui en approche le plus ; sans doute nous trouuerons tousiours plus de seureté au tronc qu'aux branches : car les moyens de ladite Infante dependent de la volonté dudit Roy son pere, & apres luy du Prince son fils qui doit estre heritier vniuersel. Mais qui peut répondre & asseurer que ledit Prince succedans aux Estats de son pere,

succede aussi à l'affection ; qu'il veuille obmettre ses propres affaires pour assister sa seur, comme fait à present le pere sa chere fille ; c'est chose rare qu'un fils suiue en tel cas les intentions de son pere ; & encores plus, qu'un Prince delaisse & abandonne ce qui le concerne pour bien faire à autrui, quelque proximité qu'il y ait, ce que nous deuons encores moins nous promettre de ce changement que de nul autre : car il n'y a desia que trop de seruiteurs & subjets dudit Roy, qui regrettent les dépenses qu'il a employées à ce Royaume ; de sorte que si Dieu en dispo- soit deuant que sa fille fust establie, & que le- dit Prince ne fust conseillé, ou ne peust à cau- se de ses affaires nous continuer le mesme se- cours que nous receuons du pere ; comment pourrions-nous secourir sa cause & la nostre, les choses de ce Royaume & de la Chrestienté, estant en l'estat qu'elles sont ? Dauantage, ie ne puis croire que le nom & party de ladite Infante n'engendre par tout les mesmes ia- lousies & effets que fera celuy du Roy, car c'est tousiours de se donner à la maison, la grandeur & puissance de laquelle, & non cel- le de la personne du Roy, tient en crainte le reste de la Chrestienté ; à quoy ne sert de rien de dire qu'elle épousera un Prince de lan- gue François, d'autant que c'est à elle & non à son mary que ledit Roy entend que nous donnions la Couronne. Partant si elle de- doit sans enfans apres nostre élection, son droit seroit pretendu & debattu par ses plus proches. Du commencement & iusques à la

venuë de Monsieur le Duc de Feria , les Ministres dudit Roy nous ont dit ouuertement qu'il ne vouloit que ladite Infante fust mariée à vn de nos Princes , pour ne mettre la succession de tous ses Estats au hazard de tomber entre les mains d'un Prince d'une autre famille que de la sienne , comme il aduendroit , si le Prince son fils mouroit sans enfans ; de sorte que l'esperance que sous main l'on nous donne maintenant de la bailler à vn des nostres ne me peut estre que suspecte d'estre iettée & publiée entre nous plustost pour gagner nos voix en faueur de ladite Infante , que pour enuie que l'on ait de l'effectuer. En tout cas il seroit donc necessaire pour nostre seureté que ledit mariage fust accompli deuant ladite election , afin que l'on ne s'en peust dédire apres icelle , comme il seroit lors trop facile de faire sans remede , ne me pouuant persuader que ledit Roy marie iamais sa fille deuant son fils , principalement à vn Prince d'autre maison que la sienne ; mais l'on dit que si ce Royaume est conserué & possédé à part , quand ce seroit par vn Prince de la mesme maison dudit Roy , les autres Princes n'en prendront point tant de ialousie que s'il est à celuy d'Espagne. A quoy ie répons que cette raison seroit considerable si nous pouuions à present disposer de la possession , & en rendre la iouissance paisible à ladite fille & à son mary ; mais comme c'est chose impossible , & que les Grands se mement principalement par les raisons & choses presentes , & non par celles qui sont atten-

duës, lesquelles sont ordinairement incertaines, chacun d'eux craignant autant la ruine & dissipation de ce Royaume, par la continuation de la guerre, que la susdite Vnion avec celui d'Espagne : Il faut faire estat que les Princes & Potentats de la Chrestienté qui redoutant l'accroissement dudit Roy d'Espagne, & l'affoiblissement de la France, prendront pareille ialousie de l'une que de l'autre, comme ils ont fait assez paroistre depuis le commencement de nostre guerre : outre cela il faudroit enfreindre nostre loy Salique, laquelle nous a tousiours esté tres-sainte & sacrée, quelque mutation qui soit aduenüe en ce Royaume, avec lequel elle est née, & est tellement attachée & incorporée, que l'une ne peut patir sans l'autre; iamaïs aussi on n'a essayé de s'en dispenser qu'à l'instant le Royaume n'ait esté remply & accablé de calamitez, desquelles il n'a esté déliuré que quand elle a esté restaurée en sa premiere force. Et si maintenant nous la méprisons sur l'esperance d'un bien futur, faisans estat d'en recevoir en nos iours le mesme traitement, & apres qu'ils seront passez, le mesme blafme & reproche de ceux qui en ont autrefois abusé: c'est aussi vne vraye imagination d'esperer pouuoir persuader aux François que cette loy qui leur a esté si utile, & à laquelle ils doiuent, apres Dieu, la grandeur & conseruation de leur pais, est violable, estant si auant grauée en leurs cœurs, & d'eux reuerée & chérie comme elle est. Au moyen dequoy tant s'en faut que i'estime que nous en deuions fai-

re si peu de compte, que ie dis qu'il est necessaire de faire cesser les bruits qui courent de ce dessein le plus diligemment qu'il sera possible, comme tres-preiudiciable à nostre cause, & à la reputation de cette assemblée dedans & dehors le Royaume.

C'EST doncques à la personne mesme dudit Roy d'Espagne, & à la puissance de son empire que nous deuons nous lier, si d'un costé son assistance nous est si necessaire, que nous ne puissions nous en passer pour conseruer nostre Religion: & si de l'autre il ne luy plaist nous la continuer, que nous ne nous donnions à luy tout à fait, ou à ladite Infante sa fille. Or pour iuger de la necessité dudit secours, il faut discourir du bien & du mal qui nous peut aduenir de ladite Declaration: car si nous ne sommes bien certains qu'il nous en succede mieux qu'il a fait iusques à present de l'assistance que nous auons tirée dud. Roy, encores qu'elle ait esté secondee des moyens du S. Siege & desdits Ducs de Lorraine & de Sauoye, certainement nous ferions vne grande faute de nous y engager.

L'ON dit que quand nous nous ferons donnez audit Roy, il aura soin de nous comme de celuy qui luy appartiendra en propre, ou sa reputation sera entierement engagée; de sorte qu'il nous secourera à l'aduenir, non pour allumer & faire durer nos troubles, comme à l'aduanture il a fait iusques à present, mais pour les esteindre & faire cesser, & partant plus puissamment & à propos qu'il n'a fait, & que rien ne nous manquera, &

que son election fera cesser les ialoufies, diuisions & desseins priuez qui regnent entre nous : car quand nous l'aurons vne fois élu pour Roy, chacun de nous ne pensera plus qu'à le seruir comme Maistre, ainsi qu'ont accoustumé de faire les grands Princes, qui peuuent remunerer ceux qui les seruent fidelement, & punir les autres. Que cela sera cause de conseruer le Royaume en son entier, lequel autrement court fortune d'estre partagé & dissipé par la guerre, s'il ne tombe entre les mains & en la protection d'un Prince fort pour l'en garentir; toutes choses n'étans desia que trop acheminées à demembrement, qui est le plus grand mal-heur qui nous peut arriuer, lequel nous deuons à cette cause eui-ter à quelque prix que ce soit. Qu'estant ledit Roy Prince tres-équitable & grand obserua-teur de sa foy & parole, nous ne deuons point douter qu'il ne nous fasse iouir de tout ce qu'il nous aura promis en general & en parti-culier par le traité de son election, à l'exem-ple du traitement qu'il fait à ses sujets du Comté de Bourgongne, & autres lesquels il a tousiours gardez & maintenus en leurs fran-chises & libertez, suiuant leurs loix & consti-tutions : plus que ce nous sera vn grand ad-uantage d'estre appuyez de ses autres Estats, & d'oresnauant participer à la commodité d'iceux comme membres que nous serons de son Empire, & enfans de la maison qui est tres-opulante & puissante. Qu'estant Prince tres-entier & constant en la foy Catholique, il perdra plustost tous ses Estats, & mesme la

vie que de manquer d'un seul point au deuoir d'un Roy tres-Chrestien pour la deffense d'icelle, qui est tout ce que nous deuons desirer. Qu'il est aujourd'huy le seul Prince de la Chrestienté, qui a le vouloir & le pouuoir de soustenir l'Eglise de Dieu assaillie de toutes parts, & comme abandonnée des siens propres. Partant si nous ne nous appuyons de luy & ne l'embrassions, pour en l'assistant & fortifiant de toute nostre puissance nous sauuer, il ne nous demeurera en ce Royaume autre moyen que le martyre, pour opposer à la persecution qui se fera contre nous, & principalement contre les gens d'Eglise, lesquels ont desia commencé à estre traitez en leurs personnes & biens tres-indignement. Que nos loix & coustumes ne nous doiuent point estre si cheres que nostre Religion & le salut de nos ames; de façon que nous ne pouuons conseruer les deux ensemble, il vaut mieux manquer aux hommes qu'à Dieu, & en ce faisant perdre plustost les biens & la vie, & mesme le Royaume, que d'obeïr à un Prince qui a iuré la ruine de nostre Religion dès le ventre de sa mere. Que c'est un grand heur & aduantage quand il faut changer de Maistre, de tomber entre les mains d'un Prince puissant, nay & accoustumé à toutes choses grandes comme est ledit Roy; car la nomination en est ordinairement plus douce à supporter, & plus vtile & honorable; pour lesquelles raisons aucuns concluent qu'il est non seulement vtile, mais si necessaire pour conseruer nostre Religion, & ne tomber en la puissance

des ennemis d'icelle , de nous ietter entre les bras dudit Roy d'Espagne, & le reconnoistre pour Maistre par preference à tous autres Princes estrangers & domestiques; que si nous faillons à le faire nous n'en pouuons éuiter la tyrannie.

A quoy ils adjoustent estre chose que nostre saint Pere le Pape desire & nous conseille de faire, offrant y joindre son autorité & sa puissance spirituelle & temporelle. Qu'estans ces deux forces & puissances vnies en ce dessein, il n'y aura Prince, Potentat ny Republique Catholique qui ose s'y opposer, mesme du costé d'Italie, ou personne ne se peut maintenir qu'avec leur bien-veillance. Que si quelques-vns s'oublent tant que de s'en formaliser, il sera facile ausdits Princes de les ranger à la raison. Que les Princes de Germanie & les Cantons de Suisses Catholiques fauorisent aussi ce dessein; les vns comme parens & alliez dudit Roy d'Espagne, & les autres comme tres-interessez en la cause. Enfin qu'estans toutes ces Couronnes vnies sous vn seul Monarque, doié des vertus qui abondent en la personne dudit Roy, il n'y aura force ny puissance aucune qui luy resiste. Quoy aduenant, nous changerons bien-tost nostre mal-heur en vn perpetuel bon-heur à la gloire de Dieu; chose que nous ne deuons esperer par autre voye que ce soit.

A V S Q V E L L E S raisons, tres-fortes & considerables, ceux qui sont de contraire aduis opposent principalement l'impossibilité de ce dessein, disant qu'estant la Religion en



peril comme il est certain & notoire à tous qu'elle est, ce seroit vrayement pure impieté que d'y contredire, nous deffillant tous autres moyens d'y pourvoir, si nous pouuions; ou seulement auons dequoy esperer de faire ce changement heureusement: mais ils connoissoient tant de difficulté & obstacles qui rendent le succès d'iceluy impossible, qu'ils sont contrains de le reietter.

P R E M I E R E M E N T, ils ne peuvent croire que le general du Royaume, ny mesme du party, l'embrasse iamais de bon cœur, pour estre si contraire à nos loix qu'il est, comme sont les mœurs de la nation Espagnole aux nostres, & sur tout à nostre Noblesse, en laquelle consiste la force du Royaume, laquelle difficilement s'assujettira à vn Prince de maison estrangere, & mesme de nation, contre laquelle nos Rois & nous avec eux auons depuis cent ans continuellement fait la guerre, & debattu de grandeur & préeminence. Qu'il est vray qu'on doit passer par dessus toutes considerations humaines, quand il s'agit de la gloire de Dieu: mais comme nous sommes nés imbecilles & imparfaits, non seulement nous pouons errer en nos iugemens, mais aussi estre tres-difficiles de disposer & faire resoudre tout vn peuple à ce deuoir au peril euident de ce qui le concerne. Qu'il n'y a pas grande apparence que ladite élection rende nostre vnion plus parfaite, ny change les volonteiz & desseins de ceux qui pretendent faire leur profit particulier de la dissipation de l'Estat: car telles conuoitises aug-

mentent avec le temps bien plustost qu'elles ne diminuent, specialement quand elles ont pour exemple vn attentat fait aux loix publiques sous quelque pretexte que ce soit. A quoy l'autorité dudit Roy pour grande qu'elle soit, pourra difficilement remedier par force tant que le Royaume sera troublé; car quiconque refusera de s'y assujettir, n'aura faute de supposts dedans & dehors pour se maintenir. Dauantage, qui doute qu'il ne soit besoin que ledit Roy accorde & delaisse aux Grands de nostre party des aduantages extraordinaires, qui ne pouuans estre que grandement preiudiciable aux droits de la Couronne, pour les attirer & faire condescendre plus volontiers à son desir, de sorte que tant s'en faut que nous deuions faire état d'éuiter par cette élection la dissipation dudit Royaume, qu'à bon droit nous redoutons, il n'y a rien qui en effet la facilite dauantage? Car c'est la guerre plus qu'autre chose qui éguise l'appetit de ceux qui y tendent, & qui peut seul leur donner les moyens d'y paruenir, partant plus elle s'allumera & durera, plus ils auront le jeu beau pour ce faire.

Quoy! y a-il rien qui la puisse tant eschauffer & mouuoir que ladite élection, par laquelle elle deuiendra immortelle? d'une guerre de Religion nous fonderons vne guerre d'Estats. Je demanderois volontiers si le Roy d'Espagne apres que nous l'aurons élu passera en France en personne, exprés pour nous regir & fortifier de sa presence, comme ainsi soit qu'il n'y ait rien qui enflamme plus

les cœurs des François que l'œil de leurs Rois ? Abandonnera-il l'Espagne en l'âge où luy & le Prince son fils sont , pour icy l'enue-lopper , ou peut-estre s'enseuelir en nos mi-sères & en nostre confusion : ou s'il faudra que nous soyons encores apres ladite élection conduits & gouvernez par Lieutenans gene-raux , desquels l'autorité, les moyens & les deportemens seront controllez & subjets à milles trauerses & longueurs , qui détruisent les affaires , comme nous auons assez éprou-ué ? Sera-ce à vn Prince François ou à vn é-tranger que la susdite charge si importante sera commise : si c'est vn de nostre nation les estrangers ne s'y fieront qu'à demy , non plus qu'ils ont fait iusques à present , pour la crainte que tousiours ils auront qu'il veuille acquerir de la reputation & faire ses affaires à leurs despens , de façon qu'il n'aura les fon-ctions libres : comme il est nécessaire qu'ait quiconque exercera ladite charge pour bien faire : dauantage, nos autres Princes en au-ront ialousie, tant est grande & débordée l'en-uie que la licence du temps a engendrée entre nous. Et si pour remedier l'on cuide y em-ployer vn estranger , qui sera celuy de nos Chefs qui voudra supporter vn tel affront & luy ceder ? Messieurs, pensons de bonne heu-re à ces contentions , car ce ne sont pas là les moindres & plus legers inconueniens qui nai-stront de ladite élection , laquelle alterera aussi indubitablement les cœurs des officiers Royaux qui nous restent ; comme ceux qui sont plus obligez que tous autres de suivre &

deffendre les loix du Royaume ; de sorte qu'il faut faire estat que plusieurs d'eux , combien qu'ils soient tres-affectionnez à la Religion, quitteront plustost leurs Offices, que de consentir ny s'assujettir à ce changement , ce qui apportera vn grand remuëment parmy nous, scandalisera & affoiblira la cause plus qu'aucuns ne veulent croire , car à leurs exemples plusieurs autres , aux Villes & ailleurs se degousteroient de s'y embarquer : de sorte qu'au lieu d'estre fortifiez & reünis dedans nous & pour ladite élection , nous en seront plus diuisez & foibles que nous ne sommes , dont au contraire nosdits aduersaires tireront vn grand aduantage , car il ne faut point douter que cela ne lie & affermissé du tout à leur seruice les Catholiques qui les assistent de tous Estats , pour courre tous ensemble vne mesme fortune iusques à la fin de la guerre, sans plus penser qu'il y ait autre remede à nos troubles , que par la ruine des vns & des autres , ou de tous les deux partis ensemble, qui est la chose que nous deuons plus craindre & apprehender. Et s'il aduient que les habitans de nos Villes ne recoiuent de ce changement la deliurance de leurs miseres si promptement & aduantageusement qu'ils se sont promis des esperances qu'on leur a données , & que leur besoin le requiert. Quels effets deuons-nous attendre du mécontentement , ou pour mieux dire du désespoir qui en naistra parmy eux : Y a-il rien qui altere plus les peuples qu'vn tel déplaisir , quand ils en ressentent le dommage ? Si nous souffrons vne fois que

leurs calamitez surmontent & estouffent leur zele, ou qu'ils impriment de pouuoir conseruer leur Religion, & iouïr du benefice d'icelle plus commodément par quelque autre voye, que par leur perseuerance en ce dessein, qui doute qu'ils ne le changent encores plus volontiers qu'ils ne l'auront embrassé? avec quoy pourrons-nous retenir ce torrent, s'il s'ébranle? sera-ce à force de garnisons estrangeres? Messieurs, s'il en faut venir là, que deviendront les priuileges, immunitéz & libertez desdites Villes, & les autres promesses que l'on leur aura faites? comme ainsi soit que les Princes n'estiment estre obligez à l'observation de leur foy au desaduantage de leurs affaires: alors quelle fiance aurons-nous d'eux & eux de nous? comment compatirons-nous avec eux, & resisterons tous ensemble à nosdits aduersaires? Preuoyons ces choses deuant qu'elles arriuent, comme accidens infaillibles de ladite resolution, si bien-tost apres la declaration d'icelle, nos Villes ne voyent & ressentent les effets desdites promesses, car leurs afflictions commencent desia à leur estre insupportables: & si Dieu & les hommes ont permis que la guerre leur ait esté si peu fauorable iusques icy, exprés pour les attirer & ranger plus facilement au party duquel il s'agit. Prenons garde, Messieurs, qu'apres le coup ils ne se repentent d'auoir plustost suiuy leurs desirs & necessitez que leurs loix, & ad'ousté plus de foy à leur esperance qu'à l'experience, & que leurs affections & simplicité ne se changent en fureur au domnage de

de nostre Religion. Messieurs, les conquestes ne se conseruent que par force, & ne faudra point moins de temps pour surmonter cette naturelle deffiance & rigueur Espagnole, qu'il en faudra pour dompter nostre inconstance & impatience Françoisse: dont ceux qui en craignent la domination appellent à témoins les Neapolitains, Siciliens, Milanois, Portugais, Indiens & iusques aux mesmes Flamens, pour répondre aux autres qui se mirent en la douceur de ceux du costé de Bourgogne: mais ledit Roy nous assistera apres son élection si puissamment & à propos, qu'en peu de temps nous pourrons vaincre nosdits aduersaires, & apres remettre facilement toutes choses en ce Royaume en leur premier & ancien ordre, ayant deliberé pour cét effet faire vn merueilleux effort deux ans durant, dedans lequel temps il espere exécuter ce dessein; c'est ce que l'on nous dit. Mais verifions, Messieurs, si c'est chose qui soit possible, & de laquelle nous ne deuions douter aucunement: pour ce faire il seroit necessaire que ledit Roy enuoyast en ce Royaume plus de forces & d'argent qu'il n'a fait cy-deuant qu'elles y arriuaissent plus à propos, & qu'elles fussent mieux conduites, & lesdits deniers mieux employez qu'ils n'ont esté, & pareillement que nosdits aduersaires deuinssent plus foibles, & moins assistez & bien-heureux en leurs affaires, qu'ils n'ont esté iusques à present: car s'il n'aduient quelque changement en tout cela à nostre aduantage, comment esperons nous qu'il nous en prena

mieux à l'aduenir que par le passé; desia sommes nous bien certains que ledit Roy ne fera assisté & seruy d'autres Princes & Potentats, que de ceux qui se sont employez cy-deuant pour nous, c'est à sçauoir de nostre saint Pere & desdits Ducs de Lorraine & de Saouye, & encores deuons-nous douter que les deux derniers s'y prolongent si auant qu'ils ont fait, d'autant que nous ne sçauons s'ils approuueront ce dessein, parce que leurs esperances de s'agrandir en ce Royaume seront du tout retranchées; qu'ils n'ont peutestre tant d'occasion de desirer l'accroissement dudit Roy comme aucuns estiment, & qu'en tout cas leurs affaires ne sont en estat qu'ils puissent faire pour cette cause ce qu'ils ont cy-deuant fait, d'autant qu'ils ont mis & consommé tout ce qu'ils auoient de meilleur, & qu'ils n'ont faute de besongne en leurs propres païs, lesquels ils ne seront conßeillez de mettre en plus grand peril pour le bien d'autrui. Quant à la Saincteté nous n'auons point encore esté bien asseurez qu'elle approuue ce dessein, & si nous pouuons conseruer la Religion en ce païs par quelque autre moyen, par raison sadite Saincteté nous deuroit conßeiller de l'embrasser plustost que certuy-cy, quand ce ne seroit que pour entretenir la Chrestienté en repos, & pour la conseruation & autorité du saint Siege, qui depend du contre-poids de ces deux puissances, dont ses predecesseurs ont tenu & soigneusement gardé la balance & égalité tant qu'ils ont pû: toutefois quand sadite Saincteté passant par

dessus toutes ces considerations se resoudra de favoriser du tout ladite entreprise, c'est tout ce qu'elle pourra faire d'y contribuer autant qu'ont fait depuis quatre ans ceux qui l'ont deuancée: partant il faut necessairement que cette augmentation des forces & deniers, dont l'on nous donne esperance, vienne entierement dudit Roy Catholique, car mesme il ne tira point de secours de la Germanie, ny de Suisse qu'à force d'argent: Ce n'est pas aussi la coustume dudit pais d'en user autrement. Messieurs, sans doute la puissance dudit Roy est tres-grande, il possede & domine plus de pais que n'a fait aucun Prince en la Chrestienté depuis Charles le Grand. Mais comme ils sont fort separez les vns des autres, ils sont aussi sujets à plusieurs frais & accidens, ausquels il a iusques à present par sa prudence & puissance, fauorisé de la minorité de nos Rois & des troubles de ce Royaume, tres-heureusement pourueu depuis trente-cinq ans: & neantmoins si d'un costé il a adjousté à son Empire le Royaume de Portugal, avec tout ce qui en pouuoit dependre, il n'a pû toutefois recouurer l'obeïssance entiere des Estats des Pais-bas, quelque effort qu'il y ait fait par le moyen de ceux que la nature luy auoit donnez, lors qu'ils estoient paisibles, les forces de son Empire estoient en la Chrestienté & principalement en la France tres-formidable. Car c'a esté la porte par laquelle ses predecesseurs & luy ont fait plus de dommage au Royaume durant nos guerres estrangeres: c'est vn aduantage que de



Royaume de Portugal ne peutrecompenser & valoir , pour le dessein qu'il veut entreprendre en ce Royaume , à cause de son éloignement, & de la ialousie de deffiance qu'il a des Portugais, laquelle durera autant qu'eux, & leurs Castillans conserueront leurs noms. S'il est vray que ledit Roy ait retranché & mis en arriere depuis quatre ans la dépense qu'il souloit faire en ses autres païs pour les conseruer, afin de mieux entendre & pouruoir aux affaires de France , & neantmoins n'ait pû nous déliurer de nos miseres, ny bien souuent payer les gens de guerre qu'il nous a enuoyez , ny ceux que nous auons receus en nos Villes, lesquelles par faute de ce ont esté contrainsts de se débander , & commettre plusieurs excez à nos yeux ; par quel moyen deuons - nous croire qu'il nous pourra mieux pouruoir à l'aduenir ? si pour nous acquerir & nous donner occasion de nous ietter entre ses bras il n'a deu par raison épargner aucune chose, comme pour mon regard ie croy qu'il n'a fait, & neantmoins que ses moyens & sa puissance ayent esté trop foibles contre nos maux ; deuons nous esperer qu'il fasse mieux, lors que nous ne nous en pourrons plus dédire, & que par honneur & deuoir nous serons obligez à supporter ses deffauts comme les autres subjets, & courre sa fortune iusques au bout ? Messieurs , tels Princes n'ont pas accoustumé de se feindre, ny d'épargner aucune chose, quand il est question d'acquerir & adjoûter tel accroissement à leur Empire, qu'est ce Royaume , qui merite bien vn bon effort ;

de maniere que ie ne puis estre de l'adujs de ceux qui ont attribué à art, plustost qu'à faute de moyens les retardemens & deffauts de deniers dont ledit Roy nous a assistez, comme si luy & ses Ministres auoient voulu nous ranger à leur desir par necessité, plustost que par bien-faits, & partant eussent fait naistre exprés tous ces manquemens, par lesquels nous voyons que l'esperance & confiance premiere que nous auions en leur assistance & bonne volonté est grandement descheuë, ne plus ne moins que la reputation de leurs forces & conduittes au seul aduantage de nosdits aduersaires.

Messieurs, la bonté & prudence dudit Roy ne meritent qu'on luy attribué vn tel artifice, & faut necessairement plustost croire qu'il n'a esté seruy selon son desir en tout ce qui s'est passé, à l'aduanture, que l'éloignement de la personne a esté cause, autant que toute autre chose, d'autant qu'il faut perdre beaucoup de temps à l'aduertir de ce qui se passe, & receuoir ses commandemens, & que nos mouuemens en France sont ordinairement si soudains & muables, qu'il est tres-difficile de s'en preualoir si on y apporte de la longueur. I'ay souuenance d'vne réponse que i'ay souuent oüy faire dès le commencement de nos troubles à vn des plus sages Ministres dudit Roy, employé par deça en ses principaux affaires, sur ce qu'aucuns luy remonstroient, que tant qu'ils employroient leurs moyens à nous secourir petit à petit, & écharcement, comme ils faisoient, pour les ménager &

faire durer dauantage , ou peut-estre pour nous le faire trouuer meilleur , ils leurs seroient & à nous infructueux, d'autant que nostre feu vouloit estre esteint à force d'armes & d'argent , autrement il consommeroit totalement tout ce que l'on y mettroit, sçauoir est que les moyens de son Roy estoient veritablement tres-grands, mais qu'ils n'estoient infinis , & qu'il estoit necessaire qu'il les départist en diuers endroits, mesmes pour la conseruation de ses Estats , nous exhortant à cette cause d'aduiser de bonne heure à establir & dresser quelque fond de nous-mesmes pour subuenir à nos necessitez , & soulager la bourse de son maistre , sans du tout nous reposer & confier sur icelle, comme nous faisons, parce qu'à la longue elle n'y pourroit fournir ; Messieurs , l'aduertissement de ce personnage nous a esté confirmé par l'experience que nous en auons faite depuis. Car nous auons d'an en an tousiours esté secourus dudit Roy, & principalement en deniers plus estroittement, non à mon aduis par faute de bonne volonté, mais comme il est vray-semblable , parce qu'il n'y a pû fournir selon son desir ; c'est aussi vne charge tres-pesante , de laquelle suiuant le conseil du mesme auteur, nous'eussions peu trouuer les moyens de le soulager , si la fortune de la guerre nous eust esté plus fauorable; mais elle a tellement appauury nos Villes & mis chacun en arriere, qu'il n'y a celuy de nous qu'il n'ait peine seulement à viure encore bien pauurement & miserablement. Et toute fois ie dis que si nous

pouuions encore inuenter quelque expedient de pratiquer ce conseil, ie serois d'aduis qu'il en fust vsé, soit que nous nous donnions audit Roy ou non: car sans doute nous succomberons à la longue sous le faix de nos miseres, si nous ne contribuons & aidions aux dépenses qu'il conuient faire pour soustenir la guerre autrement que nous n'auons fait cy-deuant, tout l'or des Indes n'estant suffisant pour donner à viure à ceux qui en ont besoin parmy nous, & partant nous maintenir & faire voir en l'estat auquel nous sommes, qui empire tous les iours à veuë d'œil: de sorte qu'il faut que nous aduisions à faire quelque effort d'armes, par le moyen duquel nous finissions nos iours, ou entrions en la iouissance de nos heritages, & d'un commerce plus libre, & moins onereux que celuy qui nous reste, afin que chacun ait de quoy se substantier & nourrir. Car si nostre langueur est à present tres-grande & insupportable elle deviendra horrible, lors que par nostre susdite resolution nous aurons rendu nostre guerre immortelle, & aurons fermé la porte à toute esperance de paix & reconciliation entre nous autres François, à cause des rigueurs que nous exercerons les vns contre les autres.

M A I S posons le cas que ledit Roy faisant un effort extraordinaire, comme l'on dit qu'il veut faire, puisse mettre ensemble de grandes sommes de deniers. Quoy hazardera-il cy-apres ses gens au combat aussi souuent qu'il est necessaire pour vaincre nosdits aduersaires, & se rendre paisible possesseur du

Royaume ? Ses seruiteurs & Ministres luy donneront-ils ce conseil en l'âge où il est, les Pais-bas estans troublez comme ils sont, & la Chrestienté comme au guet, attendant quelque mutation en son Empire par son trespas ou autrement pour s'en preualoir: ces mesmes considerations qui augmentent avec le temps, ont-elles pas souuent empesché que les armées qu'il a cy-deuant enuoyées à nostre secours, bien qu'elles fussent tres-fortes n'ayent combattu & fait infinis beaux exploits à nostre grand regret & dommage, par lesquels s'ils continüent à estre si retenus & circonspécts, Messieurs, quand finirons nos miseres ? quand aurons-nous repris tant de Villes & Places que nosdits aduersaires occupent, lesquelles ils fortifient tous les iours de plus en plus ? sera-ce en deux ans que l'on dit que doit durer son effort, & à force de temporiser & nous faire languir qu'il aura la raison d'eux ? Ce puissant Royaume fut-il oncques conquis autrement qu'à force d'armes ? les François de ce temps estans nourris à la guerre comme ils sont, sont-ils moins courageux & magnanimes qu'ils ont esté, ou s'ils sont plus lasches & patiens qu'ils ne souloient ? Lisons en nos cœurs, nous n'y trouuerons l'ardeur ny le courage de continuer la guerre entre nous qui y estoit du commencement : mais qui en est cause, que cette langueur & suite de calamitez qui nous a plus mattez que nosdits aduersaires, avec laquelle neantmoins il faut que nous nous resoluions de compâtrir, nous donnant audit Roy d'Es-

pagne, si luy & ses Ministres ne veulent résoudre de combattre, pour avec nous vaincre ou mourir, autrement qu'ils ont fait iusques à présent.

Mais encore suis-je empesché où ledit Roy trouuera avec son argent des gens de guerre suffisamment pour executer ce dessein, car il n'en voudra dégarnir l'Espagne plus qu'elle est, puis qu'il y tient sur pied vne armée expresse pour obuier aux inconueniens qu'il craint, comme Prince tres-prudent qu'il est, qui y peuuent arriuer, spécialement apres son deceds si Dieu le permet, cependant que le Prince son fils est encore ieune. L'Italie luy en peut encore moins fournir, car non seulement elle est menacée & en doute de remuement, mais c'est bien chose certaine si les nostres durent qu'elle se troublera à bon escient & bien-tost; nous sçauons aussi en quel estat sont les affaires au Pais-bas, qui luy ont cy-deuant fourny des soldats en bon nombre: mais nos guerres depuis quatre ans en ont tant deuoré, que ses seruiteurs ont peine maintenant d'y en assembler. Et mesmes en Allemagne si c'est pour venir en France, où ils sçauent n'y auoir plus rien à gagner que des coups & de la necessité, & c'est ce qui est cause qu'il faut tant de temps comme nous voyons qu'il s'en passe à remettre sus ces armées, quand elles sont vne fois defaites. Il en pourroit tirer plus commodément des Cantons Catholiques de Suisses que d'autres endroits s'il vouloit s'en seruir: mais pour ce faire, il faudroit qu'il accordast

avec eux du payement des debtes de la Couronne, ou du moins de celles qu'auons crééz au nom de nostre party pour les seruices que nous auons receus d'eux depuis quatre ans, car i'estime qu'ils ne s'y engageront, autrement que tres-difficilement, tant pour le peu de conte que ledit Roy Catholique a fait de leur nation, & pour le soin qu'ont nosdits aduersaires d'en conseruer l'amitié : & toute fois il est certain qu'il ne faut pas remettre ensemble de petites & mauuaises forces, ie ne diray pour ruiner nosdits aduersaires, mais seulement pour élargir cette miserable ville de Paris, & luy ouurir les passages qui luy empeschent les viures, car s'ils sont puissans d'eux mesmes, ils le sont aussi d'alliez & d'amis qui les secourent promptement & volontiers, comme ceux qui sont interressez en leur cause, tant pour le respect de la Religion que pour la conseruation & seureté de leurs Estats, dont il ne se faut point douter que la ialousie dudit Roy d'Espagne n'augmente encore le nombre & l'affection : car comme nostre guerre changera de nom, ils s'y engageront plus librement qu'ils n'ont encore fait, & mesmes du costé d'Italie d'où ils seront assistez d'argent, qui est ce dont ils ont plus grand besoin : car ils ne peuuent manquer d'hommes, pourueu qu'ils ayent dequoy les payer, ayant l'Angleterre, l'Escosse, l'Allemagne & les Suisses à leur deuotion, & pareillement ceux des Estats des Pais-bas, qui font la guerre audit Roy d'Espagne, & si il faut croire qu'ils feront encore ce qu'ils

pourront pour ébranler le Turc contre ledit Roy : dauantage, ils font plus de besongne d'un escu, que les Ministres dudit Roy de quatre, tant à cause des interets du port & change de deniers que l'on fait tenir d'Espagne en Flandre, & de là en ce Royaume, où quelquesfois il se perd encore assez sur les espèces, parce qu'il y a des debtes du passé à payer à ceux qui sont employez au seruice dudit Roy, qui consomment de grandes sommes de deniers, & ne font rien qu'à force d'argent. Je suis aussi en peine comment ces grandes armées estrangeres seront cy-apres nourries en ce Royaume, principalement s'il faut qu'elles approchent de Paris, comme il est necessaire qu'elles fassent pour la dégager & conseruer; car d'oresnauant les viures seront tres-rares en ce Royaume, pource que les terres & les vignes ny sont labourées comme elles estoient, & desia qu'ès environs de ladite ville il ne s'y trouue de quoy viure, principalement pour la Cauallerie: dauantage, quand auront-ils repris par force les Villes & Places que tiennent nosdits aduersaires, seulement à l'entour de ladite ville sur les riuieres d'icelle. Nous auons éprouué souuent qu'il ne faut qu'un seul siege de place pour ruiner vne forte armée, laquelle aura cousté beaucoup d'argent & de temps à dresser; encore faut-il estre bien assuré que les munitions de guerre necessaires pour ce faire ne nous manquent, & faire estat aussi que nosdits aduersaires ne demeureront les bras croisez ny inutiles durant ce temps-là, non



plus qu'ils ont fait cy-deuant, & que s'ils ne peuuent pis faire, du moins ils attaqueront nos places quand ils verront nos armées engagées aux leurs, & peut-estre qu'ils en forceront & prendront autant que nous, de sorte que ce sera tousiours à recommencer, & ne s'ensuiura qu'une entiere & generale ruine & desolation qui ne restaurera nostre Religion, Messieurs, non plus que la continuation de cette miserable guerre, laquelle achieuera de remplir ce Royaume d'impieté, & d'affoiblir le party Catholique.

M E S S I E U R S, ces choses estans véritables comme elles sont; quel aduantage deuons-nous esperer qu'apportera à nostre Religion & à nostre patrie nostre declaration en faueur dudit Roy d'Espagne, puis qu'elle rendra nostre guerre immortelle, & plus perilleuse & douteuse pour nous que iamais; qu'elle recompense aurons-nous d'auoir violé nos loix, forcé nos volontez, & épousé pour iamais la domination d'une nation étrangere, dont les façons de viure sont du tout contraires aux nostres, leur grauité estant incompatible avec nostre naturelle franchise & promptitude; Que ne deuons-nous tenter & faire pour fuir ce naufrage qui ne nous fera moins vituperable que domageable; Sera-ce faire le deuoir de vray François, que de nous precipiter à ce gouffre calamiteux, les yeux bandez, comme aucuns nous conseillent, nous confians du tout, ainsi qu'ils disent, en la justice de nostre cause, sans dauantage auoir égard ny nous arrêter à tous

nos vices & passions qui offusquent la pureté & lumiere d'icelle : Est-ce le moyen de conseruer la Religion , que de forcer & obliger les Catholiques qui assistent nosdits aduersaires, de plustost mourir que de les abandonner, leur acquerir de nouveaux amis, & nous diuiser & partialiser entre nous plus que nous ne sommes : C'est veritablement mourir glorieusement que de finir ses iours pour deffendre sa Religion ; mais aussi c'est offenser Dieu que de s'y precipiter inconsiderement & temerairement, car il faut que l'intention soit accompagnée de charité & de raison, & qu'elle profite à l'effet qui la conduit.

IE m'estonne sur toutes choses comment ledit Roy d'Espagne affectionne tant ladite election en l'âge où il est, veu les accidens, qui en peuvent naistre au reste de la Chrestienté & à ses Estats, estant Prince doué d'une tres grande experience & sagesse comme il est, & qui a toute sa vie fait demonstration de vouloir regler ses entreprises & actions au pied de la raison & de l'equite, autant que nul autre Prince de ce siecle : car il me semble qu'il doit plustost desirer de laisser au Prince son fils la succession de ses Estats entiere & paisible, que de le surcharger d'enuie & d'une querelle hereditaire fondée sur le debat de cette Couronne, n'y ayant point d'apparence qu'il doine esperer d'en voir la fin en ses iours ; & neantmoins il faudra qu'il employe & consume infinis hommes & deniers, qui peut-estre feront faute à son fila.

apres son trépas ; car toutes mutations de Princes sont subiettes à mouuemens, & s'il aduenoit qu'ils trouuassent son Empire dégarny de forces & de moyens, ou de la bonne fortune qui l'a continuellement accompagné depuis cent ans, ils le pourroient endommager grandement. Mais comme il n'y a point de puissance en la Chrestienté qu'il doie craindre pour ce regard que celle de ce Royaume, si d'auanture il n'en deuiant le maistre suiuant son dessein, l'on se promet peut-estre qu'il se rendra si foible par la guerre, qu'il ne pourra pour lors nuire à son fils, ny à ses Estats, de sorte qu'en tout cas il ne luy peut mesaduenir de tenter ce dessein, & nourrir nos diuisions. Messieurs, il me semble que ce n'est connoistre la force de la France, ny le naturel des François, que de bastir telles esperances sur fondemens si inconstans, dont le succez pourroit reüssir tout au rebours, ne plus ne moins qu'il aduint en l'année mil cinq cens octante huit, de cette grande & formidable armée de Mer dudit Roy d'Espagne, avec laquelle il s'estoit promis d'enuahir l'Angleterre, & tout ensemble ruiner ceux qui luy font la guerre aux Païs-bas, qui ne seruit toutefois qu'à augmenter la gloire, & asseurer le regne de la Reine dudit païs, & à releuer les affaires des autres qui ont tousiours depuis prospéré au detriement de la Religion Catholique : ledit Roy n'a aucun droit en cette Couronne, & suis content de croire aussi qu'il ne s'est engagé à la poursuite que pour le respect de la Reli-

gion , & de crainte qu'il a eu que tombant entre les mains du Roy de Navarre , il ne vou-  
lust remuer l'ancienne querelle dudit Royau-  
me à son preiudice ; mais i'estime qu'il n'eust  
iamais passé si auant s'il n'en eust esté pressé  
& sollicité , voire importuné par aucuns des  
nostres , lesquels luy en ont fait la conqueste  
tres-facile , & ont esté luy en offrir & promet-  
tre la domination , comme s'ils eussent eu  
pouuoir d'en disposer. C'est pourquoy main-  
tenant que luy & ses Ministres reconnoissent  
tout le contraire , i'estime qu'il ne seroit dif-  
ficile luy persuader de s'en desister , & qu'il  
aimera toujours mieux nous conseruer pour  
ses voisins tres-obligez & amis asseurez , que  
de nous auoir pour sujets incertains & mi-  
serables aux despens de ses thresors , & au pe-  
ril de ses propres païs , lesquels comme Prin-  
ce tres-adiuisé , il n'a voulu iusques icy enga-  
ger , quoy qu'il ait fait pour nous ouuerte-  
ment en cette guerre , chose qu'il ne pourra  
éuiter à l'aduenir s'il faut qu'elle se fasse sous  
son nom : Et en tous éuenemens ie desirerois  
que nous voulussions tenter cette remonstran-  
ce en son endroit , deuant que de nous laisser  
aller à d'autres conseils ; & sur tout nous pre-  
cipiter en celuy de ladite élection qui rendra  
nostre guerre immortelle : car lors il ne fera  
plus question de la Foy & Religion , ains du  
droit de la Couronne , duquel l'on n'aura pri-  
ué seulement ledit Roy de Navarre , mais  
aussi tous les Princes de sa maison , jacoit  
qu'ils fassent profession de la Religion Ca-  
tholique : ie desirerois semblablement que

L'assemblée fust representée à nostre S. Pere le Pape par personnes dignes de ce faire , & exempts de toute autre conuoirise & passion, que de la conseruation de la Religion & du Royaume : car ie ne puis croire que sadite Saincteté ait encores bien entendu la verité de nos affaires , laquelle luy a esté souuent déguisée autant peut-estre par nous-mesmes que par d'autres , & diuerfes fois. Et comment pouuons-nous esperer la guerison de nos playes , si nous mesmes les cachons & déguisons à ceux qui y peuuent remedier , comme peut faire sadite Saincteté mieux que tout autre pour le lieu qu'elle tient en la Chrestienté , & l'interest qu'a ledit saint Siege en cette cause , & en la conseruation de ce Royaume , auquel il a tousiours trouué plus de support & d'obeïssance qu'en tous autres ; Messieurs , faisans donc ce deuoir enuers l'un & l'autre, s'il est bien receu nous en receurons le principal fruit : si au contraire on n'y veut auoir égard ; ce sera autant de descharge enuers Dieu & le monde , & de consolation en nous mesmes , qui nous soulagera en nos afflictions , & nous ouurira & nous facilitera peut-estre quelqu'autre voye , par laquelle nous pourrons nous en tirer à la gloire de Dieu , au salut de nostre patrie , & à nostre honneur & vtilité. Je sçay bien que Monsieur le Legat est icy , auquel on dira que nous pouuons adresser nos remonstrances , & pareillement à Messieurs les Ambassadeurs de sa Majesté Catholique , qui representent leurs Princes , desquels nous apprendrons leurs inten-

tions, sans enuoyer plus loin; mais ce fait est de tel poids, & importe tant à la Religion, à ce Royaume, & à nous mesmes, qu'il me semble que nous deuons laisser de faire l'offre susdit; car vne remonstrance faite par personnes interessées à viue voix, a plus d'energie: il faut aussi que le Medecin voye, oye & touche le patient en personne, & non par procureur, s'il veut bien connoistre, iuger & guarir la maladie: Ces Princes seuls nous peuuent guarir, ou pour le moins grandement aider à nous déliurer de nos maux. Doncques parlons nous-mesmes à eux en corps, & leur representons au vray, & sans nous flatter l'estat de nos affaires, pour les supplier & disposer de nous assister, non à l'appetit d'aucuns en particulier, mais comme tous ensemble nous connoissons qu'il est expedient & necessaire de faire pour le seruice de Dieu & nostre commun salut.

Et d'autant que tels voyages ne se peuuent faire qu'avec le temps, & qu'il est à craindre qu'ils soient trop tardifs pour nos maux qui nous pressent merueilleusement; voicy mon aduis, Messieurs, que ie vous supplie receuoir en bonne part, & comme procedant d'un cœur entierement voué à la Religion & à son pais: C'est que nous procurions cependant que la Conference qui a esté proposée & de vous approuuée avec les Catholiques qui assistent nosdits aduersaires, s'effectuë, parce qu'il n'en peut aduenir mal, mais au contraire beaucoup de bien, y portant vne intention vrayement Chrestienne & bandée.

au salut public. Messieurs, il est certain que c'est le plus seur moyen que nous ayons pour conseruer nostre Religion & le Royaume, que de r'allier ensemble les Catholiques d'icelle; car toutes les puissances estrangeres ne seruiron qu'à destruire l'une & l'autre, si les diuisions continuent : C'est pourquoy ie me suis grandement émerueillé & émeu quand ceux qui sont avec nosdits aduersaires nous ont conuié de parler à eux, pour aduiser aux moyens de conseruer la Religion & l'Estat. Aucuns ont dit que c'estoit crime d'y entendre, car i'auois crû auparauant, & l'auois ainsi appris de Messieurs les Legats Ministres de nos saints Peres decédez, que c'estoit ce qu'ils desiroient & affectionnoient le plus que ladite reconciliation; & de fait ils s'y estoient employez les vns apres les autres, si ç'a esté inutilement, s'ensuit-il que la chose ne soit encore bonne & ne doie estre tentée, veu que le temps nous a appris qu'elle est plus necessaire que iamais? Il faut necessairement que ceux-la aient crainct que la Conference fist naistre ouuerture, par le moyen de laquelle nous reconnoissions pouuoir mieux conseruer nostre Religion & nostre pais que pour les autres qui se sont presentées: car sans doute ils n'ont deu craindre qu'il en arriuaist aucun inconuenient à la Religion ny à l'Estat, nous rendant moins affectionnez & constans en l'un & en l'autre, & nos maux plus clairs & sensibles: où ils ont conçu vne tres-mauuaise opinion de nous en toutes façons, ce que ie m'abstiendray maintenant de vous re-

presenter, puis qu'ils l'ont depuis approuvé, si ie n'estimois estre chose indigne de considerer, par laquelle est connuë leur inclination & affection en nos affaires. Or i'adjostieray, vlsant de ma franchise accoustumée, que ie desirerois que nous fissions aussi vne cessation d'armes pour cependant arrester aucunement le cours de la guerre, qui destruit la Religion & le Royaume, & dont la continuation durant ladite Conference ne peut seruir qu'à troubler & empescher les bons effets d'icelle: aussi bien tous les grands avantages que les vns & les autres pensent recevoir du progres d'icelle, sont tres-incertains, comme chacun a éprouvé à son retour, tant aux sieges de Paris & Roüen, qu'en la retraite & dissipation des armées estrangeres venuës au secours des vns & des autres, & comme nous sommes encores à la veille d'éprouver de celle qui est sur pied en nostre faueur: car si nous attendons à preparer la voye pour sortir de nos calamitez, & que nous soyons égaux en forces & en esperances, nous perirons de part & d'autre deuant que nous y entendions, pource que ce sera tousiours à recommencer. Il ne faut pas aussi que ce soit la consideration d'une necessité pressante, ny les accidens qui nous conduisent en ladite recherche, ains le seul zele de nostre Religion, & l'amour de nostre païs: Dauantage, nous pouuons bastir ladite cessation de façon que la cause n'en empirera, ny recevra aucun preiudice, toutes choses demeurans en l'estat qu'elles sont pour le temps qu'elle durera; &



toutefois les parties ne laisseront d'en tirer quelque commodité & relasche : mais il ne faut pas esperer que nous paruenions iamais à vne resolution generale des affaires que nous ne commencions par là. C'est pourquoy ceux qui desiroient faire leur profit de l'affoiblissement de la Religion & du Royaume, y ont contredit iusques à present tant qu'ils ont pû pour nous empescher de nous reconnoistre, & ce faisant décrié le party plus vtile à la conseruation de l'un & de l'autre : peut-estre aussi craindrons-nous en ce faisant d'offenser ceux qui nous assistent, & mesmes sa Saincteté & sa Majesté Catholique, & partant qu'ils nous abandonnent deuant que nous ayons pourueu à la seureté de nostre Religion; & d'autant plus que le succez des traitez que l'on peut faire durant ladite cessation ne peut estre que tres-certain. Certainement cette raison est considerable, mais ie ne puis croire que sadite Saincteté & sadite Majesté Catholique trouuent mauuais que nous recherches les moyens de pouruoir à nos miseres, pourueu que nous ne fassions rien qui preiudicie à nostre Religion, & au party Catholique, ny à leur autorité & seruice particulier, comme il me semble que nous ne ferons si nous entretenons les choses en l'estat qu'elles sont, & leur promettons de ne toucher au principal, ny traiter d'iceluy sans leur aduis: car de tout temps semblables traitez ont esté faits, mesme avec les Infidelles, que les saints Peres ont excusé, ou pour éviter vn plus grand mal, ou paruenir à vn.

plus grand bien : en quoy i'estime que sadite Saincteté estant bien informée de nos affaires ne sera non plus difficile que ses deuanciers. Je fais pareil iugement dudit Roy Catholique, parce que ie veux croire qu'il a soin de nous, & nous assiste pour nous seruir, & non pour nous perdre: & d'autant plus que nostre perte ne peut estre qu'elle ne luy soit honteuse & dommageable, ayant entrepris comme il a fait à bannieres déployées nostre deffense. De sorte que si nous luy remōstrons que ce chemin nous peut conduire au port de salut, plustost qu'en autre, ie ne me puis persuader qu'il s'en offense, preuoyant, comme i'ay dit, à ce qui le concerne; comme certainement nous sommes tres-obligez de faire. L'on oppose encore à ce conseil deux craintes : l'une, que nos peuples estans las & recreuës de la guerre, comme ils sont, refusent si besoin est, de rentrer aux perils & miseres d'icellè, apres auoir gousté de la douceur de ladite cessation d'armes, & qu'aucuns prennent pretexte sur ce de se débander d'auec nous & dresser vne guerre à part au preiudice de la cause publique. Messieurs, ie dis que ces inconueniens ne sont tant à craindre que les mal-heurs inéuitables de la continuation de nostre guerre, fondée sur les moyens qui nous restent, & aux conditions auxquelles l'on pretend nous abstraindre : car quand nos peuples connoistront qu'il n'aura tenu à nous que nous ne les ayons déliurez de la guerre à l'honneur de Dieu, & au salut public, tant s'en faut qu'ils fuyent de rentrer en la liee

de la guerre, que i'estime qu'ils s'y ietteront avec plus de courage que iamais, meus d'une iuste indignation qu'ils auront contre ceux qui seront cause de la continuation d'icelle, contre lesquels ils combattront pour lors, comme contre ennemis irreconciliables : ce que d'avanture il sera difficile leur faire faire autrement : & quant à ceux qui se pourroient separer de nous à cause de ladite cessation, le nombre à mon advis n'en pourra estre que tres-foible, & partant y acquerir plus de honte, qu'il n'apportera de dommage à la cause. Et d'autant plus que tels remuëmens seront attribuez à pure ambition, ce qui rendra leurs actions odieuses, & leurs esperances encore plus vaines.

M A I S posons le cas que ie me trompe au iugement que ie fais des volontez desdits Princes, & specialement de celle dudit Roy d'Espagne aux fins de ladite cessation. Quoy vaut-il mieux se ietter à corps perdu au pouvoir dudit Roy que de chercher les moyens de sauver nostre Religion & le Royaume par autre voye : car, Messieurs, il faut que nous fassions l'un ou l'autre, puisque les Ministres disent qu'il retirera ses forces, & cessera de nous assister si nous ne le contentions du tout. Ce sont les termes de nostre perplexité, auxquels nos pechez & passions nous ont reduits: aurons nous plus d'honneur & de profit de nous precipiter en une guerre irreconciliable, avec les avantages que nous avons éprouvez depuis quatre ans, lesquels augmenteront avec l'âge dudit Roy, qui essaye à les

éviter par le moyen de ladite cessation ; Je sçay bien qu'il seroit à l'aduanture plus seur pour nous d'accorder dès à présent tout à fait vne bonne paix generale , que de commencer par ladite cessation , à cause de l'incertitude du succez d'icelle , & que ceux qui nous assistent ne s'offenceront gueres plus , & peutestre moins de l'une que de l'autre , d'autant que les Princes quelquesfois s'accoutument par prudence plus volontiers aux choses faites , qu'ils ne consentent aux moyens de les faire ; & qu'en tout cas nous aurions pourueu par icelle à la seurété de nostre Religion , ce qui rendroit le mécontentement de ceux qui s'en offenseroient moins perilleux pour nous. Mais , Messieurs , outre que c'est souhaitter l'impossible qu'un tel traitté soit basti en peu de iours , & sans qu'il soit sçeu & diuulgué ; partant lesdits Princes auront-ils pas toujours le mesme loisir & pretexte de troubler ladite negociation , & retirer lesdites forces à cause d'icelle , & deuant qu'elle soit concludë , comme par ladite cessation , & en ce faisant nous laisser à la mercy & discretion de nosdits aduersaires ? C'est bien chose certaine que le peril en seroit d'autant plus grand , qu'il ne nous resteroit aucun temps ny loisir de pouruoir à nos affaires comme nous aurons en faisant ladite cessation , par laquelle nous nous éclaircirons des volontez de ceux avec lesquels nous l'aurons faite deuant qu'elle soit expirée , & si nous iouïrons cependant du benefice & rafraichissement d'icelle ,

Messieurs , si nous pouons faire trouuer

bon aufdits Princes , que nous essayons de pourvoir à la conseruation de la Religion & du Royaume par autre voye , que par la continuation de la guerre , ils doiuent auoir plus agreable ce qui nous y acheminera par ladite cessation qu'autrement : car ils pourront durant icelle se descharger , s'il leur plaist , d'une partie des frais qu'ils font pour nous , & les employer utilement contre les ennemis de nostre mesme Religion qui font la guerre audit Roy en ses propres pais. Mais si c'est chose que nous deuions esperer , quoy faut-il que nous nous perdions pour les contenter ? comme ainsi soit que nous ne puissions faire que ledit Roy desire sans en courre la fortune , comme ie vous ay representé ; quel profit apporteront-ils en ce faisant à nostre Religion , & à nous mesmes ? Que deuiendra l'Eglise Catholique si nosdits aduersaires s'establisent vne fois par les armes , comme ils feront s'ils continuent à prosperer sur nous , ainsi qu'ils ont aduancé depuis les guerres , & qu'il y a apparence qu'ils feront , si nous ne changeons de chemin & conduite pour y remedier ; Les Catholiques qui les assistent empescheront-ils apres nostre ruine qu'ils ne disposent de la Religion ainsi qu'il leur plaira ? Sera-ce l'honneur , le bien & aduantage du saint Siege , mesme dudit Roy d'Espagne & de ses affaires , que ces choses aduiennent ? Blasinez-moy , si bon vous semble , d'auoir mauuaise opinion du succez de nos affaires , & si i'ay parlé peut-estre trop librement : mais prenez - vous - en premierement à ceux qui sont

sont cause des malheurs d'icelle : car pour mon regard i'aime mieux estre repris de timidité & inconsideration que de manquement de foy enuers Dieu & mon païs, & enuers vous, Messieurs, comme ie meriterois si ie ne vous representois & confessois en cette action, ce qu'en ma conscience i'estime estre vtile à nostre Religion & appartenir à nostre honneur & salut public.

IE suis encore moins d'aduis, Messieurs, que nous forcions la nature & nos loix pour vn autre Prince que pour ledit Roy d'Espagne, comme i'ay desia dit, pource que nostre guerre ne laisseroit d'estre irreconciliable, & toutefois nous aurions moins de moyen pour la soustenir; car il n'y a puissance en la Chrestienté qui soit suffisante pour ce faire si celle dudit Roy ne l'est, laquelle ne scauroit continuer entiere en faueur d'vn autre; car c'est abus d'esperer que nous l'y engagions par le moyen du mariage de l'Infante sa fille, comme aucuns se promettent, pour les raisons que i'ay dites: joint que ce seroit la marier à vne querelle perpetuelle, dont la deffense luy seroit à grande charge & dépense, & l'issue ne pourroit estre que tres-douteuse. Messieurs, ce seroit tout ce que ledit Roy pourroit faire que de l'accorder à vn Roy de France bien estably & paisible, en l'estat que sont ses affaires: ie sçay que pour tenir & conseruer l'assistance dudit Roy, nous manquant le bien dudit mariage, il faudra pour le moins luy faire part du Royaume, & en ce faisant le démembrer, quand ce ne seroit que pour as-

seurer ses deniers , & satisfaire aux pretentions de ladite Infante, chose que nous deuons craindre & éuiter sur toutes choses : car si nous souffrons vne fois que ce partage ait lieu , nous deuiendrons les plus misérables gens du monde, comme ceux qui seront sujets à la tyrannie perpetuelle de plusieurs occupants , en perpetuelle guerre & inimitié les vns contre les autres , en opprobre à tout le monde & à nos voisins, & le iouët de toutes les passions de la Chrestienté : Ce seroit aussi l'entiere ruine de nostre Royaume ; tant pour l'aduantage qu'auront nosdits aduersaires, que parce que tels vsurpateurs mettroient incessamment toutes pieces en œuure , sans distinction de Religion, pour se maintenir ou s'accroistre les vns sur les autres : car telles vsurations sont ordinairement incompatibles avec les loix , & ennemis de toutes les bonnes mœurs , principalement à leur origine que tout est licite & iuste, qui peut seruir à en conseruer la possession. Dauantage , tel démembrement seroit aussi plus desagréable & ombrageux à toute la Chrestienté que seroit l'accroissement dudit Roy d'Espagne , comme i'ay desia dit : car comme il n'y auroit plus de puissance en icelle qui fust contre-poids & résistance à la sienne , chacun seroit sujet à ses volontez , qui est la seule crainte & consideration qui meut maintenant les autres en faueur de nosdits aduersaires, lesquels par ce moyen ne seroient priuez du secours qu'ils en esperent : & neantmoins c'est la plus forte raison qui combat pour ce party ; car

Pour mon regard ie croy que difficilement il feroit cesser les partialitez qui sont entre nous , tant elles sont enracinées , par ainsi nous empirerons nostre condition.

F A V T - I L donc obeïr à vn Roy , faisant profession de Religion contraire à la nostre? Messieurs , ie n'ay encore donné ce conseil à personne , combien que i'aye conseillé & désiré la paix autant que nul autre ; i'ay aussi la conseruation de ma Religion , & le repos de ma conscience en autant de recommandation que ie dois , & ne cederay en cela à creature qui viue Si ie vous represente en homme de bien l'opinion que i'ay des partis que l'on nous propose , dois-ie pour cela estre accusé de faire banqueroute à ma Religion , & de n'en désirer la propagation? il me semble, sous correction , que c'est mal argumenter, & que ie deuerois plustost estre blâmé, si ie vous déguisois ce que i'en sens, ou si la passion me maistrisoit en ce conseil. Je vous ay protesté dès le commencement que ie ne veux estre opiniastre, & que ie cederay toujours au conseil des plus sages : ie le repete encores maintenant , & m'y oblige de bon cœur , doit-on désirer de moy autre submission ; vray est que i'entends estre combattu & vaincu de raisons, & non de passions, d'effets & non d'esperances & de promesses, car la matiere de laquelle il s'agit le requiert: ce seroit estre proditeur du seruice de Dieu & de la patrie que de se flatter à l'appetit & à l'adueu d'autrui, par art ou par ignorance en ce iugement : ja à Dieu ne plaïse que ie



m'oublie tant que cela , considerant que nos peuples , & iusques aux moindres , voire que plusieurs de ceux qui au commencement étoient si échauffez qu'ils en estoient deuenus aucugles , ont maintenant les yeux tres-ouuerts , estans deuenus sçauans à leurs dépens ; enseignez de l'experience leur maistresse ordinaire. Messieurs, ils sont si las de la guerre, & si mal edifiez des choses qui se passent, que si maintenant le Roy de Nauarre leur donnoit occasion d'esperer sa conuersion , ou dauantage, si apres quelque forme d'instruction il alloit à la Messe , peut-estre qu'ils n'attendroient le consentement de nostre saint Pere le Pape , ny celuy des Chefs de nostre party, pour le reconnoistre & poser les armes ; par où vous pouuez iuger quel hazard nous courons si nous violons nos loix, fondez sur la perseuerance , puis qu'il est au pouuoir de nos aduersaires d'apporter ce changement parmy nous quand il leur plaira : au lieu que du commencement les exemples des mutations qui sont aduenües au fait de la Religion en la Germanie, Angleterre & ailleurs, animoient nos peuples à la guerre , ils seruent maintenant à les faire craindre & apprehender : que si l'on continuë à vser de rigueur à l'endroit du Roy de Nauarre sur son instruction & reconciliation à l'Eglise , qu'ils sçauent que les Catholiques qui l'assistent ont par sa permission demandée & recherchée, il est à craindre que le desespoir ne l'emporte avec eux à iouer de son reste en cette guerre , & que le succès en soit aussi preiudiciable à nostre Religion

qu'a esté la resolution prise audit païs de se distraire du tout de l'obeïssance du saint Siege, comme ils ont fait: pour cette cause i'eusse bien desiré qu'il eust plû à sa Sainteté de recevoir & ouïr celuy que lesdits Catholiques auoient pour cét effet enuoyé deuers luy: car ie crains que le refus qu'elle en a fait, non seulement serue de pretexte à nosdits aduersaires pour couvrir leur obstination: mais aussi soit cause d'arrester & lier avec eux plus estroittement que iamais lesdits Catholiques indignez d'iceluy, l'attribuant plustost au pouuoir qu'ont à Rome ceux qui craignent la conuersion dudit Roy de Nauarre & la grandeur, qu'à toute autre consideration fondée sur la Religion, comme ceux qui connoissent & croient certainement, comme ie fais de ma part, que ladite conuersion eust apporté à ce Royaume & à toute la Chrestienté vn tres-grand repos pour la suite qu'elle eust eüe, & que si elle ne fust aduenüe par la faute dudit Roy, le party Catholique en eust aussi tiré vn grand aduantage, d'autant que plusieurs d'eux eussent estimé auoir lors iuste occasion de la quitter, comme ie pense certainement qu'ils eussent fait, car i'en reconnois infinis qui ont grand regret de la diuision des Catholiques, & de voir que leurs armes seruent à establir les autres: & s'il aduient que la guerre dure, & qu'elle succède mal pour nous, quel regret aurons-nous d'auoir perdu cette occasion de gagner lesdits Catholiques, & nous reünir tous ensemble pour nostre mutuelle conseruation? Pour mon regard

i'estime, Messieurs, quoy que nous resoluions & fassions, que nos affaires iront tousiours de mal en pis , iusques à ce que les Catholiques du Royaume soient d'accord , & bien reünis à la deffense & manutention de leur Religion, comme ils ont esté autrefois , & partant qu'il est necessaire sur toutes choses de viser & mettre peine d'attendre à ce but , autrement le party Catholique s'affoiblira tous les iours à veüe d'œil , comme il a fait depuis nostre des-vnion : pour ce faire il est du tout besoin que nous iustificions tellement nos intentions par nostre presente resolution , & nostre conduite en icelle; que ceux qui sont avec nosdits aduersaires n'ayent occasion de croire , comme ils ont fait iusques à present , que nostre guerre est plustost ambitieuse que religieuse, à quoy peut grandement seruir ladite conference, pourueu qu'elle soit faite en seureté & dilection vrayement Chrestienne, & avec telle patience qu'il conuient. Chose qui nous est tres-difficile d'executer durant la tourmente de la guerre , laquelle occupe tellement les esprits des hommes & principalement des Grands, sans lesquels on n'y peut rien aduancer , que l'on n'y vacquera qu'à demy , & comme par maniere d'acquit , si l'on ne l'a fait cesser pour quelque temps : & si c'est chose que nous ne puissions obtenir de nosdits aduersaires, lesquels iusques à present certainement s'y sont monstrez tres-mal disposez , au moins differons à prendre vne resolution qui rende les choses irreconciliables, iusques à ce que nous voyons ce qui reüssira.

de ladite conference, & que nous ayons perdu toute esperance de nous pouuoir maintenir par autre voye.

OR Monsieur, nous auons tous en cette assemblée les yeux fichez sur vous, tout ainsi que les mariniers sur leur principal pilote en vn passage tres-perilleux, duquel ils n'esperent sortir que par son industrie & experience, en laquelle ils ont toute confiance: nous desirons autant que iamais de plustost perdre les biens & la vie, que de manquer d'un seul point au deuoir de vrais Chrestiens, pour la deffence de nostre Religion: c'est le vœu que nous auons fait, dont nous ne voulons nous dédire pour chose quelconque; mais nous vous supplions ne permettre que les aucugles nous conduisent, ny que les factieux abusent en cela de nostre zele & de vostre autorité, comme plusieurs eussent desia fait si ne l'eussiez empesché, dont ils vous regardent encore d'aussi mauuais œil que iamais, quelque contenance qu'ils fassent du contraire, au lieu que les gens de bien vous en reuerent & cherissent dauantage. Monsieur, le nombre de ceux-cy est plus grand & plus puissant qu'il n'a esté, car l'experience l'a fort accru; de sorte qu'il vous sera tres-facile, vous seruant d'eux & les autorisant, de conduire la barque au port que vous iugerez avec eux estre plus salutaire: Si vous prenez ce conseil vous comblerez vous & vostre maison de benedictions, car chacun à bon droit vous donnera la gloire d'auoir aidé à conseruer la Religion & la France en son entier, & vous de-

sur le bureau, peut-estre qu'elle produira plus de fruit que nous n'esperons. Combien auons nous veu de choses succeder au contraire de l'intention de ceux qui les auoient commencées & acheminées? nous sommes en vn estat que nous ne deuons faire difficulté de traiter toutes sortes de remedes: car nous sommes comme abandonnez des Medecins, & faut considerer quel est le but d'un chacun. Je pense vous auoir écrit cy-deuant que si i'auois vn procès de grande consequence & bonne cause, ie ne m'attendrois aux poursuites & productions de ma partie pour en auoir la fin à mon contentement, parce que ce ne seroit son profit d'auancer le mien. Aussi nous en voyons peu qui soient pour se resoudre de quitter leur esperance, quand ils s'y sont laissez emporter, pour iouir d'un bien qu'ils estiment moindre, encore qu'il soit plus certain, que ceux qui ont le plus d'interest à la matiere fassent leur devoir, & Dieu leur aidera sans doute, car il est protecteur de l'equite & de verité: c'est ce que i'ay à répondre à vostre lettre derniere; i'ay eu des lettres de M. le Cardinal de Gondy par Monsieur de Bussy: mais ie remets le tout sur ce qu'il me dira, à quoy il m'a promis de satisfaire au retour de Chartres, où il est allé voir Madame sa mere. Je ne puis vous dire combien i'ay esté picqué des trauerses qu'a receuës ledit sieur Cardinal en son voyage contre les promesses que ie luy auois faites, & ce que i'auois charge de luy dire, dont m'estant plaint viuement, on s'est excusé sur l'indiscretion de ceux qui

ont fait l'offense, Dieu en fera le Juge, mais toutes dissolutions se decouriront avec le temps, aux depens de ceux qui en vsent quand elles tendent à mal.

*Ce dix-septième Mars 1566.*

---

*MANIFESTE DE MONSIEVR  
de Villeroy, sur l'evasion de l'Hoste  
son Commis 1604.*

**L**E vingt-deuxiesme du mois d'Avril, le sieur Descartes Secretaire de Monsieur de Barrault Conseiller du Roy en son Conseil d'Estat, & son Ambassadeur en Espagne, rencontra le sieur de Villeroy, estant sur des chevaux de poste, entre sa maison de Villeroy & Juvisy, ledit sieur de Villeroy estant en carrosse, l'ayant salué il le pria de le suivre jusques au lieu de Villeroy où il alloit coucher, ce qu'il fit: y estant arriué ledit sieur Descartes luy representa bien particulièrement de la part dudit sieur de Barrault ce qu'il auoit appris & decouvert en Espagne, par le moyen du sieur de Rassis, que ledit Descartes auoit amené avec luy, & laissé à Fontaine-bleau des intelligences que le ieune l'Hoste, l'un des Clercs dudit sieur de Villeroy, auoit avec les Ministres du Roy d'Espagne, auxquels il s'étoit engagé & prostitué dès le temps qu'il estoit en Espagne, seruant le Roy auprès de Monsieur de la Rochepot, avec lequel ledit

ſieur de Villeroy l'auoit mis pour apprendre la langue, & y ſeruir ſa Majeſté, leſquelles intelligences il auoit depuis entretenuës & augmentées au grand prejudice du ſeruice de ſa Majeſté. Ce que ledit ſieur Deſcartes verifia & prouua audit ſieur de Villeroy, par deux lettres écrites en Eſpagnol, de la main dudit l'Hoſte, ſous nom déguifé, que ledit ſieur de Villeroy reconnut tres-bien eſtre écrites par ledit l'Hoſte, apres meſme les auoir confrontées avec d'autres écrites par luy en meſme temps, langue, & caractere, ſous ſignées de ſon nom, que luy representa auſſi ledit Deſcartes : tellement que ledit ſieur de Villeroy iugea ledit aduis eſtre veritable, ſans plus en douter; & comme ledit ſieur Deſcartes luy propoſa qu'il eſtimoit eſtre à propos de diſſimuler & celer quelque temps ledit aduis, afin de ſurprendre ledit l'Hoſte en faute, comme il ſeroit facile de faire ne ſe deſſiant de rien, & ſes actions eſtans obſeruées de près. Ledit ſieur de Villeroy reietta cette propoſition iugeant qu'il eſtoit difficile tenir ce fait ſecret long-temps, de façon que ledit l'Hoſte n'en euſt le vent, meſmes par aduis qui luy en ſeroit donné par la voye de l'Ambaſſadeur d'Eſpagne ſur le partement du païs dudit Raſſis, & le retour à Valladolid de celui dans la boëte duquel Monſieur de Barrault auoit fait prendre les deux ſuſdites lettres qui verifioient le crime de l'Hoſte. Pour cette cauſe ledit ſieur de Villeroy le pria de retourner le iour meſme à Fontaine-bleau où il auoit laiſſé ledit Raſſis, pour luy dire qu'il

s'y rendroit le lendemain de bonne heure pour informer sa Majesté de ce fait, luy présenter ledit Rassis; & receuoir ses commandemens; ce que fit ledit Descartes.

ET le lendemain vingt-troisiesme dudit mois, le sieur de Villeroy arriua à Fontainebleau enuiron les dix heures du matin, fit entendre à sa Majesté le recit que luy auoit fait ledit Descartes, & les preuues qu'il luy auoit fait voir de la perfidie dudit l'Hoste, suppliant sa Majesté d'ouïr sur cela dès le iour mesme ledit Rassis en la presence dudit Descartes, & que ce fust en lieu secret, afin que personne n'eust connoissance de leur veuë, & principalement dudit Rassis que Descartes disoit auoir tenu enfermé & caché au logis où il estoit descendu à son arriuée audit Fontainebleau. Sa Majesté ordonna audit Descartes d'amener ledit Rassis en la gallerie de la basse-court incontinent apres son disner, & leur fit bailler vn passe par tout, afin de s'y rendre par les iardins sans passer par la basse-court ny entrer au Chasteau, pour n'estre veus & découuerts, comme ils firent.

LEDIT sieur de Villeroy estant demeuré auprès de sa Majesté iusques à ce qu'elle se mit à table entre midy & vne heure, sortant du Chasteau pour venir en la chambre de la basse-court vit arriuer au bureau de la poste qui est logée près d'icelle deux courriers vestus à l'Espagnole, avec quelques malles, incontinent il dit à Montaigne commis du sieur de la Varenne qui se trouua là, qu'il sceust quelles gens ils estoient, d'où ils venoient, & où ils alloient.



LEDIT Montaigne ayant rapporté au sieur de Villeroy qu'ils venoient d'Espagne, & que l'un d'eux estoit Flaman, de la maison de l'Ambassadeur d'Espagne, qui estoit passé pour aller trouver ledit Ambassadeur à Paris, ledit sieur de Villeroy luy commanda au nom du Roy de retenir lesdits courriers, & les enuoyer loger en quelque maison du village, & mettre un homme auprès d'eux, qui ne permist que personne parlât à eux sans sa permission; ce qu'il luy dit, & luy ordonnoit pour cause qui importoit au service du Roy, à quoy ledit Montaigne dit qu'il satisferoit.

LEDIT sieur de Villeroy estant monté en sa chambre pour dîner, ledit Montaigne luy apporta un paquet dudit sieur de Barrault avec une petite boîte carrée, dans laquelle y avoit des graines de iardins que luy enuoyoit ledit sieur de Barrault, dont il avoit chargé l'un desdits courriers, lesquels ledit Montaigne assura ledit de Villeroy avoir enuoyé loger au village, & commis auprès d'eux le jeune Pizeux fils d'un courrier qui sert il y a long-temps à la suite de la Cour.

LEDIT sieur de Villeroy fut mandé par le Roy l'aller trouver en ladite gallerie de la basse-court, n'estant encores hors de table, d'autant que sa Majesté avoit ja dîné, voulant aller à la chasse: s'y estant acheminé il trouva sa Majesté en ladite gallerie accompagné de la Reine seule, le sieur de Chasteau-vieux, Chevalier d'honneur de ladite Dame, gardant la porte, leurs Majestez ayans ja ouï le recit dudit Rassis touchant la trahison dudit

L'Hoste, la façon de laquelle il auoit sceuë, & comme il l'auoit découuerte audit sieur de Barrault, ledit Descartes estant present, ledit Raffis informa encore leurs Majestez de plusieurs autres choses tres-importantes à leur seruice, & répondit à plusieurs questions & demandes que sa Majesté luy fit, present ledit sieur de Villeroy.

S A Majesté ayant finy avec ledit Raffis & Descartes, leur commanda s'en retourner au logis par le mesme chemin qu'ils estoient venus, afin de n'estre veus & découverts de personne, & retint ledit sieur de Villeroy auprès d'elle.

C O M M E sa Majesté sortoit de ladite galerie pour prendre la botte pour aller à la chasse sur la terrasse proche la grande galerie, Desnots aussi commis dudit sieur de la Varenne n'aguères venu de Thurin, depesché vers sa Majesté par led. sieur de la Varenne, se presenta à elle estant arriué à la mesme heure de Paris, où il auoit passé sans voir sa Majesté en ce lieu pour porter sa depesche audit sieur de Villeroy, ainsi que ledit sieur de la Varenne luy auoit commandé, dont sa Majesté n'étoit contente.

L E D I T sieur de Villeroy demeura auprès de sa Majesté iusques à ce qu'elle fût montée à cheual, apres il se retira en sa chambre, & ne fut si-tost entré en son cabinet, que Monsieur l'Euesque de Chartres accompagné du Pere Cotton & des Aumosniers de sa M. qui sont en quartier y entra pour aduiser avec luy ce qu'il falloit faire le lendemain.

iour de S. George pour la ceremonie de l'Ordre de la Lartiere que sa Majesté a accoustumé de solemniser ledit iour; leur conference dura assez long-temps.

SI-TOST qu'ils furent fortis d'avec luy ledit sieur Descartes y entra, qui dit audit sieur de Villeroy que ledit l'Hoste estoit arriué de Paris avec ledit Desnots, dequoy il n'auoit encore rien sceu, qu'il estoit venu en poste, & que par malheur il l'auoit rencontré retournant avec ledit Rassis de la gallerie où ils auoient parlé au Roy, en leur logis; qu'apperceuant ledit l'Hoste à cent pas de luy, il auoit dit audit Rassis qu'il fît semblant de prendre congé de luy, & qu'il se retirast dans la porte d'un logis, auprès duquel ils estoient, ce qu'auoit fait ledit Rassis le plus subtilement qu'il peût, & qu'il estoit allé accoster & saluer ledit l'Hoste qu'il auoit trouué étonné, qu'il luy auoit baillé des lettres de Monsieur de Barrault & autres qu'il auoit pour luy avec quelques gants qu'il auoit apportez d'Espagne, & auoit mis peine de l'entretenir mais qu'il auoit l'esprit émeu & trouuillé, & que ledit l'Hoste luy auoit dit auoir sceu qu'il estoit arriué deux courriers d'Espagne; demandant audit Descartes s'il les auoit veus, & comme ledit Descartes luy dit que celuy qu'il auoit pû voir vestu à l'Espagnole, qui s'estoit separé de luy & estoit entré audit logis, en pouuoit estre l'un: ledit l'Hoste continua à faire contenance d'homme qui estoit en peine, neantmoins que ledit Descartes l'auoit entretenu le mieux qu'il auoit

pû sans l'abandonner ; qu'estans entrez en la basse-court & venus iusques auprès du logis dudit sieur de Villeroy l'Hoste l'apperceuant venir du Chasteau , il auoit dit audit Descartes qu'il ne vouloit pas qu'il les vist les bottes aux iambes, & qu'il s'alloit débotter, que ledit Descartes luy auoit fait compagnie iusques hors la basse-court , qu'estant auprès du logis dudit sieur Euesque de Chartres , ils auoient rencontré vn des gens dudit Euesque parent dudit l'Hoste , qui les auoit accostez. Que ledit l'Hoste luy auoit dit qu'il n'auoit mangé depuis estre party de Paris , & qu'il vouloit aller en vn cabaret pour trouuer à disner , que ledit Descartes s'estoit offert de l'y accompagner ; qu'enfin au lieu d'aller au cabaret , il estoit retourné tout court en la basse-court du Chasteau & estoit entré en la cuisine dudit sieur de Villeroy pour y demander à manger , que ledit Descartes le voyant là estoit monté en la chambre dudit sieur de Villeroy pour l'en aduertir ; mais dautant que ledit sieur Euesque de Chartres & lesdits Aumosniers estoient avec luy il n'auroit osé s'ingerer d'y entrer plustost.

**L E D I T** sieur de Villeroy entendant ce que dessus partit aussi-tost de son cabinet pour aller faire prendre ledit l'Hoste , s'en alla au logis du Roy , prit le sieur de Lomenie avec luy pour l'assister en ce qui se passeroit, & enuoya chercher le Lieutenant du grand Preuost : cependant il commanda à du Noyer qui le seruoit de Maistre d'Hostel d'aller chercher ledit l'Hoste , & demeurer auprès de luy

luy & ne le laisser ny abandonner qu'il ne l'eust enuoyé querir, sans luy dire la cause pour laquelle il luy faisoit tel commandement, de laquelle aussi ledit sieur de Villeroy n'auoit encores fait part ny donner aduis à aucun de ses domestiques. Du Brocq l'un des Lieutenans du grand Preuost estant arriué en la gallerie qui est près la chambre du Roy, ledit sieur de Villeroy present; ledit sieur de Lomenie luy dit de la part du Roy qu'il allast prendre prisonnier ledit l'Hoste au logis dudit sieur de Villeroy où il estimoit qu'il estoit: ledit Brocq ayant répondu qu'il ne connoissoit point ledit sieur de Villeroy, luy dit qu'il allast se promener en la basse-court du Chasteau, & qu'il arrestast celuy qui y passeroit, & seroit accompagné d'un de ses laquais, par lequel il l'alloit enuoyer querir, ainsi qu'il fit à l'heure mesme, disant audit laquais qu'il trouueroit ledit du Noyer avec ledit l'Hoste, & qu'il l'amenaist avec luy.

Sur cela lefdits sieurs de Villeroy & de Lomenie passerent en la grande gallerie pour voir faire cette capture des fenestres d'icelle: mais ledit sieur de Villeroy voyant que ledit laquais tardoit trop à venir, & que ledit du Noyer estoit passé seul par ladite court sans ledit l'Hoste, ledit sieur de Villeroy soupçonna incontinent ce qui estoit aduenu, à sçauoir que ledit l'Hoste s'en estoit foy d'effroy.

Ce qui fut verifié incontinent apres par ledit du Noyer, lequel ne le trouuant audit cabaret ny ailleurs, s'aduisa d'aller au logis du sieur de Fleury pour voir s'il y estoit enco-

res : là il apprit qu'il auoit retiré son cheual, mais il ne l'y trouua point, ains seulement un garçon qui auoit accoustumé de le penser, qui luy dit qu'il l'estoit venu prendre fort à l'haſte, & qu'il s'en eſtoit allé ſans auoir dit où il alloit ; ce qui fut rapporté audit ſieur de Villeroy par ledit du Noyer, eſtant encore en ladite gallerie avec ledit ſieur de Lomenie, & à l'inſtant il depeſcha des Courriers & lettres de toutes parts, & ſur tous les chemins que pouuoit tenir ledit l'Hoſte pour le pouoir rencontrer & arreſter, ainſi qu'il eſt aduenu du coſté de Meaux. Il s'enquit auſſi au meſme inſtant comment ledit l'Hoſte auoit pû auoir aduis de la deliberation qu'on auoit faite de le prendre, & verifia que cela eſtoit procedé de celuy que luy auoit donné ledit Montaigne commis de la poſte, à ſon arriuée & deſcente au bureau, que leſdits deux courriers qui eſtoient venus d'Eſpagne l'auoient demandé & deſiroient parler à luy, leſquels il alla trouuer & parla à eux deuant que d'entrer au logis dudit ſieur de Villeroy, & eſt à preſumer qu'il fut aduertý par eux de la venue dudit Raſſis avec ledit Deſcartes, & par tant qu'il priſt garde à luy ; leſdits courriers eſtans partis d'Eſpagne quelques iours apres leſdits Raſſis & Deſcartes, en quoy il fut confirmé par la rencontre inopinée qu'il fit de l'un & de l'autre, ainſi qu'il eſt dit cy-deuant.

Et d'autant que l'on a ſceu par les depoſitions de ceux qui ont eſté interrogez depuis ſur ce fait par le ſieur de Miraumont, Lieutenant du grand Preuoſt, ce qui en a eſté ap-

pris d'ailleurs, & par le procez verbal du  
Preuost des Mareschaux de Meaux, ce qui est  
aduenu en la poursuite, & quand son corps a  
esté trouué en la riuere de Marne près du  
bac à Fay, où il fut atteint par ledit Preuost,  
dont ne sera fait mention par le present Me-  
moire qui a esté fait par le sieur de Villeroy,  
seulement pour représenter au vray ce qui  
s'est passé en l'evasion & fuite de Fontaine-  
bleau dudit l'Hoste, dont il a eu connoissance.

*Fait à Fontaine-bleau le troisiéme iour  
de May mil six cens quatre.*

*Signé, DE NEUF-VILLE.*

ANT  
1317603







Page 10

8151

B. 40.

XVII  
B A \*